

DE PROMVLGANDO
EVANGELIO

APVD BARBAROS:

SIVE

DE PROCVRANDA

Indorum salute, Libri sex.

*Authore IOSEPHO ACOSTA Presbytero
Societatis IESV.*

EDITIO NOVISSIMA.



LVGDVNI,

Sumptibus LAVRENTII ANISSON.

M. DC. LXX.

SVPERIORVM PERMISSV.

DE PROCVANDIS
RVAINGELIO

APVD BARBAROS

DE FINIS

DE PROCVANDIS

Indonitio, libri sex

London: Iohannis A. Coopers & Co.
1754.

EDITIO NOVISSIMA



2.1621

PROCVANDIS

DE FINIS
PROCVANDIS



PROOEMIUM.



E procuranda salute Indorum, rectè atque aptè dicere, perdifficile est. Primum quòd Barbarorum gentes innumerabiles sint, ut cælo, locis, habitu, ita ingenio, moribus, institutis latissimè dissidentes: quibus omnibus Euangelio conciliandis, instituendis, regendisque aliquid commune præcipere, atque in tanto hominum rerumque discrimine, accommodatè ac certò quid expediat definire, magnæ cuiusdam facultatis est, quam profecto nos minimè consecuti sumus. Deinde res Indicæ vix firmæ stabilisque consistunt, & novum quotidie suique dissimilem habitum præseferunt, ut improbandum modo sit quod non ita pridem valdè probabatur, & rebus mutatis utilia ante consilia etiam perniciosa fiant. Quamobrem ut firma ac perpetua præcepta ea de re tradantur, vix fieri profectò potest. Ut enim alia pueritiæ alia iuventuti vestis concinnanda est, neque potest eadem omnis ætatis esse mensura, ita Rempublicam Indicam institutis, religione, homi-

num genere varias veluti ætates subinde commutante , non est mirandum , si doctrinæ artifices alias atque alias docendi rationes adhibeant. Ita quamvis priores scriptores pietate & sapientia præstiterint , tamen eorum vel disputationes , vel commentarios , quos de rebus Indicis ediderunt , nostra iam ætas non magni facit , quod non magnopere rebus præsentibus accommodentur. Ex quo fit , vt eos quoque , qui pro hoc statu rerum aptè congruentérque differuerint , eodem loco futuros non longa abhinc ætate , profecto diuinare possimus. Ac nos certè rerum Indicarum imperitis , falsa fortassis & inter sese pignantia scribere sæpè videbimur , quod de Indorum natura , moribus , fidei Christianæ progressu , variè variis in locis loquamur : contra periti rerum , minus amplè & pro dignitate eadem illa dicta censebunt , atque plura ipsi & aptiora se afferre posse confident. Mihi verò quid vel docti desiderent , vel indocti reprehendant , non admodum curæ est. Illud prudentissimus quisque facilè intelligit , eadem de re non eodem modo omni ex parte dicendum esse , si veritati ac non libidini obsequendum est. Neque fallit is , qui in argumento multiplici pro rebus diuersis diuersa pronuntiat. Idem prorsus homo sui sæpè dissimilis est , eadem vrbs , & domus eadem variis locis & laudari & vituperari non falsò potest. Licuit

certè Apostolo Paulo in eadem Epistola Corinthios summis ornare laudibus , spirituales,
sapientes,

sapientes , quibus nihil deesset in omni gra-
 tia & dono dicere : eosdem ita deprimere , vt
 carnales esse inflatos , spiritualibus rebus ine-
 ptos exprobraret. Neque sibi contrarius est,
 aut sui immemor : sed quæ per partes inerant,
 potuit salua veritate , vt Chrysostomus com-
 mentatur , vniuersis ascribere. Israëllem , &
 Iudam iidem Prophetæ sæpè vituperant , se-
 men nequam , filios sceleratos , populum Go-
 morphæ , & id genus infinita conuitia iactan-
 tes : quem tamen vel eadem interdum pagi-
 na , summis laudibus euehunt , populum iu-
 stum , filios Dei , hæreditatem dilectam , gen-
 tem sanctam atque alia multa honoris causa
 appellantes. Imò verò eadem periodo Paulus,
 secundum Euangelium quidem , inquit , ini-
 mici propter vos , secundum electionem au-
 tem , charissimi propter patres. Quo magis no-
 bis salua veritate licere putandum est gentes
 Indorum , quarum est tanta diuersitas , modo
 Euangelio aptissimas prædicare , vt verè sunt
 maxima ex parte , modo valdè alienas accu-
 sare , quod hominum scelere , & peruersa edu-
 catione contingit. Vulgaris error est res In-
 dicas tanquam rus aliquod aut oppidum an-
 gustè definientium , & sicut vno verbo dicun-
 tur , ita vnius esse naturæ rationisque putan-
 tium. Sed qui hæc nostra legerit , inueniet pro-
 fecto nos nullo partium studio ductos & pro-
 ba , & praua depromere , & iucunda & tri-
 stitia æquè afferre. Nihil enim teste Domino
 Iesu aliud optamus , atque agimus , quam vt

1. Cor. 5.
 5.

Chrys.
 hom. 2. in
 1. Cor.
 Isai. 11.

Isai. 6.
 51.

Rom. 11.

Rom. 3.

pro comperta nobis rerum fide, quicquid est, ut est, aliis tradamus; quippe qui sciamus Deum nequaquam nostro egere mendacio. Neque vero gentes has vana, aut falsa concepta opinione rectè adiri & quæri ad salutem. Sed tum demum unicuique constare animum, cum quale & quam magnum opus Domini aggrediatur, non inani rumore ductus, sed firmo divinæ vocationis consilio nitens, secum prudenter expenderit.

Quamvis autem Indorum nationes innumera-
rabiles sint, quarum singulis sui certi ritus &
mores sunt, quas alio atque alio modo insti-
tuere oporteat, tamen cum id ego præstare
non possem, cui plurimæ gentes ignotæ sunt,
& ut maximè essent cognitæ, immensum opus
existeret sigillatim de omnibus disputare, ope-
ræpretium duxi, ut Barbaris omnibus accom-
modatius scriberem, Peruensium maximè ha-
bere rationem. Idque feci duabus ex causis, vna
quòd hæ Prouinciæ mihi notiores essent, ut
aliquid certius afferrem: altera quòd hoc In-
dorum genus veluti medium mihi inter cæ-
tera semper est visum, ex quo facilius veluti
extrema iudicari queant. Etsi enim Indi vo-
cantur Barbari omnes, quos nostra ætate His-
pani & Lusitani suis classibus longissimo Ocea-
no traiecto inuenerunt, non solum ab Euange-
lica luce alieni, sed ab humanis quoque insti-
tutis abhorrentes, tamen non omnes eiusdem
ordinis sunt, sed Indus Indo, ut Comicè di-
cam, multum interest, Barbarus Barbaro longè
præstat.

præstat. Barbaros autem probati auctores eos
esse definiunt, qui à recta ratione & hominum
communi consuetudine abhorrent. Vnde Bar-
barica stoliditas, Barbarica feritas, Barbaricæ
quoque opes & opera apud nobiliores scripto-
res celebrari solent, quæ & ab usu hominum
cæterorum valdè recedunt, & sapientiæ certæ-
que rationis vix quicquam habent. Hos autem
omnes noui orbis Barbaros, inde Indos appel-
latos existimo, quòd apud veteres remotissima
regio, quæ fines orbis terrarum claudere pu-
taretur India esset, quo Alexandrum Macedo-
nem, & Traianum Cæsarem penetrasse, & sacri
& profani scriptores tanquam terminos terræ
adierint, cum magna laude commemorant. Ex
quorum imitatione nostri nomen ad nouas à se
inuentas gentes, deriuasse mihi videntur. Quan-
quam initio non Indi, sed Insulani aut Anti-
liani, Occidentales Barbari dicebantur. Cùm
igitur horum Prouinciæ, nationes, genera plu-
rima sint, tamen mihi diu rem diligenter per-
uestiganti tres veluti classes esse Barbarorum vi-
dentur, quæ magnopere inter se discrepent, ad quas
ferè nationes hæ Indicæ redigi possint.

Prima classis eorum est, qui à recta ratione,
& consuetudine generis humani non ita multum
recedunt. Hi sunt potissimum, quibus & Res-
publica constans, & leges publicæ, & ciui-
tates munitæ, & magistratus insignis, & cer-
ta, atque opulenta commercia sunt, & quod
omnium caput est, literarum celebris usus. Nus-
quam enim literarum, & librorum monumenta

*D. Thom.
in ep. ad
Rom. c. 1.
lect. 5. &
1. Cor. 14.
lect. 2.*

1. Mac. 1.

extant, quin eæ gentes humaniores, & maximè
politicae sint. In hoc genere primi videntur esse
Sinenſes, quorum ego characteres vidi Syriacis
perſimiles, qui librorum copia, Academiarum
ſplendore, legum, & Magistratuum auctori-
tate, publicorum operum magnificentia pluri-
mum florere dicuntur. Secundum hos ſunt Iap-
ponenſes, tum pleræque Indiæ Orientalis Pro-
uinciæ, ad quas Aſiatica, atque Europæa inſti-
tuta olim perueniſſe ego non dubito. Hæ gen-
tes, quamvis Barbaræ re vera ſint, & à recta
& naturali lege plerique in rebus discrepent; ta-
men ad ſalutem Euangelij non aliter ferè vocan-
dæ ſunt, quam olim ab Apoſtolis Græci, & Ro-
mani, cæterique Aſiæ, atque Europæ populi.
Nam & potentia præſtant & nonnulla humana
ſapientia, atque à ſua ipſi ratione potiffimum,
Deo intus agente, vincendi ſunt, & Euangelio
ſubigendi, quos ſi per vim & potentiam Chri-
ſto ſubiicere pergas, nihil aliud agas, quam vt
à lege Chriſtiana alieniſſimos reddas. In ſecun-
da ego claſſe eos Barbaros numero, qui quam-
vis neque literarum uſum noriunt, neque leges
ſcriptas, neque Philoſophica, aut ciuilia ſtu-
dia habeant; tamen Magiſtratus ſuos certos, ha-
bent Rempublicam, habent frequentes, & cer-
tas ſedes, ubi politiam ſuam ſeruant, habent
militiæ & duces & ordinem, & religionis ſuæ
celebritatem quandam. Denique ratione qua-
dam humana reguntur. In hoc genere erant Me-
xicani, & Peruenſes noſtri, quorum imperia
& Reſpubl. & leges, & inſtituta merito admirari
quiuſ

quivis possit. Et quod incredibile penè videatur,
literarum inopiam, tanta ingenij dexteritate sup-
pleuere, vt & historias & vitas, & leges, & quod
est amplius, temporum cursus, & rationes nume-
rorum ita teneant quibusdam à se excogitatis si-
gnis, & monimentis, quos ipsi Quipos vocant, vt
nostri cum literis suis plerumque eorum peritiæ
cedant. Nescio equidem an certiores Arithme-
ticos, cum quidvis est numerandum, aut partien-
dum, literæ nostræ faciant, quam hos signa illa
sua. Memoriam verò omninò est admirabile,
quam fidelem etiam rerum munitissimarum per
Quipos suos diutissimè conseruent. Multum ta-
men etiam hi & à recta ratione, & à consuetudi-
ne generis humani absunt. Hæc autem classis latè
patet, & primum imperia continet, quale Ingarum
fuit, deinde regna minora & principatus, quales
Caciqui plerique habent, tum Magistratus publi-
cos ab ipsa Republ. creatos, quales Araucani,
Tucapelenses, cæterique Chilenses ferè sunt. His
omnibus illud commune est, vt oppidatim viuant,
ac non palantes more ferarum, vt certum iudicem
præfectumque habeant, & iura sua cuique seruen-
tur. Sed quia morum & rituum & legum monstra
tot tantæque apud hosce sunt, & tanta in subditos
sæuiendi licentia, vt nisi potentia superiore &
auctoritate regantur, vix aut Euangelij lucem aut
homine ingenuo vitam dignam accepturi videan-
tur, aut si semel acceperint, non facilè in ea perse-
ueraturi intelligantur, meritò his præfici, qui inter
tales ad vitam Christianam transierint, Christianos
Principes & Magistratus, cum res ipsa depo-
scit,

scit, tum Ecclesiæ auctoritas præcipit : sed ita tamen vt facultatibus fortunisque suis & legibus non naturæ , aut Euangelio contrariis vti liberè permittendi sint. Iam verò tertia atque extrema classis Barbarorum, quot hominum nationes, quot huius noui orbis regiones teneat, dici non potest. In hac sunt homines syluestres, feris similes, vix quicquam humani sensus habentes, sine lege, sine rege, sine fœdere, sine certo Magistratu, & Republica, sedes identidem commutantes, aut ita fixas habentes, vt magis ferarum specus, aut pecudum caulas imitentur. Huc in primis pertinent, quicunque à nostris Carybes dicuntur, nihil aliud quam sanguinolentiam exercentes, in hospites omnes sæui, qui humana carne vescuntur, nulla veste, vix ipsa virilia tegentes. Hoc Barbarorum genus Aristoteles attigit, cum ferarum more capi & per vim domari posse scripsit., quorum in nouo orbe sunt infiniti greges. Tales Chunchos, Chiriguanas, Moxos, Iscaycingas nobis vicinos nouimus, tales plerosque Brasilienses, tales Floridæ prope modum vniuersæ populos narrant. Pertinent etiam ad hanc classem ij Barbari, qui etsi atroces non sunt, neque tygrides, aut pantheræ, tamen à pecudibus parum distant, nudi & ipsi, timidi, fœdissimæ Veneri, aut etiam Adonidi, vulgò dediti. Quales esse ferunt, quos nostri Moscas vocant, in nouo regno, quale Carthaginis omnisque eius oræ promiscuum vulgus, & qui per magnos Paraguay fluuij maximi campos incolunt, tum etiam plurimæ gentes, quæ infinitum vtriusque Oceani medium tenent, nondum nobis satis exploratæ, sed fama

*Arist. 1.
& 5. Politic.
lib.*

fama certæ. In Orientali quoque India Insulares permulti eius generis esse videntur, vt Maluquiani. Huc etiam spectat aliud Barbarorum genus mansuetum, sed sensu valdè exiguo, qui nonnihil superiores excellere videntur, quandam Reipub. imaginem præferentes, sed nugarum persimiles & leges, & cultus gerentes: cuiusmodi esse feruntur, qui apud Insulas Salomonias dictas innumerabiles habitant, & maximæ continenti hæere dicuntur. Hos omnes homines, aut vix homines, humana docere oportet, vt homines esse discant, tum puerorum more instituere, & si quidem blanditiis sponte ad meliora ducantur, bene: sin minus deferendi non sunt, sed si aduersus salutem suam proteruiant, & in Magistros medicosque suos insaniant, per potentiam & honestam vim quandam ne Euangelium impedian, coërcendi sunt, & in officio continendi, quos de syluis transferri ad vrbes, & humanam vitam, & quodammodo inuitos ad Regnum introire compellere expediet. Neque enim de omnibus Indorum gentibus eodem modo pronuntiare oportet, nisi grauiter errare malimus. Neque verò aut cupiditatem & tyrannidem magistræ adhibere Euangelij, aut quod æquè noxium est, otiosam, imperitorum quorundam Philosophiam certæ & exploratæ rerum ipsarum fidei & experientiæ anteferre. Mihi cum in has vastissimi orbis terrarum gentes tot sæculis ante ignotas oculos conuerto, nihil aliud magis dicere libet, quàm illud: Secundum altitudinem tuam multiplicasti filios hominum. Verè enim altissimi & nobis penitus inscrutabilis con-

Luc. 14.
Psal. 11.

glij

filij fuit, vt tot gentes multiplicarentur, quibus
esset tandiu salutis ignota via. Quas tamen nostro
Ephes. 3. saeculo, quod alijs generationibus non est agni-
tum, ad Euangelium vocare dignatur Dominus, &
concorporales facere; & comparticipes mysterij
Christi: idque eo ordine & modo, ita aliud agen-
tibus nostris hominibus; vt altitudinem diuini
consilij humana mens penitus reformidet. Ho-
rum igitur omnium salutem procurandam & sen-
timus, & dicimus Christo duce: ac pro nostra ino-
pia aliquid afferre tentamus; quo ministri Euan-
gelij iuuari queant. Et res quidem ipsa difficilis,
noua varia existit: vires autem nostræ perquam
Matt. 23. exiguæ. Qui autem dicere dilucidè potest, & quæ
docuerit, animo persuadere, ille certè est, qui vnus
Sap. 7. est Magister omnium, idem sapientiæ dux, & sa-
pientium emendator, in cuius manu sumus & nos
& sermones nostri, ipsi honor & gloria, & nunc
& in diem æternitatis. Amen.



INDEX LIBRORVM, ET CAPITVM.

LIBER PRIMVS.

Quòd Prædicatio Euangelij apud Barba-
ros , etsi difficilis , tamen & necessaria,
& fructu plena existat. p. 1

CAP. I. **Q**uod non sit desperanda salus Indo-
rum. p. 1

II. Cur videatur multis difficilis & parum uti-
lis prædicatio apud Indos. 6

III. Quod difficultas prædicationis non debeat
terrere Christi seruos , & qua ratione
sint animandi. 12

IV. De eadem re. 17

V. Quod gentes Indorum quantumvis Barba-
ra, auxilio tamen gratie ad salutem de-
stituta non sint. 23

VI. Quod Indos Deus iam vocet ad Euange-
lium. 29

VII. Quomodo Indorum ingenia tractanda sunt,
ut Christo lucrifiant. 35

VIII. Barbarorum ineptitudinem non tam à na-
tura, quam ab educatione & consuetudi-
ne proficisci. 42

IX. Quod

Index Librorum

- IX. *Quod lingua difficultas non detertere debeat
ab Euangelij propagatione.* 45
- X. *De habitatione inter Indos.* 48
- XI. *Quod Euangelij Ministri curare debeant,
ne impedimentum Euangelio ponant.* 51
- XII. *De castitate & abnegatione necessaria ad
euangelizandum.* 55
- XIII. *Quantum officiat Fidei violentia.* 58
- XIV. *Qualis in religione Christiana magna ex
parte sit natio Indorum.* 60
- XV. *Nihilominus vera fidei ac salutis apud In-
dos spem esse magnam, alienumque esse à
Dei spiritu contra sentire.* 61
- XVI. *Quod etiam in presentia labore ministro-
rum fructus animarum sit longè maior.* 65
- XVII. *Patientia & labore effici ut copiosi fructus
ex hoc agro Dominico colligantur.* 70
- XVIII. *Quod non solum futuri fructus spes sit, sed
presentis etiam satis magni certa docu-
menta teneantur.* 76

LIBER II.

Quibus modis Prædicatio Euangelij apud
Barbaros aggredienda sit.

- CAP. I. **D**ifficile esse rationem tradere prædi-
candi Barbaris Euangelium. 82
- II. *Propter infidelitatem etiam pertinacem non
licere Barbaros debellare.* 85
- III. *Quod quibusdam visum sit propter crimina
naturæ contraria licere nostris Barbaros
debellare.*

& Capitulum.

	<i>debellare.</i>	89
IV.	<i>Confutatio superioris sententia.</i>	94
V.	<i>Responsio ad obiectiones pro expugnatione Barbarorum.</i>	99
VI.	<i>De bello propter defensionem innocentium qui à Barbaris trucidantur.</i>	105
VII.	<i>Quod omnia tam dicta de bello aduersus Indos non solum diuina, sed etiam regia lege firmentur.</i>	108
VIII.	<i>Veterem & Apostolicam euangelizandi rationem non posse exactè seruari inter Barbaros.</i>	110
IX.	<i>Cur miracula in conuersione gentium non sunt nunc ut olim à Christi predicatoribus.</i>	115
X.	<i>Quod etiam exiguo merito predicatorum, signorum parcitas aliqua ex parte attribuenda sit.</i>	121
XI.	<i>De predicatione inter eos qui fidem iam receperunt.</i>	124
XII.	<i>De expeditionibus necessariis ad predican- dum Barbaris Euangelium.</i>	128
XIII.	<i>Quo iure Christiani expeditiones facere possint in regna Barbarorum.</i>	130
XIV.	<i>Quid in terris Barbarorum Christianis liceat.</i>	134
XV.	<i>Quando liceat Barbaris infidelibus bellum inferre.</i>	136
XVI.	<i>De officio predicatoris Euangelici erga socios itineris.</i>	137
XVII.	<i>Qualem se prestare debeat Christi seruus in conuersione infidelium.</i>	141
XVIII.	<i>De tribus impedimentis qua conuersioni gentium</i>	

	<i>gentium maxime obstant.</i>	145
XIX.	<i>Epilogus dictorum.</i>	149

LIBER III.

De ciuili administratione Indorum saluti necessaria.

CAP. I.	N on esse questiones omnes tractandas ac deinceps de ciuili administra- tione differendum.	151
II.	Barbaros fidem suscipientes ad curam di- tione inque Principum Christianorum per- tinere.	153
III.	Non oportere falsos titulos contumisci do- minationis Indorum.	159
IV.	Quales administratores res Indica postu- lent.	161
V.	Quam ob causam difficile inueniantur ido- nei rebus Indicis praefecti.	167
VI.	Non esse iniquum tributa Indos pendere ad- ministratores suis.	172
VII.	Improbantur tria genera tributa taxandi.	174
VIII.	Vulgaris ratio tributa imperandi expen- ditur.	179
IX.	An propter reuocandos ab otio Barbaros tributa grauiora imperanda sint.	181
X.	Quis modus in tributis taxandis tenendus.	185
XI.	Causa ob quas Hispanis Indi commendandi sunt.	189
	XII. Quod	

& Capirum.

- XII.** *Quod doctrinam fidei & moribus sufficientem patroni Indis susceptis prabere teneantur.* 195
- XIII.** *Quid erga nondum baptizatos Indos patronis liceat.* 200
- XIV.** *De temporali providentia patronorum in suos.* 204
- XV.** *Quam circumspecte onerosæ leges fortunæ Indorum indicendæ.* 205
- XVI.** *Quid in confessionibus patronorum audiendis Sacerdoti providendum.* 208
- XVII.** *De servitio personali Indorum.* 212
- XVIII.** *De metallorum operatione.* 222
- XIX.** *Quibus modis salus Indorum per seculares ministros procurari possit.* 227
- XX.** *De ebrietatis malo Barbaris familiari.* 230
- XXI.** *Quæ mala ex ebrietate oriuntur.* 234
- XXII.** *Quibus modis ab ebrietate Indi compesci queant.* 240
- XXIII.** *De pratoribus Indorum.* 247
- XXIV.** *Mores Indorum Christo non repugnantes permittendos esse & de concordia pratoris cum Sacerdote.* 251
-

LIBER IV.

Qualem oporteat esse Ministrum salutis Indorum, quibus præfidiis hanc prosequi debeat.

CAP. I. **D**E excellentia Sacerdotalis officij.

255

ē

II. Inter

Index Librorum

- II. *Inter Indos maximè Sacerdotes prestare oportere.* 260
- III. *Contra eos qui Indorum tarditatem accusant.* 263
- IV. *Contra eos qui peruersitatem morum Indorum fidei non recepta causam asserunt.* 267
- V. *Messem esse copiosam modo operarij idonei non desint.* 272
- VI. *De peritia Indica lingua necessaria.* 276
- VII. *De Parochis Indici sermonis ignaris.* 279
- VIII. *Quod quidam non rectè inscitie sermonis Indici consulant.* 284
- IX. *Quod oporteat ad Indos venientes predicatorum Indicum idioma diligenter discere.* 288
- X. *De scientia Sacerdoti necessaria.* 294
- XI. *Oportere in nouo orbe aliquos esse praestantes Theologos.* 298
- XII. *Vita probitas in ministro Euangelij, quod & à Deo, & ab hominibus requiratur.* 301
- XIII. *Quod ij, qui inter Barbaros versantur humanis ad virtutem auxiliis sint destituti.* 306
- XIV. *Quae libidinis & auaritia incentiua occurrant.* 308
- XV. *Contra abusus Indicorum Parochorum.* 310
- XVI. *De orationis praesidio euangelizanti necessario.* 314
- XVII. *De vita exemplo.* 319
- XVIII. *De beneficentia.* 322
- XIX. *De correptione & disciplina.* 328
- XX. *Quid obseruandum in correptione Indorum.* 333

& Capitulum.

XXI. De Catechismo & catechista radio lenando.

335

XXII. De fructu ex catechizandis Indis sperando.

341

XXIII. Quid restet de Catechismo dicendum. 345

LIBER V.

Quænam Indorum populos, quibus de
rationibus edoceri oporteat.

C A P. I. **F**inis doctrina, Christi cognitio & di-
lectio. 346

II. Christi annuntiandi curam precipuam esse
debere. 348

III. Contra opinionem eorum, qui sine Christi
notitia posse aliquem saluum esse volunt. 351

IV. Contra errorem illius, qui Christianos ru-
diores sine fide explicita Christi asseruit
posse saluari. 362

V. Quod precepto cetera mysteria, qua conti-
nentur in symbolo, scire omnes Christiani
constringantur. 368

VI. De mysterio Trinitatis omnibus tradendo.
372

VII. De mysterio Ecclesia tenendo. 375

VIII. Quid in extremo mortis discrimine Indi do-
cendi sint ut baptizentur. 378

IX. De preceptis Decalogi, & de idololatria Bar-
barorum. 381

X. Contra idololatriam remedia. 387

XI. De euertendis idolorum signis & templis. 394

Index Librorum

XII. De recta dilectione sui.	397
XIII. De dilectione proximi.	403
XIV. De Catechismo vulgo Indorum necessario.	405
XV. In Instructione Indorum diu esse perseverandum.	407
XVI. An expediat Parochias Indorum regularibus committi.	410
XVII. Salutem Indorum Societati IESU pro viribus esse procurandam.	413
XVIII. Cur multis videatur societas Parochias Indorum debere suscipere.	415
XIX. Quæ rationes à suscipiendis Parochiis Indorum societatem deterreant.	418
XX. Quæ in suscipiendis Parochiis moderatio adhibenda sit.	420
XXI. Missionum usus in Ecclesia antiquus & frequens.	423
XXII. Missionum utilitates inter Indos.	426
XXIII. Quod Parochi missiones utiliter & libenter accipiant.	428
XXIV. Quid cauere oporteat in missionibus.	430

LIBER VI.

Breuiter ea de Sacramentis attinguntur,
quæ rudibus Indorum populis necessaria visa sunt.

CAP. I. Quatenus modo de Sacramentis agendum. 435

II. Multa

& Capitulum.

- II.** *Multa in his regionibus contra Ecclesie
consuetudinem geri.* 436
- III.** *De voluntate Baptismo necessaria.* 438
- IV.** *De fide & poenitentia ad Baptismi gratiam
necessaria.* 444
- V.** *De iis, qui se baptizatos, vel negant, vel men-
tiuntur.* 445
- VI.** *De Sacramento Confirmationis & illius
materia.* 447
- VII.** *De Eucharistia percipienda diuinum esse
praeceptum.* 448
- VIII.** *Quod quamuis diuinum praeceptum sit de
communicando, possit tamen Ecclesia
pro iudicio suo communionem negare.* 452
- IX.** *Quod omnino expediat, priore consuetudi-
ne emendata Indos fideles communicare.*
457
- X.** *Confutatio opinionis contraria.* 464
- XI.** *De necessitate confessionis.* 469
- XII.** *Confessionis usum Indis in sua superstitione
fuisse.* 472
- XIII.** *De peritia Indica lingua confessionibus au-
diendis necessaria.* 474
- XIV.** *De prudentia Sacerdotum & tolerantia.*
476
- XV.** *Quod confessiones non sincere fiunt, potius
Sacerdotum, quam Indorum fieri culpa.*
478
- XVI.** *Contra errorem illius qui scripsit confessiones
ab Indis esse tollendas.* 480
- XVII.** *Quas satisfactiones Indis iniungere oporteat.*
481

Index Librorum & Capitum.

- XVIII. *De Extrema-Vnctione.* 483
XIX. *De Sacerdotio.* 485
XX. *De ritibus matrimoniorum apud Indos.*
487
XXI. *Quid agendum sit de coniugiis infidelium
cum ad fidem Catholicam conuertuntur.*
491
XXII. *De matrimoniis explicandis, & iuuenibus
collocandis.* 495
XXIII. *Quibus ex rebus Indorum salus maxime
pendeat.* 498



LICENTIA ORDINARII.

IMPRIMATUR hic Liber, cui Titulus est, *De Procuranda Indorum salute*, Authore P. IOSEPHO ACOSTA, & Societate IESU, Lugduni die 14. Octobris 1669.

DE NEVFVILLE, Vicarius Gen.

Consensus Procuratoris Regis.

VIda approbatione supradicta, Librum inscriptum, P. IOSEPHVS ACOSTA Societatis IESU, *De Procuranda Indorum salute*, in lucem edi Sumptibus LAVRENTII ANISSON, Bibliopolæ Lugdunensis annuimus. Lugduni die 18. Octobris 1669.

GALLIAT.

PER

P E R M I S S I O.

Viso Procuratoris Regis consensu , supra-
dictum Librum , typis mandari Sumpti-
bus LAURENTII ANISSON, concedimus:
& nequis ultra concessam ei facultatem denuo
excudat prohibemus. Lugduni die 19. Octo-
bris 1669.

DE SEVE.

DE



DE PROCVRANDA INDORVM SALVTE.

LIBER PRIMVS.

Quòd Prædicatio Euangelij apud Barbaros etsi difficilis, tamen & necessaria, & fructu plena existat.

CAPVT PRIMVM.

Quod non sit desperanda salus Indorum.



ALVTEM Barbarorum, Fideique propagationem, qui lōgè positi sunt, ac rem voto suo metiuntur, facilem ac speciosam prouinciam arbitrantur & cum innumerabiles populos hoc altero orbe diffusos breui tempore ad Christi nomen transiisse audiunt, vberem copiosamque messem non multo negotio ex hoc agro sibi persuadent. Ita sæpe accidit, vt qui ad opus accedunt, tunc de manipulis & horreis cogitent, cum de aratro & semente deberent. Contrà qui periculo facto pro-

A pius

pius rem viderunt, atque tractarunt, tot talesque difficultates offendunt, ut plerique labore victi penè desperatione frangantur: & sudores quidem magnos & diuturnos, frugem verò vel nullam, vel perexiguam esse contendunt. Mihi verò si quid melius & utilius sapere donatum sit, utraq; sententia corrigenda, ac moderanda videtur. Nam quemadmodum præclara omnia nequaquam cuivis peruia esse solèt, ita profecto quæ necessaria homini Deus esse statuit, in iis qui diffidit, summae providentiæ facit iniuriam. Neque enim genus aliquod hominum exclusum est in Euangelij, fidei q; cõmunicatione, ubi à Christo Domino Apostoli audiunt, Eũtes in mundũ vniuersum prædicare Euangeliũ omni creaturæ. Et rursus, Prædicari in nomine eius pœnitentiam in omnes gētes incipientibus ab Hierosolyma. Et apertius, *Act. 1.* Eritis mihi testes in Hierusalẽ & in omni Iudæa, & Samaria & vsque ad vltimum terræ. Et alibi, *Mat. 28.* Docete omnes gētes. Quis igitur tā illustris præcepti toties commendati auctoritatem contēnat? Aut quam hominum nationem adedò feram & ab omni humano sensu remotā beneficio Prædicationis, Fidei, Pœnitentiæ ac diuinæ doctrinæ destitutam putet, cum audiat Dominum de vniuerso mundo obeundo, de omnibus docendis discipulos contestantē? Quod si non omniũ esse Fidẽ Paulus docet, tamẽ id non conditioni hominum aut natalibus tribuit, sed peruersitati & importunæ cuidam obcæcationi. Certè enim ut nō solum prædicationem Euangelij in toto orbe cogitemus, verum etiam insignem ubiq; fructificationẽ, Ioannes in Apocalypsi in turba illa magna & beata

beata Agnū sequēte, omnem populum, omnē tribum, omnem linguam, quæ sub cœlo est, cōmemorat. Quin potius si attentius diuinas scripturas legamus, apparebit fortassis nō sine magna ratione, ac diuino quodam mysterio extremū & abiectissimum genus hominum, vel præcipuè ad sortem Euangelij vocari. *Æthiopia*, inquit, præueniet manus eius Deo. Quæ verò gens despiciatior his, qui vel ipso terrore & putore horrore pene habentur? De his *Sophonias* quoque Propheta: Attenuabit omnes Deos terræ, & adorabunt eum viri de loco suo, omnes insulæ gentium. Sed & vos *Æthiopes* interfecti gladio meo eritis, illo nimirum gladio, quem Dominus venit mittere in terram, quod est verbum Dei, pertingens vsque ad diuisionem animæ & spiritus. In eodem quoque Propheta legimus. Quia tunc reddam populis labium electum, vt inuocent omnes in nomine Domini, & seruiant ei humero vno, vltra flumina *Æthiopiæ* inde supplices mei filij disperforum meorum deferēt munus mihi. Quosnam disperfos suos Deus noster intelligat, nisi quos alibi vocat filios excussorum? Quod cœlesti virtute excussi, vt electæ sagittæ, ac toto orbe dispersi populos innumerabiles salutariter feriant, & vinctos, ac supplices Deo suo spoliis gloriosi post se agant. Vltra flumina verò *Æthiopiæ* si quis gentes positas quærat, inueniet sanè priscis scriptoribus ignotos Nili fontes Christianorum hominum peregrinatione superatos. Neque verò illud improbabile est plerumque Insularum nomine in diuinis literis terras has omnes magnò Océano circumfusas designari, tametsi continen-

Ps 67.

Soph. 2.

Mat. 10.

Heb. 4.

Soph. 3.

Ps. 126.

Tēque vidēz pri-

mi, & na-

runt ta-

men hī

quoq; se-

res, Æ-

thiopūq;

feru alia-

no gū gi-

te capos.

Et te er-

rarū ne-

sit cu-

debeat or-

bis. Luc.

10. Phar-

de Nilo.

In oratio-

ne fune-

bri Basi-

ly, & ad

roflum.

4 DE PROCVRANDA INDORVM

*mianum
Epif 71*

tes plurima ex parte sint , fortassis , quod ea antiquorum sententia fuerit , vltra Asiæ , Europæque , atque Africæ sibi nota litora , vel nullam habitari regionem , vel eam , si qua esset , insularem esse tantummodo. Nam à Pindaro Poëta decantatum est vltra Gades mare esse hominibus impermeabile , quodd prouerbij loco non semel sanctus Nizianzenus celebrat. Itaque cum vel Sophonias omnes Insulas gentium adoraturas dicit , vel Esaias ad Insulas longe ituros , qui saluati fuerint , vltra Africam , & Lydiam , & Italianam , & Græciam , & annuntiaturus Dei gloriam gentibus , de quæ iis omnibus adducturos fratres suos donum Domino : siue etiam cum hortatur ad decantandam Domino laudem eos , qui in extremis terræ habitant insularum incolas & maris : non absurdè profectò totius huius extremi orbis homines ad Christi nomen & gloriam agnoscendam conuocandos , conducendosque significare intelliguntur. Cur enim contemptos , ac sempiternæ obliuioni datos homines arbitremur apud pium Conditorem , & benignissimum Redemptorem ? Nunquid non vnus est pater omnium ? An alio sanguine Græci & Romani , alio Barbari & Indi redempti sunt ? Ipsos certè Iesu Christi Apostolos scimus ad remotissimas , ac ferocissimas nationes penetrasse , neque earum belluinis moribus deterritos , neque sensus stuporem pertæsos & prædicasse Euangelium & baptisasse , & munus inde Domino iuxta propheticum vaticinium obtulisse. Agnoscebant se debitores crediti talenti Græcis pariter ac Barbaris , sapientibus atque insipientibus. Intelligebant

Esai. 66.

Esai. 42.

D. Hier.

in Epistol.

ad Ephes.

c. 2.

Elemè, in

Epist. sua

dicit, Post

Oceanum

mundi sūt

alij. Lo-

quitur

ibi, ut vi-

detur, de

gentibus

nouierbis.

Mal. 2.

Rom. 1.

bant in Christo Iesu non esse Iudæum, & Græcum, Barbarum & Scytham, sed nouam creaturam, quæ secundum agnitionem Dei renouatur in imaginem eius, qui creauit illam. Etenim quos paterfamilias licet debiles, licet pannosos, & horridos ad præclaras cœlestis conuiuij epulas pro sua magnificentia inuitari iubet; cuius obsecro temeritatis, cuius impudentiæ erit, hos ut serui conuiuas dedignentur, auersentur, fastidiant? Nisi putamus melius esse perspectam ministris vel conuiuarum rationem, vel conuiuij dignitatem, quam ipsi omnium conditori & largitori? In illo certè linteo quod Petro esurienti cœlitus oblatum est, omne genus non solum volucrum & animantium; verum etiam serpentium ac reptilium expositum, ac præparatum diuina nos docuit historia, ut etiam sordidos, & abiectos atque, ut ita dicam, humi repentes à Domino sanctificatos intelligamus. Quod autem Deus sanctificauit, nobis ut immundum fastidire, ac repellere minime licet. Quamobrem desinamus vel tarditatem vel duritiam Indorum tantis diuinæ claritatis promissis opponere, & eum qui promisit fidelem existimantes, à communi omnium salute nullum genus mortalium putemus exceptum.

*Colos. 3.**Luc. 14.**Act. 11.*

CAPVT II.

*Cur videatur multis difficilis, & parum
utilis prædicatio apud Indos.*

CVM has atque his similes diuinæ Scripturæ voces attendimus, satis elucet, quemadmodum Pater misericordiarum neminem velit perire, sed omnes ad pœnitentiam reuerti, omnes omnino saluos fieri, omnes ad sui nominis agnitionem venire: atque ita generaliter cogitantibus erigitur spes non mediocriter, studiûmque illud accenditur, ad salutem animarum quærendam, cum ipse dixerit suis, Ego posui vos, vt eatis & fructum plurimum afferatis. Sed cùm venit ad rem, ad eò contraria humanæ imbecillitati apparent facta promissis, ita omnes aditus miseris hominibus interclusi ad salutem, vt calore illo refrigescente, sæpe diuinam potius cogitemus seueritatem, quæ non amat multitudinem filiorum infidelium, & inutilium. Ac præteritæ quidem infidelitatis iustum supplicium infidelitatem esse, vt qui Deum in natura docentem contempserunt, in Euangelio prædicantem, auribus aggrauatis quodammodo non sinantur audire. Vt enim arcani cuiusdam ac diuini iudicij fuit tam innumerabiles populos tot annorum millibus Dei notitia caruisse, ita quoque eisdemtribuendum esse, quòd notitia quædam tenuis offeratur, vel ita offeratur, vt facile repudietur

dietur, vel ita demum recipiatur oblata, ut mox
 perniciosius deferatur. Quis enim cognouit sen-
 sum Domini? Verè iudicia illius abyssus multa. *Esa. 40.*
 Itaque videtur experientia ipsa docere infinitam
 hanc Indorum barbariem, suis ita exigentibus
 malis, cum à luce Euangelica per mille quadrin-
 gentos annos aberrasse; tum verò diuina ultione
 acrius perurgente, postquam, ut Psalmus habet, *Pf. 76.*
 coruscauerunt orbi terræ fulgurationes eius, at-
 que his locis illuxit veritatis radius, occæcatas
 esse mentes infidelium, ne fulgeat illis lumen
 Euangelij pacis. Nam quòd quidam Apostoli-
 cam tubam etiam his regionibus olim insonuis-
 se arbitrantur, huc vocantes Prophetæ testi-
 monium à Paulo pronuntiatum: In omnem ter-
 ram exiuit sonus eorum, & in fines orbis terræ *Pf. 18.*
 verba eorum, non mihi videntur tantam rem *Rom. 10.*
 satis conficere, cum etiam Augustinus sua ætate *Epist. 80.*
 in Africæ quibusdam partibus ignotum adhuc fuis- *ad Hesy-*
 se Christi nomen affirmer, quo ne Romani qui- *chum.*
 dem imperij fama peruascerat. Me verò ut illud
 secus intelligendum putem, mouet maior au-
 thoritas Christi Domini, qui perspicue docuit
 tunc venturam esse mundi consummationem, *Mat. 24.*
 cum Euangelium fuerit toto orbe vulgatum. *August.*
 Quamobrem illud, ut pleraque alia, ita de Apo- *Epist. 80.*
 stolis accipiendum est, ut Apostolici viri simul *cap. 78.*
 cogitentur: quorum sonus in omnem quidem
 terram exit, sed gradatim, suisque temporibus
 secundum æterni consilij decretum. Familiare est
 propheticis oraculis, ut tempora etiam seiunctis-
 sima, vno velut aspectu subiiciant oculis, de quæ
 iis vniuersis pronuntient, quæ per partes imple-

da sunt. Quam regulam plerumque necessariam esse sacris scripturis intelligendis, non ambiget vel tenuiter in iis exercitatus. Iam verò quod vestigia nonnulla reperta sunt, antiquam, ut apparet, Fidem notantia apud quosdam, ut crucis erecta signa, & alia quædam, non satis apertum documentum est. Extat sanè in superioribus huius prouinciæ regionibus hodie quoque fama percelebris Indorum vetusta traditione vulgata & conseruata, venisse olim virum quendam insignem nostris similem, quem suo vocabulo Ticsiuiracocha ipsi appellant, qui multa vtiliter docuerit, sed nihil sermone proficiens, signis ac virtutibus clarus etiam martyrio coronatus sit. Huius effigiem multum ab Indorum habitu abhorentem, sanctorum porro nostrorum non ab similem quidam se vidisse confirmant. Sed ut vera hæc sint (cur enim negemus esse potuisse?) quid faciemus infinitis aliis gentibus, quarum etiam facies adhuc ignota est, quas tamen esse certissima ratione deprehensum est? Illud magis persuasum habeo, & magnam orbis partem adhuc restare intactam, quod tum Nauticæ tum Cosmographiæ peritissimi affirmant, & eam quam modo tenemus, vsque ad nostra tempora Christianis hominibus incognitam perstitisse. Igitur, ut redeam ad institutum, apparet quibusdam hos populos, has gentes, hanc infinitam barbariem, ut olim destituti sunt Luce Euangelica, ita nunc quoque postquam copia illius facta est, ad percipiendam doctrinam salutarem, necessaria intelligentia & capacitate destitui. Vtrumque enim æque

æquè inscrutabilis iudicij esse, quod vt penetrare non possumus, ita neque accusare debemus. Re vera, quod in libro Sapientiæ de antiquo Chanaanæorum populo legimus, id aptissime in Indos quosdam conuenire facile annuerit, qui eorum ingenium moresque perspexerit. Non ignorans, inquit, quoniam nequaquam est natio eorum, & naturalis malitia ipsorum, & quoniam non poterat mutari cogitatio eorum in perpetuum. Semen enim erat ab initio maledictum. Sunt ergo quidam ingenita ac velut hæreditaria malitia imbuti, quorum adeo pertinax & perverso hærens cogitatio est, vt penè non auelli possit. Si mutare potest Æthiops pellem suam, Hiero. 13. aut pardus varietates suas, & vos poteritis benefacere, cū didiceritis malè. Tam profunde humana mens nequitiae gurgite absorberi solet interdum, vt pene miraculo tribui debeat, si quis eam inde possit eruere. Ne verò conditorem suum audeat vile figmentum accusare, diuinus sermo continuo præuertit dicens: Quis enim tibi dicet, quid fecisti? aut quis stabit contra iudicium tuum? aut quis in conspectu tuo veniet vindex iniquorum hominum? aut quis tibi imputabit si perierint nationes, quas tu fecisti? Hæc ergo prima, ac præcipua causa se offert, cur multo labore in his regionibus parum emolumenti sperandum sit, quod semen maledictum ac diuinis auxiliis propemodum destitutum in perditionem destinatum sit. Sed vt altiora consilia inuestigare definamus, certe doctrina Christi sublimis est, vita Euangelij plusquam humana. Homines integros, atque ingenuos postulat fidei verbum, Iacob. 2. per

per legem, inquit, perfectæ libertatis incipientes iudicari. At natio Indorum (etsi alij aliis præstant,) vniuersa tamen est ab omni ingenuitate alienissima, tota sordida, tota seruilis. Ingenio vt plurimum obtuso, iudicio perquam imbecilli, inconstans prorsus & lubrica. Moribus infidi, ingrati, metu solum cedere & vi, honoris vix sensum habere, pudoris propemodum nullum. Hos dicas pinxisse Chrysostomum, cum genus seruorum quodam loco exponit. Vbique terrarum, istud pro comperto habetur, seruorum genus impudens ferme esse, formatuque difficile, lasciuum, lubricum, parumque idoneum ad virtutis doctrinam capessendam & cætera. Neque seruale tantum ingenium est; verum etiam quodammodo brutum: vt facilius putes feras cicurare, quam istorum vel frænare temeritatem, vel excitare torporem, adeò ad percipiendum rudes, ad cedendum sunt duri & peruiaces. Denique vt irrationalia pecora naturaliter in captionem & prædam apta in corruptione perpetua degunt, neque matrimonij leges, neque naturæ reueriti: libidine pro ratione vtuntur. Quid ergo pergimus margaritas mittere ante porcos, & canibus sanctum dare, qui facile reuertuntur ad vomitum, & cœni volutabra delicias ducunt? An infantium insensatorum more viuentes, parentes animarum inauxiliatarum, comestores viscerum humanorum ratione ac lege regendos credimus, ac non potius loris & ferro subigendos? Iam vero quoniam Fides ex auditu est, auditus autem per verbum Dei lingua opus est ad Euangelizandum. Hic qui negotium

*Homi. 4.
in epist.
ad Titũ.*

2. Pet. 2.

Matt. 7.

2. Pet. 2.

Sap. 12.

Rom. 10.

gotium barbaros imbuendi assumunt, difficultates patiuntur eas, ut malint pene cum saxis, & marmoribus agere, quàm de rebus in se quidem arduis & sublimibus, & elingues dicere, & à surdis audiri. Ferunt olim septuaginta duabus linguis confusum esse genus mortalium: at hi septingentis, & eo amplius inter se discrepant, ut vix vallis habitetur paulo latior, quæ non sua materna lingua gaudeat. Et si enim in vniuerso Ingarum imperio, quod ab æquinoctiali Quitto vsque ad longissimam Chilæ prouinciam per gradus fere quadraginta distenditur, lingua generalis à Rege Guainacapa introducta viget, tamen & Indorum gentes innumerabiles sunt his terminis exclusæ, & eæ ipsæ non ita illa familiariter vtuntur, ut apud vulgus promiscuum in usu sit. Accedit quod mysteriis Fidei præcipuis vocabula sæpe defunt, ut indicæ linguæ periti tradunt. Per interpretem verò rem tantam agere, & cuiusque plebei ac vulgaris hominis fidei, & sermoni committere documenta salutis, tametsi necessitate impellente factitatur, tamen res ipsa docuit, quam non solum incommodum sit; sed etiam perniciosum interdum, dum alia pro aliis interpretatur, aut quia non assequitur, aut etiam quia sequi docentem piget. Quid igitur faciet, qui linguarum donum non habet, neque interpretationem sermonum, qui cum barbaris cogitur, & ipse barbarus esse, ut cum loqui nesciat, tacere non possit? Linguæ difficultates, locorum non minores fortassis excipiunt. Nam, ut omittam nauigationem longissimam, molestiis periculisque plenissimam, ipsæ habitationes

Indorum

Indorum ferè inaccessæ spem salutis videntur excludere. Videas plerosque ferarum instar non vrbes, & oppida, sed rupes, atque antra incolere, neque gregatim vitam degere, sed sparsim, sæpè incertis vagari sedibus. Itinera ceruis aut ibicibus tantum peruia. Domus nullæ, non tectum, non paries fundamēto surgens. Caulas pecorum, aut biuaria dicas potius, quàm hominum cœtus. Hos quæso quis adeat? quis conueniat? quis conuocet? quis doceat, & cohortetur? Cum dormiente loquitur, qui narrat stulto sapientiam, ait Sapiēs. Cùm sint igitur inter domesticos fidei, quibus doctrinæ panis erogari fructuose possit, *Mar. 15.* cur filiis tollendus est, & canibus dandus, vel potius proiiciendus? Quid consilij est incertis certa postponere, & labores subire maximos utilitate nulla vel perexigua? Atque ad hunc sanè modum qui negotium salutis Indicæ vel difficile reputant, vel etiam exosum habent, sententiæ suæ causas, si serio interrogentur, videntur mihi non improbables reddituri.

C A P V T III.

*Quod difficultas prædicationis non debeat
terrere Christi seruos : & qua
ratione sunt animandi.*

VALET sanè commemoratio difficultatum, quæ in disseminando verbo Dei occurrunt, si

si prudenter adhibeatur, non parum, ut quorundam iuuenilis quidam ardor temperetur, ac refrænetur audacia, quam rectissime Aristoteles dixit pericula ut ignota citius agredi, ita tentata celerius fugere. Fortes enim milites postulant bella Domini exercituum, non audaces & temerarios, qui more Ephraim inter suos otiose intendentes, ac mittentes arcum, in die prælii conuersi sunt. Est verò prudentis & fortis viri, pericula, difficultates omnes, rerumque incertos exitus secum ante meditari, non ut magnitudine laboris territus, spem abiiciat victoriæ, sed quo & paratior, instructiorque accedat ad rem, & dubiam sortem, si secus cedat, minus iniquè ferat. Ita certè videmus Mosem suas metientem vires detrectasse cum Pharaone congressum, Hieremiam prophetandi prouinciam deprecatum esse, Salem cum adhuc Dei spiritu regeretur, ob regnum delatum latitasse, quos tamen omnes cæterosque homines Dei & si rei magnitudo probè perspecta terrebat; tamen Dei omnipotentis amplius recreauit, & confirmauit auctoritas. Illud enim verissimè à quodam nostro fratre diu multumque in hoc negotio Indorum exercitato dictum, etiam ipse experiri iam mihi videor, Inter omnes virtutes ad functionem eam necessarias caput esse humilitatem. Hæc neque magna sapit, neque sibi pollicetur illustria, neque labore vnquam frangitur, neque verò fructus etiam tenues dedignatur: sed quidvis per eam efficiat Dominus, id gratum pro magno habet. Verè humilibus dat gratiam Deus, atque his administris, fortia sæculi & præclara

4.li. E-
thi.

Pf. 77.

Exod. 3.

Hier. 1.

1. Reg. 10.

Iacob. 4.

1. Pet. 5.

con-

*Agg. 1.**Lege
Chry. ho-
mil. 7. in
1. Epist.
ad Corin.**Ioan. 6.
Ephef. 2.*

confundit. Ac mihi quidem humilitatis maxime inopia in causa esse videtur, penuriam ut fructuum videamus, & cum multum fortassis seminauerimus, metamus perparum, quia iuxta Prophetæ sermonem, Vnusquisque in domum nostram festinamus, & domum Domini non curamus, id est, auidius nostram quam Dei gloriam quærimus. Sed venio ad rem. Indorum veram conuersionem ad Fidem perdifficilem esse dicunt. Est sanè. At illud non oscitanter cogitare oportet, semper fidei prædicationem fuisse difficillimam, & fructificationem Euangelij laboriosiore longe existimatione nostra. Ut enim omittam dicere, quanta præcesserint, quanta consecuta sint, quæ semen Dei ne susciperetur vrgerent, ne susceptum maturesceret, impedirent, profecto generalis ratio doctrinæ Christianæ satis per se ipsam verticem formidabilem monstrat. Etenim ratione omni superiora docet, nec probat: mores ab omni cupiditate, & gloria alienos instituit, vitiis omnibus funditus euersis, quibus est humana natura plenissima, & diuturna consuetudine offirmatissima. Præmia pollicetur, quæ non videntur, ea, quæ videntur, contemnere iubet: sensum hominis ad ea transfert, quæ sentiri nequeunt: vitam non humanam homines agere vult. Quis igitur facile ac suaue putet, belluas in Angelos transformare, idque voluntate ipsorum adnitente, quibus vis ista affertur? Verè opus hoc non hominis, non alterius cuiusquam, quam Dei vnus. Ipse sibi proprium vult. Hoc est opus Dei, inquit, ut credatis in eum. Et, Nemo venit ad me, nisi quem Pater

Pater traxerit. Et, Dei donum est, non ex vobis, ne quis glorietur. Quod si in ipsum Fidei nostræ autorem, & consummatorem Iesum, oculos conuertamus, est omnino aliquid, quod magnopere consolari, & erudire possit, ut obstruatur omne os, subditus fiat Deo omnis spiritus. Quis enim æternæ sapientiæ celsitudinem cogitans, miraculorum potentiam, benignitatis viscera, cum ad homines docendos, & alluciendos se inclinaret, non pro certo sibi persuaderet, vel vna illius concione mortales omnes fuisse flectendos, ut tantum Prædicatorem innumerabili multitudine certatim orbis vniuersus sequeretur? At vide, quàm res euenerit secus. Diu Euangelizauit, summo conatu, magna diligentia, adhibitis signis ingentibus, quæ nemo aliàs fecit, vita innocentissima, conuersatione suauissima, autoritate diuina, quid egit? quid consecutus est? Si consilia æterna suspicias, plus quam intelligi possit. At si hominum gratitudinem & obsequium consideres, horror est dicere. In exiguo populo, eoque per plus mille annos instructo legis, & Prophetarum oraculis, vix paucos discipulos habuit, eosque neque præcipuos, neque constantes: plurimos aduersarios, innumerabiles obrectatores, qui de malis verterentur in pessimos. Et indignetur homuncio non sibi latas segetes surgere ad primum seminis iactum? frustratum se conquerratur, si ad prædicationem suam non cernat hominum millia datis manibus stereri? Ioannes Baptista ipsa hominum qui Christum sequerentur, paucitate commotus, dixit ad suos. Qui

Ioan. 3.

de

Esa. 42.

Esa. 49.

de cœlo venit super omnes est: & quod vidit & audiuit, hoc testatur, & testimonium eius nemo accipit. Nam pro doctoris dignitate, tam exiguus discipulorum numerus quasi nemo Iohanni merito videbatur. Audiamus verò ipsum ducem & Apostolum confessionis nostræ piè cum patre suo æterno exostulantem. Et ego dixi, In vacuum laboravi, sine causa & vanè fortitudinem meam consumpsi. Nonne labores tot & tantos prædicandi, pernoctandi, vicos & castella circumeundi, clamandi, nauigandi, curandi ægros, diuina & mirabilia patrando, vacuos & infructuosos penè dicas, si paucitatem Christi discipulorum spectes, cateruas inimicorum, & peruicaciam? Nonne frustra tantum robur, frustra illam fortitudinem consumptam putes, si morientem videas, confixum in domo eorum, qui diligebant eum: à suis partim desertum, partim proditum, ab alienis insatiabili crudelitate vexatum, cæsum, in crucem actum? Sed quam rationem init sapiens Magister? Quomodo se confirmat, & consolatur? Ergo inquit, iudicium meum cum Domino, & opus meum cum Deo meo. Id est, non amplius homines curo, non respicio ad relatam ab hominibus gratiam: sed Deum meum attendo, illius iudicii æquitatem scio: opus meum illi impendo: spem meam apud illum colloco, illius gratia cuncta libens & facio, & subeo, dispendia pro compendiis ducens: Hic animus erat, hæc mens saluatoris nostri Dei. Huc deberemus aduertere animum, quicumque opus Domini facimus, & operarij inconfusibiles haberi cupimus

pimus. Non nostrum, sed Dei negotium agimus, curam ipsi omnem lætè ac promptè laborantes, atque rei exitum relinquamus. Qui hac humilitate verissima, hac syncerissima charitate opus Dei tractat, etsi videtur interdum sine fructu laborare, tamen audit statim diuinum responsum. Et nunc dicit Dominus formans me ex vtero seruum sibi, *ibidem.* vt reducam Iacob ad eum, & Israël non congregabitur, & glorificatus est in oculis Domini, & Deus meus factus est fortitudo mea, Et dixit, Parum est, vt sis mihi seruus ad suscitandas, tribus Iacob, & fœces Israël conuertendas: ecce dedi te in lucem gentium, vt sis salus mea vsque ad extremum terræ. Satis plenè Christi Domini proposito exemplo tam perspicuo & illustri, quicquid est molestiæ leuari, quicquid querelæ deponi queat, si cordis aliquid ac frontis supersit homini. *Ioan. 13.* Neque enim discipulus supra Magistrum est, neque seruus maior Domino suo.

CAPVT IV.

De eadem re.

Sufficiebat quidem Christi seruatoris exemplum: sed redarguenda est adhuc nostra desidia, & compungenda per cætera exempla Patrum. Apostolorum sanè trophæa cernimus, & totius orbis victores signa crucis vltra Romanas aquilas extulisse miramur, magnæ fœlicitatis cursum ducimus, & si daretur, tantam gloriam iuaret imitari. Sed cohibeamus tantisper animum,

& illorum sudores, pericula, certamina, temporis difficultates, hostium magnitudinem cogitemus: intelligemus profectò longè carius illis stetit victoriam, quam quisquam facile credat.

2. Cor.
10.

Arma, inquit, militiæ nostræ non carnalia sunt, sed potentia Deo ad destructionem munitionum, consilia destruentes, & omnem altitudinem extollentem se aduersus scientiam Dei. Quid igitur?

Rom. 15.

Commemorat se alibi ab Hierosolymis vsque ad Illyricum propagasse Euangelium Christi, & longè latè per circumpositas regiones, quas, si quis consideret immensa terrarum spatia, mirabitur potuisse vnius hominis peregrinatione cognosci, nedum doctrina Apostolica impleri: quo etiam in loco in Hispaniam profectionem suam prædicat, eamque prædictionem post priorem eius catenam Romæ re ipsa completam, non desunt, qui affirmant, in quibus esse videntur Hierony-

Hier. in
e. 5. A-
mos.

Chryso.

ho. 10. in

2. ad Ti-

mor. &

de Lau-

dib. Pau-

li ho. 7.

1. Cor.

11. & 12.

mus & Chrysostomus. Sed quibus periculis & ærumnis tanta peregerit, nemo melius possit narrare, quam ipse in posteriore ad Corinthios Epistola. Pelagus illud laborum, ac tempestatem si quis intuetur, videt omnino nullo modo nisi per crucem crucis prædicatores vicisse, eorum quoque æmulatores non aliter esse victuros. Verum cum Crux non dissimilis sit, nescio tamen quomodo difficultates patimur nunc omnino contrarias, vt si quis attentius consideret, diuini consilij altitudinem admiretur. Nobis nihil est perinde graue, ac nimius stupor & insipientia barbarorum: contrà Apostolos nihil ita exercuit, atque inflata illa præpotensque sapientia, tum Iudæorum, tum Græcorum, tum maximè Romanorum;

norum : ut se veluti ridiculos exhibere viderentur
 Synagogis , Academiis, Curia. Nos prædicamus, *1. Cor. 1.*
 inquit , Christum crucifixum , Iudæis quidem
 scandalum , gentibus autem stultitiam : ita ut in
 magna laude sua Paulus ponat, Non enim eru- *Rom. 1.*
 besco Euangelium , & ad Timotheum scribat, *2. Tim. 2.*
 Noli erubescere testimonium Christi. Illos urge-
 bat potestas sæculi , cum imminerent imperij fas-
 ces. Nos potestates quidem ac Magistratus Gen-
 tilium parum timemus , cum sit summa penes
 Christianos : sed ab eadem potestate non parum
 sustinemus nonnunquam molestiæ , & incom-
 modi, cum cernamus non raro euerti prauis exem-
 plis auaritiaque quorundam , quicquid ab aliis
 ædificatur ad fidem. Illi ingenia hominum nacti
 sunt clata , & peruicacia , ipsaque sæculi pruden-
 tia simplicitatem Fidei inflexibiliter respuentia:
 Nobis mobilitas contrà imbecillitasque natura-
 lis Indorum ingenij , molestiæ plurimum affert:
 ut illos quidem saxis mandare Euangelica semi-
 na diceret , nos arenæ. Maiores nostros labor in-
 defessus , inopia , ignominia , cruciatus , necis-
 que quotidianum quodammodo discrimen : nos
 tædium , sermonis inopia , ipsa hominum igno-
 bilitas , solitudo quædam , ac desperatio maximè
 oppugnant. Itaque Fidei prædicatio sicuti res est
 magna, ac maior omni existimatione hominum,
 ita nunquam sine ingenti labore & constantia
 peragi potuit. Quis credidit auditui nostro, & bra- *Isai. 53.*
 chium Domini , cui reuelatum est ? Sed in Deo
 ponenda spes , qui dat verbum Euangelizantibus *Psf. 67.*
 virtute multa : ut quamuis euntes fleant mittentes *Psf. 125.*
 semina sua , venientes certè gaudeant por-

Mat. 10. tantes manipulos suos, ipse dicit, Ecce ego mit-
 to vos, ipse est, qui operatur Fidem, & dat in-
 crementum, vt Euangelium crescat, & fructifi-
Phil. 2. cet in vniuerso mundo. Vcrum nos tyrones ter-
Colos. 1, rent militiæ labores & frangunt. Et dicimus. Quid
Ecc. 7. putas quia præterita tempora meliora fuerunt?
 Stulta sine dubio cogitatio. Nam si in illa superio-
 ra incidissemus, tantam asperitatem, nequaquam
 ferre possemus. Sed quia præterita sunt, fœlicia,
 & suauia putantur. Si igitur antiquorum tempo-
 rum allicit nos, atque tenet mirabilis in Chri-
 stianitate prouentus, & nostræ nos egestatis tæ-
 det, cogitemus labores illorum nostris sine vlla
 comparatione fuisse maiores, & Dei sapientiæ ac
 bonitati gratias agamus, quæ pro magnitudine
 operis idoneos operarios parat. At sunt multi, qui
 tametsi illa magna atque Apostolica abesse æquo
 animo patiuntur; tamen pro modulo etiam dili-
 gentiæ molestiæque suæ non respondere fructus
 vehementer dolent. Qua in re vt id quàm maxi-
 mè verum sit, quod existimant, illa certè est fir-
1. Cor. 3. missima consolatio Apostoli monentis: Vnusquis-
 que propriam mercedem accipiet secundum suum
 laborem. Dei enim sumus adiutores. Dei ædifica-
 tio estis, Dei agricultura estis. Non igitur tam
 expendet fructus, Vineæ procurator in merce-
 de reddenda, quàm operam: & gratior erit for-
 tassîs Patrifamilias labor sterilis, sed fidelis, quàm
 facilis & fœcundus. Quamobrem etiam ipsos ma-
 gnos fidei præcones videmus fructus exiguitate
Eze. 3. sæpe probatos. Nam vt omittam Ezechielem, cui
 Dominus testimonium fert: Si ad populos mul-
 tos profundi sermonis & ignotæ linguæ mittere-
 ris

ris, quorum non possis audire sermones, ipsi audirent te: Domus autem Israël nolunt audire te: ut præteream Hieremiam contemptum & ludibrio habitum præ Hanania aliisque falsis Prophetis, Amos quoque aduersus Amasiam, cæterosque Prophetas: illi ipsi Apostoli sæpe magno labore nil nisi iniurias consecuti sunt. Paulus per biennium Cæsareæ tenetur vinctus, & cum pene quotidie disputaret ad Felicem, nihil egit. Ioannes propter testimonium Christi relegatum se videt: Iacobum illius fratrem vetus narrat historia in Hispaniis præter homines septem aut nouem ad fidem conciliaſſe neminem, tam longa peregrinatione abusuque Hierosolymis suscepta, tam diuturna prædicatione. Verè enim Dominus dixit: Non est discipulus supra Magistrum: si sermonem meum seruauerunt, & vestrum seruabunt. Quoties vero ille exclamauit, Cui comparabimus generationem hanc? Cantauimus, inquit, vobis, & non saltastis, lamentauimus, & non planxistis. Quanquam nescio quid iustæ querelæ habeat, si vel paucissimas animas, vel vnā potius totus noster labor & industria lucretur, pro qua Dominus gloriæ, si sola fuisset, easdem passionibus subire minimè recusasset, ut sanctus Chrysostomus quodam loco præclare docet. Cuius aureum os audire libet tantisper de hac ipsa re, quam agimus. Nihil est quod animæ possit æquiparari, ne vniuersus quidem mundus. Itaque & si immensas pecunias pauperibus eroges, plus tamen effeceris, si vnā conuerteris animam. Et post pauca. Quod si hodie nemini persuaseris, persuadebis postridie, & si nunquam persuaseris, mer-

*Hier. 28.**Amos 7.**Act. 24.**Apoc. 1.**Ioan. 15.**Matt. 11.*

*In 2. cap.
ad Gal.
in illa
verba,
Dilexit
me &
tradidit*

*dit se-
meripsū
propter
me.*

*Hom. 1.
in 1. epist.
ad Cor.*

22 DE PROVANDA INDORVM

cedem tamen integram habes. Et si non omnibus paucis tamen ex multis persuadere poteris. Nam neque Apostoli vniuerso orbi persuaserunt, licet cum omnibus disputarint, & mercedem in omnibus assecuti sint. Si quidem Deus non secundum bonorum operum euentum, sed iuxta factorum propositum coronas elargiri solet, etiamsi duos obolos conferas, & quod vidua fecit, idem in docentibus operabitur. Noli igitur, cum orbem terræ saluum facere non possis, etiam parua contemnere: neque maiorum desiderio à paruis te abstrahas. Si centum nequīs, decem curam suscipias: si decem non possis noli quinque despiciere: si quinque vires tuas excedunt, vnum ne contemnas. Quod si ne hoc quoque possis, noli desperare, noli labori cedere. Nam si parua non contempserimus, assequemur & magna. Quæ beati Patris exhortatio ad recreandos confirmandosque animos Christi operariorum, vel sola est satis, modo se rationi quivis obsequentem præbeat. Denique vt communibus non utamur, habet sanè Indorum causa propria ac peculiaria emolumenta, eademque magni apud Christum pretij. Primum humilitatis, quod labor omnis istis impensus tanto securior, quanto ab omni humana gloria remotior. Deinde charitatis Christi fidelissimum testimonium, cum extremæ indigentiae, & periculo tot millium animarum per-euntium vita ipsa consecratur. Præterea constantiae, & patientiae quodnam possit inueniri certius vel argumentum, vel periculum hoc ipso, quod plerisque maximè grauat, tædio pro Christi gloria deuorato, vt cum multum labores, parum pro-mouere

mouere videaris? Pene dixerim esse in hoc vno Apostolicæ gloriæ æmulam laudem. Postremo illud mihi verissimè persuasum habeo fructus esse pro labore, & merito longè maximos, vehementerque eos decipi, vel desidia, vel ambitione corruptos, qui suas operas in hac Christi vinea parum fructuosè locatas conqueruntur. Quod, vt habet, monstrare erit sui temporis & loci. Illud modo maneat, etiam si penuria quàm maxima existeret, in negotio animarum, tamen Christi Iesu fidelibus operariis non minus, vel gnauiter, vel alacriter desudandum esse, vbi & illius charitati amplius obsequuntur, & de propria mercede nihil deperit.

C A P V T V.

Quod gentes Indorum quantumvis barbaræ, auxilio tamen gratiæ ad salutem destitutæ non sint.

IA M verò respondendum est prioribus illis rationibus, quibus Indorum causa, & salus oppugnabatur, & respondendum est Deo adiuuante sobrie & vere. Quatuor igitur præcipue obiecta sunt: Diuinæ gratiæ subtractio: Naturæ morumque absurditas: difficultas sermonis: locorum atque habitationis incommoda. Principiò multos esse homines suis tenebris relictos occulto Dei veroque iudicio, negare non possumus, neque

Ephes. 2.

homines modo, sed & familias & vrbes, & integras sæpe prouincias & gentes. Qui & olim fuisse, & nunc vsque sunt sine Christo, alienati à conuersatione Israël, & hospites testamentorum, promissionis spem non habentes, denique sine Deo in hoc mundo. Cur autem tandiu eos diuina gratia atque electio præterierit, tot animarum millibus interim pereuntibus, humana ratione altius arcanum est, quod temerare velle impietatis sit. Hoc loco Paulus Apostolus cursum cohibet, & inquisitionem suam ad inscrutabilis sapientiæ excelsa suspendit. Cùm enim narrasset gentes Israël obcæcato vocatas ad Euangelium, in fine autem etiam ipsum saluum futurum, cum intrauerit plenitudo gentium, perpendens, quæ profunditas se se obiiceret peruestiganti ultra, cur Deus incredulitatem Israël diuitias gentium esse voluerit, & cur eo vsque salutem earum distulerit, eaquæ oblata repulsam tulerit Israël, quasi vtrumque populum diuina gratia capere nequiret, hæc & similia ex sua narratione consequi cernens, sistit gradum, & exclamatione illa mirabili mavult hominem in ignorantia suæ tuto hærrere, quam per obstructissimæ quæstionis abrupta præcipitem dari: nihil omittens, vt egregie dixit

*Libr. 1.
de voc.
gent. cap.
5.*

Ambrosius siue quisquis is author fuit de vocatione gentium (nam stylus magis referre videtur Prosperum Aquitanicum) de iis quæ non oportet ignorari, nihil contrectans de iis, quæ non licet sciri. Multa enim sunt, inquit, in dispensatione operum diuinorum, quorum causis latentibus soli monstrantur effectus, vt cum pateat, quod geritur, non pateat, cur geratur, negotio in medium deducto,

ducto, & in occultum ratione subducta: ut in eadem re & de inscrutabilibus præsumptio comprimatur, & de manifestis falsitas refutetur. Idemque rursus libro sequente. Et quis inter hæc querulis aut curiosis notum faciet, cur adhuc sol iustitiæ quibusdam gentibus non oriatur, & à tenebrosis cordibus etiam nunc radios suos veritas reuelanda contineat; Satiùs ergo esset in re tanta, tamque obstrusa infirmitatem nostræ scientiæ confiteri, tuto negotium integrum Dei æquo veroque iudicio committentes, quam dum nitimur quæ sunt ab oculis nostris abscondita videre contra præceptum, fortassis immensæ lucis fulgore cæcari. Sed quia creberrima est quæstio inter infideles, & quæ acrius animos pulsare solet & pun gere, addendum est aliquid, quod etsi elatam mentem non satis premat; tamen obedientem atque subiectam non parum consoletur. Id vero nemo melius explicet, quam beatus Augustinus, qui in hanc quæstionem diu ac sæpe à se versatam incidens in epistola ad Optatum Episcopum ita scribit, Cur autem creentur etiam illi, quos creator præsciuit ad damnationem, non ad gratiam pertinere, beatus Apostolus tanto succinctiore breuitate, quanto maiore authoritate commemorat. Deum enim dixit volentem ostendere iram, & demonstrare potentiam suam attulisse in multa patientia vasa iræ, quæ perfecta sunt in perditionem, & ut notas faceret diuitias gloriæ suæ in vasa misericordiæ. Et mox, Merito autem videretur iniustum quòd fiunt vasa iræ ad perditionem, si non esset ipsa vniuersa in Adam massa damnata. Quòd ergo fiunt nascendo vasa iræ, pertinet ad debitam

*Libr. 2. de
voc. gent.
cap. 2.*

Eccli. 3.

Epi. 157

Rom. 9.

debitam pœnam : quod autem fiunt renascendo vasa misericordiæ , pertinet ad indebitam gratiam. Ostendit ergo Deus iram suam, id est iustam fixamque vindictam , quæ de stirpe inobedientiæ ducitur propago peccati atque supplicij, ostendit & potentiam suam , qua bene utitur etiam malis , multa illis naturalia , & temporalia bona largiens , eorumque malitiam ad exercendos , & comparatione admonendos bonos accommodans , vt in eis discant agere gratias Deo, quod ab eis non suis meritis, qui in eadem massa pares fuerant , sed illius miseratione discreti sunt. Et infra. Notas etiam fecit diuitias misericordiæ suæ in vasa misericordiæ , ita enim quid præsteretur sibi discit , gratis iustificatus , dum non suo merito , sed gloria largissimæ Dei misericordiæ discernitur à damnato , cum quo eadem iustitia fuerat & ipse damnandus. Tam multos autem nasci voluit , quos ad suam gratiam non pertinere præsciuit , vt multitudine incomparabili plures sint illis , quos in sui regni gloriam filios promissionis prædestinare dignatus est; vt etiam ipsa reiectorum multitudine ostenderetur , quàm nullius momenti sit apud Deum iustum quantalibet numerositas iustissimè damnatorum. Atque vt hinc etiam intelligant , qui ex ipsa damnatione redimuntur , hoc fuisse debitum massæ illi vniuersæ, quod tam magnæ eius parti redditum cernerent. Hæc Augustinus , quibus generaliter quantum sacræ literæ insinuant , rationes attingit , cur tam innumerabilis hominum ac populorum multitudo suo dimittatur arbitrio, id est perire sinatur. Verū cur illum, vel illū populū ante vocauerit ad salutem,

lutem, illum autem, & illum tandiu in sua cæcitare reliquerit, quis audeat inquirere? Cum legamus Apostolos aliquando parantes profectio-
nem in Asiam, vt Euangelizarent, prohibitos esse à Spiritu sancto: & rursus in Bythiniam nauigan-
tes non esse permisos à Spiritu Iesu. Qui ergo ne-
mini gratiam debet, ille, quem oporteat, vocare,
& quo tempore, & per quem sapientia sempiterna disponit. Et quanquam hæc, quæ de sententia Sancti Augustini, imo Apostoli Pauli disputata sunt, verissima sunt: sed illud tamen nihilominus intelligendum est, nullum vnquam hominum genus, ita à suo esse authore desertum, quin pro suo modo Dei testimonium, auxiliumque sufficiens haberet: ita vt sint inexcusabiles diuinæ legis in suis cordibus scriptæ corruptores, ingrati beneficiis cœlestibus patientiæ, & bonitatis tantæ contemptores. Quamuis enim, vt Paulus & Barnabas Lystris egregie prædicarunt, Deus in præteritis generationibus dimiserit omnes gentes ingredi vias suas, id quod hucusque etiam in non exigua orbis portione accidere videmus: tamen non sine testimonio reliquit semetipsum, benefaciens de cœlo, dans pluuias & tempora fructifera, implens cibo, & lætitia corda hominum vt ipsius naturæ admoniti operibus ex his, quæ videntur bona possent intelligere eum, qui est, & agnoscerent quis esset artifex, speciei enim generator hæc omnia constituit, à magnitudine enim speciei & creaturæ cognoscibiliter poterit horum creator videri. Huius sapientis sententiam secutus Ambrosius libr. 2. de Vocatione gentium, Adhibita semper est, inquit, vniuersis hominibus quædam

*Act. 16.
Ibidem.*

*Rom. 2.
Act. 14.*

Sap. 13.

*2. de voc.
gent. c. 5.*

dam supernæ mensura doctrinæ, quæ etsi parcioris occultiorisque gratiæ fuit, sufficit tamen sicut Dominus iudicavit, quibusdam ad remedium, omnibus ad testimonium. Non quod sine Christi fide salutem cuiquam, quod absit, permittat Ambrosius: sed quòd gratia in naturæ doctrina luceat, & sequentem, ad spiritum fidei & charitatis inducat. At dicet aliquis hoc loco. Quomodo credent, si non audiunt? Quomodo verò audient sine prædicante? Prædicabit sanè Philippus Eunuchus, & Petrus ad Centurionem mittetur, modo illi præstent, quod per se possunt. Neque enim qui per naturam inuitat, deerit per gratiam, si liberum non reluctetur arbitrium, Quamobrem idem author in eodem opere. Quod si forte etiam nunc in extremis mundi partibus sunt aliquæ nationes quibus nondum gratia saluatoris illuxit: non ambigimus etiam circa illas occulto iudicio Dei tempus vocationis esse dispositum, quo Evangelium quod nondum viderant, audiant, atque suscipiant. Quibus tamen illa mensura generalis auxiliij, quæ desuper omnibus semper hominibus est præbita, non negatur: quamvis tam acerbo vulnere humana natura sauciata sit, ut ad cognitionem Dei neminem contemplatio spontanea plenè valeat erudire, nisi obumbrationem cordis lux vera discusserit. Quibus profecto verbis vniuersam Indorum causam præclare actam esse ab Ambrosio nemo non videat. Interim verò flagitia & crimina omnia istorum, quamvis veniam, neque mereantur, neque impetrent apud summum Iudicem Deum, leuius tamen omnino puniuntur

puniuntur. De his quippe scriptum est, sed partibus iudicans dabas locum pœnitentiæ, non ignorans quia nequam est natio illorum, & rursus. Veniam dabas peccatis eorū, virtus enim tua iustitiæ initium est, & ob hoc quod omnium Dominus es, omnibus te parcere facis, Denique ut quicumque sine lege peccauerunt, sine lege iudicabuntur, ita & qui sine Euangelio peccauerunt, sine Euangelio iudicabuntur. Hæc eo commemorata sunt, ut querela multorum aduersus Deum compescatur, firmissimeque teneamus iudicia Dei omnia in tot & tantorum perditione populorum iustificata esse in semetipsis. Sap. 12.
Rom. 2.

CAPUT VI.

Quod Indos Deus iam vocet ad Euangelium.

VErum quod ad institutum nostrum attinet, quanquam sunt, ut dixi, non solum homines, sed populi & gentes longo tempore permixtæ infidelitati suæ; tamen nullum est hominum genus adeò ineptum, adeò brutum, & saxum, quin ad Euangelij doctrinam idoneum sit. Omni enim creaturæ, quæ sub cœlo est, prædicari Euangelium præceptum est: & in semine Abrahæ omnes gentes benedicentur: & vniuersæ familiæ terræ venient coram Domino, ut adorent. Esse quidem aliis alias nationes hominum aptiores felicioresque Euangelicæ frugi, ut agros fertiliores, negare planè Mar. 16.
Gen. 22.
Ps. 21.

Gen. 6.

planè non possumus : sed qui omnes vocat, neminem fastidiendum docet. Sunt hebetes, sunt lubrici, sint fanè. Sed cui minus donatum est, minus requiretur ab eo. Non inuoluat seruus piger talentum vnum : & vno negotiari potest. Erant in arca Noë tristega siue tabulata infima, & media

Act. 10.

& suprema, omne genus animantium eo iubetur induci, vt cæteris pereuntibus, ipsa seruentur. Non excluditur coruus præ aquila, non lepuscus præ leone. Petrus quoque occidere iubetur audacter, & manducare de omnibus non solum volucribus, sed etiam reptilibus, & nihil immundum,

Ioan. 14.

& alienum censere, quod à Domino sanctificatum sit. Habet cœlestis ciuitas mansiones plurimas non minus genere, & gradu, quam ipsa numerositate mirabiles. Neque aurum solum, & gemmæ, sed pili quoque caprarum tabernacu-

Exod. 25.

lo Dei oblatis recipiuntur. Denique qui abiectos istos ac miseros Euangelio ineptos putant, & patriæ cœlestis beneficio excludunt, qui contemnunt, atque pessundant, audiant tandem Dominum, & suum, & ipsorum pariter, seuerè admonentem.

Mat. 18.

Videte ne contemnatis vnum ex his pusillis : dico enim vobis quia Angeli eorum in cœlis semper vident faciem Patris mei, qui in cœlis est. Opinor non indignos humano suffragio, & patrocinio, quibus famulatus exhibetur Angelicus.

Heb. 1.

Omnes enim administratorij spiritus sunt propter eos, qui hæreditatem capiunt salutis. Nul- lum ergo etiam abiectum, & belluinum genus hominum à salute Evangelica alienum censendum est, cum Deus neminem vocet, cui non ad id consequendum quò vocat, intelligentiam, & gra-

etiam

tiam idoneam conferat. Etsi enim vocantur multi, eliguntur pauci, tamen nemo vocatus negligitur, nisi qui vocantem, cum liceret, audire contempsit. Notum à sæculo est Domino opus suum: nostrum est, quoniam ad omnes ire iussi sumus, neminem præterire, omnes vocare, omnes allicere, omnes conuenire. Quinam ex quibusve assumendi sint, ille nouit, cui est æqualiter cura de omnibus, & tamen non omnes prædestinauit ad vitam. Sed ex omni genere, & natione assumi, & ostensum iam est, & præclaro Esaiaë testimonio tandem confirmandum. In fine Prophetiæ illius Dominus loquitur: Et ponam in eis signum & mittam ex eis, qui saluati fuerint ad gentes in mare, in Africam, & Lydiam tenentes sagittam in Italiam, & Græciam ad Insulas longè, ad eos qui non audierunt, & non viderunt gloriam meam. Et annuntiabunt gloriam meam gentibus, & adducent omnes fratres vestros de cunctis gentibus donum Domino, in equis & in quadrigis, & in lecticis, & in mulis, & in carrucis ad montem meum in Hierusalem, dicit Dominus, quomodo si inferant filij Israël munus in vase mundo in domum Domini. Et assumam ex eis Sacerdotes & Leuitas, dicit Dominus. Hoc tanto circuitu verborum satis Spiritus sanctus ostendit, quàm esset Dei consilium immobile, nullum esse genus hominum tam remotum, ad quod Euangelij gratia non perueniret, & de quo pretiosa Deo munera non referret. Signum enim salutare Crucis ponit in frontibus suorum, quod sub Thau olim viderat Ezechiel, & sic armatos mittit

*Act. 15.**Sap. 6.**Esa. 66.**Ezec. 9.*

ad

*Hierony.
in ult. c.
Theodo-
rore in
1. c. Iona.*

Pf. 18.

*AA. 10.
AA. 11.*

adgentes in mare, siue: vt Septuaginta legunt & in Hebræo est, in Tharsis, quo nomine Indiæ remotissima loca significari in scriptura Hieronymus hic refert, & Theodoretus in Ionam, aut immensum mare, vt alij malunt, id est Oceanum. Postquam autem Asiam, Africam, Europamque percurrerint, & ad Insulas vsque vltimas se protulerint, vt non sit loquela & sermo gentium adeo barbararum, vbi non audiantur, & resonent verba eorum, tunc munus Domino egregium afferent, id est fratres suos, magnum & gloriosum prædæ apparatus agentes in equis, in curribus, in quadrigis, in mulis, & carrucis, quod quid est aliud quam pro diuersitate venientium ad Fidem diuersa esse aptata vehicula? Alij equis vehi possunt, vtpote celeri & pernici ingenio, alij quadrigis gloriosi & curribus præpotentes. Sed qui tardiores fuerint & ignobiliiores, habebunt etiam ipsi sua vehicula. Si equis minus sunt apti, at mulis insidere poterunt: si quadrigæ non erunt, at non deerunt vel carrucæ, quibus imponantur. Vt non solum Græci & Sapientes; verum etiam barbari & rudes in domum Domini, quæ est in Hierusalem, id est in Ecclesiam Christi congregentur. Atque vt intelligant omnes, etiam in istis beneplacitum esse Deo nostro, eliget de iis ipsis Sacerdotes sibi & Leuitas. Distribuet, inquam, spiritum suum, & charismata non solum Apostolis, & Israël, verum etiam gentibus, vt cum Petrus, qui est cœli ianitor, viderit Dei donum diffusum in eas pariter, prohibeat aquam, quæ introitus est Ecclesiæ: fratres quoque si fortè elatius disceptent, ipso

ipso exemplo ac testimonio diuino edocti conticescant. Nihil enim magis confirmat animos fidelium Christi prædicatorum, quàm testimonium Spiritus sancti per dona sua, & charismata, quæ partitur, vt vult. Et quidem dona spiritus, signa & miracula, quæ in Fidei prædicatione innotuerunt, his etiam temporibus, quando charitas vsque adeo refrixit, enumerare longum esset tum in Orientali illa India, tum in hac Occidentali. Res lapponensium notæ iam sunt. Synarum regio ingens diu tentata, iam vtrunque aperta navigatione Lusitanorum, & nostrorum ex noua Hispania. De Mexicanis multa narrantur. De Insularibus ipse quoque aliqua ex parte nonnulla conspexi. Historiæ inuenti noui orbis loquuntur multa, & miranda, & vera, quorum hodie quoque testes satis Fide dignos habemus. Duo, quæ recentia sunt exempli gratia non morabor apponere. Fœmina in suæ infidelitatis errore obstinata, & superstitioni cuidam veneficæ addictissima, quæ cæteris omnibus in illa familia baptizatis sola repugnauerat: morbo iam vltimo laborans misit ad sacerdotem, vt ad se festinaret, non enim se posse exire de vita, nisi aqua prius saluari perfunderetur. Semel atque iterum accersitus tandem venit, inuenit anum in extremis agentem, & baptismum magno affectu poscentem: rogat, cur tandiu distulerit: respondet illa, sibi nihil minus fuisse semper in animo, quàm fieri Christianam, oderat enim, vel ipsum nomen, sed tamen morti iam propinquanti astitisse sibi iuuenem candidum, qui anteactam vitam acriter reprehenderit, & Christi religionem quantocyus suscipere persuaderet.

contra verò tetrum quendam Æthiopem altera ex parte patriam superstitionem diu inculcasse: & cum anxia diu hæreret, tandem vicisse iuuenem Christi: statim tantum sibi baptismi desiderium accensum, vt nihil aliud lamentaretur, quam se à prima ætate non fuisse Christianam. Quid multa? Interrogata de fide pro more, & pœnitentiam ante actæ vitæ magno dolore significans, baptizatur, & baptizata protinus animam efflat, ipso sacerdote cum cæteris, qui aderant, admirante vehementer, cuius ego factum narratione cognoui, qui etiam legitimo testimonio probatum ad Episcopum suum transmittendum curauit. Fuit vir quoque apud nos, qui hodie etiam viuit, coniugatus in valle Humai vocata, olim baptizatus, & testimonium habens bonum in simplicitate sua, & sobrietate. Hic grauitè ægrotans, cum mortuus omnino crederetur ab vxore, quæ sola cadauer viri seruabat opertum, expectans ad sepulturam alicuius adiutorium (erant enim soli in loco satis remoto) triduum integrum iacuit, vt putabatur, exanimis, panno coopertus: cum repente mouere se cœpit, & vxorem admirantem ac pauentem vocans, vera esse dixit, quæ à Patribus dicerentur de vita futura. Nam & se perductum à quodam multa ac stupenda vidisse. Cum res sacerdoti innotuisset, qui hominis ruditatem optimè nosset, & miraretur tanta de rebus spiritualibus, & occultis ex ordine referentem, iam morbo leuatum ad Archiepiscopum examinandum transmisit: cuius consilio, & à nostris fratribus, & à multis aliis diligenter interrogatus, apertè, & responsionum ordine, & sensu, & ipsa

vultus

vultus constantia, & lacrymis ac profundo quodam affectu declaravit illa omnia non aliter sibi potuisse innotescere, quàm facta super eum manu Domini mirabilem extasum. Id quod vitæ demum innocentia satis postea confirmavit: atque hodie quoque Dominicus (hoc hominis nomen est) dicitur multa narrare de sæculo futuro iis, quos audituros vtiliter iudicat. Ferè eiusdem exempli est cum illo Curmacuriali, de quo Augustinus scribit in lib. de Cura pro mortuis agenda, & cum illo altero Steelsio, de quo narrat in historia Anglicana. Non dubium est quin Deus charam habeat salutem Indorum, atque ex his numerosissimis populis multos in regnum Christi adoptarit, perducendos ad patriam eo ordine, & modo & tempore, quod ipse constituit. Firmum enim fundamentum Dei stat habens signaculum hoc, Cognovit Dominus, qui sunt eius.

*Aug. de
cura pro
mortuis.
c. 12.*

*Bed. lib.
Angli.
histo.*

2. Tim. 2.

CAPUT VII.

*Quomodo Indorum ingenia tractanda
sunt, ut Christo lucrifiant.*

SEd ingenium barbarorum, moresque belluini nobis stomachum mouent. Primum quidem debemus non esse nobismetipsis sapientes, sed humilibus, ut monet Apostolus, consentientes. Deinde repetendum est sedulò Christum pro omnibus esse mortuum, ut qui viuunt non sibi viuant, sed ei, qui pro ipsis mortuus est, sed quia

Rom. 12.

2. Cor. 5.

non hoc, vt par est, æstimamus, idcirco charitas Christi non vrget nos. Quòd si pro barbaro, &

Colof. 3. Scythia mortuus est Christus, profectò à salute non alienantur homines, si dici potest, etiam irrationales, quod oportet etiam, atque etiam aduertere & animo altius insculpere. Non enim exiget amplius à quoquam Deus, quàm illius natura Deo adiuuante præstare queat. Barbaros præ Græcis atque Indos nonnullos præ nostris si quis dispiciat, nihil aliud ferè censeat, quàm præ hominibus rationalibus irrationalia iumenta. At vtrisque Dei bonitas locum parat, vtraque ad do-

Hier. 31. mum suam congregat. Seminabo, ait, in Hieremia, domum Iuda, & domum Israël semine hominum, & semine iumentorum. Vna est Ecclesia, quæ non solum propagatur humano semine, sed etiam belluino. Cuius magnificentiæ amplitudi-

Pf. 35. nem admiratus propheta exclamat, Quemadmodum multiplicasti misericordiam tuâ Deus? Quid ita? Dixerat nempe homines & iumenta saluabis

Ambrosius in Psal. 35. Domine. Quæ verba edisserēs sanctus Ambrosius, Quid est homines & iumenta? Rationabiles vti- que & irrationabiles. Rationabilibus iustitia: irrationabilibus misericordia. Alij reguntur, alij nutriuntur. Quam interpretandi rationem vt per iumenta diuinæ literæ intelligant homines iu-

Hieronymus in Hier. 6. mentis similes sensu, etiam Hieronymus sequitur, atque alij patres, vt Gregorius in illa verba.

31. & Ioan. 6. 3. Greg. lib. 11. mor. 6. 2. Pf. 67. Animalia tua habitabunt in ea. Reuera in Ecclesia Christi etiam iumenta saluantur, quia Dei misericordia multiplicata est. Vides hominem, exigui sensus, ingenio tardum, iudicij inopem, ne contemnas, ne regno cœlorum ineptum pu-

res. At non percipit quæ Dei sunt, & stultitia est 1. Cor. 2.
 illi quicquid spiritualiter dicitur, nec potest intelligere. Adhuc noli repellere, & istum potest
 ac vult saluare, qui neminem vult perire. Mystra 1. Pet. 3.
 ria fidei pronuntiat, neque intelligit, imo vix
 etiam pronuntiat: sæpe dicendo, sæpe inculcan-
 do nihil penè imbuitur, semper hebes, & trun-
 cus, perinde atque iumentum canere doceas.
 Rursus aio, ne desperes irrationalis est, iumentum
 denique Æthiops aut Indus. Audi Ambrosium
 istos esse regendos verbi capistro ad Fidem. Ne-
 que enim si satis ratione non potest capere, quæ
 docetur, non etiam poterit quantum sufficit Fi-
 de apprehendere, ut saluus fiat. Alioqui si non
 potest credere, ut illum oportet, quomodo qui
 non crediderit, condemnabitur? Nisi prædica-
 tione Euangelij contendas damuari posse, sal- Marc. 16
 uum esse non posse. Quod impium nefas auertat
 Deus à Christiano. Certissimè igitur retinendum
 est nullam barbariem, sensu carere ad Fidem ne-
 cessario. Indi porrò, omnibus consentientibus,
 non usque adeò ingenij ac sensus inopes sunt: quin
 potius, si velint animum appellere, acuti satis.
 At moribus, inquis, Indus est inuerecundis, ven-
 tri, & veneri, sine relictatione obsequens: su-
 perstitionis mirè obseruator, & tenax. Et isti
 etiam salus est, si regatur. Chamo & fræno con- Ps. 31.
 stringe maxillas, onera congruenter, adhibe, si
 opus sit, stimulum. Quod si calcitrarit, noli ira-
 tus gladium adigere, sed punge moderatè, & co-
 hibe paulatim, donec se assuescat præbere obe-
 dientem. Nempe si equus tuus impingat calces,
 siue equitem dorio, seu frænum depulit ore, non
 statim

statim ferro enecas , aut domo abiicis , propterea quòd rem tuam , ac pretium pecuniæ tuæ non vis tibi perire. Quod si homo doctrinam statim non accipiat, neque se docenti bene accommodet , statim fastidiendus , aut exterminandus erit? Neque Christi pretium , & sanguis cogitabitur? Seruilem planè naturam esse barbarorum experientia magna ex parte docuit. Ac ferè nisi metus, & vis aliqua afferatur , more puerorum , obedire contemnunt. Quid igitur : liberali tantum , & virili ingenio salus speranda est? An etiam puero pædagogus in Christo adhibendus est? Est planè, est disciplina quædam cautior, & vigilatior exercenda , & virga interdum vtendum , sed in Christo , compellendi sunt intrare ad cœnam , sed in

Luc. 14.

Prou. 29.

Prou. 29.

Ecccl. 33.

Ibidem.

Domino. Non enim quæ ipsorum sunt , sed ipsi quærendi. Scriptum est , virga , atque correptio tribuit sapientiam : puer autem qui dimittitur voluntati suæ, confundit matrem suam. Et rursus, seruus verbis non potest erudiri , quia quod dicis intelligit , & respondere contemnit. Et alibi, Cibariorum , & virga , & onus asino : panis, & disciplina , & opus seruo, operatur in disciplina, & quærit requiescere : laxa manus illi , & quæret libertatem , idest , cum adhuc premitur opere, cogitat desidiam , quid erit , si se solutum , & vacantem viderit? Fugam sanè cogitabit , atque ideò adiungitur, iugum , & lorum curuant collum durum, & seruum inclinant operationes assiduas. Et mox, mitte illum in operationem , ne vacet : multam enim malitiam docuit otiositas. Ac licèt præcepta hæc de moribus data à sapientibus de administrando & regendo conuenienter. vniuerso man-

cipiorum

cipiorum genere perspicuè loquantur, & verè : quod experientia quotidiana satis indicat in his regionibus, vbi nulla domestica obsequia, nulla externa opera nisi à seruis Æthiopibus sunt, quorum re vera mores disciplinam seueriorem, & assiduos labores exigunt : tamen de iis etiam accipienda sunt, qui, & si conditione serui non sunt, ingenuos tamen mores non præ se ferunt. Etenim iisdem testimoniis seueritatem rigidiorē aduersus contumaces homines adhibendam, etsi olim secus sensisset, tamen aperta experientia rei se commotum Augustinus profitetur scribens contra Donatistas & Circumcelliones genus hominum improbissimum ac seuerissimum. Illud autem ab eodem glorioso Patre sæpe vsurpatum, magnopere ad rem pertinere arbitror : quemadmodum olim sub veteri testamento fuisse multos, qui ad gratiam noui testamenti pertinerent, id est, qui non spiritu seruitutis in timore, sed spiritu dilectionis, vt Dei filij ducerentur : ita nunc quoque sub Euangelio in Ecclesia plurimos esse, quibus veteris testamenti status & institutio quodammodo congruat, homines magna ex parte animales, spiritum vix habentes, Qui tamen à salutis via non protinus excluduntur, sed pro suo modo conuenienter instituendi sunt. Docuit verò nos cœlestis sapientia antiquum illum populum ceruicosum duabus maximè rebus frænatum, labore, & metu : quod vtrumque seruorum est proprium. Laborem quidem & inexhaustam quandam occupationem videre licet in multitudine sacrificiorum, lotionum, vntionum, rituum, obseruantiarum, ceremoniarumque omnium, ita his vt

*Epist. 50.
ad Bonif.*

detinerentur, vt vix idola sua & commenta cogitare sinerentur. Metum verò quæ legis pagina non incuteret? Vt terrore suppliciorum, & ipso sæpius iam factò periculo ad præcepta salutis appellerent animum, & contentione deposita, Ducibus suis discerent obedire. Tale sanè erat eorum ingenium, meliora ac celsiora non caperet. *Ezec. 20.* Quamobrem per Ezechielem Dominus ipse testatur, Eo quòd iudicia mea non fecissent, & præcepta mea reprobaissent, & sabbatha mea violaissent, & post idola patrum suorum fuissent oculi eorum. Ergo, inquit, & ego dedi eis præcepta non bona, & iudicia, in quibus non viuent. Itaque Hebræi atque carnalis populi more maximè regendas esse nationes barbaras has, præsertim *Æthiopum & Indorum Occidentalium* gentes, vt & per occupationum assiduarum salutare onus ab otio, & libidine reuocentur, & per timoris incussi frænum in officio contineantur, cum antiquæ ætatis exempla, tum verò peritissimi cuiusque recens & quotidiana experientia *Eccli. 33.* copiosissimè, ac manifestissimè declarauit. Hoc enim est lorum & iugum, quod sapiens commendat: hæc virga & onus. Hoc modo ad salutem vel inuiti compelluntur intrare. Quæ non eo commemorata sunt omnia, quo vim & sæuitiam à Christi visceribus alienissimam in Indorum nationes vllò modo probem, aut tanquam in feruos dominandum putem, sed vt ostendam etiam illiberali & difficili ingenio non esse salutem desperandam, si & patienter feratur, & sapienter regatur. *1. Cor. 13.* Charitas omnia suffert, omnia sustinet, omnia sperat: patiens est, benigna est. Seueritas
ergo

ergo quæcunque exercenda est, à charitate aliena esse non debet, Charitatis porro nihil est ita proprium, quàm ut non quærat, quæ sua sunt. Hanc si & animo intimè seruet, & re ipsa declarer, qui infirmorum, & insipientium morbis curandis austeriorem se se interdum exhibet medicum, nō est timendum; ne hominum animos subditorum, ita offendat, ut vel à se, vel ab Evangelica simplicitate alienet. Facile enim recuperat charitas, quos disciplina commouerit. Imo verò per vtilem timoris vim ad libertatem filiorum paulatim homines diuinitus inducuntur.

CAPUT VIII.

Barbarorum ineptitudinem non tam à natura, quàm ab educatione, & consuetudine proficisci.

ADdam verò, id quod plurimum interesse arbitror, omnino ad istam ineptitudinem animi morumque Indicorum feritatem non ita facere natalium, stirpisve, aut aëris natiui causas, quemadmodum diuturnam educationem, & consuetudinem bestiarum vitæ non valde dissimilem. Equidem & olim ita mihi persuaseram, & rebus ipsis iam modo confirmatus ab ea sententia auelli minime possum. Ac generaliter sanè si quis contempletur, in humano ingenio longè plus efficit educatio, quàm natiuitas. Et si enim vim habet
non

Tit. I.

non parvam genus , & patria, cum Apostolus Paulus Epimenidi Poëtæ subscribat de Cretensibus , Cretenses semper mendaces , malæ bestiae, ventres pigri , tanquam ad motum peruersitatem patria multum contulerit , notumque illud sit alterius Poëtæ:

Horatius. Ræotum in crasso iurares aëres natum:

Tamen infinitis partibus superat vitæ institutio, & exempla ab ipsa infantia per sensus insculpta rudi adhuc , & tenero animo. Sunt hæ viux formæ mentis humanæ , quibus imbuta ad appetendum , ad agendum , fugiendúmve propria ac familiari propensione fertur , quemadmodum natura quævis iuxta formam sibi insitam operatur.

Aristot. 8. Ethic.

Qua propter illud Philosophi probant omnes, non afferre dolorem consuetæ , sed voluptatem : & consuetudinis vim, alteram esse naturam, & illud

Pron. 12.

nostri sapientis , Adolescens iuxta viam suam etiam cum senuerit , non recedet ab ea. Ac re vera nulla est tam barbara natio , nulla tam stupida, quæ si ab ineunte ætate accuratè , & generosè educetur , non deponat barbariem , induat humanitatem , & morum elegantiam. Videmus, vel in ipsa nostra Hispania homines in pagis quibusdam natos , si apud suos perseuerent , ineptos haberi , ac ridiculos : eosdem traductos in scholas, aut Curiam , aut celebres vrbes miræ solertiæ, ingenio præstare , nemini cedere. Ipsos Æthiopum liberos , quibus nihil apparet absurdius , in palatio enutritos, aded promptos ingenio, & ad quidvis paratos videas , vt si colorem detrahas, nostros putes. Plurimum potest consuetudo in omni genere morum in vtrâque partem , & boni , & mali.

mali. Quamobrem D. Chrysoft. vbi mores perdi-
 tos seruorum exposuit, parumque idoneos dixit ad
 virtutis doctrinam capeffendam, sapientiffimè
 adiunxit: Non id quidem naturæ causa, absit: *Hom. 4.*
 verum propter conuersationis vitæque negligèn- *in epist.*
 tiam, solent enim huiusmodi in iis, quæ mores *ad Titum*
 tangunt, negligi à Dominis. Nihil enim fermè
 aliud curantij, in quorum potestate sunt, quàm
 ministerium suum. Quod si mores illorum com-
 ponere aliquando studeant, & hoc sui gratia tan-
 tum faciunt, ne istis negotia exhibeant, mole-
 stique sint. Quæ B. Patris sententia nostrorum ho-
 minum vaticinatio mihi videtur: Accusant natu-
 ram, moresque barbarorum, ipsi nihil adhibent
 curæ, nisi vt seruis vtantur ad suas priuatas com-
 moditates. Qua igitur ratione homines pecudum
 instar enutritos ad fidei doctrinam ineptos esse
 causaris? Si ipse ita esses informatus, inter istos
 & te quid quæso discriminis interesset: Audi eun-
 dem Patrem in causa adhuc seruorum immoran-
 tem, Cum igitur sic negligantur, inquit, nemi- *In eadem*
 nemque habeant, cui componendi illos, ac for- *Homil.*
 mandandi studium sit, meritò ad ipsa nequitiae præ-
 rupta ac præcipitia deuoluuntur. Si enim vbi Pa-
 ter instat, & Mater, & Pædagogus, & Nutritius,
 & Magister, & æquales, ipsaque libertatis opi-
 nio, & alia plurima, perdifficile quispiam ma-
 lorum contubernia consortiaque deuitat, quid
 putas his omnibus destitutos, qui quotidie scele-
 stis commiscantur hominibus, & cum quibus
 volunt licenter congregiuntur, cum sit nemo, qui
 ipsorum conuersationem amicitiasque disquirat?
 Quid arbitraris eiusmodi homines fore? Nonne
 ad

*Legē
Chry. 6.
pist. 1. ad
Cor. ho. 7.*

*Greg. l. 9.
Reg. c. 17.*

*Aug. ep.
64.*

ad supremos scelerum vertices euasuros? Idcirco difficile est profecto seruum fieri bonum. Hactenus ille. Non ergo naturam barbarorum deinceps accusemus, sed socordiam potius nostram, & negligentiam. Perdifficile negotium est dediscere natales, & consuetudinem inueteratam, atque inde ad mores, & inusitados, & sensui ac libidini penitus iniucundos transformari. In omni antiquitate fuit non mediocris labor Euangelij Magistrorum in transferenda ad Fidei regulas, & conuersationem veteri hominum consuetudine. Testis est historia vniuersa. Multa Iudæis legi assuetis Apostolica Ecclesia condonauit, vsque dum prorsus exuti Mosem, Christum induerent. Multa de Æthnicismo tolerauit antiquitas: in ipsis primæuis Christianis magna alioqui miracula edentibus vix victimarum cruor elui poterat, vt oportuerit Apostolum sæpius ea de re monere Corinthios. Scribit Gregorius Papa ad Augustinum Anglorum primum Episcopum mores gentilicos, & patrios paulatim debere emendari, & patienter toleranda esse, quæ non possunt, ita facile corrigi. Lectio omnium pene nationalium Conciliorum indicat peculiarem sanctorum Patrum curam in relegandis paulatim ritibus quibusdam maiorum. In Africa multa vsque ad sua tempora Augustinus perdurasse testatur. Ne igitur despereamus, aut tumultuemur, si de pristina barbarie, & superstitione, & animali vita in baptizatis Indorum populis multum adhuc permanere videamus, cum præsertim, & ipsorum ingenia rudiora sint, & nostra diligentia nullo modo cum veterum labore comparanda. Mores sensim mutantur

cur in melius, Fides Christi magnam totius humani sensus, & affectus habet abnegationem. Pro lucro non mediocri computandum est, quicquid ex tam horrida, tamque inculta barbarie humanitatis, aut etiam Christianitatis eluceat. Exemplo ac solatio sit Dominus omnium, qui populi ceruicosissimi mores adeò ingratos, & insuaves sustinuit per annos quadraginta, imo plusquam quadringentos: quem tamen, & delere facile poterat, & magnis potius beneficiis inuitabat, ut hominis improbitatem Dei patientia benignitasque superaret.

CAPUT IX.

Quòd linguae difficultas non deterrire debeat ab Euangelij propagatione.

Sermonis autem, & locorum difficultates non exiguae illae quidem sunt: sed ut charitatem exerceant hominis Dei, non ut extinguant. Apostolis quidem datum scimus donum esse linguarum, propterea quod pauci Christi praecones toto orbe salutis nuntium breui insonare debebant. Quamobrem Paulus gratias agit Deo, quòd omnium lingua loqueretur. Quandiu verò generale illud munus spiritus in Ecclesia perduravit, neque apud veteres compertum lego, neque ego facile dixerim. Illud pro comperto habemus praedicationem Euangelij posterioribus saeculis processisse, cum linguarum dona cessassent, sed charitas omnium

1. Cor.

14.

omnium donorum maximum studiosè ageret , vt quod decrat in dono, augeretur ad meritum. Profectò enim posteriores hac in re , & si secus aliis fortasse videbitur : non ita infœliciores fuere maioribus. Etenim vt Christus ad Thomam dixit,

Ioan. 20. Fidem ex oculis , & tactu colligentem , Beati qui non viderunt , & crediderunt : ita etiam dicere quispiam queat beatos eos , qui non acceperunt sermonem , & tamen prædicauerunt. Hic enim vtrunque mercedis est loco , & pugnare , & ipsa sibi arma expensis propriis parare : & prædicare inquam , & sermonem necessarium prædicationi discere. Vt ergo in prima rerum conditione , ita naturas instituit summus opifex, vt vnumquodque perfectum ederetur iuxta genus suum, nullo terræ labore, nullo cœli circuitu: at mox iussit semen proferre , vnde terra laborata genus vnumquodque repararet : ita sanè oportuit in regeneratione mundi per verbum idem omnipotens primas stirpes diuinitus perfectas surgere, deinceps harum seminibus accedente humani studij labore genus Evangelicum propagari, cum iam , & numero multi essent , & temporum non premerentur angustiis. Beati quidem oculi , qui viderunt Dominum : sed beati quoque qui non viderunt , & crediderunt. Fœlices quibus Spiritus sanctus dedit donum linguarum, interpretationem sermonum : at non infelices , qui per charitatem spiritus de suo ponunt in opere Domini , quod non acceperunt. Quanquam , & hoc ipsum posuisse , accepisse est. Iam illud multum mouere nos debet , quòd videmus ad gentes profundi sermonis , & ignotæ linguæ homines

mines penetrare lucri spe, nec deterreri barbarie immensa, sed vniuersa mercium gratia lustrare, non Æthiopum innumerabiles linguas, non Sy-
nārum, non Tartarorum, non Brasiliensium, non extremi Oceani litora recusare, & quicquid inter Mendocinum Promontorium, & Fretum Magellanicum situm est infinitis terræ, ac maris spatiis, idque vtroque ex latere, & Boreali, & Australi, magno studio obire: denique, & si quem tellus extrema refuso summouet Oceano, vel si quem extenta plagarum, Quatuor in medio dirimit plaga solis iniqui, hunc perscrutantur, huius linguæ vel balbutientes se accommodant, ut aurum, argentum, ligna pretiosa, mercesque exquisitas ad suos euehant, quæstum vndique augeant: tam longam, & periculosam peregrinationem auidissimè suscipiunt, ut profecto admirabile sit omnes pene portus vtriusque Oceani, omnes sinus orbis terrarum stationibus nauium Hispaniensium teneri, omnes Indorum Satrapas cum nostris mercatoribus & nautis commercium habere. At qui pretiosissimas merces quærimus animas Dei imagine insignes, qui lucra non incerta, aut breuia; sed æterna in cœlis speramus linguæ difficultatem, locorum asperitatem causamur, ut appareat verè prudentiores esse filios huius sæculi in generatione sua filiis lucis. Et sermonis quidem difficultas in hoc spatio regio Piru magna ex parte leuata est, cum generalis illa Ingarum lingua, quam Quichuam vocant, vbiq[ue] in usu sit, & ea ipsa non ardua scitu præsertim ad artem iam redacta diligentia, & studio viri de Indorum natione optimè meriti. Quod si in superioribus

*Virg 7.
Æneid.*

Luc. 16.

rioribus prouinciis ea potissimum viget quæ appellatur Aimara, neque ipsa est valde difficilis, neque multum ab illa altera abhorrens. In Mexicano Regno aiunt esse linguam quoque generalem, vt faciliior sit communicatio inter se tam multorum populorum, & gentium. Quod si Christianus Princeps id effecisset in Christi gratiam, quod barbarus Guainacapa imperio suo effecit, vt vna lingua omnes vterentur, aut vna certe vbique haberetur, profecto maximam prædicationi Euangelij commoditatem fuisset allaturus. Verum vbi id fieri minus potest, superest, vt charitas ardens in Christum, industria, & labore perficiat, quod deest naturæ. Qua in re P. Francisci Xauerij admirabile extat exemplum, qui in perdiscenda Malauarica lingua tantum operæ, & sudoris posuit, tantundemque in Iapponensi, atque aliis longè inter se diuersis, vt si Apostolico dono linguarum præditus esset, non posset maiore gloria Christi nomen in tanto terrarum orbe
1. Cor. 13. vulgare. Certè enim Charitas omnia potest & cum linguæ cessarint, vna charitas pro omnibus est.

CAPVT X.

De Habitatione inter Indos.

INter obiectiones supra propositas postrema petebatur ex incommoda habitatione barbarorum. Huic modo respondendum est hoc excepto

cepto quòd quæstio illa grauis , Vtrum expediat
 sedem figere inter Iudæos , quòd vulgò doctrinas
 tenere dicunt , an potius discurrendo inter eos
 verbum salutis disseminare , quod proprium
 est missionum , in suum locum reseruanda est,
 vbi Deo propitio accuratè tractabitur , & quid
 habeat commodi vel incommodi res vtræque ,
 explicabitur , tum verò quibus incommodis
 melius ac facilius occurri queat. Illud tantum
 nunc agitur , vt neque asperitates locorum ,
 neque impedimenta itinerum , neque verò ha-
 bitationis ipsius Indicæ ratio præpostera Chri-
 sti seruum ab instituto retardent. Et quidem la-
 bores æumnæque iter mari terræque fa-
 cientium , & multæ , & graues sunt. Verum
 quis aliter sibi persuaferit , nisi demens sit , cum
 patria , atque amicis , & charis omnibus reli-
 ctis velut alter Abraham peregrinatur , & exit
 nesciens , quo eat ? Ego inquit , ero merces tua
 magna nimis. Hoc Apostolicum opus , hæc
 gloria propria. Et tamen qui misit suos sine
 pera , & sacculo , & argento , quærit ab ipsis,
 Nunquid aliquid defuit vobis ? Nusquam diui-
 na Prouidentia , neque certius , neque dulcius
 sui experimentum præbet , quàm cum illius ope
 fretus incertas sedes , & humana præsidia incerta
 constituit experiri. Paulus Apostolus clamat,
 sint mores sine auaritia , contenti præsentibus.
 Ipse enim dixit , Non te deseram , neque de-
 relinquam , ita vt fidenter dicamus , Dominus
 mihi adiutor , non timebo quid faciat mihi ho-
 mo. Iam vero quod de habitatione rara , & in-
 commoda barbarorum multi causantur , Pri-
 mum

Gen. 12.

Heb. 11.

Gen. 15.

Mat. 10.

Luc. 22.

Heb. 13.

Deut. 31.

Ios. 1.

Ps. 55.

117.

DE PROVVRANDA INDORVM

num sunt planè frequentissimæ provinciæ Indo-
rum, & populi numerosissimi, vbi commodè &
fructuose Christi doctrina tradi possit. Id quo-
que quod diu efflagitatum, & non ita du-
dum institutum est de reductione Indorum
ad certos populos, vt non sparsim more fera-
rum, sed communiter oppida inhabitent, dici
non potest quantæ sit vtilitatis futurum ad
Mat. 10. omnem vitæ barbarorum informationem. De-
inde sicut saluator suos admonuit, si non re-
ceperint vos in hac ciuitate, fugite in aliam;
Amen dico vobis non consummabitis omnes
ciuitates Israël, donec veniat regnum Dei: ita
nobis quoque dictum arbitremur, vt disper-
sos fratres nostros quæramus: quod si alicun-
de, aut locorum iniuria, aut sermonis incom-
moditate depellimur, aut ipsa rerum necessita-
te vrgemur, transeamus ad alios. Neque enim
timendum est, ne aut electos, Dei sermo præ-
tereat, aut vbi laboret vtiliter, Christi opera-
rius non inueniat. Dabit Dominus, dabit ver-
bum Euangelizantibus virtute multa, qui
F. f. 67. diuina authoritate promisit, Ego
Ioan. 15. posui vos, vt eatis, & fructum
plurimum affe-
ratis.

CAPUT XI.

*Quòd Euangelij ministri curare debeant,
ne impedimentum Euangelio
ponant.*

Qui verò Euangelizandi munus suscipiunt, curare magnopere debent, ne Euangelio ipsi impedimento sint. Accidit enim sæpenu-mero, ut Indorum desidiam ac vecordiam ij maxime accusent, qui ministerium suum minime implent: qui si diligentius se ipsos excuterent, synceriusque iudicaret, profecto inuenirent ipsis potius, quam Indis tribuendum esse, quòd interdum minus fœliciter res Christiana processerit. Quidam, inquit Paulus, non syncere Christum annuntiant, quidam autem ex bona voluntate. Quin etiam addit, omnes quæ sua sunt quærere, non quæ Iesu Christi. Quominus mirandum est si de nobis etiam tale aliquid dici queat. Vtinamque illud ad nos minime pertineat, Væ vobis qui circuitis mare, & aridam, ut faciatis vnum profelytum, & cum factus fuerit, facitis illum filium gehennæ duplo, quam estis vos. Quod vehementer Augustinus execratur in libro de Fide, & operibus, Nec sic, inquit, faciamus Christianos, quomodo Iudæi profelytos, quibus Dominus ait: Væ vobis & cætera. Sæpè enim quos pastores cura, beneficentia, fide sen-

Phil. 1.

Mat. 23.

Lib. de Fi-
de, & per
cap. 26.

DE PROCURANDA INDORVM

*Mich. 3.
Amos. 1.*

*Mich. 1.
Prou. 13.
Ps. 36.
Ecclesi. 5.*

Ezech. 22.

tire oportuit, hos potius sæuos lupos miseri greges, experiuntur. Comminantur certè diuinæ literæ nobis, Qui violenter, ait Michæas, tollitis pelles eorum desuper eis, & carnem desuper ossibus eorum. Atque alius quoque Propheta, Odio habuerunt corripientem in porta, & loquentem recta siue perfectè abominati sunt, Idcirco pro eo quod diripiebatis pauperem, & prædam electam tollebatis ab eo, domos quadro lapide ædificabitis, & non habitabitis in eis, vineas plantabitis amantissimas, & non bibetis vinum earum. Quod profectò vaticiniū vereor ne Indicæ opes nimium experiantur, cum instar somnij nimium properatæ fortunæ, & oriantur, & occidant, & quæ de meretricibus congregata sunt, ita Deo comminante, vsque ad meretricis mercedem reuertantur. Festinata quippe substantia minuetur, deficientesque sicut fumus deficient, quoniam non prosperabitur possessio scelerata. Igitur temporales Domini Indorum, ne cupiditate & violentia salutem eorum impendant, timendum est. De nobis autem, id est, de ministris Ecclesiasticis fortassis non sit minor querela, atque vtinam minime ad nos pertineant illa prophetica, Principes eius in medio eius, quasi lupi rapientes prædam ad effundendum sanguinem, & ad perdendas animas, & auare sectanda lucra. Prophetæ autem eius lineabant eos absque temperamento, videntes vana, diuinantes eis mendacium, populi terræ calumniabantur calumniam, & rapiebant violenter egenum, & pauperem affligebant, & aduenam opprimebant calumnia absque iudicio. Sine temperamento hi

liniunt,

liniunt, qui peruersis ausis colorem vndecumque
 quærunt, etiamsi nulla vera ratione subsistat.
 Sed illud formidandum & dolendum, quod ad-
 iungit sermo diuinus: Et quæsiui de eis virum,
 qui interponeret sepem, & staret oppositus con-
 tra me pro terra, ne dissiparem eam, & non in-
 ueni: & effudi super eos indignationem meam.
 In igne enim iræ meæ consumpsi eos, viam eo-
 rum in caput eorum reddidi, ait Dominus Deus. *Mich. 3.*
 Nec dissimilis Michæas est, Principes eius in mu-
 neribus iudicabant, & sacerdotes eius in merce-
 de docebant, & super Dominum quiescebant
 tlicentes, Nunquid non Dominus in medio no-
 strum? Non venient super nos mala. Propter hoc
 causa vestri Sion quasi ager arabitur, & Hierusa-
 lem quasi aceruus lapidum erit, & mons tem-
 pli in excelso sylvarum. Sophonias quoque
 inclamat, ac post multa concludit, Desolatæ *Soph. 3.*
 sunt ciuitates eorum non remanente viro, neque
 villo habitatore. Quæ prolixè recitata sunt pro-
 phetica oracula, quod similia quadam ex parte
 hisce quoque temporibus accidisse cernamus.
 Noui equidem permultos esse & Ecclesiastici,
 & sæcularis ordinis viros, qui piè ac religiose
 Neophytorum causam agant, atque ita commo-
 dorum suorum rationem habeant, vt salutem
 fortunamque Indorum non negligant. Verum
 apud alios res ita habet, vt expressit sermo pro-
 pheticus. Neque id mirari homines debent, cum
 his certè in locis auaritia maximè vigeat, vbi il-
 lius plurima materia est, atque argenti copia
 plurima. Quæ enim alia est remotissimas regio-
 nes penetrandi causa? Cur immensos Oceani cir-
 D j cuitus,

cuitus, & labores homines subeunt? Nempe ut
 modestissime dicam, propriis fortunis consulere
 arbitrantur, cum aut suam, aut suorum inopiam
 argento ex India collecto se depulsuros confidunt.
 Neque id ego reprehendo modo, sed illud ago,
 ut non omnem in Indos culpam reiiciamus, si
 prouentus Euangelici in hoc agro non ita læti
 atque vberēs extiterint. Existēt profecto qua-
 les volumus, si nos ij operarij simus, quos ager
 dominicus postulat, si Christum, non nostra quæ-
 ramus. Nam quæ fidei propagatio, quæ morum
 institutio speranda sit, si iuxta Prophetam sacer-
 dotes non solum mercede doceamus, sed mer-
 cedem etiam potissimum requiramus? Re vera
 verendum est, ne vænale putent barbari esse Euan-
 gelium, vænalia sacramenta, neque animas no-
 bis curæ esse sed nummum. At dignus est opera-
 rius mercede sua. Dignus planè. Sed manducan-
 dum est, ut Euangelizes, non Euangelizandum,
 ut manduces. An verò Euangelizandum, ut dite-
 ris? Ut congeras? Ut opibus plenus reuertaris in
 patriam? Iam verò quam sanctè, quam integrè,
 quam innocenter viuamus omnes qui Christi san-
 ctissimam legem barbaris promulgamus, nos
 ipsos interrogemus. Certè barbari fidem nostram
 de moribus iudicant. Procliuius quippe est, quod
 videas, credere quàm quod audias. Rarò per-
 suadet factis sermo contrarius. Illud autem ma-
 gnopere prouidendum est iis qui inter fidei ty-
 rones versantur, ne priuato suo malo publicam
 Christianæ familiæ existimationem lædant, atque
 corrumpant, neve dum ex quibusdam cæteros
 coniectant, omnes criminentur. Vitium enim, ut
 scitè

Mich. 3.

scitè dixit Gregorius Theologus similem causam
agens, ad omnes facilè manat, atque ob multo-
rum vel etiam quorundam culpam, vniuersus or-
do in inuidiam crimenque vertitur. Quodque
miserrimum est hæc criminatio non in nobis
consistit ac defigitur; verum vltèrius se porrigit,
ac magnum & venerandum religionis nostræ
mysterium in inuidiam trahit. Hoc illud est, quod
Deus vehementer queritur; Propter vos iugiter
nomen meum blasphematur inter gentes. Desina-
mus igitur tantopere barbarorum infidelitatem,
& morum peruersitatem accusare; & nostram
aliquando agnoscamus ignauiam, qui non di-
gnè Euangelio Christi conuersemur, plùsque ope-
ræ in colligendò argento ponamus, quam in ac-
quirendo populo Dei.

*In ora-
tione de
Pacè. 3.*

*Esaï. 52.
Ezec. 36.
Rom. 2.*

CAPVT XII.

*De Castitate & abdicatione necessaria ad
Euangelizandum.*

TRia verò sunt, quæ fidei prædicationi &
cultui vehementissime officiunt, avaritia,
impudicitia, violentia: quemadmodum numero
totidem Euangelium maximè promouent, Vitæ
continentia, Abdicatio omnium, Mansuetudo:
Quæ, si quis velit parumper aduertere, Aposto-
lis & à Domino commendata, cum prædicandis
Euangelio instituerentur, & ab ipsis diligenter
seruata comperiet. Atque impuditiæ quidem
labes

labes manifeste contemptum parit. Nihil enim perinde homini Philosopho ignominie ac dedecori est, ac more pecudis libidini prosterni. Et quidem in omni doctorum aut magistratuum gradu ita res habet: at in Evangelico viro, qui vitam totam supra humanam ac penitus cœlestem instituit, id dedecoris dici non potest, quantum offendat oculos, quàm reddat abicctum, & aspernabilem. Quam ob causam ut ego sanè opinor, etsi sunt alia grauiora crimina, nulla tamen ab antiquis patribus grauius animaduersa in homine Ecclesiastico, ut qui priscos canones legerit, merito miretur ob semel admissum stuprum, irrecoverabiliter de omni sacerdotali gradu & ministerio Ecclesiastico depelli conuictum. Idcirco Apostolus Paulus & toties & tantopere Discipulos Timotheum & Titum, in quibus Ecclesiæ magistros informat, castitatis cuiusdam perfectæ admonet. In omni castitate, inquit, & rursus, Te ipsum castum custodi. Et alibi, Te ipsum præbe exemplum bonorum operum, in doctrina, in integritate, in grauitate. Ut enim nihil contemptum ita ingenerat præceptoris ut turpitudine ista, & sordes, ita nihil est quod magis admirabilem reddat, atque perfectâ quædam & omni etiam suspitione libera pudicitia. Admirantur, inquit, non concurrentibus vobis in eandem luxuriæ confusionem. Virtutis cuiusdam cœlestis id esse homines opinantur, quod nostri barbari, ubi forte intuentur, adeo suspiciunt, ut vix credant. Cum quadam in vrbe in foro clericum concionantem, inter cæteros audisset Curaca quispiam Indorum, & sermonis ardorem ac vim admiratus

esser,

1. Tim. 3.

1. ibidem.
Tit. 2.

2. Pet. 4.

esset, conuersus ad Hispanos, quæsiuit, Quænam ratio hominis, & quod institutum esset? Cum respondisset quispiam, Hominem esse sanctum, qui salutem ipsorum tantummodo quæreret. Perrexit ultra quærere, vtrum deliciis, opibusve vacaret, cum esset responsum minimè isthæc ab illo quæri, subdidit barbarus, Cur ergo non alio vitur habitu ac veste, vt genus vitæ declaret? Vide obsecro quam apud illum laborarit ordo Ecclesiasticus. Atque vtinam solus esset. Quemadmodum verò impuditiæ fœditas despicabilem reddit Prædicatorem, ita auaritiæ sordes faciunt odiosum. Atque haud scio an quicquam aliud magis audientium animos à verbo Dei auertat, & alienet, dum pietatem quæstum putant, & sicut scriptum est, vitæ conuersationem compositam esse ad lucrum. Quam professionis Euangelicæ pestem Christus Dominus à prædicaturis discipulis diligentissimè amolitur. Nolite possidere aurum, neque argentum, neque pecuniam in Zonis vestris, non peram in via, neque duas tunicas, neque calciamenta, neque virgam, dignus est operarius cibo suo. Gratis accepistis, gratis date. Quam expresse, quam diligenter, quam etiam minutim inculcatum? Cibus solum Euangelistæ suo Dominus permittit, & quidem vt prædicationis non sit causa, sed fructus. Quærite primum Regnum Dei, & iustitiam eius; & hæc omnia adiicientur vobis. Sed ne ipsum quidem cibum Paulus excellentissimus Prædicator admittit, sed laborat manibus suis, ne quem grauet, vt sine sumptu ponat Euangelium, & gloriæ ducit quod nemini onerosus sit, cum possit oneri esse, vt Christi Apostolus.

1. Tim. 6.
Sap. 13.

Matth.
10.

Luc. 9.

Matth. 6.

1. Thes. 2.

1. Cor. 9.

2. Cor. 11.

stolus.

stolus. Animaduertebat optimus Architectus & sapiens fabricam Euangelij magnopere quavis commodi specie etiam iusti, etiam necessarij, vel impediri, vel certè retardari, ob eam rem eligebar
 1. Cor. 9. potius mori, quam vt gloriam hanc suam, id est
 1. Cor. 15. fructum Euangelij copiosum perderet. Quamobrem præ omnibus Apostolis non solum amplius laborauit, sed multò etiam vberius fructificauit. Ingenerat re vera expoliatio hæc Euangelica animis hominum admirabilem quandam viam amoris, vt quem tuis commodis insudantem videas, oblitum sui, rem propriam negligentem, hunc totis visceribus complectaris, tanquam syncerè & paternè tua curantem. Quare cupiditatem omnem, & turpe lucrum Principes Apostolorum Petrus & Paulus, in Ecclesiæ ministris sæpe & grauissimè detestantur, si qua ergo plaga dolenda est in hac causa, auaritia est. Quid enim non agat mali auri sacra fames?

CAPVT XIII.

Quantum officiat Fidei violentia.

Sed præter hæc incommoda, ipsa Fidei primordia ex multa nocendi licentia non medio-cre damnum accépère. Atque vt stirps primis iniitiis nata peruerse, & inflexe, non facile mox vitium deponit, cum creuerit, sed aut perfringi, aut natiuo suo ertori permitti debet, ita prorsus cum Indorum natió bellici apparatus potius authorita-
 re,

re, quam germana prædicatione magna ex parte initio Christum acceperit, dubitare non possumus, quin animo conceptum metum, & seruilem conditionem non ingenuè in Filios Dei translata per regenerationem, adhuc retineat, ac rebus ipsis, ubi sibi impune licere putat, ostendat. Nihil enim ita fidei susceptioni aduersatur, atque vis omnis, & violentia. Non enim est fides nisi volentium, ut prouerbij loco sit illud Augustini, cætera posse hominem etiam nolentem, credere non nisi volentem. Quamobrem mansuetudo, & suauitas vel præcipuè commendatur Euangelicis viris. Omnem, inquit, ostendentes mansuetudinem ad omnes homines. Et alibi, Cum modestia corripientem eos, qui resistunt veritati, nequando Deus det illis poenitentiam, & resipiscant. Et Iacobus Apostolus monet, in mansuetudine suscipere insitum verbum, quod potest saluare animas nostras. Quoniam ergo voluntarium est ac liberum cuique obedire Euangelio credendo, neque fides per vim extorta aliorum potest esse, quam dæmonum, suauiter ac beneuole ducendus est, non protrudendus auditor. Hinc diuinus præceptor missurus suos ad Euangelizandum exorditur, Ecce ego mitto vos sicut agnos in medio luporum. Ac vide Domini magnificentiam, ab agnis lupi superati sunt, ac deposita feritate in eundem se gregem adiunxerunt. Quando obsecro ferocia potentium minis cederet? Quando orbis domaretur vi? Tacendo, tolerando, benemerendo de inimicis, vicerunt Christi milites, non cædendo, non terrendo, non minitando. Quod si non receperint Euangelium, quid præcipis Domine? Iubebantne ignem de

*Aug. 17.
16. in Io.*

Tit. 3.

2. Tim. 2.

Iacob. 1.

Iac. 2.

Mat. 10.

cælo

60 DE PROCVRANDA INDORVM
 cœlo descendere? Ruinæ tradent ciuitatem? Nesci-
 tis, inquit, cuius spiritus estis. Filius hominis non
 venit perdere, sed saluare. Quid ergo? Si non rece-
 perint vos in ista ciuitate, ite in aliam. Quam be-
 nigne? Quam dulciter? Itaque qui sponite Euange-
 lio cedunt, verè cedunt, fidem corde concipiunt,
 & ore confitentur, & fixi manent, & toti Dei sunt,
 non partim in Deo, partim in Baal claudicantes,
 specie & voce Christiani, animo, & re infideles. Id
 enim consequatur necesse est, vbi contra naturam
 suam, contra Domini voluntatem, Fides extorques-
 tur: inuitis.

C A P V T XIV.

*Qualis in Religione Christiana magna ex
 parte sit Natio Indorum.*

4. Reg. 17

AC mihi quidem videtur res Indorum persi-
 milis antiquæ Samaritanorum historiæ,
 quam in 4. lib. Regnorum legimus, vbi terrore ac
 metu ferarum incursantium perculsi habitatores
 perierunt Dei sacerdotem, qui Dei legem doce-
 ret. Cum venisset igitur, ait, vnus de sacerdotibus
 his qui captiui ducti fuerant de Samaria, habitauit
 in Bethel, & docebat eos, quomodo colerent Do-
 minum. Et mox post enumeratas superstitiones
 varias illorum adiungit, Et cum Dominum cole-
 rent, Dijs quoque suis seruebant, iuxta consue-
 tudinem gentium, de quibus translati fuerant Sa-
 mariam, vsque in præsentem diem morem se-
 quuntur

quuntur antiquum. Non timent Dominum, neque custodiunt ceremonias eius, atque iudicia & legem, & mandatum & cætera. Postremo concludit: Fucrunt igitur gentes istæ timentes Dominum, sed nihilominus, & idolis suis seruientes. Nam & filij eorum, & nepotes sicut fecerunt patres sui, ita faciunt vsque in præsentem diem. Non puto totum nostrorum Indorum habitum, & religiositatem describi potuisse, vel plenius, vel elegantius. Et Christum colunt, & dijs suis seruiunt: & timent Dominum, & non timent: vtrumque enim confirmat scriptura diuina: Timent ore tenus, timent dum instat Iudex, aut presbyter, timent denique simulatoriam Christianitatis speciem præferentes: non timent animo, non colunt serio, neque corde credunt ad iustitiam. Quid plura? Filij, & nepotes eorum, sicut fecerunt patres sui, sic faciunt vsque in præsentem diem.

CAPVT XV.

Nihilominus vera Fidei, ac salutis apud Indos spem esse magnam, alienumque esse à Dei spiritu contrà sentire.

EN nostrorum temporum Samaria: vbi Christus habitat cum Socot Benot Babylonio, cum Nergel Cuthæo, cum Asima, cum Nebahaz, 4. Reg. 17. & Thartac, & Adramelech, & Anamelech, & quibuscunque alijs portentis Deorum. Vbi non tam colitur

*Act. 8.**Ioann. 4.**Ibidem.**Coloss. 1.**Es. 4. 35.**Matt. 10.**Act. 1.*

colitur cum alijs, quam iniuriam suam, & contumeliam ferre quodammodo cogitur, Dæmonibus confociatus, & eorum honores consortio suo cumulans. Sed non sunt ideo Samaritani nostri auerſandi, non statim desperandi. Et Samariæ quoque recordabitur Dominus: & erit, cum accipiat verbum Dei, & Simone relicto Philippum audiat, Petrum ac Ioannem prædicatores mereatur. Erit cum dicat, Et nos credimus, quia hic est vere Saluator mundi. Omnino Samaritanis quoque sui ipsius copiam facit Christus, & ostendit suis regiones iam albas ad messem, & laborem fœlicem pronuntiat, & fructum copiosum pollicetur in vitam æternam. Cur ergo spem abijcimus? Cur Iudæorum supercilio Samaritanos procul abire iubebimus? Ac non magis Dominum illiusque Apostolos imitantes Euangelium proferemus? Et quod in toto mundo fructificat, & crescit, & hinc in terra arida, & inuia aliquando tandem fructificaturum credemus? Nam quæ erat sitiens, erit in fontes aquarum, quia scissæ sunt in deserto rupes, & in flumina eruperunt. Veniet, veniet prorsus tempus suum Samariæ: & qui prius in mandatis acceperant, In viam gentium ne abieritis, & ciuitates Samaritanorum ne intraueritis, audient postea Dominum præcipientem, Accipietis virtutem Spiritus sancti superuenientis in vos: & eritis mihi testes non solum¹ in Iudæa, sed in omni etiam Samaria, & vsque ad vltimum terræ. Ac mihi sanè persuasum est, neque inde possum reuocare sententiã, & si aliquanto serius, & si laboriosius, & parcius fortasse pro initijs, tamen

men aliquando Spiritus sancti benignitate Indorum gentes fore, ut in Evangelij gratia multum locupletentur, & vberes coram Domino Sabaoth fructus ferant. Neque verò alias ego difficultates perpendo aut timeo, quam operariorum fidelium, & prudentium in Christo magnam inopiam cum magna profecto copia mercenariorum, & eorum qui sua quærunt, non quæ Iesu Christi. Igitur si Dominus veros operarios miserit in messem suam operarios, inquam, inconfusibiles, rectè tractantes verbum veritatis, quos hæc natio hominum, non sua quærere, sed se perspiciat, qui libenter filijs thesaurizent, insuper & seipsos impendere pro animarum salute promptissimi sint, quibus adeo chari sint filij spirituales, ut non solum Evangelium Christi, sed ipsa quoque viscera tradere ament, qui probati à Deo ita loquantur, ut non quærant hominibus placere, sed Deo, qui probat corda, quorum sermo non sit in specie adulationis, neque in occasione avaritiæ, denique qui non suam sed Dei gloriâ syncerissimè quærant: tunc planè manipuli pleni in arca Christi colligentur, tunc consumpta sterilitate, lætissimæ segetes surgent, & congregabuntur in vitam æternam. Patientia interim opus est, & fidei ad Deum oratione, ut mittat operarios suos. Neque leuiter hæc & temerè pronuntiata quisquam putet: ipsa rei experientia locuples testis est. Sunt homines Dei, rari illi quidem, sed sunt certè, qui exemplo suo comprobauerunt Indorum perniciem non ex ipsis esse, qui nacti fideles, strenuos, ac prudentes sacerdotes ac duces, sentiunt planè doctrinæ vim, & vita ipsa respondent, paulatim quidem

1. Tim. 1.

Phil. 2.

2. Cor. 12.

1. Thes. 1.

*Marc. 4.**3. Reg. 19
Rom. 11.**2. Tim. 2.
Psal. 58.*

quidem vt solent omnia, sed tamen accipiunt semen, & vltro fructificant primum quidem herbam, id est externum religionis cultum, deinde spicam intelligentiæ, & affectus qualiscunque, postremo plenum frumentum in spica, hoc est Fidem iam plenè per dilectionem operantem dignè Deo. Néque enim summa incrementa exigenda sunt vno statim die. Quod si quæ à Catholico Rege, & illius senatu (pro magno Christianæ religionis ardore, & studio salutis Indorum, edicta manarunt, rei fortunisque istorum bene ac sapienter prospicientia tam diligenter ac fideliter executioni committantur, quàm sunt necessariò procurata, non solum facilis, & iucunda; verum etiam fructuosa admodum futura esset breui Indicæ salutis administratio. Et tamen utcunque res hætenus se habuerit, non tam malè habet, quin multa Indorum millia Christo lucrifiant: atque vbi quidam Helix ac nimij zelatores omnes Indorum gentes post Baal suum abire conqueruntur, omnes, retinere Guacas suas, & suo Zupai seruire clamant, ibi reliquit sibi Dominus plusquam septem millia, qui non curuant genu ante Baal, ibi & Abdias interdum est, etiam Prophetiæ dono cumulatus. Nouit Dominus qui sunt eius, omnes gentes seruiant ei. Quæ cum ita sint, non est Christiani pectoris, sed à Christi spiritu alienissimi, homines inde auocare, & à negotio gerendo dehortari: cum difficultates omnes quantacunque sint, Dei præcepto, & gratia superiores esse non possint, fructusque animarum, vt parcissimè succedat in tam infinita multitudo non possit non esse copiosus, & merces apud Deum multò maxima.

CAPVT

CAPVT XVI.

*Quòd etiam in præsentia labore ministro-
rum fructus animarum sit longè maior.*

AC fructum Euangelicæ prædicationis nos quidem animarum multitudine metimur, sicut scriptum est, In vnum colligam reliquias Is- *Mich. 2.* raël, pariter ponam illum quasi gregem in ouili, quasi pecus in medio caularum, tumultuabuntur à multitudine hominum. Ipse tamen Dominus *Matt. 21.* dicit multos esse vocatos, paucos verò electos, multos ad Euangelium, & nuptias inuitatos, pau- *Luc. 14.* cos dignos se conuiuio præbuisse. Quod sapienter reputans Paulus sibi quoque ipsi timet, & non *1. Cor. 9.* contentus tam raræ vocationis suæ gratia, corpus adhuc castigat, & domat, ne prædicans aliis re- *1. Cor. 10.* probus ipse efficiatur: neque nos hoc consilij vllò modo ignorare patitur. Vt cùm antiquos patres tot ac tantis beneficiis cumulos videamus, & baptismo figuratiuo lotos, & mensa Domini spi- *Heb. 4.* rituali communicatos, & tamen ex tot millibus hominum vix vnum, aut alterum bene placuisse coram Domino, quibus iratus iurauit, si introi- *Psal. 94.* bunt in requiem meam: nos quoque timeamus, neque nobis ipsis de accepta iam gratia placeamus, & dum ad correctionem nostram scripta illa omnia intelligimus, qui nobis videmur stare in gratia ista Euangelij, omnibus modis caueamus, ne inde excidamus. Nam & semen recipi, & exo- *Matt. 13.* riri parum prodest, quando vel solis iniuria, vel *Luc. 13.*

Isai. 9.
Isai. 10.
Ose. 1.
Rom. 4.

66 DE PROCURANDA INDORVM
spinarum improbitate corrumpitur. Pauci sunt
reuera, qui saluantur: neque semper multiplicata
gente, magnificatur statim lætitia. Sed & si fuerit
multitudo filiorum Israël, vt arena maris, reliquæ
saluæ fient. Tota enim electorum ciuitas magna
quidem ipsa per se, sed cum numerositate filiorum
 sæculi huius comparata, exigua est: vt verissimè
à sanctis Prophetis, reliquæ saluæ esse dicantur,
veluti ex magno aliquo aceruo, aut copioso con-
uiuio. Hæc eò pertinent omnia, vt inanis quo-
rundam opinio refellatur, qui iustitiam Dei igno-
rantes, & suam volentes statuere, iustitiæ Dei
non sunt subiecti. Hi tum demum messem vbe-
rem, & fructum copiosum sibi cogitant, cum ad
vorum succedunt omnia, atque hominum my-
riades lucro suo vix sufficere putant: quorum, vt
est laudanda voluntas, ita corrigenda sententia:
ne si gloriam Apostolicam æmulentur, & primi-
tias Euangelij, quicquid inferius est, aut minus
amplum, sterilitatem, & inopiam arbitrentur.
Contentus certè esse debet operarius, si in vineæ
labore & fructu, Domini atque hæredis volun-
tati satisfactum sit. Sed vt lucra Euangelica ipsa
multitudine metiamur, equidem non intelligo,
cur labore, & opera ministrorum non longe maior
appareat fructus salutis Indorum. Nam vt ea affe-
ram, quæ omnes norunt, quæque ipsi causæ Indo-
rum infestissimi confitentur, profecto, & renas-
centium, & in Christo morientium turba non po-
test non esse plurima. Quot enim infantium mil-
lia quotidie de interitu æterno eripiuntur salutari
lauacro? Qui empti statim de terra teneri Christi
sanguinis foetus Deo immaculati offeruntur. Et si
enim

enim frequens est ubique infantulos recentes ab utero extinguere, ob quam causam Aristoteles scribit gentium fuisse consuetudinem, non ante nomen imponere quàm octauus dies veluti iam vi-cturum puerum renuntiaret, quòd primo dierum septenario vix vitæ nomine dignus haberi possit, propter naturæ inconstantiam: tamen, ut quorundam opinio fert, nescio quo cæli, aërisve occulto tactu in tota prope regione duobus circulis Tropicis comprehensa, multò frequentissimum est, recens ortos pueros ante paucos dies interire, ut vix ausim dicere, vtra portio sit maior abeuntium, an permanentium. Quos omnes cum sibi Christus amator paruulorum sacro sui sanguinis fonte purgatos lucrifaciat, quis non vel integrum hoc vniuersi laboris Indici operæpretium ducat? Ipsos grandiores intueamur. Illud firmum est diuinæ legis oraculum, in vltimo agone vitæ, de tota causâ pronuntiari: ut quem mors iustificatum inueniat; huic non admodum obsit vitæ superioris iniquitas. Atque de Indorum gente hæc plurimorum sententia est, eorûmque maxime, qui diutius cum iis versantur, urgente metu mortis, plerosque sacerdotem protinus sibi vocare, Patrem adesse obnixè petere, peccata sua dolenter, & seriò confiteri, magna Fidei, & pœnitentiæ indicia præbere, idque cum liceret illis, vel sine teste res suas agere, & pro arbitratu componere. Quem eorum animum cum à nonnullis audissem, & aliqua ex parte ipse quoque expertus essem, quæsiui tamen diligentius ex aliis, quos experientiores iudicabam, & minus causæ Indorum affectos: & quamvis non pauci essent præcipuè

*In lib. de
hist.
anim.*

inter Sarrapas, & Curacas ac vetustiores Indorum, qui etiam tunc infidelitatis suæ signa proferrent, tamen plerosque, ut dixi, ita se comparare omnium testimonio comprobavi. Quæ una res magnam profecto salutis Indorum spem facit: propterea quod certum esse videtur internæ fidei & religionis indicium, eo tempore pœnitentiam Ecclesiasticam exoptare, quo maximè veritatis & sensus intimi ratio haberi solet, utpote nulla iam fictionis aut metus causa restante.

Quocirca narrabat Episcopus Popaianensis, cum ipse iam olim in Partibus Mexicanis simul cum aliis sui ordinis viris versaretur (erat enim Augustinianæ familiæ) vehementer admirari se solitum illorum Indorum fidem, qui iam extremo morbo laborantes & morti propinqui, à suis se portari præciperent, ita ut erant decumbentes lectulis, aut quas Hamacas vocant, longo itinere sex aut septem interdum etiam pluribus milliariis confectis usque ad sacerdotem aut monachum, ut fieret sibi copia confitendi peccata, adeo ut in ipsa via iacentes horum non pauci patris præsentiam præstolantes occurrerent, interdum in ipso itinere extinguerentur. Ac reuera credendum est herum non mediocrem turbam pro sua pietate ac fide, salutari pœnitentia remissionem consequi apud benignum Deum, atque ad vitam migrare perpetuam. Primùm quòd quibus minus naturalis talenti donatum est, ab iis iuxta saluatoris sententiam, minus requirendum sit, exiguo quippe conceditur misericordia. Deinde istorum crimina ut plurimum, non eius generis sunt, ut inexorabilem sibi reddant Deum, atque in ipso

interitu

Zuc. 12.

Mat. 6.

Interitu vetera vlciscentem, cuiusmodi scripturæ prædicant, maximè peccata in Spiritum Sanctum, ex certa malitia perpetrata. Peccant enim plerique vel ignorantia vel carnis infirmitate incitati, quibus si ebrietates, & scortationum flagitià adimas, vix quicquam reliquum sit. Postremò, neque restitutionibus rei alienæ, néque iniuriis, aut inimicitiis impediuntur, néque obstinatione quadam scelera perpetrandi, cum vix avaritiæ, aut violentiæ apud eos sensus sit. Quibus omnibus rebus meritò adducimur, vt de istorum extrema salute non parum speremus, eius præsertim intuentes clementiam, qui pauperis, atque inopis oblationem licet exiguam non contemnit. Mihi verò persuadeo, vt de istorum miserorum confessione, & pœnitentia melius sentiam, quam de multorum sæculi huius potentium ac sapientium in extremo vitæ spiritu ingenti apparatu, & pompa, etiam si sacerdotum longo ordine cingantur, & de male partis diuitiis magna legata Ecclesiis relinquant. Solus ille, qui nouit omnes, scit vnde plures salui fiant. Sæpe quod altum est hominibus, abominatio est ante Deum. Nemo igitur iudicet alienum seruum, néque stulta, & ignobilia mundi contemnat. Itaque vbi operariorum non cernimus vsque adeo magnos sudores pro Christo, non possumus terræ sterilitatem accusare, siquidem in tanta desidia ministrorum hos certè fructus videmus, visuri sine vlla dubitatione longe cumulatioribus, si modo dignitati Euangelij responderit dignitas ministrorum. Néque verò pro paruo ducendum est, quòd expulso Diabolo Christus regnat, ac pro nefariis, & impuris idolorum culti-

*Prou. 1.
Hier. 7.
Esaï. 63.*

Luc. 12.

bus Ecclesiastica Sacramenta celebrantur ; quòd veneficiorum, flagitiorum, parricidiorum quotidie decreſcat furor, nèque audeat ſcelus impune graſſari. Fremit Satanas ſe pulſum, & quantis po-
teſt viribus, agit, vt liceat redire ad priſtinam do-

- Matt. 11.* mum iuxta Euangelium. Idcirco vacuam Chriſti miniſtris optat, & dolens ſe ſpoliari antiquiſſima hæreditate, in omne ſe latus vertit, cui nomina mille, mille nocendi artes, vt ſeruis Chriſti perſuadeat vanos, & inutiles ſuos eſſe labores, vt torpore ac deſperatione ſuperati relinquant diſſipatas Chriſti oues, ab immaniſſimo lupo protinus trucidandas. Sed ſtat Dominus pro populo ſuo, & clamat, Qui non colligit mecum, diſpergit, & qui non eſt mecum, contra me eſt. Adhuc monet, adhuc hortatur leuare oculos, & videre regiones albas ad meſſem : vt qui ſeminat, ſimul gaudeat, & qui metit.
- Joan. 4.*

CAPVT XVII.

*Patientia, & labore effici, vt copioſi fru-
ctus ex hoc agro Dominico
colligantur.*

- Joan. 4.* **I**lla verò Domini ſententia comprobantis in hoc eſſe verbum verum, quia alius eſt, qui ſeminat, & alius eſt, qui metit, ſatis nos confirmare, & conſolari deberet, ſi pro diligentia ſeminandi ſalutis verbum, non apparet illico fidei, & charita-

charitatis fructus assurgere. Fieri enim potest, ut
 sementis iaciendæ præsens tempus sit, futurum
 aliquando certè messis colligendæ. Apostoli in
 Prophetarum labores introisse dicuntur, neque
 tamen, vel hi; vel illi sibi fructificarunt sed Deo,
 qui nouit opportuna tempora iuxta sapientis sen-
 tentiam unicuique negotio. Hominis autem af-
 flictio multa est propterea quod futura scire non
 potest. Sed tamen & qui arat, in spe debet arare
 fructus percipiendi, & huic suæ spei, etiamsi di-
 lata affligat, debet nihilominus patientiam & lon-
 ganimitem adhibere. Ecce agricola, ait Iacobus
 Apostolus, expectat pretiosum fructum terræ, pa-
 tienter ferens, donec accipiat temporaneum &
 ferotinum, patientes igitur estote & vos, & con-
 firmate corda vestra. Abraham longanimiter fe-
 rens adeptus est repromissionem. Ac ferè omnis
 historia, omnis sermo diuinus eo maximè tendit,
 ut per patientiam scripturarum spem & consola-
 tionem habeant, qui laborant quidem, sed labo-
 rum suorum emolumenta non vident. Nihil ma-
 gnum nihil gloria dignum sine patientia vnquam
 peractum est. Ipsos Romanos rerum dominos pa-
 tientia maxime & tolerantia, orbis potitos, non
 solum profanæ, verum etiam sacræ literæ com-
 mendarunt. Neque tam fuit admirabilis potentia
 in prospera, quàm in aduersa fortuna constantia.
 Non videmus nos modo nascentis Ecclesiæ diffi-
 cultates à Christianis orti, inter solos Christianos
 educati. Certè fides vbi nunc firmiores altiores-
 que radices egit, ibi initia habuit longè difficilli-
 ma. Non igitur sementis Euangelicæ fruges ex
 præsentibus tantummodo metiendæ sunt. In lege

*Eccles. 8.**1. Cor. 9.**Prov. 13.**Iac. 5.**Heb. 6.**Rom. 15.**1. Mach.
8.*

Leuit. 19. sanè scriptum legimus : Quando ingressi fueritis terram, & plantaueritis in ea ligna pomifera, auferetis præputia eorum, poma, quæ germinant, immunda erunt vobis, nec edetis ex eis. Quarto autem anno omnis fructus eorum sanctificabitur laudabilis Domino. Quinto autem anno comedetis fructus, congregantes poma, quæ profecerunt. Fortassis in terram nuper ingressi ex plantatis lignis nondum poma matura atque esui apta decerpimus : fortassis fides Indorum nondum fructus satis fame Prædicatorum dignos edidit: adhuc præputia auferenda sunt : adhuc multus pristinæ infidelitatis gustus est. Sed quid agimus ? Itane semper futurum est ? Imò vero posterorum saltem generatione quis dubitat fructus diuino conspectu dignos, omni vetustatis sapore abolito, exorturos ? Erunt nati parentibus feliciores, quod experientia satis docet, erunt fidei magis idonei paternæ suæ superstitione minus imbuti, religioni diligentius innutriti. Neque video cur quisquam contra nobis ominetur infausta. Natio nulla est hominum obsequentior, nulla subiectior. Ingenio nequaquam duro & obtuso, imitandi quicquid viderint, mirè cupidi. In quibus potentiam & regendi authoritatem conspiciunt, nimium venerabundi, dicto citius obsecundantes. His moribus Indos esse præditos, quicumque vel exiliter expertus est, non ignorat. Si ergo magistros nacti sint strenuos, Christi charitate feruentes, qui bono exemplo, ac sana doctrina greges sibi commissos sollicitè pascant, quid non sperandum est, diuina in primis, quæ non deest suis, gratia aspirante ? Sed quoniam omnia hic aspera, omnia aduer-

sa narrantur, vel certè existimantur à multis, ostendam labore & patientia cuncta superari, & de desperatis atque ærumnos in iitiis in lætissimos exitus solere conuerti. Ostendam verò non tam rationibus, quam exemplo Patrum, quod efficacius persuadet. Ac placet paulò fusius referre, quæ de sancto Malachia Episcopo coætaneo suo B. Bernardus scribat, cum primum creatus est Pastor Connereth, quæ ciuitas est in Hybernia. Cùm cœpisset, inquit, pro officio suo agere, tunc intellexit homo Dei, non ad homines se, sed ad bestias destinatum. Nusquam tales expertus erat in quantacūque barbarie, nusquam repererat sic proteruos ad mores, sic ferales ad ritus, sic ad Fidem impios, ad leges barbaros, ceruicosos ad disciplinam, spurcos ad vitam. Christiani nomine, re Pagani non decimas dare, non primitias, non legitima inire coniugia, non facere confessiones, pœnitentias nec qui peteret, nec qui daret, penitus inueniri. Ministri altaris pauci admodum erant, sed quid opus plurium, vbi ipsa paucitas inter laicos prope modum otiosa vacaret? Non erat quod de suis fructificarent officiis in populo nequam. Neque enim in Ecclesiis, aut prædicantis vox, aut cantantis audiebatur. Hoc statim his moribus nemo opinor causæ Indicæ tam iniquus sit, qui non fœliciores, vel potius minus infœlicem prouinciam istam nostram agnoscat. Sed pergamus audire, quod optimi Christi ministri in tam perduto populo officium fuerit. Quid faceret, inquit, athleta Domini? Aut cedendum turpiter, aut periculosè certandum. Sed qui se pastorem, non mercenarium agnoscebat, elegit stare quam fugere, pa-

*In vita
Malach.
cap. 6.*

ratus

ratus & animam dare pro ouibus, si oporteret. Et quanquam omnes lupi, oues nullæ, stetit intrepidus in medio luporum, omnimodis argumentofus, quomodo faceret oues de lupis, Monere communiter, secretò arguere, flere per singulos, nunc asperè, nunc leniter conuenire, prout cuique expedire videbat. In quibus minus hæc profecissent, cor contritum, & humiliatum offerebat pro eis. Quoties noctes totas peruigiles duxit, extendens manus in oratione? Et cùm venire ad Ecclesiam nollent, per vicos, & plateas occurrebat inuitis, & circumiens ciuitatem quærebat anhelus, quem Christo acquireret. Sed horum conatuum exitum forsitan quis expectet? Vbi ergo Bernardus iniurias, & difficultates pro Christo multas à B. Malachia toleratas narrauit, adiungit, Perseuerauit pulsans, & secundum promissionem tandem aliquando pulsanti apertum est. Cessit duritia, quieuit barbaries, & domus exasperans paulatim leniri cœpit, paulatim correctionem admittere, recipere disciplinam. Fiunt de medio barbaricæ leges, Romanæ introducuntur, recipiuntur ubique Ecclesiasticæ consuetudines, contrariæ rejiciuntur, reædificantur Basilicæ, ordinatur Clerus in illis, Sacramentorum ritè solemnia celebrantur. Confessiones fiunt, ad Ecclesiam conueniunt plebes, concubinatus honestat celebritas nuptiarum. Postremò sic mutata in melius omnia, ut hodie illi genti conueniat, quod Dominus per Prophetam dicit, Qui ante non populus meus, nunc populus meus. Hactenus Bernardus de S. Malachia, quæ tam fusè recitata sunt, ut in casu simili imò longè deteriore industriam atque operam boni

Matth. 7.
Luc. 11.

Osc. 2.

boni militis Christi discamus, & fidei ac persec-
rantia certissimos atque vberriimos fructus con-
templemur, ne nostra dissimulata inertia inculti
ac syluosi soli sterilis natura culpetur. Alterum
quoque exemplum eodem pertinens, quamvis alia
ratione ex historia Bedæ probata afferamus. Is l. 2.
Anglicarum rerum refert Mellitum olim à magno
Gregorio cum Augustino missum, propter sæ-
uiantis regis iniurias & plebis exiguum nume-
rum pulsum propria sede Cantuam venisse, vt
cum Laurétio & Iusto Coëpiscopis suis tractaret,
quid facto opus esset. Decretumque communi
consilio fatius esse, vt omnes in patriam redeun-
tes libera ibi mente Domino deseruirent, quam
inter rebelles fidei barbaros sine fructu residerent.
Itaque Mellitus & Iustus in partes Gallia recessê-
re. Cum verò Laurentius eos iam secuturus, ac
Britanniam relicturus esset, iussit ipsa sibi nocte in
Ecclesia B. Apostolorum Petri & Pauli stratum
parari: in quo cum post multas preces, & lachry-
mas ad Deum pro statu Ecclesiæ fusas, obdormis-
set, apparuit ei beatissimus Apostolorum Prin-
ceps, & multo illum tempore secretæ noctis fla-
gellis arctioribus cædens, sciscitabatur Apostoli-
ca districtione, quare gregem, quem sibi ipse cre-
diderat, relinqueret? An mei, inquit, oblitus es
exempli, qui pro paruulis Christi, quos mihi in
iudicium suæ dilectionis commendauerat, vin-
cula, verbera, carceres, afflictiones, ipsam po-
stremam mortem & mortem crucis ab infidelibus
etiam inimicis Christi ipse cum Christo coronan-
dus pertuli? His B. Petri flagellis simul, & exhor-
tationibus animatus, atque eruditus Laurentius,
manere

Lib. 2.

c. 5. & 6.

manere decernit, socios ex Gallia reuocat, Regem sibi haecenus infestum adit, ostensis vulneribus flectit, Deo lucratur, gentis totius salutem ad finem vsque multa cum alacritate procurat, & perseverantiae tandem meritis impetrat. Sola nimirum est, quae coronatur perseverantia. Quibus profecto documentis satis Christi milites admonentur certare vsque ad mortem, & in rebus aduersis diuino auxilio freti, constanter sperare victoriam. Nostrum est pugnare pro viribus, Dei autem, qui bella conterit, vincere. Dei agricultura est, Dei aedificatio est: & neque qui plantat est aliquid, neque qui rigat, sed qui incrementum dat Deus, vnusquisque verò secundum laborem suum, mercedem accipiet.

1. Cor. 3.

CAPVT XVIII.

Quòd non solum futuri fructus spes sit; sed praesentis etiam satis magni certa documenta teneantur.

ATque haec ferè ita à me disputata sunt, tanquam de Indorum gente ad Euangelij veritatem perducenda, tenuiter, & angustè ipse quoque sentirem, neque praecleari alicuius fructus ex his laboribus colligendi spem vllam certam tenerem. Quod quanquam his gentibus, quibus valde me fauere profiteor, non solum parum honestum; verum etiam, vt quidam nostri rectè admonent,

nent, prorsus iniquum, & iniuriosum est, attamen libenter facio, quod malim in causa Indorum asserenda modestus defensor, quam nimius laudator existimari. Vt enim omnes nationes hæ, quæ magno Oceano ambiuntur, ita essent barbaræ, absurdæ, inhumanæ, ingratae, leues, obtusæ, Euangelio denique, & omni spiritali negotio ineptæ, quemadmodum plerique mercenariorum calumniantur, tamen ipsa illorum testificatione effectum est certè hætenus, ut tot gentium salutem nullo modo desperare debeamus, nèque verò salua rerum fide possimus. Itaque quamvis verum esset, quod sumunt salutis Indicæ oppugnatores, tamen quod maximè volunt, minimè efficiunt. Ego verò si planè quod sentio dicturus sum, immeritò prorsus in causa Euangelij harum gentium ingenium naturamque accusari nullo modo dubito, atque equidem certus sum, si Euangelij introitus in has regiones is extitisset, quem Euangelij conditor maximè docuit, non alios illius progressus futuros fuisse, quam quos in prima, & Apostolica Ecclesia legimus. Nam si post talem nostrorum hominum corruptionem, Christum tamen colunt, & si quando magistrum præfectumve paulò modestiorem nacti sunt, mirifice, & auctulant, & colunt, & seipsos quavis cera molliores præbent, & quicquid præclari, atque honesti vident, imitari contendunt, quid Deus bone, futurum fuisse arbitramur, si ex ipsis prædicationis exordiis speciosos Euangelizantium pacem pedes conspexissent, si se solos Christo, non sua quarri, & verbis, & rebus ipsis didicissent? No-


stræ certè minimæ societatis Patres qui in his Peruensibus regionibus annos iam octo versantur, & harum gentium mores experti sunt, tum missiones diuturnas multasque obeundo, tum eorum Parochias propriè suscipiendo, tum verò siue Parochi munere continenter cum his agendo, omnibus prorsus modis se se fructus opinione maiores inuenisse tam seriò testificantur, vt Deum inuocent in animam suam, si non ita res se se habeat. Quidam etiam in primis inter nostros graues, & maturi viri se nusquam, neque faciliores, neque meliores Euangelij segetes vidisse, scriptis literis confirmarunt, qui tamen, cum ex Hispania aduentarent, vulgari, idest, contraria opinione tenebantur, quam facto abundè satis periculo penitus exuertunt. Nam & ingeniosos esse hos Indos, & dociles, & mansuetos, & bonorum sacerdotum amatores, & obediētes, & fastus, opumque contemptores, & quod multi minus credunt, si semel serio, atque ex animo, religionem virtutemque susceperint, in sententia constantes. Quod ego vt sentiam, non difficile adducor, cum videamus Ingarum fidei deditos, aut Guacarum superstitione astrictos, pro occultanda sibi commissa idolorum vanitate, aut gaza recondita, libentissimè passim occumbere, citiusque fortunas vitamque ipsam suam, quam paternæ superstitionis arcana prodere. Quis enim nescit Indos flagris sæpe concisos, sæpe flammis exustos, neque verbum tamen in his cruciatibus contra suam sententiam protulisse? Cur ergo Diabolum Christo fortiorem in seruendo putemus? Aut ad falsa, & perniciosa, quàm ad vera, & salutaria conseruanda constantiores futuras

futuras esse gentes à Deo, & conditas, & redemptas? Da mihi certe apud Indos Apostolicos viros, reddam ipse vicissim ex Indis Apostolicos fructus. Ad nostros, quod nescio quam vitæ honestioris speciem, & cupiditatis abiectiorem fortè conspexerint, ita Indi accurrunt, ut passim confessionis faciendæ causa remotissimi etiam veniant, triginta, aut octoginta leucas emensi: conciones sacras ita frequentasse vidimus, ut insatiabili Dei verbi fame ferri viderentur, vnam ex alia usque ad quatuor, & quinque eodem die adeuntes, idque omnibus diebus Dominicis, & festis: poenitentiae sacramentum perpetua quadam frequentia ita, & peti, & reddi, qui cerneret, iubilum, aut magnæ hebdomadæ tempus omnino crederet, Dari sibi graues poenitentias postulant, & si minus pro votis graues imponuntur, ipsi arripiunt, lachrymis & acerbo dolore se conficientes. Inuitant alij alios ad poenitentiam tanto ardore, ut nostri non posse omnibus satisfacere, & illorum precibus importunis se opprimi conquerantur. In melioris vitæ proposito ita constantes, ut nonnullas scæminas, qui sexus fragilior est, constet, neque precibus, neque minis, neque verò stricto cominus mucrone, & iugulo opposito pervinci potuisse, ut veteribus amatoribus obsequerentur, sua omnia libenter dant: Christi corpus avidissimè esuriunt, & quibus conceditur, mundissimè accipiunt, & religiose conseruant, neque ultra se semel communicatos locum crimini dare posse testantur. Quod secus cum esset aliquando factum, tanta indignatione aduersus se ipsum Indum commotum scimus, ut à se strangu-

lando

lando tanquam impio, & sacrilego Domini corporis proditore vix manus temperare potuerit. Quosdam ea deuotione diuinitus impleri constat, vt de rebus diuinis sapienter prorsus, & excelsè sentiant, & nonnunquam dono cœlesti futura præuideant. Immodica hæc, & per exaggerationem dicta plerique existimabunt, aut etiam velut ficta ridebunt. Verum ego certa, & explorata loquor. Ac quicquid ij, qui videntur sibi soli esse Christiani, contrà discipulent, in nationes quoque gratia Dei diffusa est, & nihil Deus discernit inter istos, & nos, fide purificans corda eorum. Et quidam sane rebus ipsis iam victi fatentur se nihil vnquam tale, aut vidisse, aut de Indorum gente sperasse, atque ita & admirantur, & Deo optimo Patri orphanorum gratias agunt: nonnulli etiam nostros sequi, & se socios adiungere in hac Euangelij fœlicitate contendunt: plurimi contra oppugnare pergunt, quos oportebat de fratrum salute lætari, & coadiutoribus suis beneuolè gratulari. Quod verò à nostris hæcenus effectum est, tantum est quantum operarius quivis Euangelij non infidelis, & imperitus efficere possit. Et ij ipsi ex nostris hanc operam nauantes saluti Indorum pauci admodum numero sunt, præ innumerabili Indorum multitudine. Quibus ex rebus facile profecto intelligi potest, quam sint futuri præclari, atque vberes fructus, si plurimi huic agro excolendo operarij iis viribus, & industria, qua decet, à Domino messis mittantur. Quamvis autem, multas Indorum nationes Euangelio ita esse aptas existimemus, vt nunc scribimus, ac Peruenſes profecto
tales

tales experti sumus, tamen in reliquo etiam opere modum tenebimus, neque ita ample de rebus Indorum dicemus, ne alias Indorum nationes, quas minus esse idoneas non ignoramus, præterisse videamur. Nam etsi nostros Indos, quos novimus, præcipuè spectamus, cuperemus tamen si fieri posset, omnium salutì prodesse, quod scribitur. Nam ex iis quoque, quos in extréma classe posuimus, barbaris, scimus Euangelij gratiam copiosos, & illustres manipulos ferre. Brasilienses profecto constat, nulli barbarorum nationi ingenij feritate, & morum absurditate cedere, quos tamen Societatis Iesu maximè opera, ita esse domitos, & humanis diuinisque legibus assuefactos, nostrorum literis accipimus, ut & homines, & Christiani boni simul esse didicerint. Habet etiam nunc Fides gentium primitias suas. Habet Euangelium inter nationes fructus omni opinione maiores. Illud solummodo orandum est, ut Christus Dominus dignos nos reddat novi testamenti ministros. Nam ad hæc quis tam idoneus? Atque hætenus prædicationem Euangelij apud barbaros, & si magna ex parte difficilem, tamen, & necessariam, & fructu plenam ostendimus. Iam quibus modis aggredienda sit, sequenti disputatione explicandum est.



DE PROCVRANDA
INDORVM SALVTE.
LIBER SECVNDVS.

*Quibus modis Prædicatio Euangelij apud
barbaros aggredienda sit.*

CAPVT PRIMVM.

*Difficile esse rationem tradere prædicandi
barbaris Euangelium.*



VÆ duæ res maximè inter se diffi-
dere videntur, annuntiatio Euange-
licæ Pacis, & intentatio bellici gla-
dij, eas nescio quomodo nostra hæc
tempora non solum coniunxerunt;
verum vt necessariò cohærentes certa lege sanxe-
runt. Et reuera complurium barbarorum hunc
nouum orbem incolentium ingenium eiusmodi
est, vt nisi more ferarum, aliqua ratione cogan-
tur, vix vlla spes sit, aut prorsus nulla, fore ali-
quando, vt humanitatem libertatémque filiorum
Ephes. 2. Dei induant. Porro altera ex parte Fides ipsa ve-
luti

luti reclamatione se Dei esse donum, non opus hominum, & suapte natura ita liberam, ut qui coactam velit, nullam potius efficiat. Itaque hæc sibi admodum repugnantia conciliare, & certam aliquam inire rationem, ut intelligentiæ vera luce consistant, & studiosa charitatis industria cohæreant, maius omnino opus est, quàm ut nostra diligentia, aut ingenio perfici possit. Sed, qui simul nuptias præclaras in Evangelio ac verè regias apparauit, simul conuiuias non nisi laceros & pannosos ac barbaros prorsus offendit, docebit pro sua diuina sapientia seruos suos, qua ratione neque ad epulas admittant indignos, neque quantumvis tamen illiberales & sordidos tanta Domini liberalitate frustrentur, etiamsi honesta quædam vis, ac voluntaria, ut ita dicam, compulsio afferenda sit. Huius tam difficilis negotij in conuersione Barbarorum dux & magistra charitas est, quæ omnia sustinet, omnia sperat, quæ non agit perperam, neque cogitat malum, & ut semel omnia dicam, non quærit quæ sua sunt. Charitatis verò venenum singulare cupiditas est, pessima fidei propagandæ ac nutriendæ nouerca, patrona mendacij, temeritatis magistra, comes violentiæ: quæ mammonæ seruos specie pietatis interdum induit, sed virtutem eius funditus abnegat atque euertit. Funditus igitur extirpanda est, si in ouile Christi per ostium cupimus introire quam plurimos, nam qui contra fecerint, Religionis Christianæ ampliandæ prætextu Christi nomini infestissimos se hostes præbebunt, eruntque de eorum numero, de quibus perspicuè Propheta prædixit. Et eos qui transibant simpliciter, conuertistis in bellum, cau-

Luc. 14.

1. Cor. 13.

Mich. 2.

Habac. 2.

sam paulo superius attulerat , Quoniam contra
 Deum est manus eorum. Et concupierunt agros,
 & violenter tulerunt & rapuerunt domos , & ca-
 lumniabantur virum & domum eius , virum &
 hæreditatem eius. Hos alius quoque Propheta
 mihi compellare videtur : cum ita vehementer in-
 uehitur : Væ qui congregat auaritiā malam do-
 mui suæ, vt sit in excello nidus eius , & liberari se
 putat de manu mali. Cogitasti confusionem do-
 mui tuæ, concidisti populos multos , & peccauit
 anima tua. Quia lapis de pariete clamabit , &
 lignum , quod inter iuncturas ædificiorum est,
 respondebit , & reliqua ; quæ sequuntur , , vatici-
 nium sanè in multis istorum melius oculi cer-
 nunt, quam legunt in Prophetæ codice. Auaritia
 quidem manifesta est omnibus , & auaritiæ causa
 nidus excelsus ambitionis : vnde magnus error
 consequitur hominum , sibi vt putant consulen-
 rium , cum potius, & sibi , & suis ruinam parent.
 Mirabile dictu est , quam cito multorum opes ef-
 fugerint, atque euanuerint , vt ad nepotes ex tanta
 re vix aliquid peruenerit, occulto Dei consilio,
 sed manifesto adeò effectu , vt eas omnes copias
 præstigias putare homines possint. Viderint ergo
 hi , an ad ipsos pertineat , quod Propheta loqui-
 tur , concidisse populos multos ac domui suæ
 confusionem potius cogitasse , quam splendorem
 & gloriam. Sed de his alio loco dicendum
 est. Illud modò teneamus, quod est omnium ma-
 ximum , & præcipuum fundamentum , In hac
 disputatione de ratione prædicandi Barbaris Euan-
 gelium , Cupiditatem nullo modo esse audien-
 dam, cuius suffragio periclitetur Fides necesse est:

Charita

Charitatem verò prudentem pro Magistra semper habendam, quæ cum fideliter salutem proximorum quærit, inter difficiles causas viam inuenit, & omnibus rationibus agit; vt consequatur quod cupit, & quamvis impedimenta interdum multa patiatur, fœlices tamen Deo bene iuuante exitus fortiri solet.

CAPUT II.

*Propter Infidelitatem etiam pertinacem
non licere barbaros debellare.*

EXISTIT verò hoc loco quæstio à multis quidem copiose grauitérquæ tractata, sed necessariò nobis quoque repetenda, An charitatis Christianæ sit barbaros bello domare, vt de bellati Fidei prædicationem recipiant. Illud autem primum sit in causa barbarorum, Non esse facienda mala, vt *Rom. 3.* veniant bona, quod sentire blasphemix genus interpretatur Apostolus. Bella ergo si iniqua sunt, suscipienda non sunt, etiam si certam salutem, vel dimidio orbis allatura videantur. Quamobrem si nullam aliam patere viam prædicationi inter Indos constaret, quam belli expeditione non iusta, clausam potius illis Euangelij ianuam oporteret existimare, quam vt lege Dei perfracta ad eiusdem legis obseruandæ prædicationem irrumperetur. Si enim ea proposita quæstione, vbi quisquam baptizandus in potestate sit impiorum, atque infidelium constitutus, ad quem perueniri non possit vt lauacro regenerationis abluatur, ni-

*August.
lib. con-
tra Men-
dadium,
c. 20.*

si deceptis mentiendo custodibus, Augustinus Theologiæ decus ita respondendum existimat, ut clausum omnino reputandum sit, ubi ad subueniendum animæ æternæ saluti solum per mendacium aditus patet, quis non videat, quanto facilius responderet, si ostium fidei ferro iniusto aperiendum sit, clausum potius existimare oportere? Sed quoniam documentum hoc omni dubitatione vacat, quæ sunt consequentia videamus.

Ioan. 3.

Quæritur, An iusti belli causa in barbaros sit infidelitas ipsa, quod Euangelium repudient? Sed breuiter & absolute, iusta causa non est infidelitas, quæ solum Deum habet iudicem, & ultorem. Qui incredulus est, inquit, ira Dei manet super eum.

Ioan. 5.

Et, Qui non credit iam iudicatus est. Et, Qui non

Mat. 16.

crediderit condemnabitur. Hoc ad illos sanè. Ad

Mat. 10.

nos verò quid? Si non receperint vos, exeuntes excutite puluerem pedum vestrorum in illos. Non dixit, stringite gladios vestros in illos, iacula euibrate. Quomodo verò iacula aut gladium intentare præciperet, qui etiam virgam & baculum de manu abstulerat? Qui non solum inermes ad prædicandum mittit, verum etiam seminudos, discalciatos sine pera, sine argento. Neque enim

Rom. 10.

ait, Ecce ego mitto vos lupos inter oues, sed oues

Esa. 52.

potius inter lupos. Quam speciosi pedes Euange-

Mat. 11.

lizantium pacem, annuntiantium bona. At, quam

terribiles pedes minantium gladium, effundentium sanguinem. Et si armandi sunt milites Christi, qui bella Domini exercituum præliantur, sed longe aliis armis, quæ Paulus magnus dux ostendit,

Ephes. 6.

State succincti lumbos mentis vestræ in veritate, & induti lorica iustitiæ, & calciati pedes

in

in præparationem Euangelij pacis, & reliqua, quæ enumerat. Dicit aliquis, Quid si verba non profunt, & profunt verbera? Si pacem oblatam fastidiunt, bellum intentatum timent? An non satius erit vel per vim saluos facere, quam per nimiam indulgentiam perire permittere? Rectè ista quidem, si in subditos proferantur. Infideles vero quod nobis ius subiecerit, quære: & inuenies Paulum, qui de data sibi à Christo potestate gloriatur, se inde colligentem, Quid mihi de iis, qui foris sunt, iudicare? Nonne eos, qui foris sunt, Dominus iudicabit? Legamus sanctorum Patrum commentarios, certam sententiam Apostoli consentienter docentium, Ecclesiæ ius & fas non esse in infideles, sed in eos tantum, qui per ianuam baptismi ingressi sunt in ouile Christi. Quamobrem Augustinus in quodam sermone alloquens quosdam Christianos, qui ethnicorum se sacrificiis contaminauerant: De iis, inquit, qui foris sunt, nos non iudicamus, illis blandiendum est, vt credant, in vobis putredo hæc ressecanda est. Et mox, Non tollo, inquit, idola illorum, quia nō habeo in illos potestatem, habebo autem cum fuerint facti Christiani. Diuinè quoque Bernardus Eugenium admonet libro de consideratione secundo, Vicario Christi non dominatum in orbem, sed Apostolatum conuenire. Nam Principes gentium dominantur eorum: at non ita erit inter vos. Neque ante paratum se Paulus dicit vlcisci inobedientiam suorum, quàm illorum prior fuerit completa obedientia, id est, vt alibi Augustinus interpretatur, non ante in quenquam agere lege fas est Ecclesiastico viro, quàm per Fidei obedientiam

2. Cor. 10.

et 13.

1. Cor. 5.

Aug. 10.

10. ser. 6.

Ber. 2. iib.

de consid.

2. Cor. 10.

August.

epist. 90.

ad Boni-
facium.

*Th. 1. 1.
q. 12. a. 1.*

dientiam se ipse Ecclesiæ sponte submittat. Siue ergo infideles sint, & Christum ignorent, siue annuntiatum etiam rejiciant, nobis in illos belli decernendi ius nullum est, nulla honesta causa. Quam sententiam satis auctoritate sua confirmavit D. Thomas, cum perspicuè docuit, ad Ecclesiam non pertinere infidelitatem in illis punire, qui nunquam Fidem receperunt. Et quoniam magna copia est eorum, qui ista accuratè exposuerunt, illud solum admonendum arbitror, veniam iis, dare oportere, si qui sint, qui zelo fortassis potius, quam scientia ducti, dum summi Pontificis nunquam satis commendatam auctoritatem amplificare pergunt, etiam extra septa Ecclesiæ gladium illius, & leges proferri volunt, quod tam est absurdum, ut à nemine melius confutetur, quàm ab ipsis summis Pontificibus, & Ecclesiæ Catholicæ perpetuo sensu, atque usu, quæ nunquam in Paganos, aut Iudæos, quod Christi Fidem respuerint, animaduertit, neque religionis diuersitatem causam belli iustam interpretata est. Quando namque vel minimum iurisdictionis actum Ecclesia exercuit in infideles per mille quingentos annos? Quando legem tulit? Quando denique sibi subiici nolentes coëgit, vel etiam attentauit? Nisi fortè temporalem dominatum gentium iure obtinentes, etiam temporales leges sibi subiectos infideles, Christiani Principes tulerint. Quod quia sine controuersia omnes sentiunt, qui modo aliquid sentiunt, non est, quodd morosa disputatione reuocetur in dubium.

*Concil.
Trid. sess.
24. 6. 1.*

CAPVT III.

Quod quibusdam visum sit, propter crimina naturæ contraria, licere nostris barbaros debellare.

QVoniam verò infidelitatis etiam pertinacis, & positivæ, ut loquuntur Theologi, crimen sibi, viuorum, & mortuorum Iudici, puniendum, Christus reseruari voluit, neque vlla Ecclesiastica lege in rebelles animaduerti fas est, illud diligentius discutiendum est, quod potest serio in quæstionem vocari, An seposita causa Fidei ob id possint Barbari debellarí, quòd crimina multa eadèmq; atrocia perpetrant contra ius naturæ. Itaque vtrum possint necne cogi, ut ab idololatria abstineant, à nefariis sacris, & colloctionibus, quas cum ipso Diabolo per quàm frequentes habent, à concubitu masculorum, ab incestuosa pollutione sororum ac matrum, & reliquis id genus flagitiis? Nam facinora longum esset commemorare, quomodo alij alios in dicta causa enecent, computationes ac temulentias suas cruore misceant, humanis multi carnibus pro summis deliciis vescantur, alij pueros innocuos simulacris mactent, alij suorum inferias aliorum sanguine peragant, plerique potentiam ad nihil aliud, quam ad nocendum, & sæuiendum, sibi datam arbitrentur, perinde, atque immanes
feræ,

feræ, quæ naturaliter gradu inferiores ac viribus imbecilles pecudes, prædæ suæ vendicant: ut idem sit apud istos dominari, & prædari: nihil aliud subditum esse, quam potentioris libidini obnoxium esse. Quanta sit, & quam latè patens hæc feritas barbarorum in hoc vastissimo orbe, qui ritus portentosi, quæ legum ac dominorum tyrannis, referre exacte, iusti voluminis opus esset. Historiæ Indicæ quanquam multa narrant; exigua tamen est portio præ illis, quæ res ipsa habet. Verum quod ad rem pertinet, certum est mores Indorum plurimorum esse ferinos, ut quod fabulæ canunt de quibusdam facie quidem homines esse, corpore vero aut pisces, aut sues, aut lupos, id verum esse nostri barbari suis moribus probent. Fremunt ergo nostrorum hominum turba ac tumultuatur, cum ista audiunt, aut etiam intuentur: horum se scelerum ultores æquissimos, milites putant: quicquid contra nefarios naturæ violatores ferro, cæde, incendiis sæuierint, gloriæ ducunt, ac tum demum excursions suas in barbaros laude ac præmio, & apud Deum, & apud homines dignissimas iactant. Neque vero huic vulgari opinioni patroni desuere. Nam ut omittam eorum sententiam, qui penes Ecclesiam & Ecclesiæ caput Rom. Pont. ius esse ad hæc Ethnicorum crimina plectenda statuerunt, qui non tam nostra quam Apostolica voce iam dudum explosi sunt, cum de incestuoso flagitio Corinthij illius (quod contra naturæ leges pugnare quis nesciat?) suos, id est, Christianos acriter obiurgans, eorum, qui foris sunt nempe Paganorum similia crimina ad se nihil pertinere testatus est.

1. Cor. 5.

est. Illi porro probabilius aliquid afferre sibi videntur, qui huiusmodi ius ad vindicanda naturæ contraria scelera, non Ecclesiasticum, sed naturale esse volunt penes optimum quemque Principem, qui possit ac debeat in Remp. perditis legibus ac moribus institutam, si verbo audiens non fuerit, ferro decernere, & belli iure subiectis iustas leges imponere. Quod si ab iis quæras, cum multi Principes, sapientes, & probi, vel sint, vel sibi esse videantur, cui potissimum hoc opus delegandum sit, respondent, in hac re vt in cæteris natura communibus, primo occupanti locum cedere. Ipso ergo iure naturæ barbaros istos posse ab Hispanis debellari, quibus per Rom. Pont. prouincia hæc demandata sit, quique victricia signa primi vltra Herculis columnas extulerint, & ad immensa terrarum spatia omni antiquitati hætenus ignota prouexerint. Néque mirum esse si fortunis suis exciderint Indi, cum potuerint propter sua mala merita etiam vita spoliari iustissime. Et quoniam quibusdam dicere aliquid videntur, & magnopere cum populari sententia istorum consentit oratio, quæ pro causa argumenta afferant, recitemus necesse est. Aristotelis, inquiunt, sententia est, qui in libris Politicis ita scripsit: Quod potest mente prospicere, natura imperat, & dominatur: quod autem potest corpore hoc facere, paret natura, & seruit. Et mox, Barbari quod natura dominetur, non habent: quamobrem aiunt Poëtæ, Græcos barbaris dominari oportere, quod idem natura sit barbarus, & seruus. Cum ergo barbari isti nostri supra modum barbari ac ferini reperti sint, néque mentem

*Primum,
Arist. 1.
Pol. 6.1.*

1. Pol. c. 5.

Lib 7.

Pol. c. 14.

Aug. 5. de

Civ. c. 12.

8. Tho. de

Reg. Pri.

c. 4. 5. 6.

1. Mac. 8.

Secundum.

Cypr. lib.

de Exhor.

ad Mars.

c. 5. 25. 9.

tem habeant ad se, & sua regenda idoneam, natura ipsa comparatum est, ut illis subsint ac pareant, qui dominari rectè possunt, atque eos secundum naturæ leges conuenienter regere. Quod si repugnent, debellari posse iustè idem author affirmat. Bellica, inquit, vi uti oportet contra bestias, & contra eos homines, qui ad parendum nati sunt, nec volunt parère: quia natura id bellum iustum existat. Alibi quoque Philosophus suam hanc sententiam de iusto bello in barbaros amplius explicat ita scribens: Néque exercitatio rerum bellicarum ob id est meditanda, ut in seruitutem adigant immerentes. Sed primum ne ipsi aliis seruire compellantur. Deinde ut imperium quærant gratia utilitatis subiectorum, non ante omnia dominationem. Tertiò ut eis dominentur, qui seruire sunt digni. Hæc ille. Atque huc pertinere videtur aliqua ex parte Romanorū historia, qui quòd æqui, & boni obseruantes forent, omnium potiti existimantur, diuino ita decernente consilio, quorum imperium à sanctis Patribus laudatum legimus, & quod est amplius in ipsis diuinis libris. At infinitis partibus præstant Christiani barbaris, quam olim Romani cæteris. Secundum sit, Filij Israël ob idololatriam atque scelera debellarunt Amorrhæos, & reliquas gentes, quarum scriptura meminit, ut libri Iosué, & Sapientiæ copiosè docent. Cur ergo non liceat Christianis veri Dei cultoribus iniurias illius vlcisci, & ad verum vnius Creatoris cultum idololatrias reuocare? Quam rationem Cypriani confirmat autoritas, si ante aduentum Christi, inquit ille, circa Deum colendum, & idola spernenda,

nenda, hæc præcepta seruata sunt, quanto magis post aduentum Christi & cætera? Præterea, si in lege naturæ viuerent homines, quando nulla erant regna diuisa, nondum Respub. collocata, liceret sapienti, & probo viro improbum à malefactis compescere, vel verbo, vel vi, liceret de pertinace pœnas sumere; nisi velimus naturam adeò sui oblitam, vt nullum constituerit naturaliter suarum legum iudicium, nulli potentiam ad dominandum detulerit. Igitur ad eundem modum Reipub. bene institutæ barbaros, & illeges fas erit ad rationis iura compellere. Alioqui immanissima scelera naturaliter, & multa, & in emendata, imò ne emendabilia quidem permaneant necesse est, quò nihil videtur absurdius. Adde quòd si pueri, vel homines stupidi & semiamentes Reipub. aliquam gubernarent, idque cum insigni detrimento subditorum, liceret profectò vicinis Principibus lege charitatis, & iure naturæ, si non possent aliter perditam illorum administrationem emendare, armis & vi, magistratus, & populum cogere, vt aut sibi Principem crearent idoneum, aut si ne id quidem effici possit, Reipub. ipsius administrationem suscipere per seipso, multum licet reclamantibus illis. Atqui natio Indorum minus habet, vel æquitatis, vel prudentiæ, & iudicij, quam pueri, & semiinsani. Quid ergo culpatur si vel ab inuitis pro ipsorum salute, & pace eripitur Principatus? Postremo innocentem ab iniuria, & cæde defendere quivis potest, atque si opus sit, aggressorem mulctare fortunis, & vita ipsa. Manifestum vero est inter istos innumerabiles innocentium cædes perpetrari,

*1. c. Si
audierit.
Tertium.*

Quartâ.

Quintâ.

trari, cum & obuios quosque capiunt, & trucidant, & in suos quóque immaniter sæuiunt, pueros, fœminas, & miserabile genus neci dantes, adeo vt cruore humano macelli cuiusdam instar permulta loca redundare comperta sint, quorum testis locuples esse potest Mexicana Prouincia. Quamobrem non licere solum, sed etiam quàm maximè expedire barbaros ita insanientes bello domare, rationi consentaneum apparet. Hæc potissimum sunt, quæ pro causa belli Indici afferri à nonnullis solent.

CAPVT IV.

Confutatio superioris sententiæ.

VErum si partium studiis sepositis, quæ tanquam nebulæ quædam crassæ veritatis lumen abscondere solent, lex ipsa æterna consulatur, non dubium est, quin purissimis radiis omnem hanc caliginem, quæ nobis offunditur, depulsura sit, dilucide ostendens, æquè esse iniquum, si vel non iusta fiant, vel quæ iusta sunt, non iustè fiant. Iustè quod iustum est exequeris, ait diuinus Legislato: quam rem præclare explicat Dionysius magnus, & diuinæ, & humanæ sapientiæ ponderator. Infideles sane, idololatrias, masculorum concubitores, incestuosos, sine fœdere, sine misericordia, parentibus non obediētes, ingratos, scelestos, & quibusvis aliis nominibus verè notatos coërceri, mulctari fortunis, atque

*Deut. 16.
Dionys.
epist. 8. ad
Demos-
philum.
Rom. 2.*

que ipso capite plecti, iustitia, & æquitate plenum est, quis hoc neget? Verum à quo, & qua authoritate, id verò quæritur. Néque enim quia tu peccasti, idcirco mihi statim de te pœnas sumere fas est, nisi & ius ego in te habeam, & causâ tuam legitimè transigam. Néq; verò si Resp. aliqua peccet leges condendo flagitiosas, & turpes, aut si moribus perditis Princeps ac Magistratus labefactantur, continuò ius erit Reipub. vicinæ, aut Principi leges ferre meliores, inuitos compellere, vt recipiant, & seruent, non obsequentes ferro aggredi, repugnantes bonis, & vita exuere. Etenim si tantum licentiæ Reipub. in Rempub. tribuas, nihil aliud agas, quam vt breui vniuersum terrarum orbẽ perturbes, & discordia, ac cædibus impleas. Melius, melius omnino diuina, incommutabilis, atque æterna lex sanxit, nullius vnquam emendanda sapientia, aut temeritate violanda, vt id iuris Principi in Principem, Reipub. in Rempub. sit, quod attinet ad leges ferendas, & scelera profliganda, quod est ciui in ciuem, priuato viro in priuatum. Vbi illud solum interessẽ volunt clarissima ingenia, quæ totam hanc rem copiosissimè, & dilucidissimè prosecuta sunt, vt non modo fas sit Reipub. se defendere contra aggredientis iniurias, quod etiam priuato licet, vt vim repellat vi, verum etiam iam acceptas propria authoritate vindicare queat, quod priuato nequaquam licet, id ita docente ratione clarissima, quod ciuis ac priuatus habeat apud quem expostulet, vbi repetat, à quo iniuriæ recompensationem merito expectet, publicum Magistratum; at Respub. contra Rempub. alteram

nam nullum habet, quod adeat, commune tribunal; ac nisi ipsa propria authoritate vlciscatur iniurias, futurum fit, vt rebus omnibus læsa reparari nullo modo queat. Quæ cum ita se habere tum in ipsa naturæ luce veluti in aperta lege notassent, tum perpetuo ab ipso mundi exordio decursu ab omnibus mortalibus seruata, quotquot iustitiæ qualemcunque prætextum bello gerendo præferrent, animaduenterent, sapientes omnes & nostri, & externi eam solam causam bello aggrediendo æquam, & iustam statuerunt, ad resarcienda damna, & iniurias vindicandas, vel suas, vel suorum, id est ciuium, aut sociorum, aut eorum etiam, qui iniquè læsi ipsorum opem implorassent. Præter hanc causæ acceptæ iniuriæ, aut violati iuris gentium, nullam nostri maiores iustam agnouerunt, nèque gloriæ quærendæ, nèque cumulandarum opum, nèque amplificandi dominatus, nèque verò religionis propagandæ. Quotquot verò non læsi arma sumpserunt, eos prædones potius, quam milites vocitandos censuerunt. D. quidem Augustinus suo ipse ingenio, acerrimus quæstionum obscurarum indagator, in hac vero etiam Manichæorum calumnijs, & Ethnicorum contra Fidem Christianam opprobrijs excitatus, sæpe ac diligenter totum hoc de bello gerendo negotium tractans, illud vbique constituit, causam iustam belli solam esse iniuriæ depellendæ necessitatem. Ita quodam loco, bella, inquit, iusta definiri solent, quæ vlciscuntur iniurias. Ambrosius quoque cum de fortitudine in lib. de Offic. disputaret, ita scribit: Non se ipsum committit sibi, alioqui fortitudo sine iustitia iniquitatis

Aug. l. 5.

Quæst. in

Iosue. c.

10.

Ambros.

l. 1. offi.

c. 25.

mate

materia est, quo enim validior est, eo promptior est, ut inferiorem opprimat, cum in ipsis rebus bellicis, iusta bella an iniusta sint, spectandum putetur. Nunquam David nisi laceffit bellum intulit. Vides quale bellum Ambrosius iustum definiat. Illud planè quo exemplo David non nisi laceffit Princeps arma induit. Hos Isidorus secutus bellum iustum definit, quod ex edicto geritur de rebus repetendis, aut propulsandorum hominum causa. Denique bellum gerere necessitatis est. Quod etiam Tullius vidit, cum in tertio de Rep. libro ut idem Augustinus refert (nam ad nos non peruenit opus illud præclarum) definiuit nullum ab optima ciuitate bellum suscipi solere, nisi aut pro Fide, aut pro salute. Fidem intelligens initum cum sociis fœdus, salutem ipsum Reip. contra oppugnantes statum. Et planè quotquot in diuinis literis à sanctis viris bella suscepta referuntur, qui ob id laudantur, quòd fuerint fortes in bello, quòd castra verterint exterorum, à primo illo quod magnus Patriarcha Abraham pro fratris salute gessit usque ad extrema Machabæorum gesta pro patria, lege, & libertate, semper mentio est acceptæ prius iniuriæ, ut magis non recusata cum esset opus, quam quæsitæ cum non esset, appareat, excepto quòd diuina authoritate quædam interdum peracta sunt, quæ non humanis auspiciis sed cœlesti præcepto ascribenda sunt. Sed ut vetera omittamus, Ecclesiæ Catholicæ, quæ firmamentum est veritatis, sensum atq; vsum tenemus aperte, quæ per mille quadringentos annos nunquam in barbaros, aut paganos nihil non aliàs lædentes, arma, vel ipsa sumplit, vel suis cōsuluit, cum essent

*Isidor. lib.
18. c. ym.
c. Gratia.
Caus. 23.
q. 1. 2. c.
3.
Augu. ad
Bonifac.
Augus.
lib. 22. de
ciu. c. 6.*

*Heb. 11.
Gen. 14.*

*Luce. 12.**Greg. lib.
11. Regist.
c. 15 dist
45. c. qui
sincera,
idem l. 1.
epist. 45.**Matt. 16.*

potentissimi ac religiosissimi Principes, atq; constaret externos omni scelere obstrictos. Scit enim fidelis populus Dei Christum interpellatum à quodam, respondisse, O homo quis me constituit iudicem inter vos? Si legati nationis Indorum rebus suis componendis vltro accerferent nostros, haberet fortassis aliquid rationis eiusmodi introducta potestas leges ferendi, emendandi, puniendi. At nunc molestissimè ferunt causæ suæ non vocatos iudices, vltro neos disceptatores, qui non solum leges, & ius dicant inuitis, verum iam olim admissa ferociter vindicent. An sapimus nos plus quam maiores nostri? An Fidei zelo vehementius ardemus? Omnino verum est, quod sanctissimus Gregorius de hac re scripsit, Qui Fidem asperitatibus propagare volunt, suas magis quam Dei causas probantur attendere. Interim quis illud non videat, quam implacabile isto modo Christiani nominis odium apud barbaros excitetur? Quam graue, & immedicabile scandalum? Tota ista res vergit in obstinatum quandam inuidiam, & odium Fidei, & certam perniciem hominum. Neque verò scandalum istud separabile est vllò modo ab hac causa, aut in iis numerandum, quæ non data, sed accepta dicuntur. Christus quod non debet tributum soluit, ne scandalizet; nos nullo modo debitas terras, si spoliemus, vexemus, prædemur, nullumne iustum timebimus scandalum? Res ipsa satis clamat per se. Neque enim ea exempla hæcenus vidimus, quæ licentiæ, & furori militari fræna laxanda persuadeant. Et quod caput est, Catholicorum nostrorum Principum leges longe aliter faciendum esse edicunt, quibus obedire par est.

Quam

Quamobrem præclarissima & sui ordinis & nostri temporis lumina, quæ in causam Indorum propriè inciderunt, eiusmodi belli suscipiendi consilium, idque iuris gravissimè cum disputationibus suis, tum etiam scriptis de industria libris improbarunt. Quorum sententia iamdudum apud omnes obtinuit, Salmantino & Complutensi illustribus Gymnasiis damnantibus, ut audio, atque explodentibus scriptum cuiusdam librum contra causam Indorum, atque ipso Catholici Regis Senatu longe aliam rationem in expeditionibus Indicis præcipiente, cuius æquitatem opportune exponemus, si prius obiectionibus supra propositis responderimus.

CAPUT V.

*Responsio ad obiectiones pro expugnatione
Barbarorum.*

*Caît. 2. 2.
q. 66. art.
8. Victo-
ria Bel.
de Indis,
& de bel-
lo, n. 23.
24. & 40.
Soto in 4.
d. 5. q. 1.
art. 10.
& l. 4. de
iur. &
iur. q. 2.
art. 2.
Anton.
Corduba
Minorit.
1. p. qua-
stionarij,
q. 57.
Cov. 2. p.
relec. Re-
gul. Pec-
ca. §. 10.
Ad pri-
mā obiect.*

AC primum quid sibi voluerit Philosophus barbaros natura servos asserens, non est obscurum cernere, si paulò altius illius disputatio repetatur. Sentit & quidem sapienter, in Rep. bene constituta, natura ipsa docente, alios debere dominari, alios parère, sapientes & viros imperare, imperitos & fœminas obedire, quod profecto verissimum est. Hinc colligit Græcos natura comparatos esse ad imperandum, quod essent sapientiores, barbaros utpote rudes & imperitos ad ser-

100 DE PROVVRANDA INDORVM
uiendum. Quid obsecro verius quàm senes &
maturos præesse natura, adolescentes obtempera-
re, fœminas virorum, pueros maiorum arbitrio
naturaliter regi? Iam qui velit colligere ex his, à
barbaris imperium quod iam habent, eripere li-
cere, eadem ratione conficiet, à fœmina, aut ado-
lescente, vbi regnat, posse per vim extorqueri do-
minatum, itémque à rege imperito regnum, & à
præsule indocto Pontificatum: quod omnibus, &
diuinis, & humanis legibus, quàm repugnet, nemo
non videat. Aliud est enim quid faciendum sit ex
ratione ac secundum naturam: aliud, quid si fiat,
infectum fieri nequeat. Iure ergo sapientiores, &
elegantiores regnant: sed re ipsa imperitus, & bar-
barus si regnet, non ius sed iniuria est, de regno
hunc pellere. Alioqui rapinæ, & cædi res morta-
lium omnes expositas esse oportebit. Quod ex co-
dem Philosopho adiunctum est de iusto bello in
barbaros, qui seruire recusant, obscurius profecto
est, & quod suspicionem non exiguam parit, illa
non tam ex philosophica ratione quam ex popu-
lari quadam opinione profecta esse. Intelligi ta-
men potest, si in hac quoque re Aristotelis autho-
ritas magnopere conseruanda est, in eos barbaros
seruire nolentes bellum iustum decernere, qui
Remp. nullam habent propriam, neque Magistrá-
tus, neque leges, sed ritu ferarum incertis, & sedi-
bus, & legibus vagantur: quales & fuisse olim, &
esse hodie quam plurimos notissimum est. Bellum
autem in hos non omnis illa cædis, & seruitutis
licentia cogitari debet, sed moderata quædam vis,
quatenus humanè, & non bestialiter prorsus viue-
re persuadeatur. Quod si Alexandri, vt quidam fe-
runt,

runt, potentia delectatus, signa Macedonica in orbem vniuersum proferri voluit, nobis non admodum curandum est, quid ille adulatoriè magis quam Philosophicè scripserit. Quanquam non diuersa à nostris sapiens, Rhetorica ad Alexandrum, suscipiendum bellum esse constituit in eos qui Remp. & eius siue amicos, siue socios iniuria violare moliantur. De Romanis parum ad rem pertinent, quæ afferuntur. Etsi enim laudari solent, neq; fortassis immeritò quod legibus æquioribus subditos gubernarint, fœdera, & societates fidelissimè custodierint; tamen multa vsurpasse tyrannicè ne ipsi quidem diffitentur; ita non nemo dixit:

*Aristot. in
Rhet. ad
Alex.
c. ult.*

Non ius arma dedit; potius ius arma dedere.

A S. Augustino illorum imperia vocantur honorifica latrocinia. Neque tamen, si me non fallit memoria, eorum historici celebriores bella gesta narrare solent, nisi quæ aut pro salute, aut pro Fide, ut eorum dixit egregius author; suscepta videri velint. Nā quod de expugnatis Chananæis per Israëlitas assertur, multò robustius nostram confirmat sententiā. Nam cum sanctarum scripturarum tractatores in eam quæstionem incidunt, diligenter causas iusti belli exponunt, & vnā quidem potissimā Augustinus reddit, illud genus belli iustū asserens; quod Deus imperat, qui nouit, quid cuiq; fieri debeat, in quo bello dux ipse, aut populus non tam author, quam minister iudicandus est. Ut ergo præcipienti Deo hecem filij innocentis, religiosè paruit Abrahā, utpote vitæ omnium Domino, ita quoque vel Iosue filius Naue, vel quicumque alius sententiā Dei in populos reos exequi debuit, & iudici ac dominatori omnium manus administras

August.

Ad secundā obiect.

*Aug. lib.
6. Quas.
9. 12. in
Iosue.*

*Aug. lib.
44. quæst.
9. 4. super
Num. 21.
20. & ser.
105. de re-
pore.
Cassianus
collat. 5.
cap. 24.*

Sap. 11.

Sap. 11.

præbere: neque tamen ob id liceat vel patri in filium vel principi in externum populum quantumvis impium, gladium stringere. Adde quod iidem sacri scriptores humanas rationes adiungunt, quibus ex iure gentium bella Hebræorum contra Amorrhæos & cæteros Palæstinos non iniquè gesta declarent. Eas modo persequi longum esset, & instituto non necessarium. Illud modo agimus, ut fiat perspicuum sanctos Patres nullo modo existimasse vel idololatriam, vel quævis alia contra naturam piacula causam idoneam exitisse, ut de loco suo pellerentur illæ gentes, vastarenturque ab Hebræis, siquidem tam sollicitè causas alias exquirunt. Et reuera eadem sunt vel minus graua nostrorum barbarorum crimina, quam quæ illorum scriptura commemorat. Ita enim de his loquitur liber Sapientiæ: Illos enim antiquos inhabitatores terræ sanctæ tuæ, quos exhorruisti, quia odibilia tibi opera faciebant, per medicamina & sacrificia iniusta, & filiorum suorum necatores sine misericordia, & comestores viscerum hominum & deuoratores sanguinis à medio Sacramento tuo, & authores parentes animarum inauxiliatarum perdere voluisti per manus parentum nostrorum, & reliqua. Non opinor horribiliora obiici Indis, iis quoque, quos Carybes vocant, qui sunt omnium truculentissimi. Ob id aptè paulò inferius diuinam auctoritatem exitio illarum gentium interponens, subdit per interrogationem, Quis enim imputabit tibi, si perierint nationes quas tu fecisti? Non enim alius est Deus quam tu, cui cura est de omnibus, ut ostendas, quia non iniuste iudicas iudicium

cium. Hoc est, non inuadis aliena, neque vsurpas iniquè iudicium, si gentes impias cogis commeritas pœnas suorum scelerum dare. Cypriani verò ineptè profertur authoritas, cuius longe alius sensus est. Suscipiens enim illo opere causam Martyrij agere, idolorum cultum vult adeo Christiano virò execrandum, vt quidvis potius perpetiatur, quam id impietatis admittat. Quod vt confirmet, admonet, quam fuerit quondam infestus Deus Idololatriæ, vt ob id cæde grassari in exteros suis iusserit, quanto ergo tempore gratiæ reuelatæ amplius amare debet fidelis ob fugiendum idolorum cultum sanguinem quoque proprium fundere? Ita enim concludit, si ante Christi aduentum circa Deum colendum & idola spernenda hæc præcepta seruata sunt, quanto magis post aduentum Christi seruanda sunt, cum ille veniens non verbis tantum nos hortatus sit, sed & factis, post omnes injurias & contumelias passus quoque & crucifixus, vt nos pati & mori exemplo suo doceret. Hæc Cyprianus. At verò quod de lege naturæ afferebatur, militat potius pro causa Indorum. Neque enim iure Naturæ priuatus de priuato pœnas sumere posset, neque vim aliquam coërcēdi haberet, cum sint omnes homines natura pares. Quoniam vero mores institui recte non poterant, neque Societas in officio contineri, placuit omnibus publicam potestatem creare, in quam jus suum quisque transferret, quæ proinde & leges condere, & supplicio afficere peccantes authoritate totius multitudinis in se transfusa posset. Quod si Magistratus, aut Resp. barbarorum suo muneri non facit satis, habet

*Cypriani
de Exhort.
ad Mari*

*Ad tertiam
obiect.*

iudicem Deum, non Rempub. aut principem aliquem externum. Alioqui cum grauiſſima peccent interdum Principes, aut Magiſtratus noſtri, licet bit, vel Gallo, vel Italo, vel Anglo, Hiſpanienſis Reipub. peccata caſtigare, & ius dicere, vt viſſim inter ſe Principes hac authoritate fungatur. Hoc neque ineptius, neque rebus humanis exiti-
lius dici quicquam poteſt. Neque vero vbi ſubdi-
torum conſentit voluntas, præſidentium ſtolidi-
tas, atque inſipientia poteſt per vim compelli. Itaque ſi Principes barbarorum inique ac tyran-
nice tractarent ſuos, poſſent innocentes per vim
(ſi ſecus non eſſet locus) ab illorum ſcelere, &
iniuria eripi. Sin autem corruptio morum ea eſt,
quam ipſi quoque ſubditi libenter ſequuntur, non
poſſunt ab extraneis compelli ad virtutem. Neque
eſt eadem ratio in pueris, & amentibus Rempub.
adminiſtrantibus. Naturale eſt enim, vt pueri non
dominentur in viros, cum puer etiam ſi ſit om-
nium hæres, nihil à ſeruò differat teſte Paulo, ac
multo minus inſanis in mentis compotes iuris
aliquid eſſe poteſt, quemadmodum, neque belluæ
in hominem. At barbari iſti, & imperantes, &
ſeruientes æquè vel ſapientes ſunt. Quare ſi ligna
ſylueſtria, vt eſt in antiqua parabola, Rhamnum
ſibi prætermiſſa oliua, ficu, & vite, Regem creant,
quid mirum ſi illius incendio concrementur?
Hoc enim in ſumma intereſt, quod barbarus
non natura, ſed ſtudio, & moribus talis eſt, puer,
& amens non ſtudio, ſed natura. Quamobrem
quæ barbari peccant, non eſt cuiuſvis animad-
uertere.

*Ad quar-
tam ob-
iect.*

Gal. 4.

Iudic. 9.

CAPVT VI.

*De bello propter defensionem innocentium,
qui à barbaris trucidantur.*

IN fine huius de bello disputationis non præte- *Ad quin-*
 ribo sententiam illustrium Theologorum, qui *tā obiect.*
 defensionem innocentium, iustum titulum bello
 Indico posse prætendi significant. Aiunt, si mores
 sint adeò tyrannici legesque, ut innocentes pas-
 sim trucidantur, quod Carybes faciunt, ut eis ves-
 cantur, diisque suis immolent, tunc sanè temporis
 licere nostris, & cuivis Principi eiusmodi infeli-
 ces homines à cæde tyrannica eripere, ac si opus
 sit, ferro decernere, & barbaros ab ea immanita-
 te reuocare. Cuius documenti manifestam esse
 rationem quod fas sit homini priuato innocentem
 de alterius nece, etiam cum inuasoris cæde, si
 opus sit, eripere, multò ergo melius id Reipub. li-
 cebit in Rempub. alteram. Vnicuique enim man- *Eccl. 17.*
 dasse Deum de proximo suo. Et rursus, Erue eos, *Prou. 24.*
 qui ducuntur ad mortem, & qui trahuntur ad in-
 teritum, liberare ne cesses. Addunt præterea non
 obstare rationi iam dictæ, si ipsi, qui occiduntur,
 sponte patiantur, & seipsos offerant neci, imo
 etiam à nostris liberari inde quàm maximè re-
 nuant. Neque enim esse Dominos vitæ suæ, &
 planè quamvis libens patris irati mucroni, filius
 supponeret iugulum, liceret, nihilominus vel in-
 vitum à cæde eripere. Hæc illi disserunt: quibus
 equidem

equidem nullo modo contradixero, cum sciam pro fide iustè suscipi bellum, fidē verò seruādam ei qui læsus à potentiore, ad nostra auxilia confugit. Innocentis verò defensionem à morte præsertim, etiam si ipse taceat, natura ipsa clamante, cuius valenti opem ferre, commendatam esse etiam atque etiam omnes quantum puto consentient. Itaque efficitur, iusti belli causam contra barbaros homicidas, defensionem innocentium esse: Verum hæc quamvis disputata subtiliter; si tamen conferantur ad rem parum accommodata intuentur. Cum enim defensio ista cum minimo lædenti damno adhibenda est; unde neque dominio spoliari barbari possunt aut vita, si possunt terrore aut subiectione aliqua contineri: tum verò nullius est rationis eos velle defendere; quorum grauiorem perpetres cædem. Constat verò copiosissime, bello Indico plures infinitis partibus absumi quam vlla barbarorum tyrannide. Quare si moraliter loquendum est, vix poterit, vel potius nunquam omnino poterit suscepti belli aduersus Indos causa iusta in defensione innocentium collocari. Etenim quod & supra admonui & sæpe repetendum est, vastationis Chananæorum & terræ Palæstinæ occupatæ neque hanc commemorant sancti Patres causam, cum profecto sacræ literæ manifestè doceant nationes illas omni scelere contaminatas, neque etiam à plurimo innocentium sanguine temperasse. In libro Sapientiæ legimus ad hunc modum: Aut enim filios suos sacrificantes, aut obscura sacrificia facientes, aut insanix plenas vigilias habentes, neque vitam, neque nuptias mundas iam custodiunt, sed alius
alium

alium per inuidiam occidit, aut adulterans con-
 tristat, & omnia commixta sunt, sanguis, homi-
 cidium, furtum, & fictio; corruptio, & infidelitas,
 turbatio, & periurium, tumultus bonorum, Dei
 immemoratio, animarum conquinatio, natiui-
 tatis immutatio, inordinatio mœchiæ, & impu-
 dicitæ. Infandorum enim idolorum cultura, om-
 nis mali causa est, & initium, & finis. Atque hæc
 quidem sunt illa opera gentium, quæ Dei popu-
 lum didicisse ex earum consortio Propheta do-
 lenter meminit: Commixti, inquit, sunt inter Ps. 105.
 gentes, & didicerunt opera eorum, & serui-
 erunt sculptilibus eorum, & factum est eis in scanda-
 lum. Et immolauerunt filios suos, & filias suas dæ-
 moniis, & effuderunt sanguinem innocentem,
 sanguinem filiorum suorum, & filiarum suarum,
 quas sacrificauerunt sculptilibus Chanaan. Quæ
 cò fusiùs commemorata sunt, quò minus nostro-
 rum barbarorum mores fœdos, & sanguinarios
 miremur, cum sciamus familiare id fuisse perpe-
 tuò nefariæ idolorum culturæ, quæ, vt sapiens
 dixit, omnium malorum causa est, & initium, &
 finis. Ita demum intelligemus eas omnes, quæ à
 nonnullis aduersus Indos causæ prætexuntur, non
 defuisse antiquis iustis sub lege aut etiam sub
 Euangelio agentibus, contra sui temporis infide-
 les, & barbaras nationes: sed nequaquam tamen
 eas satis esse existimasse, vt bello infestandas ar-
 bitrarentur.

CAPVT VII.

*Quod omnia iam de bello aduersus Indos
non solum diuina: sed etiam regia
lege firmentur.*

HAud parum perfectum est, quòd omnes belli causas aduersus barbaros, quæ nostrum ad illos ingressum antecedunt, remouimus, vt vulgari errore profligato putantium beneficij loco ponendum esse, quod barbaris pro agris, & libertate prærepta, Fidem Iesu Christi, & vitam hominibus dignam reddamus, quorundam etiam plus sapere volentium, quàm par sit, sententia perspicuè refellatur, qui nostris ad illorum scelera, vel compescenda, vel etiam plectenda ius faciunt: quod summæ potius iniuriæ tribuendum esse abunde, vt opinor, apparuit. Hinc iam consequens esse videbatur, vt exponeremus, quid illis faciendum sit, qui eiusmodi expeditiones in Indos secuti, fortunis potiti, & opera ac seruitute miserorum iure belli abusi sunt, quorum superstites sunt hodie quoque non pauci. An potuerint excusari ignorantia? An sint restitutioni obnoxij omnibus modis tum ipsi, tum res ipsorum, ad quoscunque tandem deuolutæ sint? Et quid remedij tandem in tanta perturbatione afferri queat? Sed de iis quanquam est difficilis, & periculosa censura, tamen alio loco si Deus annuerit, dicetur opportunè. Nunc vniuerse, ius, & iniuriam indicendi belli tracta

tractamus : atque illud tanquam totius actæ causæ firmamentum adiicimus , quòd cum in omnibus regnis Indiarum tam multa prælia commissa sint , & tot nationes subactæ ; nullum tamen genus Indorum seruituti subiecit regia lex , quin potius Indos omnes , & liberos esse , & suis rebus liberè uti declarauit , grauissimis pœnis propositis , iis , qui veluti iure belli captos , sibi manciparent. Imò verò in omnibus expeditionibus quæ fiunt , faciendæve sunt , siue ad nouas gentes quærendas , siue ad iam quæsitæ peruestigandas , inuiolabili lege sancitum est , ut neque nostri milites aggrediantur non laceßiti ad vexandos , cædendosve barbaros , neque illos vndecumque captos seruire cogant. Qua vna lege plenissime demonstratur , nullum belli ius nostris ex quantavis Indorum barbarie , & inhumanitate concedi. Superest ut quoniam , & diuinis , & humanis legibus bello laceßendi Indos omnis causa sublata est , hac exclusâ via prædicandi Euangelium ijs , quos armorum vis subegisset , persequamur , an alius aliquis aditus pateat ad annuntiandum gentibus Christum.

CAPVT VIII.

*Veterem & Apostolicam Euangelizandæ
rationem non posse exactè seruari
inter barbaros.*

TRibus igitur modis, quantum mihi diligenter cogitanti occurrit, ad prædicationem Fidei apud barbaros insisti potest: quorum nos tum æquitatem, tum prudentiam expendere necesse est. Primus est, ut more, & instituto Apostolico, gratia Dei freti eant prædicatores ad gentes, & prædicent Euangelium, omni militari remoto apparatu. Alter, ut gentes nouæ non adeantur, sed quæ iam fuerint principibus Christianis subiectæ siue per ius, siue per iniuriam, iis demum operam suam impendant verbi Dei ministri. Tertius, ut adeant quidem, & prædicent Christum, ubi nominatus non est, sed tamen humanis præsidij, & copijs adiuti, quibus seruentur illæsi. Habent autem hæ singulæ viæ, proprias & commoditates, & difficultates suas, neque parum diuinæ lucis expetendum est, ut intelligatur, primum, an quævis istarum probanda, improbandaue sit, tum quæ debeat cæteris anteponi, si omnes sequi non vacet, postremo, quid in vnaquaque prouidendum sit Christi seruo. Prima igitur illa non dubium est; quin sit non solum officij, & æquitatis plena, verum etiam omni laude superior, in ipso duce, & Apostolo conuersionis nostræ Iesu Christo
primum

primum dedicata, deinde in sanctis eius Aposto-
 lis illustrata, qui patientia sua, & eximia pauper-
 tate potentiam mundi vicerunt, de quibus Esaias
 præcinit: Conculcabit ciuitatem sublimem pes
 pauperis, gressus egenorum. In quo genere Euan-
 gelizandi prorsus Euangelico (neque enim dici
 aliquid maius potest) primum consolationis est
 plurimum, ipsis Dei ministris, quod vitam cœle-
 stem instituunt, ab omni cupiditatis, & violen-
 tiæ specie remotam, ideoque iucundam, & li-
 beram. Ipse enim dixit. Non te deseram, neque
 derelinquam. Et, Cum misi vos sine sacculo, & si-
 ne pera, nunquid aliquid defuit vobis? Testis
 huius rei locuples est M. Franciscus noster, qui
 tanquam de alio loquatur, tantum diuinæ volu-
 ptatis, & consolationis flumen in illa sua verè bea-
 ta peregrinatione in animum influere solere affir-
 mat, ut cogeretur à Deo petere, ut aut imbecillitati
 suæ parceret, aut si ita decreuisset, iuberet se vi-
 tam commutare, quod tantam vim cœlestis dul-
 cedinis ferre non posset. Id fortasse minus facile
 credent homines: sed experti sciunt, quid acci-
 piant, & nemo scit, nisi qui accipit. Deinde fru-
 ctus ipse Euangelij merito speratur vberior, ubi
 verbis facta non dissident, sed exemplo suo, man-
 suetudine, paupertate, benignitate, Christi præ-
 dicator vehementius pulsat animos, quam aures
 quibusvis vocibus. Nihil Paulus audebat loqui
 eorum, quæ per illum non efficeret Christus. Ad-
 mirabilis est vita Euangelica, & oculos ad se om-
 nium animosque ipsa nouitate conuertens; cum-
 que intelligunt homines non sua, sed se quæri,
 tunc nescio quomodo, & se & sua libenter imper-
 tiunt.

*Esai. 16.**Heb. 13.
Luc. 22.**Apo. 2.**Rom. 15.*

tiunt. Postremo quicquid molestiæ accidit, quicquid difficultatis & periculi, mors denique ipsa & quivis cruciatus, si tandem designetur in Christi militem, videtur ad illius gloriam cumulandam pertinere, neque tam in fugam vertere, quam palmam offerre, & certaminum omnium fructum pretiosissimum Triumphum Crucis. Quæ cum ita se habeant, plerique eorum; qui ad munus dilatandi Evangelij excitantur, eam sortem feliciorrem putant, ubi potest, ut dixi, Evangelium Evangelicè prædicari. Atque in ea re non dubium est, quin præclare cum nostris magna ex parte in India Orientali actum sit, in qua vere more Apostolico licuit inter tot gentes Christum annuntiare Indis, Persis, Arabibus, Æthiopibus, Malauribus, Iapponensibus, Sinenibus, & infinitis aliis. Quam tamen Evangelizandi rationem si in plerisque huius Occidentalis orbis gentibus ad amissum tenere quis pergat, nihil aliud quam amentia extremæ damnandus sit, neque immerito. Experientia ipsa omni exceptione superior testis rem abunde monstravit. Nam ut de aliis taceam, sola terra illa Florida semel, atque iterum, & tertio pacificè ad se venientes prædicatores, inauditos indicta causa trucidavit, quod & Dominicani probarunt, & nostri plus satis experti sunt. Itaque institutum illud Apostolicum ubi teneri commodè potest, nihil prius, neque melius. Vbi autem non potest, ut ferè in omni barbarie res habet, non est prudentiæ, specie iustitiæ sanctioris committere, ut salutem ipse abjicias, & alienam nihilo amplius compares. Mihi verò attentius intuenti in hoc instituti genus, duæ

occurrere

occurrere causæ solent, ob quas Apostolica illa Regula, & forma inter has nationes teneri exactè non posse videatur. Vna est satis nota, quòd hæ gentes sicut bestiarum moribus vtuntur, ita humanitatis parum permittant, sine fœdere, sine misericordia, prout quidvis collibitum est, ita temerè agentes. In hospites, & externos nullum gentium ius obseruantes cum ne inter se quidem naturæ leges sciant. Quamobrem qui horum se rationi, & arbitrio commiserit, poterit is cum apris & crocodilis amicitiam inire. Neque verò ab istis Martyrium expectandum est, quæ fortassis spes tantum discrimen leuaret, non enim pro Fide, pro Christo, pro Religione moriendum est: sed vt vel suauiores epulas de te præbeas, quod Brasiliensibus, & toti Septentrionali oræ huius orbis vulgare est, vel spoliū præbeas barbaris elegans, vel denique quia visus es nunquam, & quid in te sibi liceat, experiri iuuat. Apostoli prædicabant Christum Iudæis quidem scandalum, gentibus autem stultitiam, aliis sapientiam, aliis signa quærentibus: sed vtrique tamen ratione agebant: oderant verò illos propter nomen Christi, atque ita beatos potius faciebat persecutio; per quam etiam miro modo Dei gratia amplius dilatatur. At barbari, excepto hoc quod homines simus, nihil cogitant, imo illud quoque diu addubitasse non pauci comperti sunt. Altera causa in nobis est, cur Apostolica prædicatio institui omnino Apostolicè non possit, quod miraculorum nulla facultas sit, quæ Apostoli plurima perpetrabant: quorum splendore & potentia freti, auctoritatem dicendi apud quosvis quicquid placebat,

1. Cor. 2.

H facile

48.10.
 14. 14.
 11.

48.13.

facile vendicabant. Habebantur homines Dij si-
 miles, atque ita cætera eorum paupertas, abiectio,
 ignobilitas, ineruditio sæcularis, ornamento po-
 tius erant, quam contemptui & fastidio, diuinam
 eorum vim admirantibus, & prudenter iam inde
 colligentibus gentibus, quam essent homines af-
 fectibus superiores, & toti pene cœlestes. Quod
 de Sergio Paulo Proconsule viro prudente diuinæ
 commendandum memoriæ putarunt. At nostri,
 nunc temporis, cum talium operum maiestate se-
 se barbaris admirandos, & timendos non præ-
 beant, nihil restat, nisi vt reliqua vitæ inopia &
 impotentia penitus contemnatur, neque à gene-
 roso & excelso animo sed à misera & aduersa for-
 tuna profecta intelligatur, atque adeò cum sordidi
 illiberalésque isti maxima ex parte sint, omnium
 rerum penuria nostros consequatur necesse est. Et
 si enim ob cibum Euangelizare non expedit sed
 sine cibo tamen Euangelizari non potest. His ac-
 cedit, quod perspecta nostrorum hominum auari-
 tia & ferocia ita hæ nationes perculsæ sunt, vt sibi
 consulendum putent, nostris vbicunque conce-
 datur, sine vlllo discrimine interemptis. Non so-
 lum ergo signorum vis nostris temporibus deest,
 verum pro iis etiam scelera vbique feruent. Quo
 grauissimo incommodo interclusa ferè videtur
 via ad primam illam penitus Apostolicam Euan-
 gelizandi rationem: vt maiores societatis nostræ
 sapienter edixerint, specie Euangelicæ perfectio-
 nis non esse temerè arbitrio barbarorum, prædi-
 catores Euangelij committendos. Quandiu enim
 porcorum, & canum socordiam, atque impuden-
 tiam agnoscimus, nobis quoque à Christo Do-
 mino

mino præceptum existimare debemus, ne pretio-
 sas margaritas frustra mittamus ante eos, qui &
 eas conculcent pedibus suis, & conuersi disrum-
 pant nos.

Matth. 7.

CAPVT IX.

*Cur miracula in conuersione gentium non
 fiant, nunc, ut olim, à Christi
 Prædicatoribus.*

Multos verò inter hæc illud quærere & ad-
 mirari non temerè solere animaduerti,
 quid sit, quod nostra ætate in prædicatione Euan-
 gelij, apud nouas gentes miraculorum illa vis non
 cernatur, quam Christus suis promisit, quæque ad
 confirmanda super humana dogmata singulariter
 efficax est. Nam & nationes innumerabiles sunt,
 quarum salutem Deo esse charam dubitare non
 possumus: & hæ, siquæ vnquam aliæ, externis si-
 gnis & operibus prodigiosis fidem commodare
 plusquam dici queat, facile solent. Argumento est
 mirabilis illa, & inaudita nostrorum hominum
 peregrinatio in terra Florida, vbi ex immenso
 naufragio quatuor illi homines tantum supersti-
 tes Cabeça de vaca, Dorantes, Castillo, & quidam
 alius, diuinitus gratia curationum donati & ope-
 ra Apostolica perpetrantes, homines alioqui mili-
 tares & profani, inter immanissimos barbaros
 per totum decennium non solum illæsi seruati

Marc. 16.

*Barbari
 act. 28.
 prius
 Paul. m
 homici-
 dam, mox
 Deū dice-
 bāt, quod
 nihil la-
 sus esset
 à vipera.*

sunt, verum infinitas populorum cateruas post se agentes, itinera ad id temporis inaudita confectere ab Oceano Arctico usque ad Antarcticum mare penetrantes. Quæ in peregrinatione, quemadmodum eorum fide digni commentarij habent, propter sanitarum operationes vitæque innocentiam tantum admirationis, & gloriæ apud barbaros sunt consecuti, ut propemodum adorarentur pro diis, & quicquid imperarent, non aliter quam de cælo profectum acciperetur. Quæ res abundè monstravit, ut eorum etiam quidam literis prodidit, quam esset facilis, ac certa via ad conversionem gentium harum, vitæ innocentia, præsertim signorum splendore decorata. Quid ergo? Cur putamus Excellsi dexteram se continere, neque quod facillimè potest, gratia miraculorum tot populos ad fidem trahere? Iuvat interdum illa Prophetica oratione exclamare ad Dominum,

Zeel. 36. Misere nostri Deus omnium, & respice nos, & ostende nobis lucem miserationum tuarum, & immitte timorem tuum super gentes, quæ non exquisierunt te, ut cognoscant, quia non est Deus nisi tu, ut enarrent magnalia tua. Alleluia manum tuam super gentes alienas, ut videant potentiam tuam. Sicut enim in conspectu eorum sanctificatus es in nobis, sic in conspectu nostro magnificaberis in eis: ut cognoscant te, sicut & nos cognouimus, quoniam non est Deus præter te Domine. Innova signa, & immuta mirabilia, glorifica manum, & brachium dextrum, & reliqua. Atque hæc sanè oratio huic tempori, & negotio non aliena videtur. Verum cur tanta signorum parçitas sit, cum videatur tam esse effusa necessi

necessitas, merito cruciat animum. Etsi enim Apostolica tempora vberiore Spiritus Sacti dono ditata sunt, & Spiritus primitias habuerunt; tamen non statim cum sæculo illo primo euanuit potestas signorum. Ecclesiasticæ historiæ narrant tempore Constantini Magni totam Iberiam Provinciam, quæ est Armeniæ proxima, Christianæ mulieris captivæ opera, & signis, ad Christum esse conuersam. Legimus in historiis Anglorum quot & quàm magna per Augustinum, & Iustum, & Mellitum, cæterosque monachos miracula Christus ediderit, & magni Gregorij in hac causa testimonium tenemus, quod gentium saluti Deus tanta indulgeret. Cur ergo nostra tempora deserta sunt, quibus tanta orbis portio innotuit, vt cum ea Anglia vniuersa si conferatur, vix domus exigua ad ingentem urbem futura sit? Multos ergo, vt dixi, ad hunc modum secum cogitantes, pia hæc neque indocta quæstio tenet.

Mihi verò illud Augustini opportunè occurrit, qui cum commemorasset paulò ante, diuinam vocationem interdum signis externis aliquando interno potius impulsu fieri, mox adiungit, Hæc autem vocatio quæ siue in singulis hominibus, siue in populis, atque in ipso genere humano per temporum opportunitates operatur, altæ & profundæ ordinationis est. Quis enim cognouit sensum Domini, aut cum quo iniit consilium? Populum Israël sibi charum, initio de seruitute Ægypti Pharaone toties profligato ingentibus prodigijs eripuit: eundem populum longè post de Babylonica captiuitate patriæ restituit non ita magnis operibus perpetratis: illic quidem per

Aug. lib.

83. 9.

9.68.

*Esai. 40.**Exod. 14.*

H; Moysem;

- Agg. 1. 6.* Moysen , & Aaron , hîc per Zorobabel & Iesum:
2.
Zach. 1. neque tamen minus se mirabilem prædicari vult
3. Esdr. 5. secundo isto reditu quam primo illo ingressu in
 terram promissionis. Proinde Hieremias loquitur,
Hier. 16. Ecce dies veniunt, dicit Dominus, & non dicetur
 ultra , Viuit Dominus , qui eduxit filios Israël de
 terra Ægypti , sed viuit Dominus , qui eduxit fi-
 lios Israël de terra Aquilonis , & de vniuersis ter-
 ris ad quas eieceram eos. Cui rei non dissimile
 mihi videtur , quòd Ecclesiam suam olim in ipsis
 Euangelij cunabulis , multorum signorum & va-
 riorum charismatum copia congregauerit , ean-
 dem modo de gentibus non minus mirabiliter
 mirabilium parcite colligit , diuersa tempora
 secundum altissimas sapientiæ suæ leges diuersis
 rationibus administrans. Attamen in re obscura,
 quantum sapere datur, non nihil etiam rationis in-
 uenire potest humana cogitatio , modo sobriè
Ephes. 3. quærat, in charitate primum radicata & fundata,
 vt possit comprehendere. Ac mihi quidem aliquo-
 ties ista animo repetenti tam perspicuæ diuersita-
 tis in potestate signorum, illa occurrere causa so-
 let , quod priscis temporibus omnino necessaria
 fuerint , nostris non item. Etenim fides mysterio-
 rum sublimium omnem humanam rationem su-
 perantium astruenda tunc erat apud homines
 maximè ratione sua cuncta metientes , & ad soli-
 tos calculos reuocantes , Græcos, inquam, atque
 Romanos, cæterosque illa maximè ætate sapientia
 huius sæculi florentes. His quomodo per homines
 paucos, ignobiles, imperitos persuaderi posset, do-
 ctrina omnibus humani ingenij viribus validissi-
1. Cor. 1. mè obsistens, quam proinde stultitiam Dei Apo-
 stolus

stolus vocat, nisi diuina quædam, atque ineluctabilis euicisset authoritas, contestante Deo signis, & prodigiis, & variis charismatibus? Quod *Heb. 2:1* etiam Paulus Apostolus sæpè commendat. Sermo *1. Cor. 2:1* meus, inquit, & prædicatio mea non in persuasibilibus humanæ sapientiæ verbis, sed in ostensione spiritus & virtutis, ut fides vestra non sit in sapientia hominum, sed in virtute Dei, & alio in loco, Qui prædestinatus est filius Dei in virtute *Rom. 1:16* secundum spiritum sanctificationis ex resurrectione mortuorum Iesu Christi Domini nostri, per quem accepimus gratiam & Apostolatum ad obediendum fidei in omnibus gentibus. Ita religio Christiana, ubi humana præsidia prorsus aberant, diuinis est fundata miraculis. At nostrorum temporum longè alia ratio est. Nam & ij, quibus fides annuntiatur, omnibus rebus inferiores sunt, ratione, cultu, authoritate: & ij, qui annuntiant antiquitate religionis suæ, multitudine suorum, ingenio, elegantia, cæterisque copiis ad persuadendum superiores sunt, & abundant. Neque barbarorum ingenia ea sunt, quæ fidei difficultatibus terreantur, cum à maioribus suis obseruent ipsi longè incredibilia. Ac reuera si Christus annuntietur, ut opus est, obsequentes & ad credendum faciles sese exhibent. Denique quid magnorum signorum confirmatione opus est, ubi potius desideratur acutior intelligentia, quæ altitudinem doctrinæ nostræ aliqua curiositate disquireret? Vnum illud his gentibus huic nouo orbi potentissimum, & ad Fidem efficacissimum ac pene singulare miraculum necessarium est, mores cum Fide congruentes. Hoc & abundè

sufficit, & omnibus concessum est, modo velint.

In hoc argumento explicando de signorum raritate, mirifice versatur S. Ioannes Chrysostomus in epistola priori ad Corinthios tractans illa verba

1. Cor. 1.

Apostoli, vt Fides vestra non sit in sapientia hominum, sed in virtute Dei. Ac primum quidem monstrat signa Euangelicæ prædicationis initio patrata Fidem non illi solum sæculo, sed & futuris peperisse. Si enim illa tunc peracta creduntur, certum est, doctrinam, cui confirmandæ adhibebantur, diuinitus, esse profectam & inspiratam, sin autem historiæ, ac veritati signorum minus gentilis credat, at longè omnibus signis maius est, homines paucos, ignobiles, illiteratos, omnibus mortalibus exosos toti orbi persuasisse Religionem adeo intellectu arduam, & omnibus affectibus oppositam, quam neque ratione firmarent, neque potentia defenderent, neque visibili aliquo præmio persuaderent. Non ergo Fides iam satis fundata miraculis, nouis indiget confirmari, quin potius vtilius esse asserit signis nunc carere, quoniam maioris meriti sit. Postremo, id quod de vitæ integritate ad fidem conciliandam Euangelio

Chrys. ho.
6. in 1. ad
Corinth.

admonui, adeo confirmat, vt dicat, Quòd etsi in præsentia signa viderentur, quis tamen persuaderet? Quis externorum aures nobis accommodaret, cum tantopere increbrescat malitia? Etenim probata Christianorum vita maiorem apud multos authoritatem sibi vendicabit, quàm signa. Siquidem hæc apud impudentes, & malos homines malam concitant opinionem. Vita autem pura, etiam ipsum Diaboli os maiorem in modum obstruere poterit. Hæc ille. Quibus ego addiderim

inter

inter Apostolica signa ad subiugandum orbem in obsequium Christi hoc maximum extitisse. Si- 2. Cor. 12.
 gna, inquit Paulus, Apostolatus nostri facta sunt super vos: in omni patientia in signis, & prodigiis, & virtutibus. Vide, obsecro te, quid loquatur, ubi inter signa Apostolatus primum locum tribuit Patientiæ, secundum miraculis, & prodigiis. Atque ad Thessalonicenses, Ipsi scitis, fratres, 1. Thess. 2.
 introitum nostrum ad vos, quia non inanis fuit, sed ante passi, & contumeliis affecti, & cætera, ubi qualis fuerit vita, qui mores, quam ab avaritia, ab adulatione, à fastu omni remoti, id verò pro certo, & insuperabili veritatis annūtiatæ testimonio profert. Sit vita pura, & innocēs, in Christi prædicatore: & hæc signorū omnium vim obtinebit.

CAPUT X.

Quod etiam exiguo merito Prædicatorum, signorum parcitas aliqua ex parte attribuenda sit.

QUod si quis præter allatam rationem, amplius adhuc requirat, accipiat etiam alteram. Miracula quidem etiam per homines à charitate Dei alienos effici posse, notior res est, quam ut longa probatione indigeat. Habes Paulum dicentem, si habuero omnem fidem, ita ut montes transferam, charitatem autem non habuero, nihil sum. Habes ipsum Dominum perspicuè docentem. Multi dicent mihi in illa die, Nonne in no- 1. Cor. 13.
Mat. 7.
 mine

*August.
lib. 83. q.
9. 79. fm.
16.*

Luc. 9.

Act. 19.

Pf. 73.

mine tuo prophetauimus, & virtutes multas fecimus? Quibus ipse respondebit, Amen dico vobis, nescio vos: Discedite à me operarij iniquitatis. Quo in loco Basilius Magnus, & author de Ecclesiasticis dogmatibus seriò monent vitæ potius fidendum esse quam signis, quod his interdum etiam peccatores abundant. Nam & ille in Euágelio dæmones expellebat, qui Christum non sequebatur. Hæc quanquam ita se habent, tamen non dubium est, quin frequentissimum sit, & veluti lege fixum, vt quo quis fide & sanctitate magis eminuerit, eo aptius instrumentum sit, per quod Spiritus sanctus tam præclara opera perpetret. Vix enim inter multos vnus occurreret, qui vera signorum gloria claruerit, qui non idem egregia fide opus Domini operatus sit. Cum enim Apostoli etiam semicinctia ac sudaria magna in oppressis peragerent, scæuæ cuiusdam filij viribus maiora conantes, etiamsi Christum inuocarent, & Paulum commemorarent, tamen iustè audierunt sibi à malignis spiritibus responderi, Iesum nouimus, & Paulum scimus: vos verò qui estis? Quo facto nos admonitos scriptura voluit, etiamsi Christi nomen ad profligandos hostes ex corporibus humanis satis potens esset, sed tamen malorum meritis impediri sæpe rem tantam. Quid ergo mirum, si rara illa, & admiranda testimonia aufugerint, si signa nostra vt est in Psalmo, non videamus, neque sit Propheta in terra, vbi Fides exigua est, vbi charitas refrigescit, rarusque omnino est, qui parem animi cum corpore curam getat, & celebretur ille pro sancto, qui paulò studiosius pueriles carnis illecebras, & sæculi

culi vanitates ab se abdicarit ? Equidem non dubito si illa priorum prisca fides , si pietas , spiritusque feruor ille rediret , quin prisca etiam opera spectaturi essemus. Conuertamus oculos in nostri sæculi hominem B. Magistrum Franciscum , virum Apostolicæ vitæ , cuius tot , & tam magna signa referuntur per plurimos , eosque idoneos testes , vt vix de alio , exceptis Apostolis , plura , aut maiora legantur. Quid M. Gaspar , aliique socij non pauci in India Orientali , quantam diuinæ magnificentiae laudem nouis conuertendis populis operibus admirabilibus pepererunt ? Quod in aliis sacrorum Ordinum viris perspectum etiam est , & in nostra quoque Occidentali India non omnino inusitatum. Verè humilibus *Iac. 4.*
dat gratiam Deus. Atque vt eos canales infun- *1. Pet. 5.*
dendo liquori sapiens artifex eligit , qui neque comminuti , neque vitiiati aliqua ex parte sint , ne humorem infusum , vel non transmittant quo oportet , vel propria affectione corrumpant : ita profecto Spiritus sanctus ad suam potentiam , & gloriam declarandam , eius puritatis viros , atque humilitatis assumit , qui nihil sibi sumentes , totum Deo cuius est omne donum perfectum , & saluti proximorum syncerè refundant. Quod quia magnum , & rarum est , ita scilicet , Deo esse fidelem , vt neque in magno , neque in paruo Dei gloriam sibi quis suffuretur , idcirco rara etiam sunt talia dona. Si enim in iniquo mammona in- *Luc. 16.*
fideles estis , ait veritas , quod vestrum est , quis credet vobis ? Hoc profundè significans , quod qui etiam de puerilibus , & sæcularibus superbimus , de opibus , de genere , de elegantia , quod
vocat

vocat iniquum mammona , & alienum , quia verè, neque nostrum est , neque iusto dignum, quomodo non magis intumescemus , si spiritus dona illa magna , & præclara nostræ fidei committantur? Atque has ego duas præcipuas esse causas reputare soleo in raritate signorum : & alteram diuinæ esse iustitiæ , alteram sapientiæ, quibus suprema illa , & inexhausta potentia quodammodo cohibetur , atque libratur , ne se secundum diuitias suas effundat. In omnibus verò bonitatem superexcedentē considerare licet, quæ etiam hoc ipsum quod minus præstare , atque indulgere videtur , ad hominum certam salutem accommodat, atque conuertit. Ipsi gloria in sæcula. Amen.

C A P V T . X I .

De Prædicatione inter eos qui Fidem iam receperunt.

Igitur morem illum Apostolicum Euangelizandi vbi nominatus Christus non est , vt omnium beatissimum , vbicumque licet , retinendum esse , vbi id vero minus conceditur propter malitiam ; vel regionum , vel hominum , saltem suspirandum , & quoad eius fieri potest , imitandum, satis , vt reor , monstratum est. Sequitur vt de eo prædicandi genere differamus , in quo auditores iam vtcumque Christianos offendimus, & legibus nostris subiectos. Id quod est modo
vltatius

vſitatus, propterea quod non tam nouis regionibus inueſtigandis, quàm olim repertis excolendis, magis inuigilare hominum ſtudia cœpêre. Quain re duo præcipienda videntur. Vnum, vt Principum ciuili iurisdictioni minimè reſiſtatur. Alterum vt in Eccleſiaſtica cura religioſe, & magno animo perfeueretur. Nihil perinde inſtructioni, & ſaluti Indorum nocere compertum eſt, atque peruerſam quandam, & mālignam poteſtatem temporalis, & ſpiritualis concertationem, aut imminutionem, aut quoquomodo offenſionem. Atque, vt de cæteris modo magiſtratribus ſæcularibus taceamus, certè grauiter errant quidam ſpecie fortasſe pietatis, ius regium, & adminiſtrationem vocantes in dubium, quærentes interdum, quo titulo, & iure Hiſpani dominantur Indis? Num hæreditario iure ad nos deuoluti ſint, an bello iuſto ſubiecti? Quæ ſanè diſputatio eò pertinet, vt adminiſtrationis Indiæ, vel tollatur, vel certè debilitetur authoritas, quo ſemel ſi gradus fiat, quanta ſit futura pernicies, quæ perturbatio rerum omnium conſequatur, dici vix poteſt. Neque verò id ego modò ſuſcipiam, vt bella, bellorumque geſtorum rationes defendam, atque omnes illos ſuperiorum temporum turbines. Illud religioſè & vtiliter moneo non oportere in hac cauſa amplius diſceptare, ſed veluti præſcriptum iam ſit, optima fide agere debere Chriſti ſeruum. Neque alia ſubtilior petenda eſt cauſæ euictio, quam quòd, vt demus quam maximè peccatum eſſe in uſurpatione dominatus Indici, tamen neque reſtitui iam poteſt (cui enim, aut quibus modis?) neque ſi
maximè

maximè posset, Fidei Christianæ semel susceptæ
euidens iniuria, & periculum, id vlllo modo pate-
retur. Nam etsi infideles ad Fidem profitendam
cogi violenter ab alienis præsertim principibus,
disciplina Christiana grauissimè detestatur, &
prohibet: eadem tamen ipsa religionem semel,
siue iure, siue iniuria susceptam, nullo modo de-
ferendam esse, & desertores coërcendos esse se-
nerè decernit. Qua de re extant Patrum antiqua
decreta in Concilio Toletano, Oportet, inquiunt,
vt Fidem etiam, quam vi, vel necessitate suscepe-
runt, tenere cogantur, ne nomen Domini blas-
phemetur, & Fides, quam susceperunt, contem-
ptibilis habeatur. Plus enim habet iuris, vt Au-
gustinus censet, quod in eis Dominicus chara-
cter agnoscitur. Adde, quod subditorum non est
ist a examinare, sed honorem potius omnem de-
ferre Principibus. Certè Cæsarum dominatus in
orbem inuectus, si quis exactius discutiatur, maxi-
ma ex parte tyrannicus fuit, neque tamen Pau-
lus, & Petrus eorum potentia resistendum do-
cuerunt, quin potius honorem, obedientiam ac
tributa reddenda diligenter præcipiunt, idque
non solum propter iram, sed etiam propter cons-
cientiam. Ac licet aliis gentibus iure aliquo im-
perarent Romani, at in Iudæos iniuriosè profe-
ctò irruerant: tamen Christus Dominus, neque
censum, neque tributa reprehendit, sed soluit ipse
quoque libertate sua non vtens, cum esset filius
summi Regis. Et cum multa in Herode Ioannes
Baptista acriter obiurgaret, potentiam tamen
nunquam increpuit, imo verò milites stipendia
Romana, qualis est in Actis Apostolorum, ille

*Conc.**Tol. 4.**c. 55. d.**45. De
Iuda.**Epif. 50.
ad**Bonifa.**Rom. 13.**Tit. 3.**1. Pet. 2.**Mat. 22.**Matt. 17.**Luc. 3.**Act. 10.*

Centurio, rectè mereri sanxit. Denique & magnarum opum & Regnorum maximè iura, cum sæpe per iniuriam introducta sint; tamen videmus in sacris literis in principibus sua imperia constare, & subditos obedientiam doceri. Igitur siue iniuria usurpatus sit dominatus Indicus, siue quod magis existimandum, & prædicandum est, quantum attinet ad Regum administrationem, iure & ordine, nequaquam expedit Indorum administrationem, quæ illis vtilissima est ad salutem æternam, Christianis principibus derogare. Hoc sibi cum persuaferit Evangelicus operarius, poterit sine vlla offensione, & scrupulo in hanc latissimam segetem falcem mittere: & tam de salute Indorum, quàm illos administrantium in Christo cogitare, atque operam suam omnem impendere fideliter, ingressurus sine dubio vastissimam quandam syluam, multis quidem asperitatibus horribilem, sed tamen fertilitati Euangelicæ commodissimam, modo zelus Dei vigeat, & tolerantia non desit cum fiducia coniuncta. Et quoniam, quod ad caput alterum attinet de Ecclesiastica, & religiosa disciplina conseruanda tam in nostrates, quàm in ipsos Indos, vbi iam Fides Christi suscepta est, prolixiorē orationem desiderat, tractanda res est vberius consequentibus libris. Modo illud maneat, vt in militari disciplina res habet, non rectè prouinciam aliquam expugnari, & in ditionem redigi, nisi deducta colonia, & præsidio imposito, gradus figatur, ita profectò in horum infidelium conuersione, nihil sperandum esse lucri, nisi obfirmato animo, iis corripiendis, instruendis, atque ad perfectum vsque promo-

uendis

128 DE PROVANDA INDORVM
uendis consilia , curæ, conatúsque omnes admo-
ueantur. Neque enim repente quicquam legitima
incrementa suscipit.

C A P V T XII.

*De expeditionibus necessariis ad prædi-
candum barbaris Euangelium.*

QVoniam constat antiquo , & Apostolico
more non posse plerisque infideles obiri,
& debellari barbaros prius , vt mox domiti reli-
gionem Christianam recipiant , multis , & ma-
gnis rationibus peruersum esse monstrauius,
non exiguæ occurrere videntur angustia , quo-
nam modo , & via verbum Dei ad nouas natio-
nes peruenire queat. Sed quia omnibus gentibus
prædicari Euangelium oportet secundum Salua-
toris præceptum , & prædictionem , & nulla est
hominum portio , quam incurabilem reliquerit
summus conditor, colligitur, nouo aliquo Euan-
gelizandi genere vtendum esse , nouo quoque
hominum generi accommodato. Vt enim barba-
ri , veluti mixta humana & ferina natura con-
stant, vt moribus non tam homines , quam ho-
minum monstra videantur , sic quæ cum illis in-
stituenda est consuetudo , partim humana & li-
beralis , partim subhorrida , & ferox sit , necesse
est , vsque dum natiua illa sua feritate deposita,
paulatim mansuescere incipiant , & ad discipli-
nam humanitatémque traduci. Non igitur ne-
gligenda

gligenda est accuratior de expeditionibus tractatio, quibus, vel incognitæ nationes explorantur, vel iam exploratæ adeuntur, idque sæpius navigatione prolixa, interdum terrestri itinere. Quo in utroque genere in hoc Occidentali orbe, atque Oceano Antartico novæ quotidie gentes, & hucusque inauditæ occurrunt, quarum salus nullo modo contemni potest. Simul ergo proficisci oportet viros militares, necessaria humanæ vitæ præsidia in tam longa, tamque periculosa peregrinatione ferentes, simul vitæ æternæ præcones, castris Christi militantes, ut diabolica tyrannide captas animas Deo expugnent. Id ita coniuncto officio oportere fieri, non solum ratio docuit, verum ipsa iam longo usu comparata experientia. Quare si qua spes est salutis barbarorum, in his certè expeditionibus posita est. De quibus primum quod ad militiæ leges spectat secundum omnium supremam Dei legem, dicendum erit: deinde quod ad prædicationem conversionemque gentium pertinere 1. Cor. 15. arbitrabimur. Prius enim quod animale est, deinde quod spirituale. Tria igitur quæri posse videntur, Primum quo iure, quave ratione novæ expeditiones in barbarorum terras suscipiantur: tum quid in iis fas sit agere nostris: postremo quibus iniuriis laceßiti Christiani possint sibi barbaros subicere, vel bello vel vi.

CAPVT XIII.

Quo iure Christiani expeditiones facere possint in regna barbarorum.

REgna igitur barbarorum quo iure Christiani adierint, adiréve possint, si quis ex me quærat, facile responsurus sum non alio opus esse quam ipso communi naturæ, quod homines sint. Peregrinari cuivis quocunque fas est: nefas verò hospitem paſcatum, neque lædentem, neque suspectum communi solo excludere. Quamobrem leges illæ Chinensium, quæ capitis supplicium in hospites iniussu Regis venientes statuunt, iniquæ profectò sunt, & ab omni humanitate alienæ. Nam vt nihil aliud, certè innatus amor noua discendi, atque experiendi, ius cuique facit, vt remotissima quæque, si libeat, oculis, atque animo lustraret, quod ad rerum humanarum, atque etiam physicarum prudentiam non parum conferre censuit Poëta, qui sagacissimi viri laudes exordiens: Qui mores hominum, inquit, multorum vidit, & vrbes. Itaque hostibus tanquam pœna dignis aditum ad nos præcludimus, cæteris non item, nisi meritò in suspicionem veniant. Iam verò mercaturæ artis hoc proprium est, vt quæ apud suos abundant, deferant ad externos, & quibus vicissim illi circumfluunt, reportent suis. Ita enim communis nostri generis author mortales omnes inter se sociandos

*Homerus
initio
Odissæ,
vt vocat
Horus.*

dos, & quadam communione in officio retinendos existimauit, si sibi essent vicissim opportuni, & commodi. Atque ut in hominum ingeniis alios alia curare cernimus, ut hic calceos paret, ille contra domum ædificet, ita ipsas orbis terrarum regiones suo quoque quodam fœdere coniunxit, dum rerum aliarum aliis atque aliis feracitatem attribuit, nec fœlicitatis humanæ esse censuit, quod ille cecinit:

Omnis feret omnia tellus.

Virgil.

Auri atque argenti haud scio an ditior vlla regio possit concurrere hoc ipso Piræ, aliarum pene omnium rerum olim summopere indigente. Alibi metalla, alibi gemmæ abundant, alibi ligna, piper, herbæ medicinales, lana, serica, artificia, & id genus sexcenta. Qui ergo commoditates suas, nauigantes aut peregrinantes apud exteros quærunt, illis vicissim vtilis futuri, operæpretium facere quis non videat? At in istis, dicet aliquis, cupiditas potius regnat, & immoderata rapacitas, sicut & illis aliis perniciosa sæpe curiositas aut ostentatio potius, quam vtile aliquid discendi communicandive studium. Neque humanitatis est officium, sed auaritiæ sitis, qua feruntur. Quis hoc neget? At modo non quid vitiositas hominum habeat, sed quid ipsa communis utilitas concedat, expendimus. Licet ergo, licet sine vlla dubitatione barbarorum fines penetrare, idque si renuant nulla vel accepta vel meritò expectata iniuria, iniqui sunt. Verum his sepositis rationibus, quas habet ipsa natura communes, est omnino singularis quædam causa Christianis, & ab ipso

ipſo omnium conditore ius conditum, vè quæ à Deo didicerunt, doceant ipſi cæteros mortales, quorum ſalutem optare & quærere debent.

Matt. 16.

Qui ergo dixit, Ite in mundum vniuerſum, & prædicate Euangelium omni creaturæ, is certè aditum liberum quocunque terrarum aperuit, quem qui nobis præcludere velint, & ſummi Dei præcones ac legatos inauditos à ſe relegant, non ſolum contra ſalutem ſuam facere putandi ſunt, verum etiam inſignem Chriſtianæ Reip. contumeliam irrogare. Quod ſi barbari prædicatione Euangelica commonendi excitandique ſunt, neque id fieri vnius, & alterius Sacerdotis peregrinatione permittit, vel ipſorum ingenium ferox, vel regionum immenſa diſtantia, neceſſario præſidio deſtituta, perſpicuum eſt complurium hominum cætu, & rerum opportunarum apparatu opus eſſe: quæ ſanè duo in Expeditionis ratione continentur. Nouas ergo ſiue Expeditiones, ſiue profectiones, ſiue alio melius vocabulo appelles, ad Indorum terras, conuictumque explorandum, eſſe æquitatis, & officiij plenæ, ſi genus ipſum per ſe ſpectetur, ſatis ex his perſuaſum puto. Ariſtoteles quidem in Politicis ſuis, Peregrinis non admodum fauere videtur. Seditiones, inquit, concitat peregrinitas, donec in eandem ſimul conſpirationem deuenierit. Quapropter quicumque adhuc inquilinos ſuſceperunt, vel aduenas, omnes ferè ſeditionibus iactati ſunt, cuius documenti exempla plurima accumulât. Cæterum & ſi rectè ac perfectè inſtitutis ciuitatibus peregrinorum turba meritò ſuſpecta eſſe debeat, ac proinde purgatio aliqua iuſta ſit, tamen barbarorum

Ariſtot.

5. Pol. c. 3.

rum

rum alia longè ratio est, qui vel ob hoc ipsum externis indigent, vt eorum Respub. rectè constituatur, imò verò vt possint eo nomine dignam habere Rempub. quippe cum ferarum magis ritum vitam agant, quos ad societatem legesque naturæ accommodatas attrahere, & reluctantes quodammodo compellere, seclusa tamen seruitute, & cæde, porius officio assignandum est. Quod vsque adeo certum habuit Philosophus, vt barbaros homines parère nolentes, bello etiam domare, iustum natura decernat, quod nos ita temperamus, vt capi quidem, aut cædi, aut profligari barbaros nequaquam sinamus, propterea quòd naturalem seruitutem nullam agnoscimus, sed tamen melioribus, & sapientioribus pro sua salute docendos ac regendos, non illiberaliter committamus.

*Aristot. 1.
Pol. c. 5.*

CAPVT XIV.

*Quid in terris barbarorum,
Christianis liceat.*

Vnde fit consequens ea omnia, quæ huic fini honestè præscripto necessaria sunt, ipsa lege naturæ, & Christi, nostris apud illos licere, imò verò etiam expedire, modò id quod vbique quidem, sed in hac maximè causa seruandum est, modus adhibeatur, vt ne quid nimis. Quoniam ergo natura barbarorum est maximè inconstans, atque infida, opus est, vt qui apud illos versantur, securitati suæ consulant, &

I 3

neque

neque nocere cupiant, neque tamen se frustra lædi permittant. Quare quæ defensionis sunt propria & tutelæ, ea nemo culpare debet, si Christiani satagant. In quo genere sunt portus naualibus stationibus occupati, arces erectæ, ac munitæ, præsidia militaria cætera, quo confugere violati queant, & barbaros quantum satis erit, terrore ipso, in officio continere. Hoc à Lusitanis factitatum in plerisque Orientis maritimis vrbibus, non sine egregia ipsorum gloria, & magna Christianæ Reipub. commoditate, nemo est, qui non laudet. Quod si morosior quisquam id interpretatur iniuriam, propterea quod in suo regno munitiones, & præsidia extrui ab externis, quivis nostrorum Principum grauitè indignaretur, & quantis posset viribus obsisteret, intelligatur oportet, barbarorum ingenium eiusmodi esse, vt nullam patiatur iniuriam, si contra ipsorum iniurias se quisquam muniat, quod in nostris humanè & pro dignitate se se gerentibus secus habet: qui enim inter suos non nisi armatus incederet, iniurius esset, idem si inter externos, & merito suspectos armatur, cautus & prouidus potius dicetur. Adde quod ipsorum barbarorum interest, vt nostri cum illis consuetudinem habeant, quam fieri possit, tutissimam, & diuturnam, vt religionis veræ, ac salutis suæ, documenta percipiant. Atque hæc quidem militaris apparatus, & disciplinæ causa est, quam dixi. Iam quod ad commutationes rerum pertinet, & mercimonia, nihil est quod hoc loco peculiariter præcipiendum sit, præterquam vt pretia rerum

ferum iudicio boni viri atque prudentis constituantur. Qua in re non mediocrem habet quaestionem, vtrum quanti barbari merces nostras aestimant, tanti transigi possint. Nam bracteolas, & calculos, & gladiolos; & filtra, & vitrea, id genus nugas ac scrupula, tanto in pretio apud istos haberi compertum est, vt auri, aut argenti non paruum vim, interdum eximios etiam simagros cum his commutare perlibenter ament. Verum ista discutere enucleate, non huius negotij est. Illud exploratum teneamus, omne genus mercimonij cum istis exercere licere; pretium vero neque lege, neque certa ratione constare, sed iudicio sapientis, qui perspiciat quantum abundant iis, quae ipsi reddunt, & quanti faciant, vel ad vitae praesidia; vel ad ornatum quendam ipsis charum ea, quae accipiant à nostris, quanta horum copia inopiave sit: vt omnibus probe perspectis atque libratis quae rerum aestimatio iusta censenda sit, statuere possit. De agris vero colendis, & fructibus faciendis, dummodo fundi iis necessarij aut culti non occupentur, non dubium est quin beneficij etiam loco ponendum sit, si desertos & infœcundos agros nostri exerceant, & sementem faciant, atque Europæ frugibus assuefaciant. Idem in gregibus alendis iudicium est, vbi pascua vberissima nullis vsibus vacant, quod plerique barbarorum armenti, ac pecoris negligentes sint; venationibus delectentur. Denique quicquid utilitatis nostris ex illorum solo accedere potest, sine vllò eorum detrimento, imo cum non exiguo emolumento, id iure naturæ con-

136 DE PROVANDA INDORVM
cessum esse dubitare non possumus. Quamobrem
quod ad auri & argenti fodinas exercendas spe-
ctat, quod præcipuè nostrates curant, pro conces-
so reputandum est, quicquid barbari pro negle-
cto habent. Ita metalla fodienda suscipere, aut
auri grana ex fluviorum obicibus cogere, aut ar-
genti fundendi industriam sequi, aut gemmas ex
fundo expiscari, aut pretiosos vniones eruere, aut
quicquid denique rarum est, & indigenis, vel ig-
notum, vel despectum, non est contra æquitatem,
si harum rerum studiosi sua diligentia & industria
persequantur. Sed observandum tamen, vt ne-
que iam ab incolis occupata, & habita in pretio,
injuriosè dolo, aut vi præripiantur, neque ipsi-
met nostris ad nostras non ipsorum commodita-
tes seruire cogantur: quod vtrumque periculi ple-
num est.

CAPVT XV.

*Quando liceat barbaris infidelibus bel-
lum inferre.*

QUod si barbari, vt sæpè solent, nullis injuriis
læsi, sed humanè ac beneficè affecti, nostros
lædere pergant, aut fide violata cædem mediten-
tur, præsidia aggrediantur euertere, agros populen-
tur, fruges corrumpant, naues iniecto igne crema-
re studeant, dolo alimenta surripiant, aut denegēt,
cæterasq; injurias adorianur, non solū nostris sese
defendere, ac tueri licebit, verumetiam dāna illata
reparare

reparare, & acceptam contumeliam vlcisci, ac si res exigat, serio agere, & bello prosequi rem. Nam belli eam iustam definiuimus causam, vbi iniuria laceffitus princeps arma induit. Verum illud summopere aduertendum, non eodem modo barbarorum iniurias ac cæterorum hominum persequi oportere. Cum enim sint imbecilli, ac puerili ingenio Indi, magis puerorum ac fœminarum, vel potius pecudum more tractandi sunt, vt non tam eos serio vlcisci velis, quam necessario castigare, & terrere, neque tam gladius in istos acuendus est, quam intentandum flagellum, vt vel ita mulctati discant timere & parere. Non enim ad illa sæua statim veniendum est, ad ædes incendio conflagrantes, viros ferro trucidandos, seruitutem perpetuam, & reliquas bellorum calamitates. Sed quatenus progrediendum sit, & vbi sistendum, Ducis Christiani charitas cum salutari prudentia coniuncta, & melius dictabit, & plenius, modò meminerit se Christi religionem profiteri, & verbo & exemplo debere, vt non tam suas curet, vel incommoditates, vel iniurias, quam vt pretiosa animarum lucra Domino acquirat.

CAPVT XVI.

De officio Prædicatoris Euangelici erga socios itineris.

HIs ita explicatis, iam quod sit Euangelici prædicatoris officium in nouarum vocatio-
ne

ne gentium, intuendum est. Atque illud in primis præcipiendum; ne quoniam nouo modo & immutata ratione Christum barbaris annuntiaturus sit, septus militari præsidio & multiplici apparatu; idcirco se Apostolico officio minus fungi arbitretur, animûmque demittat, quasi Euangelium non euangelicè annuntiet. Oportet Dei seruum diuinæ per omnia voluntati promptissimè subdi; ac se æterna illius sapientia regi; generosè permittere. Non omnium eadem tempora, sed cuncta

Eccles. 3. fecit Deus bona in tempore suo. Nouo generi hominum, nouam Euangelizandi rationem non ingratè suscipiet; quisquis non suam; sed Dei gloriam meditatur. Sæpè aurea illa & depicta ante oculos antiquitatis laus; si ad nos referatur, nihil aliud; quam vimbram quandam & fastum & nominis appetentiam immoderatam sapit.

Phil. 4. Etenim quid magis Apostolicum quam ubique, & in omnibus institutum esse; vt sciat Dei seruus; in quibus est; sufficiens esse, & abundare

Matt. 10. & penuriam pati. Aliquando Christi discipuli

2. Tim. 4. sine sacculo, sine duplici tunica Euangelizant; aliquando vero etiam penulam postulant; & sollicitè præmitti iubentur, vt ne quid illis desit.

Tit. 3. Quod si militum & sæcularium profana turba
Act. 27. mouet Christi seruum, meminerit Paulum apud

Iulium nauigantem cum cohorte Italica eaque superstitionis Gentilicæ, eundem doctorem Gentium recolat Romam caput mundi primum ad se ingredientem spectasse vinctum, & militari custodia circundatum. Quis vero ita crederet? Maximi prædicatoris in maximam urbem ingres-
sum quam alienum, quam incommodum putes,

fi

si humanas rationes consulas? At si diuinas, Quæ *Phil. 1. 1.*
 circa me sunt, inquit, magis ad profectum vene-
 runt Euangelij. Verbum enim Dei non est liga- *2. Tim. 2. 9.*
 tum. Quamobrem gloriosè prorsus nonhorta- *2. Cor. 6. 3.*
 tur strenuus militiæ cœlestis dux, Vt in omnibus
 exhibeamus nos sicut Dei ministros, non solum
 in vigiliis, in ieiuniis, in castitate, in scientia,
 in longanimitate, in suauitate, in Spiritu sancto,
 in charitate non ficta, in verbo veritatis, quæ po-
 stea commemorat, verum etiam in iis, quæ prius
 admonenda putauit, in multa patientia, in tri-
 bulationibus, in necessitatibus, in angustiis, in
 plagis, in carceribus, in seditionibus, in labori-
 bus. Denique, In virtute Dei, per arma iustitiæ à
 dextris, & à sinistris, per gloriam, & ignobilita-
 tem, per infamiam, & bonam famam, vt sedu-
 ctiores, & veraces, sicut ignoti & cogniti, quasi
 morientes, & ecce viuimus, vt castigati, & non
 mortificati, quasi tristes, semper autem gaudentes,
 sicut egentes, multos autem locupletantes, tan-
 quam nihil habentes, & omnia possidentes. His
 cœlestis tubæ vocibus generosè animatus Christi
 miles, cum ad rem induxerit animum, & se totum
 diuino arbitrio permiserit, iam quid sibi præstan-
 dum sit erga cæteros, animaduertat oportet. At-
 que hic aduersus socios itineris, vel maritimi, vel
 terrestres, partes suas diligenter intelligat, vt eos
 quantum fieri possit, in disciplina Christiana con-
 seruet, primum beneuolentia in omnes, omnibus
 omnia factus, vt omnes Christo lucrifaciat, affa- *1. Cor. 9. 19.*
 bilis, suavis, sermonem habens semper in gratia *Col. 4. 6.*
 sale conditum, vt sciat quomodo vnicuique eum *Ephes. 5. 15.*
 oporteat respondere, ac nihilominus tempus re-
 dimat,

Gal. 6.

dimat, vt sibi interdum vacet & Deo. Infirmi-
 tes aliorum portare, & non sibi placere, & præ-
 occupatum in aliquo delicto si spiritualis est, in

Col. 1.

spiritu lenitatis instruere, omnem hominem iux-
 ta Apostolum, & corripere, & docere, & conari,
 vt exhibeat perfectum in Christo Iesu. Hoc vt ef-

Hier. 13.

ficiat, frequenter Verbum Dei proponet in spiri-
 tu, & virtute conterens petras. Neque valde locis
 aut temporibus impediatur, sciens Paulum in li-

Act. 11.

tore orasse, & prædicasse in plateis, in tentoriis,
 in nauigio, omnem locum Dei verbo non in-
 commodum iudicabit. Ad pœnitentiam maxi-
 mē hortabitur omnes, confessiones indefessē ex-
 cipiet, & scelerum, neque multitudine, neque ma-
 gnitudine perterrebitur, sciens Christi sanguinem

1. Ioan. 2.

propitiationem esse pro peccatis totius mundi. In
 summa duo magnopere prouidere debet, vnum,
 vt saluti suorum consulat verbo, & re, quantum
 licebit: alterum idque præcipuē, vt infidelium ac
 neophytorum illis curam seriò ac sæpe commen-
 det: ne nostrorum, vel iniuriis læsi, vel malefa-
 ctis offensi Christianæ religionis nomen blasphem-
 ent. Quid illis fas sit, quid nefas, tum quid de-
 ceat, & expediat, secundum ea, quæ supra sunt
 disputata, docebit, atque eos quamvis in militari
 classe, tamen Apostolorum quodammodo officio
 satisfacere debere admonebit. Denique sataget
 Christi seruus omnibus modis, vt Christiani Chri-
 sto, si non militent, vt par est, ne saltem bellum
 implacabile indicant, facti laqueus (vt scriptum
 est) speculationi, & rete expansum in Thabor.

Osee. 5.

CAPUT XVII.

*Qualem se prestare debeat Christi seruus
in conuersione infidelium.*

Cum nostris cura erit, quam diximus. Cum infidelibus verò ad Christum conuertendis, cuius rei causa omnis iste labor susceptus est, omnes charitatis vires exeret operarius Domini, memor se opus Domini operari, repetens verò animo, & altius expendens, Neminem venire ad Christum nisi quem Pater traxerit, Fidemque Dei donum esse, & corda hominum in manu Domini, in quo voluerit vertat, Voluntatemque à Domino præparari, & multa talia quibus Spiritus sanctus certissimos nos esse voluit, nullius esse industriæ, nullius diligentiae nostræ vocationem gentium ad Euangelium, sed solius misericordiae, & præuenientis Dei; ad orationes, & preces assiduas, atque feruentes totum se conferat, spem omnem in cœlesti gratia collocans, & diuinæ misericordiae fores diutissimè pulsans. Et quamvis in omni negotio orationis præsidio fidendum sit; at in hac vna re nihil oratione magis necessarium, nihil omnino potentius: hæc vna impetrat gratiam, cui acceptam oportet referre Fidem. Apostoli quidem cum cætera beneficentiæ officia ab se ablegassent, Nos, inquiunt, Orationi, & ministerio Verbi instantes erimus, adeò inter se duo illa cohærere intelligebant. Nunquam Petrus, & Ioannes, nunquam Paulus ante precem ad Deum

fufam,

*Ioan. 6.**Ephes. 2.**Prou. 21.**Act. 6.*

fusam, de Christo ad populum verba fecerunt.

*Dionis. de
Diu. nom.
cap. 3.*

August. 4.

*lib. de Do-
ctrin.*

*Chri. c. 15.
Sap. 7.*

Luc. 6.

1. Cor. 1.

Mat. 18.

2. Thef. 3.

Ephes. 6.

Col. 4.

Et rectè Dionysius monet ante omnem actum, Theologiæ præsertim, orationem præire oportere. Augustinus quoque cum Ecclesiasticum Oratorem informat, initio sermonis se, & sua omnia, & fructum atque exitum orationis Deo committere ingenuè admonet, In cuius manus sumus, & nos, & sermones nostri. Ipse mediator Dei, & hominum Christus Iesus non ante ad prædicandum Apostolos mittit, quam in oratione peruihil pernoctarit. Neque enim tam sermonis, & diligentia suæ fructum, quam orationum expectare debet fidelis Dei minister. Neque suis tantum sacrificiis, & precibus quamuis assiduus, quamuis feruentibus, contentus esse debebit, sed aliorum etiam Christi seruorum auxilia studiosissime efflagitare, vt ex multarum personis facierum gratia agantur pro eo, & consensus fratrum super omni re, quam petierint, in nomine Christi, obtineat apud Patrem misericordiarum. Paulus tantorum apud Deum meritorum vir per omnes epistolas pro se orari obnixè contendit, vt sermo Dei currat, & clarificetur, vt liberetur ab importunis, & malis hominibus, vt detur illi fiducia in apertione oris sui, vt loquatur Dei verbum ita, vt oportet eum loqui. Atque hæc, & alia huius generis cogitans Christi seruus, maximam atque optimam ministerij sui spem, in efficacibus & frequentibus, & suis & suorum orationibus collocabit. Deinde exemplo suo, ac vitæ integritati, & innocentia secundas partes attribuet, patiens, benignus, humilis, beneficus, continens, mansuetus, super omnia verò Christi, & fratrum charita-

te ardens. Sermones nostros minus fortassè barbari intelligent : at virtutis officia, vbiq̃ue & clarè loquuntur, & perfectè intelliguntur, & potentissimè persuadent. Sed in hoc genere peculiariter fides, ac sincera beneuolètia in barbaros ac veluti paterna quædam prouidentia exhibenda est. Nihil æquè animorum fidem conciliat ac beneficiètia: vt de eo factis optimè mereri studeas, quem dictis tuis audientem velis. Quamobrem prædicaturos Apostolos iubet Christus infirmos curare, leprosos mundare, dæmones eiicere, gratis accepta gratis dare, quod expeditissima ad conciliandos Euangelio homines via sit benignitatis ac beneficentiæ. Sentiant infideles, sentiant catechumeni, sentiant neophyti Patrem, & aduocatum : pro iis sæpè interpellat apud Ducem, & magistratum, hos à militum iniuriis tueatur, horum egestati consulat, vel propria mendicitate. Si quid acerbius designandum erit in aliquem, huius ipse administer non sit. Thesaurizet potius filiis parens, ac non solum sua, sed & se libenter impèdat, & superimpendat pro animabus eorum, licet plus diligens minus ipse diligatur. Neque datum requirat, sed fructum. Dici non potest, quam sit ad persuadendum efficax charitas, & viscera digna Apostolo. Vbi tamen (ne & hoc prætereamus) sic dilectionem impendere norit, vt se se tamen non improuidè committat alienis: ne, quod quibusdam contigit nostris, dum plus æquo indulget infidis, temeritatis suæ pœnas luat. Nihil mutabilius barbarorum ingenio. Paulo Apostolo naufragati exhibent non modicam humanitatem pyra accensa, eundem à vipera appetitum, homicidam reputat, Luc. 9.

2. Cor. 12.

Philip. 4.

Act. 18.

mox

mox nihil à bestia læsum , pronuntiant Deum. Huiusmodi barbarorum ingenium est. Qui heri habebaris pro amico summo, hodie indicta causa interire iuberis , quem paulo ante homicidam & extremo supplicio dignum ducebant , mox , si ita res tulerit , adorabunt pro Deo. Itaque prudens ac fidelis Dei seruus, & illis consulat quantum poterit , & sui nihilominus non erit negligens. Iam tertias partes in ministro Euangelij , Verbum Dei sibi vendicabit , qua vna in re vehementer, & indefesse laborandum. Primum , vt sermonis aliqua copia sit , vel interpretem fidum vel per seipsum, si consequi potuerit. Quocirca non multa neque ardua, sed pauca eadēque sæpius repetendo elementa sermonum Dei tanquam pueros edocebit: & M. Francisci industriam sequens, sermone vernaculo atque ipsis familiari mysteria fidei præcipua & vitæ Christianæ regulas repetet: illorum fabulas ac nugas facilè confutabit: exemplis vteretur atque similibus, quam fieri possit, ipsis accommodatis: interrogationibus vrgebit non insuauiter. Si deprehendat in quopiam ingenij aliquid atque iudicij, disputationes non admodum philosophicas sed populares potius instituet. Signa adhibebit externa, & ceremonias cultūque omnem Ecclesiasticum plurimi faciet, vt vel hoc modo homines sensu obtusos commodius instruat. Iam concionibus publicis statis temporibus aget, iam priuatis colloquiis. Demulcere verbis , inuitare præmiis , minis terrere , persuadere exemplis, sed in Christi virtute , non in hominum sapientia. Deus , pater misericordiarum aderit seruo suo in omnibus, vt verbum Euangelij recipiatur, non

ut verbum hominum, sed sicut est vere, ut verbum Dei. Sed quoniam cum de ordine, & modo catechizandi agetur, latius ista explicabuntur, satis sit vel exiliter adumbrasse Euangelici prædicatoris officium. 1. Thes. 2.

CAPUT XVIII.

De tribus impedimentis, quæ conuersioni gentium maximè obstant.

VErum in conuersione gentium ad fidem, hostis nostri generis diabolus, cum acerbissima torqueatur inuidia, quibus potest viribus atque artibus agit, ne opus Domini prospere-
tur. Itaque innumera impedimenta molitur, ut fructum sementis diuinæ de cordibus audientium rapiat. Ad hæc paratum atque constantem oportet militem Christi stare, ne asperitatibus offensus, ab incepto pedem referre incipiat, tum verò ut contrariis vndique perspectis, remedia adhibere opportuna conetur. 1. Cor. 16.
Ostium fortasse erit apertum & euidens, sed tamen aduersarij multi. Et quanquam sunt impedimenta verbi Dei plurima, tria tamen præcipua sunt: quorum vnum à nostris, alterum ab externis, tertium ab ipsismet, quibus Fides annuntiatur, proficiscitur. E nostris quidem, solent plurimum Indorum veram conuersionem retardare pessimi
K exempli

Am. 34. exempli mores. Vnus autem ædificans, & alter
 destruens, quid proficit eis nisi labor? Nullam re-
 vera ego grauiorem difficultatem sentio in hac
 causa: propterea quòd cum barbari religionis
 nostræ ignari sint, omnes nos similes ac veluti
 vnius coloris reputant. Ita crimen huius atque
 illius, in omnium redundat infamiam, & quod
 est grauius ipsum Christianum nomen apud infi-
 deles in odium venit. Huic malo quid potest af-
 ferri remedij, nisi vt nostrorum hominum licen-
 tia, quibus modis possit, frænctur, neque vsque
 ad miseras infidelium animas sæuire sinatur? De-
 inde illud multum à B. Augustino commenda-
 tum in catechizandis rudibus documentum ac-
 curatè seruetur, vt admoneantur ij, qui Fidem
 suscipere parant, ne religionem nostram ex no-
 stris hominibus metiantur, sed ex ipsius potius
 æquitate, & sanctitate. In nostris si quem vide-
 rint modestum & probum, cum secundum le-
 gem, & Fidem sese gerere, quos vero arrogan-
 tes, auaros, obscænos, immites notarint, hos
 nobis quoque odio esse persuadcant, ac iuxta le-
 gem nostram multo grauiissimas suorum scele-
 rum pœnas duros. In omni genere hominum
 bonos esse & malos: neque Christum cogere
 quenquam vi, sed in futuro iusta vel præmia,
 vel supplicia cuique pro meritis reseruare. Ad
 hæc quantum licebit, vt à talium consuetudine
 & familiaritate abstineant, curandum, & boni
 viri frequentius barbaris obiiciendi, & mutuo
 connectendi. Ad quæ omnia præsidis, siue du-
 cis voluntas religiosè ac beneuolenter affecta,
 multum

multum momenti afferet , vt cohibeat atque castiget nimiam suorum insolentiam. Verum à suis quoque fidei candidati molestiam patiuntur non mediocrem , tum à Dominis , & proceribus , qui suos ad alienas leges transire grauitè ferunt , tum maximè à veneficis & præstigiatoribus , & idololatriæ magistris , qui auaritia & ambitione corrupti lucri & gloriæ iacturam facere se vident Christianæ religionis augmento. Hi vt quondam Iamnes & Mambre Moyse , Elymas Paulo & Barnabæ , obstinatè resistunt veritati. Quemadmodum in India Brachmanes , in Iapponia Bonzos , apud Noui regni incolas Piaches , in nostro Piru Humos cernimus. Et quidem Dominorum ac Principum suauiter , ac diligenter tentanda voluntas est , & expugnanda in Christo , & suorum obsequia , iuxta nostram legem promptiora futura , & gloriæ plurimum accessurum , cum his etiam crebrius & liberalius agendum. Multum quippe in vtramque partem horum studia promouent. Qua in re grauitè à nostris peccatum esse in Atabalipæ Ingarum Principis nece , ipsi quoque eius successores conquerebantur , quod affirmarent , si regis voluntas delinqua obtineretur , breui admodum futurum , vt vniuersum Ingarum imperium fidem libentissimè acciperet. Miro enim modo barbari omnes Regibus suis ac ducibus addicti sunt. Aduersus Magos acrius pugnandum erit : eorum fuci ac fraudes detegendæ , & traducenda insipientia , & ridenda deliramenta , & confutandæ versutiæ. Quòd si respiscere nullo modo velint , & facultas non de-

2. Tim. 3.

Act. 13.

fit, à cæteris separandi, & grauitè interdum mulctandi, modo plebem reliquam maior turbatio non sequatur. Sed his ambobus majus ac difficilius Fidei impedimentum ex ipsa inueterata consuetudine proficiscitur. Vbique sanè consuetudo magnas vires habet, sed in barbaris longe maximas, quippe vbi rationis est minimum, ibi consuetudo radices profundissimas agit. In omni natura motio eo diuturnior ac veliementior, quo magis est ad vnum determinata. Ita lapidem sursum ferri, impossibile: deinde bruta animantia dedocere, difficile: mox hominem parum mente vigentem à consuetis retrahere, graue. Proinde in hac vna palæstra omnes suos sudores, operas, conatus exercebit copiosè Christi discipulus. Proderit autem quam plurimum, ritus, & signa, & omnem externum cultum diligenter curare. His quippe, & delectantur, & detinentur homines animales, donec paulatim aboleatur memoria, & gustus præteritorum. Quæ causa fuit Moyfi, vt populum Ægyptiis ritibus assuetum, multitudine sacrificiorum, & ceremoniarum distineret. Neque enim prius

4. Cor. 13. quod spirituale est, sed quod animale. Postea superstitionis antiquæ monumenta cautè, & gradatim extinguenda curabit, vt idola sua Guacas, adorationesque omnes penitus dediscant, ac pro iis pias alias, atque Christianas frequentent. Deinde teneriores animos puerorum nondum illa superstitione imbutos Christiana consuetudo, & disciplina suauiter occupet, & paternas pugnas ridere, ac contemnere iubeat, quod M. Franciscus

Franciscus sapienter faciebat. Præmiis, & laudibus paruulos inuitet, atque animet, maiores puerorum exemplo pudefaciat, & terreat. Postremo quod omnium est, & præcipuè considerandum, & diligentissimè obseruandum, non facile credet verbis, & quibulvis significationibus Barbarorum, etiamsi Fidem tenere, & Baptismum appetere se proclament. Cum enim sint leues corde, facile credunt, non Fidem concipientes ex Deo, facile quoque id retractant inconstantes, & leues. Diu & multum tenendi, vt quid profiteantur, intelligant, vt veterem consuetudinem idolorum deponant, vt mores alios induant. Denique consuetudinis peruersæ venenum alterius consuetudinis antidoto curandum est, vt verè Christum induant, ac non partim in Christo, partim in Baal claudicantes, sibi grauiorem acquirant damnationem, & sancto nomini grauem faciant iniuriam. Non multitudine, sed veritate, animarum lucra computanda sunt. Ita religio Christiana pluris fiet, & qui illi dant nomina, gloriæ atque honori erunt.

CAPVT XIX.

Epilogus dictorum.

QVoniā verò de vniuersa catechizandi ratione vberius in quarto libro dicetur, nihil præterea addendum arbitror, nisi vt sum-

130 DE PROCVR. IND. SAL. LIB. II.
mam eorum omnium , quæ differui , ad hoc
vnum conferam, vt per iniuriam fides nullo mo-
do propaganda existimetur , tum verò vt nouo
generi hominum nouam Euangelizandi ratio-
nem non fastidiat Christi seruus : & quantum per
rerum & temporum opportunitates licebit insti-
tutum vetus atque Apostolicum conseruet : vbi
minus, id exactè fieri patitur conditio hominum,
intelligat , neque de merito , neque de laude , ne-
que vero de fructu aliquid sibi perire , si fideliter
Dei gloriam quærens atque animarum salutem,
labores suos , & curas omnes in Euangelij dila-
tandi studio ad finem vsque consumat.



151
DE PROCVRANDA
INDORVM SALVTE.

LIBER TERTIVS.

*De Ciuili Administratione Indorum
saluti necessaria.*

CAPVT PRIMVM.

*Non esse quæstiones omnes tractandas, ac
deinceps de ciuili administratione
differendam.*



Ci o equidem, in iis, quæ de iure belli, deque promulgandi barbaris Euangelij ratione hæctenus disputata sunt, multa posse quæri, multa tractari, quæ à me patum explicata, vel etiam prætermissa videantur. Neque verò dubito quin studiosi ac literati nonnulli diligentiorẽ, atque vberiorẽ harum rerum, quæ sunt per se quidem grauissimæ, & premunt quotidie vehementer animos religiosos, tractationem desideraturi sint, quibus in te tanta

*Arist. 1.
Ethic.*

communiter hæc, atque vniuersè dicta non faciunt satis, sed priuatas, ac familiares quæstiones suas minutè ac sigillatim solui mallent. Quibus profectò ita obsequi cupimus, vt quamvis peculiæres de moribus sermones esse vtiliores præuideamus, tamen instituti nostri rationem de tota causa Indorum susceptam, varijs, implicatisque quæstionibus obscurandam, ac veluti extenuandam non arbitremur. Etenim neque doctrinæ, neque experientiæ nostræ tātum tribuimus, vt explorare liquidò omnia, ac certò definire possimus, quæ præclarissimis etiam ingenijs negotium facessunt: neque si id mediocriter præstare possemus, ad propositum nobis finem accommodatum esset, quibus illud maximè animo est, ea afferre quæ & intelligantur ab omnibus, & quantum fieri poterit, nemini non probentur. Nam in tanta sylua eaque ita spinosa, ac densa, illud potius optandum esse videtur, vt via aliqua ad barbarorum salutem certa, ac tuta muniatur: omnes verò latebras exquirendi, omnia abstrusa lustrandi, omnia denique impedita, atque implicata perpurgandi onus tantum nemo nobis æquus imponet. Quamobrem & in ijs, quæ de rebus Indicis administrandis dicta sunt hæctenus, & in ijs, quæ deinceps plura dicentur, præcipuas quidem res, ac veluti capita, quantum Christi Iesu dono licet, explicare, & confirmare satis putamus: tenuiora verò cætera, atque illarum veluti radicum, vel fibras, vel germina, valde illa quidem alioqui necessaria, persequi hoc loco minimè suscipimus. Igitur Euangelij ad barbaros profectio, & ingressu superioribus libris declarato, quid illis præstandum sit, qui diuinitus ta-

Et verbo veritatis manus dant, & in ouile Christi intrare volunt, deinceps pertractandum restat. Hi verò tanquam in Christo geniti infantes multa cura, diligentiaque egent, ac quemadmodum Regij pueri tum pædagogo regendi traduntur, tum magistro erudiendi; ita hi, & ciuiliū magistratum administratione solerti regendi sunt, vt in officio disciplinæque teneantur, & præceptorum spiritualium, idest, sacerdotum doctrina accurate imbuendi. Itaque de cura, & Politica, & Ecclesiastica salutis Indorum necessaria differendum est, Cum verò id quod animale est, præire Apostolus definierit, tum verò sequi quod spirituale est, hanc partem ciuilis administrationis si ante persequamur, ex ordine certè faciemus, Qua verò ratione barbari omnes, qui Christi nomen profitentur, ad Principum Christianorum curam, ditionemque pertineant, ante exponendum est, quæ de iis agatur, quæ vel Indorum populis illi præstare debent, vel ab ipsis vicissim percipere possunt.

1. Cor. 15.

CAPVT II.

Barbaros Fidem suscipientes ad curam, ditionemque Principum Christianorum pertinere.

PRincipio nemo est, qui neget, modo catholice sapiat, Euangelij promulgationem per totum terrarum orbem ad Romani summique Pontificis auctoritatem pertinere. Is enim proprie

prie est, cui in Petro ouile dominicum commissum est, cui grex omnis Christi traditus est, cuius proinde interest non solum oues iam congregatas pascere; verum etiam dispersas, ac dissipatas; quin potius nondum oues quærere, ut oues fiant; atque ut intra septa Euangelij cum reliquo grege pascantur; euocare: de quibus sanè Christus dixit, Alias se oues habere; quas oporteret adduci, ut fieret vnum ouile & vnus pastor. Hanc suam curam; & agnouerunt; & præstiterunt Romani Pontifices. Nam & Petrus Apostolus in Ægyptum Marcum misit, & Clemens Dionysium Arcopagitam in Galliam; & Gregorius Augustinum sociosque eius in Angliam; Gregorius item secundus Bonifacium in Germaniam, Hispaniam quoque, & Africā per sacerdotes à Romana Sede destinatos Christū recepisse historiae veteres tradunt, atque eiusmodi Euangelicis expeditionibus ad expugnandum Christoquē subiiciendum terrarum orbem factis per summos Reip. Christianæ Imperatores, idest, Apostolicæ Sedis antistites, plena est omnis antiquitatis historia. Et nomē ipsum Apostolicum valde consentit. Neque enim ob id solum Apostolicam Romanā Sedem vocari puto; quod Apostolorum fuerit, nam fuit & Ephesina, & Hierosolymitana, & aliæ non paucae; verum etiam quia Apostolorum munus pro Christo legatione fungendi, & vsque ad terminos terræ, illius Fidem immobili firmitate testificandi propriè ac præcipuè in Romano Pontifice perseuerat. Hoc cum ita sit, quis dubitat, quin sanctissimi Patres, cum ipsis per se orbem obire non liceat, eam curam aliis demandare & possint, & debeant; Neque ut

cant

eant solum, sed vt destinent ipsi ac mittant, quos idoneos iudicarint. Id ergo negotij in noui orbis gentibus adeundis, & infinitis, & difficillimis Romani Pontifices Catholicis Hispaniarum Regibus detulêre, vt tanquam proprium, ac peculiare munus agnoscerent, & curarent. Cum enim classibus vsque adeo crebris, & magnis, apparatu quoque & sumptu ingenti opus sit propter immensam Oceani nauigationem, & terrarum regiones plerumque incommodas, & egentes, non potuit villo modo nisi Regiæ potentia res tanta committi. Cur verò Hispaniæ Regibus potius aut solis, si modo absit inuidia, non est ab æquitate alienum, cum & illorum auspicijs, atque ope primum inuenta, vtraque India sit, & nauigationi Oceani opportunissima Hispania sit. Denique primi illi eam prouinciam, & petiuerunt, & studiosè curarunt. Neque est cur de summorum Pont. voluntate conqueratur quispiam, si onus, vt re vera est, idque grauissimè premens, cogitetur. Eiusmodi prædicationem consequitur, vt qui ex infidelibus Barbaris, Christianam Religionem profiteri velint, ad curam Principum Christianorum, tutelamq; pertineant. Id cum literæ Alexandri VI. copiosè doceant, quarum concessionem ad hunc modum rectè viri doctissimi intelligunt, non est, cur in hac causa diutius hæreamus. Neque enim posset aliter Fides in tot populis recens, & tenera permanere ac accrescere, nisi Christianorum Principum patrocínio, fide, potentia aduersus inimicorum Christi defenderetur iniurias. Barbari natura efferrati & insolentes, foedera, atque amicitias parum curare soliti, rationē faciliè contemnentes, quonā modo

modo frænari, tenerique possint, nisi nostrorum vim pertimescant? Qua ratione Christi character impressus in novis Euangelij tyronibus non summo opprobrio sit, si semel baptizati Indi suorum scelere, & parricidio Fidem statim sint prodituri? Denique in tam remota orbis regione, & à cætera Christianitate seiuncta, in medio nationis pravae & peruersæ, quid spei superesse potest, homines ut infirmi, iudicij inopes, moribus perditis, natura instabiles perseverent, nisi nostrorum regum sinu foueantur, atque vlnis infantium more gestentur? Cuius rei cum aliæ pleræque nationes, tum maximè Æthiopicæ, Angolæ, & Manicongi testimonium abundè dant, in quibus lauacrum Christi susceptum maiorum perfidia & temeritate ignominiose fœdatum est; cursus Euangelij abruptus; salutis hominum aditus omnis occlusus, qui si vim nostrorum sentirent, non in religionem Iesu Christi tam perniciosè sæuissent. Rectissime omnino sentiunt summi Theologi esse penes Ecclesiam integram, absolutamque potestatem Fidem ab hostium iniurijs, & contumelijs tuendi, eaque nisi grauiora exinde mala consequantur, aduersus consilia & vim pessimorum esse utendum. Itaque si expedire censeat, potest sine vlla dubitatione Ecclesia infideles Reges, aut Dominos de Fidelium dominatu, & ditione dejicere, eamque ad Fidei defensionem committere Christianis. Ac ne noui aliquid afferre videamur, præter concordem, ut dixi, sententiam, vetus sanè est Apostoli Pauli præceptum, in causa matrimonij si infidelis conjux fidei, fraudi & impedimento esse cœperit, liberum esse fidelem ab eiusmodi

Th. 1. 2.

q. 10. ar.

8. ibidem

Caier.

Dur. 2. d.

44. q. 3.

ar. 2. Viç.

Relect. de

Indis. So-

rus 4.

dist. 5. q.

vni. ar.

10.

1. Cor. 7.

Inno. 3.

c. Quæro,

seruitu

seruitute. Et certè constat arctius ac magis naturale vinculum esse coniugij, quam cuiusvis subiectionis, & seruitutis. Itaque si periculo Fidei etiam dissoluto coniugali vinculo pro data sibi à Domino potestate, occurrendum putat Ecclesià, quid mirum est, si in eadem Fidei causa subditum, seruūve Fidelem ab infidelis Domini seruitute liberet? Adde quod idem gentium Doctor causas, disceptationesque Fidelium non vult ad ethnicos magistratus deferri, sed ipsos sibi legere, qui ius dicant, propterea quod Fidei iniuriam ab impijs pertimescebat. Quin etiam re ipsa Iudæos omnes ac Sacra nos hominum Christianorum seruitutis iam pridem spoliauit Ecclesià, cum primum ex infidelibus seruis fieri illi Christiani liberi velint. Qua de re etiam legem Iustinianus Imperator tulit, vt siue Paganorum, siue Hæreticorum serui, siue Iudæorum, ad Christianam religionem transire velint, dominorum potestati eripiantur, nullo etiam dato pretio. Quominus mirandum est, si tyrannide in recens effectos Christianos infideles Domini abutentes, omni in illos ditione ac iure, Ecclesiæ autoritate interposita, excidere possint. Quod si Euangelio prædicando, & propagando nullo modo obsistant, neque suis impedimento sint, quominus Christo, qui vel dare volunt, fidem dent, vel quam semel dederunt, inuiolatam seruent, etiamsi ipsi alioqui in erroris sui cæcitare persistant, non idcirco suorum gubernatione spoliandi sunt: sed est nihilominus summus veluti Imperator ab Ecclesià constitutus Christianus Princeps, vt causam Fidei, ac Fidelium prouidentiam, quotiescunque res postulet,

Et cap.
Gaude-
mus, de
Diuor-
tiis. Conc.
Tol. 4. ca.
61. & 62.
Refertur
28. q. 1. c.
Iudæi. Et
cap. Sape
malorū.
1. Cor. 6.
Gelas. d.
54. c. Ge-
neralis.
D. Greg.
eadem, d.
c. Frater-
nitatem,
ex li. 5.
Regist. c.
131. Et
titul. de
Iudæis,
Et Sara-
cenis, c. 1.
Et seq. Et
fin. Conc.
Matisco.
1. cap. 16.
apud
Gra. d. 54
c. Mancipia.
L. Deq
nobis, §.
His ita
dispositis,
C. de
Episcopis.

postulet , diligenter agat. Quoniam verò rarissimum est ac penè impossibile , vt barbari Domini in suo regno aitam religionem contemni , euertique , ac leges pleraque mutari non ægrè ferant , & quibus possint modis nouam religionem auertant , dæmonibus præsertim furentibus , ac multum apud suos ea de re tumultuantibus , commune ac veluti canonicum debet haberi , vt hoc tempore Indorum populi , quicunque Christum sequi destinarunt , sub nostrorum regum cura , atque administratione sint. Et tamen moderatione se nostri gerant oportet , si Christianam Rempub. saluam esse volunt , & religionis dignitatem pro virili sua parte tueri , vt neque ferro , nisi extremum discrimen vrgeat , agatur in barbaros , neque de commoditatibus ac dominatu suo pellantur , nisi quatenus iniuriæ Fidei , & suis perniciosi deprehendantur , neque grauius quicquam designetur , quo Christi Euangelium lædi , perturbariue possit. Denique vt agnoscat religiosus Princeps potestatem sibi à Christo ad ædificationem , non item ad destructionem datam. Et quamvis Christiani Principes Domini sunt , parentes se tamen præbeant , neque tam quæ Indorum sunt sibi , quàm Indos ipsos omnium Domino quærere videantur.

2. Cor. 13.

CAPVT III.

*Non oportere falsos titulos comminisci
dominationis Indorum.*

HOC igitur ius administrationis, ac subiectionis Indorum ex propria ac certa Ecclesiæ commissione generale est, & commune tum iis, qui hæctenus explorati sunt, tum iis, qui procedente tempore occurrent. Quod quidem nisi aliunde perturbetur iniuria, æquum ac salutare esse constat. Alios verò titulos, quos asserre quidam nituntur, Regiæ potentia, vt mihi quidem videntur, assertores nō necessarij, ne assentatores dicam, qui nimirum ex tyrannide Ingarum in hoc regno, atq; vsurpato per vim Imperio, itémque ex polycratia gentium plurimarum legitimo Rege carentium (has Hispani Behetrias vocant) contendunt Christiano Principi regnandi ius facere, equidem neq; satis intelligere, neque certè probare possum. Etenim si à prædone alterius rem deprædari, & tibi vendicare non potes, quæro quid æquitatis, quid rationis habeat, quòd à tyrannis (vt ita esse faciamus) Indorum dominatum eripias, tibi que ipse adscribas? An idcirco iustior Sylla, quòd Rempub. Marij seruituti eruerit, addixerit suæ? An verò alienum scelus, nostro ius facit? Hoc vero perridiculum est, & Æsopicae fabellæ persimile. Adde quod istorum imperia, per vim licet vsurpata, tamen annos iam sexcentos confirmata sunt: quam ætatem si in aliis plorisque imperiis neges

neges præscriptioni esse satis, profecto res humanæ omnes misceantur, necesse est. Quod enim regnum est, quod non violentia magna ex parte initio quæsitum sit? Ut non ineptè apud veteres, & Reges, & Tyranni eodem nomine censeantur. In Polycratiis vero, aut communitatibus, præter ciuium ipsorum consensum, imo contra omnem omnium sententiam, externum principem inducere, si tyrannide vacat, nescio planè quis vnquam tyrannus haberi debeat. Neque vero abnuo multis Indiarum locis ex bello iusto ac legitimo, quod propter iniurias hominum, aut fidei offensas existere forsan potuit, ius peculiare Christiano Principi dominandi fieri, nam eiusmodi Lusitanicæ Historiæ nonnulla referre videntur. Verùm cum de communi, ac certo titulo disputatur, Ecclesiæ authoritatem, Fidei periculum, ipsorum barbarorum salutem, Rempub. Indicanam administrandi, & æquissimum ius præbere Principibus Christianis, & illud per se abundare, certo nobis persuadet cum ratione valde experientia ipsa consentiens. Quamobrem siue alij tituli etiam sint, siue non sint, constat ad Regum Catholicorum curam maxime pertinere salutem Indorum, cui procurandæ, & religionis præceptores, & disciplinæ ciuilis ministros lectissimos mittant, oportet, vt Deo atque Ecclesiæ iniuncto sibi munere perfungentes, vt ipsos decet & causa tanta exigit, satisfaciant.

CAPVT IV.

*Quales administratores res Indicæ
postulent.*

Igitur quam refert vniuersitatis Indorum præfe-
ctos, ac magistratus optimos apud Christia-
nos nancisci, quantumve ponderis in vtram-
que partem vel salutis, vel exitij ciuilis admini-
stratio habeat, quovis etiam tacente, res per
se ipsa declarat. Nam cum in omni Repub. Ma-
gistratus perinde sit, atque pædagogus quidam,
vt est ab Ambrosio præclare dictum, atque iusti
& æqui custos immortalis, facile quivis intelli-
get, ita ad Ecclesiasticam, ac spiritualem institu-
tionem comparatam esse ciuilem & humanam,
quemadmodum ad Christi Euangelicam legem,
naturalis iuris disciplina necessaria est, quippe
nisi hæc fuerit obseruata, vt ait beatus ille, illa
custodiri non possit. Quamobrem Paulus docet
non esse potestatem nisi à Deo, easque quotquot
sunt, à Deo ordinatas esse administras boni, mali
ultrices. Quibus consentaneum est illud Petri
qui & Regibus, & Regum ducibus obediendum
monet; quod bonis laudi, improbis terrori eorum
officium sit. Ergo si sunt hæc capita populorum,
si pastores, si duces, gubernatores, aurigæ, tum
etiam lumina, specula, leges viuæ, & quibuscun-
que aliis nominibus tum diuinæ tum Philoso-
phicæ literæ ornandos ducunt, quis satis dicere

*In Epist.
ad Rom.
c. 1.*

*Ibidem.
Rom. 13.*

1. Pet. 2.

Amos 6.

Hier. 23.

1. Reg. 9.

Ezec. 27.

Arist.

L

queat,

Recl. 10.

queat, quantum in horum integritate, & fide præsidij ac salutis Reip. situm sit? Qualis enim rector est ciuitatis, tales inhabitantes in ea, & secundum iudicem populi, sic & ministri eius. Quem totum locum ab omnibus penè Reipub. legumque tractatoribus externis copiosè grauitèrque versatum, à nostris Ecclesiasticis, sacris, & exemplis, & documentis disertissimè illustratum, quanquam diutius proferre non opus est, tamen

Orat. 10.

iuuat insignem Basilij ea de re accumulare sententiam. Necesse est, inquit, huiuscemodi viris mandare magistratus, ac eos aliorum constituere duces qui cæteros omnes prudentia, constantia, ac vitæ sanctimonia longè anteeant, vt virtutes, quibus præditi sunt, communes fiant eorum omnium, qui eos imitantur. Nam ad mores eorum, qui gubernacula tenent, componere se totos ij, qui parent, solent, ita vt quales duces fuerint, tales esse necesse sit eos omnes, qui sequuntur, & quales fuerint in Republica Principes, tales vt plurimum existere solent reliqui ciues. Atque hæc quidem Magistratum, atque potentiam optimo atque aptissimo cuique demandandi curâ in omni Reipub. in omni Principe debet esse vel maxima: at in noui huius orbis administratione, in barbarorum nationibus, & subigendis & continendis in Fide, quisquis rerum Indicarum vel tenuiter experiens sit, nullo modo dubitabit eam, neque primam, neque maximam esse debere, sed omnino ac penitus singularem. Etenim à præfectis, à ducibus, à iudicibus, à Regiæ denique maiestatis administris, perinde, atque à fonte fluuium, ad res omnes Indicas, vel perniciem, vel salutem, vel

si quid aliud tertium est, deriuari, ac permanere perspicuum est. Neque dici potest, eo fonte vitiato, quam latè lues influat, quàmque omne remedium respuat. Ac ne cui forte videar in suscepta causa amplificanda studio magis, quam ratione duci, afferam non nisi certa, & explorata argumenta, quæ vtinam quantum habeant ponderis & ipse exponere possim, & ij, quorum interest, velint attendere. Primum in aliis Rebusp. ac ciuitatibus ex multa antiquitate fundatis, & constitutis, habent moderatores adjumenta plurima eademque maxima, quibus etiam volentes non sinuntur errare. Sunt leges publicæ vtilis, est patriæ consuetudo, sunt exempla maiorum, est denique quidam rerum veluti cursus ipsa antiquitate firmatus, quo in otio & negotio facilè ac tranquille ciuitatis status per se pene consistit, vel certe si deflectat paululum, modica rectoris motione dirigitur, sicut in tranquillo ac tuto mari clauum tenenti vsu venit. At in Indicana gubernatione, cùm præsertim noua regna adeuntur, atque habitantur à nostris, omnino est secus. Omnia noua, nullæ consuetudines certæ, leges iuræque omnia, naturali excepto, nihil prope modum firma authoritas, exemplaque superiorum temporum vel nulla, vel non imitanda, euentus quotidie inopinati, repentinæ plerunque ac periculosæ mutationes, municipalia iura tum ignorata, tum non satis firma ad iudicandum, Hispanienses, Romanæque leges magna ex parte cùm barbarorum diu retentis moribus repugnantes, status ipse Reipub. adeo inconstans & varius suiq; dissimilis, vt quæ heri commodissima rectif-

simaque habebantur, hodie rebus commutatis
 iniquissima, ac perniciosissima existant. Hic quis
 non videat qualem moderatorem eiusmodi Res-
 pub. efflagitet, quàm sapientem, quàm cordatum,
 quàm prouidum, quàm integrum, atque con-
 stantem, quippe cuius consilio, & prudentiæ com-
 missa sint omnia, in quo præsidia omnia belli pa-
 cisque constituta, collocataque sint? Si enim pri-
 mos ciuitatum conditores optimos, ac sapientis-
 simos esse antiquitas voluit ad prima fundamenta
 iacienda, profecto perspicuum est, non nisi præ-
 stantissimos, lectissimosque viros orbis indagato-
 res, ac nouarum gentium duces esse debere. Hæc
 planè, vel vna ratio ad obtinendam causam satis
 erat. Adiungam tamen alteram non minus effica-
 cem, atque robustam. Nam cum remotissimæ re-
 giones hæ sunt, caputque huius vniuersæ Reip. siue
 Regiam, siue Pontificiam maiestatem inspectes, lon-
 gissimè distitum, licentiæ, ac libidini Præfecto-
 rum campus late patens ostenditur, vt quicquid
 collibeat, licere sibi etiam opinentur. Quod enim
 longe distat, quasi nihil ad se pertineat, facile teme-
 ritas humana cõtemnit. Hinc seditiosa consilia, tu-
 multus etiam, atque ad eò totius Reip. perturba-
 tio; remedium verò oppido serum, atq; incertum.
 Quarum rerum testis locuples est hoc ipsum re-
 gnum Perù toties intestinis armis concussum, atq;
 instar procellosi maris contrariis ventis agitaturn.
 Itaque vt Medici pulmonum, si ægrotare cœpe-
 rint, curandorum perdifficilem esse rationem do-
 cent, quòd ad traducendum eo vsque medica-
 mentum longa & valde clausa via sit. per stoma-
 chum, vt phlegmæ vis valde iam debilitata perue-
 niat,

niat, aut ne perueniat quidem, ita planè longinquitas supremæ Potentiæ, atque authoritatis, huius Reip. ægritudini leuandæ remedia opportuna vix plerumque sperare permittit. Quamobrem quicquid in rebus Indicis à Præfectis peccabitur, propemodum dixerim sine emendatione peccabitur. Quod equidem perspexisse Romanos mihi persuadeo, cum ad remotissimas quasque prouincias non nisi lectissimos, atque integerrimos viros mittendos censerent, aliquando quoque, si res postulare videtur, ipsi Consules Reip. lumina non cunctanter proficiscerentur, quippe qui egregiè nossent; quos animos faceret temeritatis dilata vindicta, utque soleat à reliquo grege seiunctus vel ipse bos efferari. Postremo si hæc tanta non essent, illud non paruum existimari potest, quod vel leuia peccata gubernatorum, & procerum in rebus Indorum ingentia crimina haberi debent, propterea quod teneros adhuc illorum animos vehementer sauciant; & à Christiana religione perniciosissimè auocant. Etenim & publicorum Magistratum culpæ abscondi non possunt; quia ut Tragicus dixit,

Pellucet omne Regie vitium domus.

*Sineca in
Thyeste.*

Et infirmi adhuc; & rudes Indorum sensus nullo modo de Christiana gente, deq; Christo ipso aliter iudicare norunt quàm ex his, quæ perspiciunt in nostris sublimibus præsertim, atque authoritate eminentibus. Quæ res quanti fiat apud æquissimū hominū conditorem, atq; parentē, inde facile intelliges, quod cū lachrymis ac dolori intimo sancti Regis David flagitiū admissum condonasset libenter; illud tamen seuerissimè vindicauit, & questus est,

2. *Rg. 11.* quod inimicos Domini nomen blasphemare fecisset, cum inter se reputarent, Deum eius regis amicum habitum, qui tanta perpetrasset, quod ad diuinæ existimationis contumeliam quandam pertinere videbatur. Propheta sanè Ezechiel, etsi de suo Israëlè narrare videtur, verius tamen de nostri æui hominibus vaticinari credendus est, cum illa, diuini doloris & querimonix plena

Ezec. 36. pronuntiat, Et ingressi sunt ad gentes, ad quas introierunt, & polluerunt nomen sanctum meum, cum diceretur de eis, Populus Dei iste est, & de terra eius egressi sunt. Quas sanè ironicas voces fastidij, & despicientix testes, cum inter se gentes de nobis sapissimè vsurpant, tum verò cum acrius obiurgantur etiam in os nobis iactare non verentur, eadem quippe ipsi agimus, quæ in illis maxime reprehendimus. Si quis igitur animaduertat

Rom. 2. rerum Indicarum varium, ac mutabilem statum, tum supremæ potestatis tam longe positam sedem, mox animorum in fide recentium teneritudinem fateatur necesse est, ad nullam aliam prouinciam regendam, ad nulla negotia gerenda ampliorem desiderari sapientiam, integritatem, pietatem, vt mihi quidem sæpenumero occurrat, quod à Probo dictum sanctus Paulinus narrat

In vita Ambros. Ambrosio cum res Mediolanenses id temporis difficiles & præsumptæ iret administraturus, Non tam se iudicem quam Episcopum, vt putaret benignitate, zelo, paterna cura erga omnes. Quæ de re Valentiniani illius maioris non erat parua gloriatio, quod eos ipse iudices daret, quos Ecclesia sibi legeret Sacerdotes. Atque vtinam nunc, vel Ambrosios, vel Nectarios, vel si qua sunt.

præse

præfectorum celebriora nomina haberemus: profecto noui orbis administratio tales se maximè decere ipsis rebus ostenderet, quibus, quod Leo magnus Theodosio Augusto gratulabatur, non solum regius animus, sed etiam sacerdotalis in-
esset.

CAPVT V.

Quam ob causam difficile inueniantur idonei rebus Indicis præfecti.

HOs igitur duces, hos magistratus res Indicæ postulant, neque vlla argumenta, quantum vrgent illa quidem satis, tanti facienda sunt, quanti ipsa longi temporis experientia. Quam causam cum diserte ageret vir quidam clarissimus, & inter regios ministros Princeps, colligebat nusquam fidem, prudentiam, animi magnitudinem magis requiri, tum vero adiungebat aptissimè. Et cum tales ministros efflagitent res, qui homines ad hæc venimus? Vt potius exonerandæ Hispaniæ causa quam huius reipublicæ capessendæ missi esse videamur. Quotum enim quemque inuenies, cui si in Hispania magistratu potiri, si præfectura licuisset, Oceanum trajecturus fuisset, atque hæc in extremo orbe quæsiturus? Ita melioribus rebus exclusi ad hæc veluti extrema conuertimur. Mihi vero hæc prudentissimi viri oratio, non tam esse iniuriosa videtur in
L 4 multos,

multos, quos prouinciæ hæ, & habuerunt, & habent præstantissimos, Christianæque ac sapientis administrationis laude florentes, quam commovere potius, & conqueri Indicarum rerum natura ipsa comparatam difficultatem. Etenim cum penetrandi ad Indos plerisque, vt modeste dicamus, familiaris rei angustia in causa sint, ac relictam patriam, liberos, charos omnes, labores quoque immensos, & pericula nauigationum, itinerum, noui cœli, ea vna cogitatione compensent, quod aliquando tandem ex India redituri sint diuites, ac beati, vt quod reliquum est ætatis, in otio splendide agant, suos etiam fortunis iuuent (quis enim si cogitationes, consiliaque sua inspiciat, ita se animatum neget?) Quis obsecro non videt cupiditati, atque auaritiæ ianuam esse patefactam amplissimam? Vt cumulandæ pecuniæ cura sit prima, cætera omnia huic vni posthabeat, quippe cuius causa se tanta suscepisse, tanta perpeßum esse secum reputat, dedecoriquæ sibi, & ignominia vertendum, si ex India non optime nummatus reuertatur ad suos? Sic vsus, atque hominum existimatio habet. Hac lege quis iam magistratus, vel supremus, vel infimus non cupit familiaris rei suæ commoda augere? Quod non potest non vehementer nocere Reipublicæ. Aristoteles quidem magnopere interesse Reipub. censet, ne egentes ad magistratum vocentur, quod pauperes in magistratu vanales fieri ob egestatem asserat. Moyß quoque de creandis iudicibus Iethro socer sapienter consilium dedit, quod ille libenter accepit. Prouide, inquit, de omni plebe viros sapientes, & timentes Deum,

2. Pol. c. 7.

6. l. 3.

c. 8.

Exod. 18.

Deum, in quibus sit veritas, & qui oderint auaritiam. Et quamvis Indicis magistratibus stipendia ampla constituta sint, quibus viri boni contenti sunt, sæpe tamen fitis illa opulentè in patriam reuertendi iusto nescit expleri, ut hîc quoque verum sit illud Salomonis: Rex iustus erigit terram, vir auarus destruet eam. Atque inde quoque rebus Indicis altera non leuior ærumna proficiscitur, quòd cùm gubernatores omnes, ac iudices Hispaniam cogitent, studia sua omnia, & curas illic collocent, Indicum solum veluti alienum, atque extraneum habent, ita parum curant, quod nihil amant, quod quantum statui, atque incrementis Reipub. obsistat, dici non potest. Inter laudes eorum, qui ciuitatem aliquam administrant, & necessarias dotes, illam primam Philosophus numerat, ut statum præsentem Reipub. ament. At Rempub. hanc ita plerique ab animo suo alienant, ut exilij loco habere videantur: aut certè præclarè cum rebus Indicis agatur, si quemadmodum militares præfecti vbi castra ponunt, in id temporis, quod eo in loco se acturos intelligunt, commeatum, cæteraque opportuna curant: inde abeuntes dissipata omnia, atque exusta relinquunt, ita nostri homines ad id saltem ætatis, quod hîc exacturi sunt, utcunque res Indicas constare velint. Hæ sunt administrationis Indicæ graues difficultates. Ad quas accedit quoque alia longè quidem maior, verum non ita communis, sed propria eorum, qui nouas Indorum terras adeunt, sedibus ibi collocandis intenti, quòd cum ad barbaros eant, non nisi armorum

Prov. 29.

s. Pol. c. 9.

armorum præsidij fultibus se incertis commit-
 tant, vbi vel se tueri oportebit, vel ferro etiã ape-
 rire viam. Itaque totus iste primus ingressus mili-
 taris est. Quamobrem ei demandari prouincia so-
 let, qui peritia militari excellit, neque ad co-
 pias ductandas tam Ducis probitas, quam mili-
 taris peritia spectari solet. Hic quid occurrat in-
 commodi, facile quivis cogitare potest. Cum
 enim primus ingressus fidei, prima exordia Evan-
 gelij, prima Christi annuntiatio pro ductu ac vo-
 luntate hominis, vt parcissimè dicam, militaris
 transigenda sit, illius sententia in omnibus prin-
 ceps sit, cumque dux ipse profanus sit, manus vero
 satellitum temeraria, qualem expectare debe-
 mus administrationem, quam rebus Christianis
 prouidentiam? Quamobrem illud etiã atque
 etiã Catholici Principes, horumque præreges,
 aut cuiuscunque demum intersit, cogitare debe-
 rent, cum ad eiusmodi expeditiones bellicas du-
 ces præfectosque legunt, vt pij, Christiani inte-
 gri, Deum timentes, salutemque hominum pluri-
 mi facientes quærantur, denique ij, qui se Episco-
 porum, imo verò Apostolorum munus sustinere
 perspiciant. Quanquam enim ad arma tractanda
 non tam viri probitas, quam militaris peritia, vt
 Aristoteles voluit, spectanda sit, tamen vbi
 de fidei initiis agitur, de salute tot barbaro-
 rum, denique de ipso Christi honore, atque exi-
 stimatione, infinitis partibus pluri facienda est
 vitæ integritas, atque constantia. Neque enim tam
 dilatandæ Reip. causa res geritur, quam Fidei am-
 plicandæ. Huic verò duci & moderatori probò
 etiã adiungere oportebit cohortem non homi-
 num

num perditorum, ac profligatorum, sed si non optimam ac religiosam, tamen non pessimam, & infamam. Quod si quis nimia ista censebit, ridens fortassis in cogendis militaribus copijs eiusmodi despectanda probitate præcepta, is sic habeat, longè magis esse risu dignum, ad Evangelij primum introitum eos reputari commodiores, qui ad nocendum procliuiores sint. At neque vir ea probitate ac modestia facilè reperietur, inquit, neque delectus ille hominum ad expeditiones bellicas vlllo modo haberi potest. Primum si fieri nequeat, expeditiones ne fiant. Neque enim amat Christus annuntiari cum insigni Christianæ religionis dedecore. Deinde non vsque adeo dura res est, modo voluntas ne desit, præfectus quispiam quærat non solum militari laude clarus, verum Christiana pietate commendatus: vtque ad illius comitatum si non deligantur pijs homines, tamen non admittantur nefarij. Si enim homines infames, & sordidos Imperatoribus militare Romanæ leges non iniuria vetuerunt, quid est cur Christo in primo illius ad infideles ingressu perditissimus quisque nomen dare sit permittendus? Quamobrem cùm in omni Magistratu Indicorum verò maximè in prima ad barbaros profectio- ne viros idoneos sapientia, & pietate præstantes præficere oportet, magna adhibita diligentia, vt tales omnino quærantur, inuentique præmijs, atque honoribus ad rem pro dignitate gerendam permoueantur. Quanquam magna apud Deum gloria copiosaque pro meritis rei tantæ remuneratione nihil potest amplius ac præstantius cogitari. Assiduæ autem nostrum omnium ad Do-
minum

Osee 13.

Ier. 34.

Hier. 3.

minum preces esse deberent, si modo tot hominum millia amamus, aut alicuius facimus, ut neque det reges in ira sua, neque propter peccata populi regnare faciat hypocritas, sed mittat potius pastores iuxta cor suum.

CAPVT VI.

*Non esse iniquum tributa Indos pendere
administratoribus suis.*

QUoniam administrationem nouæ Christianitatis penes nostros principes esse iam diximus, & his ex Dei, Ecclesiæque præcepto incumbere, saluti Indorum ministros idoneos tum ad spiritualia, tum ad ciuilia præbeant; exinde dicendum est, vtrum ad horum ipsorum necessarios vsus, possit ab Indis exigi aliquid; quidve illud sit: mox, quod vicissim Indis rependi debeat, Tributa ergo necessaria ad spirituales, politicamque gubernationem certa ratione moderata, ac definita non iniquè Indorum gens pendere existimanda est. Nam vt omittam, Philosophorum Rēspubl. suas constituentium, de publicis tributis sententiam, qui semper moderatoribus publicis, negotiisque communibus de publico, & communi censu tribuendum docent, certè in diuinis noui testamenti literis, vsque adeo expressa res est, vt nihil amplius. Paulus sanè Apostolus hunc totum locum scribens ad Romanos excellenter illustrat:

illustrat: Necessitate subditi estote, inquit, non solum propter iram, sed etiam propter conscientiam. Ministri enim Dei sunt in hoc ipsum seruiantes. Reddite ergo omnibus debita, cui tributum, tributum, cui vectigal, vectigal, cui timorem, timorem, cui honorem, honorem. Quo loco non oscitanter notari debet, quos alloquatur Paulus, & de quibus, Scribebat sanè ad Romanos iam Christianos subditos verò Cæsaribus, qui in liberam ciuitatem per vim irruperant ad potentiam. Et tamen his necessariò parendum monet, non solum propter iram, sed etiam propter conscientiam, id est, non timore hominum solum, sed etiam Dei ita urgente. Deinde tributorum pensiones præcipiens, atque commendans, causam reddit æquissimam, quod publici magistratus ministri Dei sint in commune bonum seruiantes, ac proinde eos, ali atque honorari à subditis iustum sit. Quæ ex re colligit reddendum esse quicquid debetur, siue tributum sit, siue vectigal, siue quidvis aliud. Quæ in hoc loco commentetur Chrysostomus, placet etiam ascribere. *Hom. 23.* Innumera bona, ait ille, ciuitatibus per magistratus obueniunt, quæ si sustuleris, omnia simul pessum ibunt, ita ut neque vrbes, neque agri, neque domus, neque forum, aut aliquid aliud consistere queat, sed omnia simul subuertantur, potentioribus imbecilliores impunè deuorantibus. Propterea ab antiquis temporibus communi omnium sententia principes à nobis sustentari debere visum est, ob id quod sua ipsorum negligentes, communes res curant. Et mox, Quod si Paulus tunc cum gentiles adhuc essent Principes, ista

ista præcepit, multò magis oportet ea fidelibus exhibere. Eam Apostoli sui doctrinam Christus Dominus non solum præcepto ante constituit, verum etiam exemplo commendavit suo. Nam

Matt. 22.

*In oratione
contra
Auxen-
sium.*

Luc. 2.

*In oratione
sive
epistola
ad Iulianum.*

*Et Aug.
de cat.
rud. c. 21.*

de Cæsari reddendo censu rogatus, Cæsari, quæ Cæsaris sunt, reddenda esse respondit, magisterio obedientiæ, ut ait sanctus Ambrosius, & nos inhæremus, dum solvimus, quæ sunt Cæsaris, Cæsari, & quæ sunt Dei Deo, tributum Cæsaris est, non negamus. Ipse verò recens natus Saluator in Bethleem etiam profectus est, ac descriptus, & Augusto Cæsari Iudæam tunc cum cætero orbe obtinenti censum persolvit, quemadmodum vult D. Nazianzenus. Quam rem cum & diuinorum librorum authoritas, & ratio ipsa satis muniat, atque confirmet, neque nostrorum Theologorum eorum quoque, qui causæ Indicæ studiosiores sunt, aliquanta ab iis tributa exigi posse quifquam neget, nihil est cur in loco plano, & expedito amplius immoremur.

C A P V T VII.

Improbantur tria genera tributa taxandi.

TAmetsi ab Indis tributa exigere nostris licere manifestum sit, at quanta illa tamen, & qualia quæve ratione, & sorte, & quovsq; id fanè perobscurum est, & ad explicandum impense difficile. Neque enim statim immodicas exactiones probaturi sumus, neque avaritiæ, ac rapacitati

citati multorum conuiuere debemus, quæ una res totius regni euersio sit, atque Indici fundi, ut comicè dicam, calamitas. Nam quod hos capere oportet, illa intercipit. Ac sit licet maiores facultate nostra certum aliquid in re usque adeò incerta & dubia definire; tamen operæ pretium facturus sum, ut mihi videor, si diligentius rationes aliquas tributa taxandi excussero. Primum igitur documentum sit, Indis multæ nomine tributa imponi minimè posse. Nam ubi iustè aliqua ciuitas, aut gens debellata est, solet, idque meritò, pecuniaria redditio pro victoris arbitrio imperari, ut temeritatis suæ pœnas luat. Hanc vel potissimam tributorum originem extitisse, Gregorius Theologus vult, ita scribens; Ex peccato penuria nata est, perniciosæ cupiditatis mater, quæ bella peperit, à quibus orta sunt tributa, à quibus in diuina condemnatione nihil grauius est, & acerbius. Hæc Gregorius. Ad hunc modum proffigato ac victo Ioachaz Rege Iuda à Pharaone, centum talentis argenti & talento auri terram esse mulctatam diuinæ literæ tradunt. Hoc genus tributorum tum profanis, tum sacris literis frequentissimum est. Sic Moab à Dauide perculsum sub tributo seruasse, itemque Syrum Damascenum, sic Chananæum tributarium factum Ephraim authore Iosue, nec non reliquas illas nationes Iebusæorum, Amorrhæorum, atque aliorum Salomonis opera perpetuo tributo soluendo addictas esse populo Israël sacra historia commemorat. Quod sane nullo modo iniuriosum esse, non solum sanctorum virorum exempla demonstrant, sed etiam aperta ratio, quæ

*Orat. ad
Iulianū.*

4. Reg.
23.

2. Reg. 8.
1. Par. 18.
Iosue 16.
Ch. 17.
3. Reg. 9.

iure

iure belli victos victoribus subdit, neque fortunis solum, sed libertate quoque vitæ ipsa reddit obnoxios. At Indorum populi, ut supra satis disputatum est, à Christianis debellari non possunt, ac proinde neque libertate, neque argenti pensione mulctari. Quid enim nostros læserunt, quorum ne nomen quidem audierant? Dei verò offensas, naturæque iniurias vlcisci, nostra nihil interesse, opinor alias satis esse monstratum. Itaque grauitè profecto peccarent, qui eo iure debellatos barbaros instar Amorrhæorum, & Chananaeorum, vel potius, ut præsentia loquamur, Maurorum, atque Turcarum, seruitute, atq; multa pensione onerarent, existimantes etiam beneficium se collocare, quod non capite plecterent. Neque enim tam stolidi rationi nisi ab imperitia, & insolentia militari proficisci potest. Quod si id genus quippiam hætenus perpetratum est, consulant certè conscientias suas, qui ita se compararunt. Atque hoc sanè documentum certissimum est: sequens verò multò certius, Nefas esse in exigendo censu rationem habere Euangelij illis communicati, quasi retributio expectetur, ut pro Fide, & Baptismo, Christi que notitia imperita vicissim repetatur argentum. Hæc tota sordidissima cogitatio hominum tum imprudentium tum improborum Euangelium veluti licitantium (nam & hoc à quibusdam jactari aliquando solitum audio) nihil profecto à Simone illo abest, nisi quod ille nefarius pecuniam potius dare pro gratia, isti gratiam pro pecunia cupiunt commutare. Nullo ergo modo ferendum est, ut in designando tributo, quid per Christianismum sint consecuti barbari, cogitetur. Quæ enim gratis accepimus

Act. 8.

Act. 10.

gratis

gratis quoque dare iubemur. Tertium documentum esto, Barbaros causa soli, terræve ab ipsis culturæ, & habitatæ nihil debere Principibus Christianis. Quod ut intelligatur, meminisse oportet tunc demum ratione soli pensionem persolui Principibus, aut Reip. ab homine priuato, cum Principis auctoritate, & iure conceditur. De quo genere tributorū Ambrosius videtur loqui in sua illa contra Arrianos defensione mirabili. Si tributum, inquit, Imperator petit, non negamus. Agri Ecclesiæ soluunt tributum. Si agros desiderat Imperator, potestatem habet vendicandorum, & cætera quæ persequitur. Hoc igitur ita habet, cum ager regio iure possidetur. Quare videmus tū subditos à Dominis, tum externos à ciuibus agros ea pacatione accipere, ut certos semper census inde persoluant. Isto sanè exemplo sanctus Ioseph vniuersam Ægypti terram subdidit Pharaoni, quinta portione frumentaria Regiis vsibus perpetuo addicta, quod quibus agros ipsos tribuisset, rectè & iure posset cum his de reddenda ea semper portione pacisci. At hæc ratio in tributis Indorum iniri nequaquam potest. Neque enim solum nostrum ipsi occuparunt, sed nos illorum, neque ad nos ipsi, sed ad illos nos certè peruasimus. Itaque barbarorum terra subditur quidem Christianis principibus, cum primum populi ipsi subduntur, sed nihil, illius ratione barbari debent, quam à nobis mutuati non sunt, sed nobiscū potius communicarunt. Plurimum verò interest, utrū homines ratione loci subdantur, an potius hominum causa locus ipse. Hic enim res nullo modo addicuntur, sed integrum ius penes dominos manet,

*De bono
tributi
genere lo-
quitur
Zacharias
Papa
in ep. ad
Bonifa-
cium. De
sclauis
Christianis,
Eccl.
Extra
lib. 5.
epist. 11.
quest. 1.
Si tribu-
tum 24.
q. 8. cap.
sanctum.
Gen. 47.*

Quamobrem Indis (huc enim nostra iam dudum tendit oratio) pro modo ac magnitudine possessionum, agrorum, gregum, pascuorum, tributa etiam exaggerare, & cumulare, ut pro tanto tantum certa ratione persoluant, iniquissimum esset, si quidem rebus nihil per se debentibus census imponeretur. Quod sanè, neque factitatum haecenus esse scio, sed est fortasse improborum cupiditate tentatum. Neque tamen illud modo disputo, An Rex, quemadmodum Ingarum Imperio successit apud nos, & Moteçumæ apud Mexicanos, ita quoque in omnia illorum iura concesserit, ut agros, greges, pascua, mineralia, cæteraque principum suo ipse iura adeat. Nam si rectè & ordine ab illis ista obtinebantur, & legitimè ac iustè nostri illis successisse censentur, rectè quoque ista omnia retineri consequens est. Vtrum vero aut illud ita habeat aut illud, examinare ac diiudicare nostrum non est. Habent Catholici reges consilia, senatusque suos, habent conscientiae magistros. Subditis, dum iniuria non est evidens, pro iure suorum principum sentiendum, pronuntiandumque est, ut Apostoli Petri præceptum integrè conseruetur, Regem honorificate. Illud hoc loco solum agimus, quod & farentur omnes & est per se satis certum, etiamsi barbari conuertantur ad Christum, non tamen rerum suarum iure excidere, neque verò nostris, quamvis subdantur ad fidei fasceptæ tutelam, vel seruitute vel fortunis suis obnoxios esse, id quod Paulus quoque Pont. max. apertè decreuit.

1. Pet. 2.

CAPVT VIII.

*Vulgaris ratio tributa imperandi
expenditur.*

PLerisque autem illa ratio tributa imperandi videtur æquissima, vt perspiciatur primum, quibus rebus vnaquæque prouincia abundet, vtrum frugibus, veste, gregibus, mineralibus, argento: tum verò numero Indorum oppidatim tributimque inito, ea summa quotannis imperetur, quæ possit commodè conferri, ita vt singuli certa portione tantum attribuant, quantum vel ex hisce rebus, vel ex operis suis locandis sustentata familiola, præbere queant. Quæ sanè consuetudo obtinuit, vt viritim tributa pendātur. Extant regia edicta grauitè cauentia, ne ab Indis ea exigantur, quæ & ad se sustentandos, atque ab ægra valetudine, si acciderit, recreandos, & ad liberos educandos, ac matrimonio collocandos necessaria habent. Quam Christiano pectore dignam legem laudare par est. Qua in re totam quoque illam prouincias lustrandi diligentiam, prouentus, ac commoditates perspiciendi, tum vt ea iniungantur quæ commodissimè possunt præbere Indi, vt nihil supra vires, nihil nimis graue sustineant, cæterasque instructiones eodem pertinentes, comprobare profectò decet: quin ne illud quidem improbandum est, vt singuli, qui modo vel ætatis imbecillitate, vel corporis affecta valetudine, vel officio publico non

impediuntur, aliquid in commune conferat, vnde
tributi pensio fiat. Bene hæc sanè omnia. At quod
viros in primis doctos non bene habet, quo etiam
me moueri vehementer fateor, illud est, quòd so-
lum cogitatur, quid Indi soluere possint, quid verò
soluere debeant, non item. Quæ sanè consideratio,
vt non exigantur, quæ non possunt reddere, neces-
saria est: sed nullo modo sufficiens, nisi præterea
addatur, vt neque ipsi ab Indis capiamus, quæ no-
stra non sunt, iustitiæ sempiterna lex docet, ad exi-
gendum ab aliquo quidpiam, tametsi necesse sit
vt possit ille præbere, tamen nullo modo id satis
esse, nisi & possit soluere, & insuper debeat. Nam
siue non possit soluere, siue non debeat, æquè
est iniqua exactio. Et si enim supra satis monstra-
tum est Indos nostris aliquid debere reddere,
quorum in administratione sunt, non tamen
continuo efficitur, vt quantum possint, tantum
debeant, etiamsi rem temperes verbo leniore, vt
tantum tribuant, quantum commodè queant.
Itaque ratio hæc peruulgata ad tributa barbaris
imperanda, qua solum spectatur, quid quantumve
vnusquisque soluere queat, licet plerisque vt dixi,
sancta ac legitima appareat, tamen penitus in-
specta, non satis idonea, imò verò exitiosa de-
prehendatur necesse est. Quæro enim, cur Hispa-
nis, & Gallis cæterisque per Europam, si ista con-
ditio offeratur, vt singuli tantum pendant, quan-
tum possunt commodè, iniquissima, & iniuriosis-
sima sit, Indis verò iusta & æqua? An istos sua im-
peritia, imbecillitas, tenuitas fecit obnoxios? Dein-
de quid hoc à seruorum conditione abest, à qui-
bus iustè exigitur quidquid reddere possunt, quia
quicquid

quicquid seruus acquirit, Domino acquirit? Præterea si bello iusto domiti, mulctæ nomine tributa pendere cogerentur, quid posset grauius imponi, quam id vnusquisque vt det, quod potest? Nam quod non potest, ne tyrannus quidem exigendum putat.

CAPVT IX.

*An propter reuocandos ab otio barbaros,
tributa grauiora imperanda sint.*

AT dicunt qui res Indorum, atque ingenia maximè callent, hoc magnoperè barbaris expedire, vt tributis grauentur, propterea quòd natio hominum ignaua, & otiosa, nisi cogatur laborare, & industriam, atque operam in quæritando censu ponere, socors more pecudis vitam transigit, turpiter belluinis rebus vacat: quippe qui neque rem familiarem augent, neque sibi consulunt in posterum, sed hodierno tantum cibo contenti, genio indulgent. Ad hanc quidem rationationem, quæ peritissimo cuique maximè familiaris esse solet, nos sanè ita respondemus, vt barbaros laborare, negotiari, occupatione & cura distineri, per quam ipsis salutare esse fateamur, imò verò illorum Reipub. vtcunque constituendæ necessarium omnino. Qua de re Ingarum proceres ingenio sine dubio peracri, iudicioque præstantes, in eo vel maximè rectam istorum ac diuturnam administrationem esse censuerunt.

7. Pol.
cap. 13.
Eccl. 33.

vt quam maximè exercerentur, minimèque vatare sinerentur. Itaque vbi necessaria aut vtilia decrant, etiam rebus superuacaneis distinebantur, vt qui eorum disciplinam cognouerit, merito miretur, quod veteres narrant, etiam vermiculorum colligendorum certam mensuram quibusdam imperatam, alios faxis vltro citroque voluendis serio occupatos. Neque verò causa aut obscura est, aut longè posita, cur Indos negotio vrgeri maxime expediat. Etenim barbari omnes ingenio sunt seruili, seruis verò nullum otium esse debere, etiam in prouerbum abiisse Aristoteles dicit, quòd otium petulantes faciat, id quod noster sapiens præclare monuit, Mitte, inquit, seruum in operationem, ne vacet, multam enim malitiam docuit otiositas. Igitur exerceri Indi debent, non negamus, sed libentissime amplectimur. At cui exerceri, cui negotiari, cuius inferuire commodis debeant, hoc verò quæritur. Cum enim illud à tyrannico dominatu regalis absit, quod hic in subditis moderandis non suam, sed ipsorum magis vtilitatem spectet, profectò non est obscurum sincere cernentibus, operas atque negotia Indorum in ipsorummet emolumenta debere conuerti. Non enim instar apiarum id tantum mellis in aluearibus relinquendum est, quantum apibus alendis sufficit, ne intereant, reliquum omne auferendum: neque vt greges detondendi sunt, quibus vellera ita defecamus, vt radices solum denuo procreandæ lanæ saluas esse sinamus. Excepto igitur eo, quod & spiritualibus & ciuilibus præpositis necessarium esse prudens charitas sanxerit, quicquid vltra salutis

Indorum

Indorum prætextu nobis vsurpamus, pro rapina ducendum est. Atque equidem vereor, ne ybi se quidam Catones Mutiosve profitentur, moresque barbarorum censura sua seuera notare atque emendare pergunt, Pharaones potius existant, *Exod. 5.* depositaque censoria larua; qua tam rigide increpitant; Vacatis orio alteros se Nabuchodonosores exhibeant, omnia expilantes, & miseros duram seruitutem seruire cogentes. Desinant ergo iam tandem homines auari, & inhumani saluti se se Indorum iactare, fortunisque consulere, Agnoscant potius, ac fateantur priuatis se commodis seruire, nulla publicæ disciplinæ cura teneri, nullo gentium harum adiuuandarum desiderio tangi. Omnino fucus ipse se prodit, neque sustinet diu cupiditas prouidentia sibi falso nomen impositum. Quod si duri esse pergamus in miseros, neque nostræ cupiditatis ardorem eorum lachrymæ extinguant, profecto timendum est, ne multus ac creber clamor Indorum cœlos omnes penetrans ad ipsum æquissimi iudicis tribunal irrumpat. Regnum, ait Spiritus sanctus, transfertur de gente in gentem propter iniurias, & contumelias, & iniustitias, & diuersos dolos. Auro quoque dicit nihil esse scelestius. Et qui calumniatur pauperem; vt augeat diuitias suas, dabit ipse ditiori, & egebit. Et in sancto Iob terribilius. Hæc est pars hominis impij apud Deum, & hæreditas violentorum, quam ab omnipotente suscipient. Si multiplicati fuerint filij eius, in gladio erunt, & nepotes eius non saturabuntur pane: Qui reliqui fuerint ex eo sepelientur in interitu, & viduæ illius non

*Exod. 5.**Hier. 52.**Eccl. 10.**Prou. 22.**Iob 27.*

plorabunt. Si comportauerit quasi terram argentum, & sicut lutum præparauerit vestimenta, præparabit quidem, sed iustus vestiatur illis, & argentum innocens diuidet, ædificauit sicut tinea domum suam, & sicut custos fecit vmbraculum. Diues cum dormierit nihil secum auferet, aperiet oculos suos, & nihil inueniet, apprehendet eum quasi aqua inopia, nocte opprimet eum tempestas. Quas sane diuinæ seueritatis minas in pauperum oppressores, violentosque alieni sudoris exactores, videant qui volunt, an de nonnullis huius sæculi hominibus res ipsa copiose declarauerit. Filios cæcos, nepotes auita hæreditate deiectos, vix pane saturatos, posteritatem omnem extinctam, vi-
duas etiam virorum obitu lætas, & voti compo-
tes, argentum terræ propemodum coæquatum ad
pauperes deuolutum, sacras domos pretiosis illo-
rum spolijs, & veste coornatas, ac reliqua, quæ de
violentorum vltione, diuina Iob loquitur, prom-
ptum est cernere in plerisque nostræ ætatis homi-
nibus, quæ quicumque meminerit, fateatur ne-
cesse est, etiam nostræ Reipub. & gentis referre
plurimum, vt modus teneatur diuinæ authoritatis
lege præscriptus: quem si exactiones excefferint,
non solum non erunt adiumento, verum etiam
Deo iustissimè vindicante, certi exitij, & ruinæ
causa plenissimæ. Extat sanè epistola grauissima
Gregorij magni ad Constantiam Augustam, in
qua multa seuerè locutus adiungit, Idcirco for-
tasse tantæ expensæ in hac terra minus ad vti-
litatem proficiunt, quia cum peccati aliqua
admixtione colliguntur. Præcipiant ergo serene-
nissimi Domini nihil cum peccato colligi. Nam
scio

lib. 4.
Reg. epi-
stola 33.

scio quia & si parum Reipub. attribuitur vtilitatibus, ex eo multum Respub. adiuuatur. Quia sapientissimi Patris sanctissima sententia causa totius Indicanæ nullum proferri potuit vel plenius, vel certius oraculum.

CAPUT X.

*Quis modus in tributis taxandis
tenendus.*

SI quærat ex me, Ad quam igitur Regulam respicere debent, qui tributa neophytis barbaris ex bono & æquo taxare cupiunt, ego certe nullam novi aliam præter eam, quam D. Thomas affert de lege humana eleganter differens, quamque Theologi reliqui summopere probant. Vt in lege ferenda onerosa præsertim, finis ipse penitus inspiciatur, atque pensionis tantum imponatur, quantum fini proposito congruit, tum verò in distribuendis eiusmodi oneribus proportionis æqualitas conseruetur. Hinc quories excesserit, pro iniqua legem computari oportere. Hæc illustrium Theologorum, rationi prorsus consentanea, de tributorum impositione sententia est. Duo ergo accurate prouidenda sunt ei, qui in lege de tributis ferenda nolit errare: Vnum ex parte Indorum, vt non grauentur nimium, sed ea exigantur, quæ possint opportune præbere & commode: alterum ex parte nostrorum, vt quod ab Indis accipitur, pro officio ijs ac necessaria prouidentia imper

1.2.q.96.
artic.4.
Sylu. Ga.
bella, 3.
q.2.
Sor. lib.1.
de Iust.
q.6.a.4.
Caiet.
verb.lex,
in sum-
ma.

impertienda æquum, congruēsq̃ sit. Huc enim Theologi, & Theologorum decus Thomas respiciunt, cum dicunt tributa ratione finis necessaria licere imponere, ea verò eovsq̃ debere progredi, quovsq̃ finis ipse efflagitat. Itaque quod supra iam dixi, repetendum est diligenter, vehementer eos errare, qui Indorum gentes perinde atque prædia quædam, aut greges reputant, unde quidquid emungi potest, dummodo ne intereat funditus, sed futuris vsibus reseruetur, siue ager sit siue pecus, id totum honesto ac liberali lucto assignant. Sed labuntur profecto grauissimè, quicunque ita se comparant. Neque enim Indos tuos numerare potes, & quasi de tuo inde quidvis accipere. Quin potius si quid accipis, ob id accipis, ut tu vicissim aliquid aliud rependas, quod si non dederis ipse, quidquid abstuleris, iniquum est, & iniuriosum. Ut Medicus ab ægroto, Aduocatus à cliente iustè pretium capit, pro impensa opera, & officio: ita Patronus ab Indo si quid accipit, pro officio accipit. Itaque quemadmodum militibus Reip. causam suscipientibus de publico, & annona, & stipendia præbentur, quæ sanè à cæteris pro collato in se beneficio Reip. tuendæ iure exiguntur, neque tamen militiæ prætextu quantumvis extorquere, & corradere fas est, sed hæc tantum, quatenus militi, præsidiiq̃ comparandis, ac tenendis opus est: ita prorsus quæ Christiani à barbaris tributa capiunt, eovsq̃ solum progredi oportet, quovsq̃ fini proposito necessarium est. Est verò ille finis ratione præscriptus, ut ministri saluti, & administrationi Indorum necessarij non desint, honorepturq̃ congruenter.

Hi verò in duplici genere sunt. Primi ac præcipui numerantur Pastores animarum, Ministri salutis æternæ, quos eorum largitionibus, & prouentibus ali, quos ipsi diuino verbi, & Sacramenti pane nutriunt, non tam dispositionis humanæ, quam diuini esse iuris notissimum est. Id omni lege definiti Paulus gentium Doctor disertè ostendit. Nam de lege gentium hoc argumentum versans, Quis militat, inquit, suis stipendiis vnquam? Quis plantat vineam, & de fructu eius non edit? Quis pascit gregem, & de lacte eius non manducat? Ne verò secundum leges humanas tantum agere videatur, producit statim diuinam Veteris Testamenti. Nunquid secundum hominem hæc dico? An & lex hæc non dicit? Scriptum est enim in lege Moyse, Non alligabis os boui trituranti. Si nos spiritualia vobis seminauimus, magnum est, si carnalia vestra metamus? Nescitis quoniam qui in sacrario operantur, quæ de sacrario sunt edunt, & qui altari deseruiunt, cum altari participant? Atque hæc quidem iuxta legem veterem, quid verò noua, & Euangelica? Nequaquam ab his discrepantem monstrat, Ita & Dominus ordinauit iis, qui Euangelium annuntiant, de Euangelio & viuere. Dixerat quippe Dominus, Dignus est operarius mercede sua. Nihil ergo opus est testimoniis aliis, quæ sunt plurima, eadèmq; grauissima. Vnus Paulus, vel potius Spiritus sanctus in eo loquens nobis abundet. Verùm præter Sacerdotes Domini non est dubium, quin politicæ, atque humanæ administrationi Reip. barbarorum, per quam necessarij sint sæculares præpositi. Hi verò distributi videntur apud nos in duas species. Nam

1. Cor. 9.

Deut. 25.

Deut. 18.

Luc. 10.

Matt. 10.

Nam & iudices Magistratusque sunt, de quibus dictum est supra, & si quid restat, dicetur post:& sunt propriè susceptores Indorum, siue Patroni (ita enim appellare malo, quos vulgus nostrum suo sermone Encommenderos vocat) quibus procura, ac prouidentia, quam gerere debent hominum suæ fidei, ac tutelæ commissorum, licet sanè tributa quædam vicissim capere. Quo in loco accuratè intuendum est Regiam Maiestatem ius illud omne, quod habet ad exigenda tributa à populis neophytorum sibi ab Ecclesia in fidem datis, in eiusmodi Patronos transfundere, eosque penes collocare, certis quibusdam pactiõibus interpositis, de quibus mox opportunè dicemus. His ergo, si eos se se exhibeant, quos fide iurata profitentur, tributa rectè solui non est, cur reuocetur in dubium, cum manifestum sit licere Principi alijs attribuire, quæ percepturus ipse esset. Qua de re & nostrorum Theologorum, iurisque prudentium concors sententia est, & accedit B. Gregorij nullo modo contemnenda auctoritas, qui ad nobiles quosdam viros Sardiniaë scribens, eosque & quid debeant præstare subditis sibi cõmissis, & quidem infidelibus adhuc, & quid eam ob rem percipere ab illis possint, commode, admonet. Ad hoc quippe, inquit, illi vobis commissi sunt, quatenus & ipsi vestrae vtilitati valeant ad terrena deservire, & per vestram prouidentiam, eorum animabus ea, quæ sunt æterna, prospicere. Vnde apparet rectè posse nobilium hominum, ac bene de Rep. meritorum fidei curæque committi, vt saluti barbarorum consulant, eaque ex causa ab his sua ipsi emolumenta percipiant. Quoniam verò cum est

conuentio

*lib. 3.
Regist.
epist. 23.*

conuentio aliqua, vt ob hoc illud detur, certa quædam ratio ac proportio feruetur necesse est, ne aut hinc excedat, aut inde deficiat, omnino perspiciendum est, ad quæ & qualia Patroni Indorum obligentur, vt inde verissimè cognoscamus quando & quovsq̃ue iustum sit talibus tributa persolui. Sed ante considerandum erit, Anne expедierit Indorum populos in Fide rudes eiusmodi patronis committere, quibûsve ex causis id excogitatum, effectumque sit.

CAPUT XI.

Causæ, ob quas Hispanis Indi commendati sint.

CAusas igitur cogitanti mihi, cur in hoc nouo orbe Indi Hispanis hominibus commēdati sunt, vnde & vulgare illorum vocabulum traxit originem, tres præcipuæ veniunt in mentem. Prima, quòd cum suis expensis, & laboribus in nouas regiones penetrarent summis, & difficultatibus, & periculis se se obijcientes, excogitatum, atque inuentum est, quod mercedis loco tribueretur à Principe ipsis ita flagitantibus, vt ex Indorum populis suo patrocínio commissis emolumenta annua perpetuò reportarent. Quemadmodum Imperatores Romani emeritis militibus agrum aliquem impertiebantur, vnde sustentandæ reliquæ vitæ certi prouentus relinquerentur. Nostrorum autem hominum prima cum Rege.

pactio

pactio fuit, vt Indorum à se expugnationum administratio tum sibi, tum primo successorì, aut hæredi firma rataque esset: exinde Regi liceret, cuicumque placuisset, adscribere. Itaque, pro militiæ stipendio, pro victoriæ præmio Indi Hispanis dati sunt. Altera quoque fuit causâ, eaque maioris momenti; quoddam nouus orbis Regi vsque adeo longè posito subactus, in illius ditione retineri nullo modo poterat, nisi à quibus erat quæsitus, ab ijsdem custodiretur, vt licentiam barbarorum frænarent, & à finitimis tuerentur, & nostris demum legibus assuefacerent. Neque enim minus est, vt quidam Poëta dixit, quam quærere, parta tueri, imò verò vt Nazianzenus probè asserit, longe maius ac difficilius. Vt ergo in peregrina terra homines alioqui patriæ amantissimi tenerentur, fierentque nouæ Reip. cultores, atque amplificatores studiosi, fixas ibi sedes collocantes, attributa sunt certa oppida Indorum, quorum, & dominatu & commodis potirentur. Perinde atque vmbra quædam Hispaniæ procerum repræsentata sit, cum subditis, siue, vt nostri vocant, basallis imperitent. Tertia eademque maxima, ac reliquarum fundamentum causâ extitit, vt noui Fidei tyrones, teneræque stirpes patrociniò cura-que veterum protegerentur, instituerentur, religionis disciplina regerentur, Denique salutis viam, vt omnino munirent, atque infirmos in Fide, vt

*Ovidius.
Innectina
prima cō-
tra Iu-
lian.*

Rom. 14.

monet Paulus, assumerent. Arbitror me omnes institutionis huius causas esse complexum. Iam sequitur, vt de vnaquaque quid habeat æquitatis quid difficultatis, quid officij, disseramus. Ac prima illa de remunerandis laboribus sumptibús-
que

que militarium hominum, ex necessitate quadam potius quam ex voluntate, aut religione profecta fuisse videtur. Neque enim poterat Princeps, aut per quam ægrè poterat, tantos tot hominum sudores, imo vero etiam cruores dixerim, præmio pari afficere, nisi in nouo orbe illorum virtute parto, potentiam quæstumque partiretur. Nam neque isti alioqui contenti essent, & cæteris similia, audendi, aggrediendique cupiditas omnis extingueretur. In Lusitanica India, quod Regum Lusitanorum auspicijs, & auro parta sit, potuit penes Regem totus ille dominatus sine iusta suorum querela retineri. Nostrorum verò hominum, quoniam suo pte ductu & re, tanta peregerunt, longè alia ratio est. Itaque necessitatis, ut dixi, cuiusdam fuit, ut suo quodam iure, ut olim Israëlita tribus distributore Iosue, terram sortirentur, permanente tamen, quod minimè obsecurum est, supremo omnium penes Regem imperio. Quamobrem fatendum est, hac nostris mercede proposita, distribuendi leges quodammodo, & fuisse, & esse seruandas. Ut planè, nisi alioqui quippiam impediatur, de hac Rep. beneficijs, ipsiusmet emolumenta reddantur, & pro ratione meritorum maior minörve portio vnicuique designetur. Neque enim inanis prorsus, & superuacanea vox est hominum, suo sudore, & sanguine partis, novos, & nihil in Rep. gerentes præclari frui vehementer exoptantium, idque non levis iniuriæ loco exprobrantium. Etenim cum cætera non desunt, debet profectò laborum, meritorumque ratio haberi, id quod & Regia statuta præscribunt, & gubernatores à se obseruari

*Ios. 13. &
deinceps.*

obseruari contendunt, verè an falsò, non statuo,
 satis proposito est, omnium vna consensio. Sed
 ecce ingens malum vnde minus timebatur, exor-
 tum, ex æquitate iniquitas, ex commoditate
 damnum, ex iure conflatur iniuria. Quis enim
 cum sibi Indos pro mercede propositos, ac reddi-
 tos intuetur, non statim labores, expensas, peri-
 cula, quibus defunctus est, cogitat, parum-
 que esse quicquid capiat, & sentit, & iactat?
 Itaque prouentus commodaque sua, quæ ex In-
 dorum, vel opera, vel tributis percipit, non pro
 futuro in illos officio, & à se impendenda ope-
 ra, sed pro iam exhaustis laboribus metienda pu-
 tat. Cui malo quid remedij possit afferri, non sa-
 tis video. Verùm illud serio moneo, atque con-
 testor, quamvis æquum sit in eiusmodi commen-
 dationibus Indorum, rerum antea præclarè ge-
 starum rationem habere, minimè tamen tributa
 operasque istorum amplius augeri posse, quam
 conferendi in illos beneficij ratio postulet. Quem-
 admodum & præfecturæ in Rep. & sacerdotia
 in Ecclesia benemeritis quidem conferenda sunt,
 & dignioribus, oppido ampliora, at census, vel
 publicus, vel Ecclesiasticus pro futuro labore,
 atque officio datur. Itaque huic percipiendo ve-
 teres labores prætexere minimè licet. Sed si pro-
 fecto desis officio, atque imposito munere non
 perfungaris, quantumcunque olim emeritus sis,
 prouentus tutò non percipis. Secunda vero cau-
 sa conseruandæ, ac tuendæ Reip. huius, non
 dubium est, quin æquitatis vtilitatique plurimum
 habeat, quin potius in eo salus Regni tum tem-
 poralis tum spiritualis sita sit, si non desint his ve-
 luci

luti deductis coloniis coloni sui. Nam id quoque Romanæ Reip. sapientissimæ moris fuisse constat, ut novos colonos, quo firmaret, defenderetque coloniam suam domicilio donatos variis priuilegiis, commoditatibusque prosequeretur. Regis, regniue interest maximè, ut sint qui tanquam proprium domicilium tueantur, & quoad licet, amplificent. Quamobrem propria quadam nuncupatione, eaque apud nos honorifica, hi propriè vicini, ciuēsve nominantur. Itaque & vxorati esse iubentur, & certam urbem incolere, vnde nisi annuente prorege, abesse nusquam liceat: si abfuerit, absentis expensis alius sufficitur, quod si diutius moras traxerit, ab Indorum moderatione remouetur, aliusque succedit perinde, atque demortuo. Quin etiam Principis hi omnes feudatarij habentur, fidem suam sacro iureiurando Reip. Regisque iussis astringentes. Itaque bella si qua exoriantur in prouincia, propriis sumptibus adire, & belligerari coguntur, quod nuper in bello Ingarum Cuzquenses, & in Ghiriguanensium, Charquenses, Pacensesque fecerunt: proinde equos, arma cæteraque in repentinum quemque tumultum parata habere, in otio, & negotio Reipub. adesse promptissimè. Quæ quidem omnia, & prudenter, & salutariter instituta sunt, neque parum conscientias eiusmodi hominum leuant, qui pro imposito sibi onere honorem quoque, hoc est, prouentus referant. Neque enim, quod multi falso opinantur, sola est causa redditus Indicos percipiendi, propria ac peculiaris Indorum salutis adhibita cura, licet ea præcipua sit, verum aliæ quoque causæ sunt, sunt alia etiam

N

publicæ

publicæ utilitatis officia, quibus cum addicuntur nobiles homines, iure remunerandi sunt. Eas ob res quod regem ex Indis capere oportebat, id in eiusmodi feudatarios omne transmittit. Tertia quoque ac porissima causa supra allata de cura, providentiæque Neophytorum, si nuda ipsa per se spectetur, speciosa planè, & honesta, atque officij plena videatur. Quid enim magis salutare dici potest, quam ut novi Christiani veterum diligentia commendentur? Quod etiam

De Eccl. in primæua Ecclesia in more fuisse Dionysius
Hier.c.2. Arcopagita satis indicat, cum fidei candidati probatæ vitæ susceptoribus traderentur, piè ac salubriter imbuendi, atque officiosè adiuuandi. Hæc ut dixi, perpulchra, perque honesta causa est, si nuda ipsa cernatur. At ubi à cogitatione venimus ad rem, I E S V bone, quæ perturbatio, quanta fœditas. Verum vitio hominum, non causæ hoc fit. Neque vero prauorum peruersitas bonis detrahere debet, sed Dei optimi, & benignissimi ope fiet, ut Patroni officium non deserant, sed nomini suo ipsi respondeant. Nostrum iam est quæ sint horum partes in Indos à se susceptos exponere.

CAPVT XII.

Quòd doctrinam fidei, & moribus sufficientem Patroni Indis susceptis præbere teneantur.

PRimum ac maximum onus sustinent, Indos iam Christianos effectos in fidei, morumque doctrina, cæterisque ad salutem opportunis, quantum opus est, adiuuandi. Re enim vera Patroni, Pædagogi, Nutritiique in Christo teneris adhuc & paruulis dati sunt. Hoc omnes sine exceptione consentiunt, & docti, & indocti, & experti & imperiti. Hac lege, hac conditione Indi nostris à Principe commendantur, recepto usitatoque more sese penes ipsos conscientiam suam exonerare testante. Quod sanè onus ipsi, qui sustinent, rarò intelligunt. Ex hoc primo præcipuoque documento efficitur in primis, vt quicunque iniuncto sibi muneri non faciunt satis, non solum graue crimen admittant maledictionis æternæ rei, quòd opus Domini fraudulenter faciunt, verum restitutioni etiam obnoxij sint, quòd minimè officio functi, ob quod tributa instituta sunt, nihilominus illa perceperint. Neque enim charitati tantum Christianæ infensi sunt, sed etiam publicam iustitiam lædunt. Efficitur deinde, vt si negligentes admodum segnesque se præstiterint tales Patroni, neque emendare & resarcire iacturam

Hier. 48.

pergant, possint omnino, imo vero debeant ab Indorum commendatione remoueri, aliis eorum loca suffectis. Quæ ne duriora quispiam arbitretur, aut quoniam consuetudo contrà obtinuit, tanquam noua respuat, extat hodie quoque Regij decreti publica fide exemplum, quod ipse quoque legi, vtrumque illud, & de restitutione facienda, & de remouendis negligentibus Indorum patronis, seuerè grauitèrque statuentis, seruarique omnino in posterum præcipientis. Ego verò adiiciam id quoque, quod perparum aduertì video, cum sit vel maximum, quod in Indorum commendationibus longè plus spectare oporteat, vtrum is, cuius fidei commendantur, ea existimatione sit, vt imposito muneri non defuturus merito credatur, quam meritorum rerumque gestarum quantus splendor extiterit. Atq; omnibus modis affirmo id, quod vel tenuiter doctus facile concedet, Patroni, indignus si sit, consciètiâ quidem non esse tutam, at multò minus Principis eam curam cõmittentis indigno. Indignum autem eum dico, quem viri boni, ac sapientes nequaquam idoneum reputant eiusmodi negotio procurando, nimirum qui præ vitæ impuritate, præ inueterata avaritia, præ socordia ingenua miseros susceptos vexando, expoliando, diuina omnia, ac salutaria pro nihilo ducendo, pessundaturus apparet. Profecto mirari libet, quòd cum in triennali, aut etiâ annuo Prætorè creando, vitæ integritas accuratè quæratùr, in perpetuo Indorum Domino, cuius sit vel leuè peccatum perniciosius futurum; vix morù ratio habeatur: sola vel ipsius, vel maiorum merita attendantur, tanquam pecuniæ dandæ non animarù negotiù tractaretur. Quæ

ter ex me aliquis, quamnam institutionē, quā doctrinæ rationem sufficere intelliget Patronus, ut conscientiæ satisfaciatur suæ? Respondebo breuiter ac vere, nunc temporis magna ex parte ea cura, & molestia liberatos esse patronos: siquidē Episcopi sibi sumptus fecerunt; neque iniuriā, ut sacerdotes ipsi designent, ac destinent: quibus Patroni stipendium à maioribus præscriptum optima fide persoluant. Quod si hos, vel remissos, & negligentes notarint, vel improbos, & impuros, vel cupidos, ac rapaces, denique gregem Domini lædi grauius insolētia Pastorū animaduenerint, pro fide, quam suis debent oportet ad Episcopos deferat, & quātū in ipsis sitū erit, ardēter agant, ut susceptis suis quā optimè cōsultum sit. Id cum sedulo præstiterint, si tamē nihil profecerint, fidem suam hac in parte liberarūt: nec quæretur de manibus illorum sanguis effusus, cuius antistites Principi pastorum, cum apparuerit, rationem reddent: Quot verò sacerdotes in Indorum oppidis habere oporteat, breuiter quidem dici potest, quot erunt necessarij fidei institutioni, Sacramentorum administrationi, cæterorumque Ecclesiasticorum functioni. Prouincialium vero synodorum, ubi de paræciis agitur, canonibus definitum est, quoto numero Indorum vnus sacerdos sufficere existimandus sit. Sequatur patronus Episcopi sui iudicium, si synodi decreta seruari vsquequaque non possunt. Quicquid verò paracho tribuendum erat, si abesse contingat, siue negligentia patroni id fiat, siue penuria ministrorum, siue Episcopi desidia, nihil interest: prorsus tantundem debet Indis restituere ad minimum vsque obolum. Neque potest illa summa cuiusvis

N 3

iudicio

*C. cūm ex
iniuncto,
de Hæret.
docet id
Innocent.*

*3.
Ezech. 3.
1. Pet. 5.*

*In Conc.
Limenſi
Conſt. 77.*

iudicio in alios vsus conuerti, aut quouis prætextu alio deflecti. Qua de re frustra sanè nonnulli dubitarunt. Nam præter edicta regia id disertè cauentia, ratio est aperta, quod pecunia illa ab Indis tanquam ex conditione persoluitur ad ministros Ecclesiasticos sibi necessarios sustentandos: hi cum defuerint, quacunque ex causa defuerint, debet profectò horum stipendium ad largitores redire ex integro. Quemadmodum cum pro negotio tuo curando homini pecuniam offers, si nihil ille curauerit, siue culpatè id, siue inculpatè, certè pecuniam tuam iure repetes, neque te inuito ea pecunia auerti in alias causas potest. Igitur hæc certa, & sunt, & habentur. Illud non item, vtrum qui negligentia sua, crassaque culpa Indos sibi commissos, sine sacerdote, sine legitima doctrina tenuit, teneatur restituere tributa omnia per id temporis percepta, an vero satis sit, tantum reddere, quantum paracho dandum erat. Qua de re alios audire mallet, quam ipse dicere. Verùm non teneri omnia tributa restituere, magis mihi persuadeo, propterea quod tametsi doctrina Indorum, prouentuum annuorum colligendorum præcipua causa sit, non tamen sola, vt supra explicatum est. Sed sunt alia quoque patronorum onera Reipub. utilia, quibus cum defuerint, non iniuste tributis aliqua ex parte fruuntur. Iam si quis vigeat, quantum ergo, & quovisque restituendum est? Nihil equidem certius asserere possum, quam vt visitatorum, ac iudicum regionum sententiis acquiescat, qui cum non soleant præter doctrinæ defectus, & damna alioqui Indis data, aliud præterea iubere restitui, idque mos habeat doctorum

Cap. II.

Etorum ac proborum hominum, aliquid insuper imperare, quandiu res amplius explorata non est, minimè oportet. Quod si Indorum tam populosa ac frequens turba sit, ut sunt pleræque in prouinciis superioribus, manifestum ut sit vnum sacerdotem tot hominum curæ & doctrinæ nullo modo esse satis: neque tamen antistes admonitus plures mittat, vel quia non habet in promptu, vel quia fortasse dissimulat, ita ut Patronus non sit in culpa, quæritur merito, an oporteat reddere Indis id, quod alteri sacerdoti, si adesset, erat attribuendum. Hic quoque varia res est. Sed cum iuxta retentum morem, vel iuxta synodale decretum obseruatum, plures essent sacerdotes adhibendi, non dubito, quin redditurus sit Indis Patronus, quicquid de duorum stipendio, vel plurium subtractum sit, siue vitio id suo acciderit, siue secus. Nam ut dixi, pactionis ea lex est. Vbi verò neque consuetudo, neque synodi decretum, neque præsulis vrget præceptum, etiamsi plures ministros populi numerositas postulet, potest Episcopi sui iudicium sequi, si vnum satis esse ille responderit. Denique vsque dum ille statuatur pluribus esse opus, potest dato sibi ministro esse contentus. Namque ut prius admonui hac parte sollicitudo præcipua ad Episcopos recidit, qui de Indorum rebus edocti Patronos molestia antiqua idoneos ministros quæritandi liberarunt. Hæc de præcipua cura Patronorum hoc est de spiritali ministerio erga iam Christianos Indos, attigisse sit satis.

CAPVT XIII.

*Quid erga nondum baptizatos Indos
Patronis liceat.*

ANtea vero quam ad politica officia progrediar, diluenda est dubitatio de cæteris infidelibus Indis, qui sorte cum Christianis eadem coniuncti sunt, quorum tanta est copia in provinciis nonnullis, ut intra annum, aut non multo amplius in vna ad decem, & septem millia maioris ætatis baptizati referantur. Alibi verò commendati Indi omnes, vel pene omnes idololatæ adhuc sunt, ut in Prouincia sanctæ Cræcis. Magna ergo mihi quæstio esse videtur, An à talibus tributa quoque Christiani exigere queant, propterea quòd nondum sunt Ecclesiæ subiecti, ex cuius commissione ius omne nostris in barbaros esse diximus. Deinde quamnam ob rem pensiones eas nostri dignè percipiunt, siquidem nulla iis Sacramenta, nulla diuina officia communicant? Cæterum consuetudo nihil videtur inter fideles, infidelesque Indos discernere, quoad tributa reddenda. Omnes iisdem astringit legibus. Id igitur an liceat, & si olim dubitabam, imo verò improbabam, tamen re magis animaduersa, non adeo mihi persuadeo iniquum. Etenim Principi subditi hi quoque sunt, postea quam terra hæc in illius ditionem venit, siquidem istis non minus ius dicit, quam cæteris:

ac proinde quemadmodum olim Paganis Christiani tributa pendebant, cum illi rerum potirentur, ita nunc temporis Christianis Pagani non iniuria persolunt. Neque enim modo de iure dominatus Indici disceptatur, sed pro confesso sumimus imperium hoc illi stare, qui imperat. Accedit ad hoc, quod infideles Indi nullo modo Christi baptismum auersantur, quin & cupiunt, & petunt: verum plerique in numero catechumenorum siue ipsorum vitio, siue nostrorum negligentia tenentur. Cum ergo in catechismi cura, hi quoque cum cæteris communicent, non immerito cum cæteris quoque ministris necessaria tribuunt. Siquidem Apostoli Pauli præceptum est, Communicet autem is, qui catechizatur ei, qui se catechizat in omnibus bonis. Minimè verò ferendum esset, ut Christiani Christianis, paganis pagani imperarent, cumque vnum eundemque populum hi, & illi constituent, non posset non exitiosissimum esse discrimen eiusmodi. Quam ob rem præterquam quod his quoque ius dicere, atque hos tueri perinde ac cæteros principis interest, proprie ac peculiariter patronorum, parochorumque partes sunt, cum istis quoque de salute æterna seriò agere, ad Euangelij gratiam vocare sedulo, de fide instruere, instructos moribus informare, volentes & dignos vltro admittere ad Ecclesiæ gremium, si grauiori periculo vrgeantur, salutari lauacro succurrere, ut sanctorum Patrum decreta habent. Denique nihil prætermittere, quod ad illos Christo lucrificandos pertineat, quod non charitatis tantum, sed officij sui propriam obligationem agnoscant

Gal. 6.

De con-
sec. d. 4.
c. Si qui,
& seq.

*Lib. 3.
epif. 26.*

*23. q. 6.
Iam ve-
rà.*

*Lib. 3.
Regist.
ep. 23.*

agnoscant necesse est. Quod vsque adeo D. Gregorius sentit, vt ad Ianuarium Episcopum scribat his verbis: Rusticos, quos habet Ecclesia tua nunc vsque in infidelitate remanere negligentia fraternitatis vestrae permisit. Et quid vos admo-
neo, vt extraneos ad Deum adducatis, qui vestros ab infidelitate corrigere negligitis? Vnde necesse est vos per omnia in eorum conuersionem vigilare. Nam si cuiuslibet Episcopi in Sardinia Insula Paganum rusticum inuenire potueris, in eundem Episcopum fortiter vindicabo. Iam verò si rusticus tantæ fuerit perfidia, & obstinationis inuentus, vt ad Deum venire minimè consentiat, tanto pensionis onere grauandus est, vt ipsa exactionis suae poena compellatur ad rectitudinem festinare. Ex qua sanè tanti Patris auctoritate, & diligentiam discimus conuersioni infidelium adhibendam, & modum, si se duriores prae-
buerint rusticitate magis animi, quam electione rationis, cuiusmodi barbari penè omnes sunt, iudicij vix sententiam sequentes, sed impetu, aut consuetudine impulsis, vt hi certè seueritate quadam salutari compellantur intrare. Pensionibus vero grauandos censet beatus Pater, quas sine iniuria potestas imponat. Nam si iniquae essent, nullo modo exaggerandas ille censeret. Atque hæc quidem ad se dicta Sacerdotes accipere debent. Patroni verò illa, quæ ad nobiles Sardiniae idem Pontifex scribit in hunc modum, Cognoui penè omnes vos rusticos in vestris possessionibus idololatriæ deditos habere, & valde de hac re contristatus sum, & post pauca. Vnde magnifici filij exhortor, vt omni cura, omnique sollicitudine

tudine animarum vestrarum zelum habere debeatis, & quas rationes omnipotenti Deo de subiectis vestris reddituri estis, aspiciate. Ad hoc quippe illi vobis commissi sunt, quatenus, & ipsi vestrae utilitati valeant ad terrena deferuire, & vos per vestram prouidentiam eorum animabus ea, quæ sunt æterna, prospicere. Si igitur impendunt illi quod debent, vos eis cur non soluitis quod debetis? Idest, ut assidue illos magnitudo vestra commoneat, ab idololatriæ errore compescat, quatenus eis ad Fidem ductis omnipotentem Dominum erga se placabilem faciat. Hæc Gregorius: quibus & quid liceat accipere, & quid deceat reddere infidelibus Indis sibi commissis, Patroni satis, quantum arbitror, edocentur. Illud obiter adueriti debet, quamvis non liceat per vim ad baptismum Christianamque professionem compellere barbaros subditos, licere tamen imo expedire ab idolis colendis etiam inuitos reuocare, hoc est illorum simulacra, & fana demoliri, superstitiones diabolicas extrudere, quæ non solum Evangelij gratiam impediunt, verum etiam naturæ legem infestant, quam ut seruent, compelli infideles subditi sine vlla dubitatione possunt, id quod abunde declarant leges Constantini, Valentiniani, Theodosij, cæterorumque Principum Christianorum, quas mirificè sancti Patres collaudarunt: neque laudatores modo, sed impulsores authoresque se præstiterunt. Et re vera quamvis officij minus exhibeatur infidelibus Indis, tamen non videtur satis consuli saluti eorum, si tributorum minus pendant, quam Christiani, vel hac enim de causa à baptismo percipiendo deterrebuntur, si grauiora

*Conc. Eli
bar. can.*

*41. iubentur Chri-
stiani in-
fidelium*

*seruorum
idola cō-
minuere,*

*idem in-
sinuat*

*Aug. ser.
de Pueris*

*Centurio-
nis. De*

Paganis

*& tem-
plis eorū.*

*l. 1. & l.
Nemo.*

*Niceph.
lib. 7. c.*

*46. lege
Amb. l. 5.*

*ep. 30.
contra*

*relatio-
nem Sym-
machi.*

*Aug. lib.
1. contra*

*epi. Par-
men. c. 7.*

*& epi.
48. & 50.*

tunc

204 DE PROVVRANDA INDORVM
tunc sibi tributa imminere cognouerint, quæ po-
tius imminui sanctus Gregorius vult, vt leuem
Christi sarcinam, & iugum suaue libentius su-
beant.

C A P V T XIV.

De temporali prouidentia Patro- norum in suos.

EAdem quoque Indorum commendatione di-
ligenter præscribitur Patronis, vt non solum
in Fidei, ac salutis æternæ eruditione populi sibi
commissi curam gerant, verum temporali præsidio
in vitæ huius ærumnis quotiescunque ope eorum
indigeant, benigne adsint, intelligantque, se Neo-
phytis datos esse parentum loco. Horum igitur
rem politicam iuuare debent, & ab iniuriis, vel
hominum, vel temporum pro sua virili tueri. Ita-
que vt Hispaniæ procures sui municipij homini-
bus defensionem, ac prouidentiam proprio iure
debent, quo nomine ab illis tributa percipiunt, sic
in his locis populis Indorum sibi attributis Patro-
ni singularis cuiusdam in otio æquè, ac negotio
patrocini tenetur obnoxij, aut si id mavis, quem-
admodum familiæ suæ pater ipse familiam con-
sulere debet. Serio ergo illud sibi dictum cogitent
de clientibus suis, Discite benefacere, quærite iu-
dicium, subuenite oppresso, iudicate pupillo, de-
fendite viduam. Abdiam in alendis famelicis, & è
periculo eripiendis infantibus repræsentent: aut
egregium bonorum sibi diuinitus affluentium di-
tributorem

Esai. i.

3. Reg. 18

Atributorem sanctum Iob imitentur, qui sua illa fortunata tempora memoria repeteret, ait, Si negavi quod volebant pauperibus, & oculos viduæ expectare feci, si comedi bucellam meam solus, & non comedit pupillus ex ea, si despexi pereuntem, eo quod non habuerit indumentum, & absque operimento pauperem. Hac beneficentia & fide si susceptis suis nostri consulerent, verè & nomini & officio responderent suo, essetque non voce tantum, sed re ipsa horum institutio novis Evangelij cultoribus conseruandis, & promouendis quam maximè accommodata.

CAPUT XV.

Quam circumspectè onerosæ leges fortunæ Indorum indicendæ.

ENumeravi hætenus omnes, ut reor, Patronorum functiones, institutionisque huius causas, quas intuentes iis, quas cernimus, legibus Principes hanc Indorum Remp. condiderunt. In aliis orbis regionibus, apud Orientales præsertim alias esse rationes neophytorum instituendorum non ignoro: neque verò disputo, an nostratia hæc longè illis inferiora sint, minusque ad salutem, quam quærimus, accommodata. Fuisset fortassis alia Reip. forma commodior, & ad Iesu Christi notitiam consequendam novis gentibus multò iucundior. Quanquam, ut dixi supra, quæ nostris barbaris incommoda acciderunt, hominum magis nequitia, quam administrationis vitio referenda.

referenda sunt. Quamvis enim rectè & sapienter constituta Reip. quamvis æquis legibus temperata, facile improborum temeritate violatur, cum sit nihil, quod non humana peruersitas, si relinquatur sibi, conuertat in peius. Viderunt alij, quid cui præferendum sit. Nos ea omni collatione prætermiſſa, præſentia, & nobis nota tractamus, illud superioribus adjicientes, causas eas, quas retuli, nostris vt Indi commiſſi ſint, oportere omnibus vtriuſque fori, externi inquam, atque interni iudicijs eſſe notiſſimas. Quibus ex omnibus rectè ſapienterque animaduertiſis poterunt profecto legiſſimatores ſtatuerè, quid tributi gens quæque Indorum Patronis ſuis ſoluere debeat. Idque vt ſine vitio, & errore decernant, perſpicient primum quantum, & quibus è rebus prouentum commodè omnino poſſit afferre, tum verò cum ratione metientur, imposito oneri, ac functioni exoluendæ ſuæ, quantum Patronis aſſignare par erit, idque ex æquitate, & prudentia moderabuntur, vt non aliorum remiſſio & indulgentia, aliorum, vt Apoſtolus ait, ſit tribulatio. Et facultatem ergo Indorum, & præpoſitorum operam, atque obligationes intuebitur ſapiens Reip. moderator, vt tributa taxet, atque conſtituat. Quam ſanè & facultatum, & gubernationis rationem ſimul ineundam in cenſu imponendo, & vel augendo, vel relaxando Ariſtoteles quoque ad Reip. conſeruandam incolumitatem valde commendat.

2. Cor. 8. Si quidem excedat, inquit (populus populique gubernandi difficultas, vt ego interpretor) augeatur cenſus ſecundum multiplicationem : ſi verò deficiat, relaxetur, ac minor fiat ſenſus taxatio.

Quò

Quò sanè spectasse videntur nonnulli gubernatores nostri. Iam verò vltèrius progredi, & quantum ex vnoquoque viritim exigì oporteat, & vtrum homines tantum censerì debeant, an etiam fortunæ, vt ditiores plus tribuant, & quovsq; nostræ considerationis fines egreditur, legum prudentiæ potius id vniuersum relinquendum. Nobis, quæ causa sit iusta tributòrum Indicorum, & ad quam regulam debeant temperari, exposuisse satis est. Illud tantummodo admonendum arbitror, tam graue esse hanc imponendi tributa prouinciam, vt nisi multa accuratâque consultatione virorù prudentium, & rerum peritorum, atque, quod caput est, ab omni cupiditatis specie alienorum res primum agitetur, agitâtâque manifeste constet, quicquam decernere, ac lege sancire valde temerarium sit. Si enim ad priuatas de fundo, de domo, de legato controuersias finiendas; solent homines non contenti vulgaribus, Regios etiam senatus adire, & è sapientissimorum iudicum suffragiis sententiam postulare, quantò obsecro amplius, ac maius est, cum de totius gentis perpetuo censu agitur, vbi vel leuissima iusti, & æqui ignoratio damnum affert fortunis innumerabilium hominum sempiternum? Quamobrem seuerissimè simul atque sanctissimè Romani Pontifices inter atrocissimos casus Sedi Apostolicæ reseruatos illum semper numerandum putarunt, cum Domini Christiani populorum sibi subditorum ceruices, vel nouis pensionù oneribus premunt, vel auctioribus cumulant. Quæ vel vnica res negotij magnitudinem copiose perspicuèque declarat. Neque enim esse potest Proregis, Præsidisve, leue, aut venia

In 4. ca.
su bulla
Cœna
Domini
1568.
Syn. Ex-
com. 7.
§. 54. Ga-
bella. 3.
§. 7. Non.
c. 27.
n. 58.

nia

nia dignum erratum, vbi vel studio partium, vel rei cognoscendæ negligentia, vel proprii sensus fiducia, in tanto negotio labitur.

CAPVT XVI.

Quid confessionibus Patronorum audientis Sacerdoti prouidendum.

*Ecel. 2.
1. Pet. 2.
Matt. 22.
Matt. 27.
Rom. 13.
Didrac-
mum
Cæsari
solui vult
Hieron.
in Mat-
thæum.
At Am-
bros. li. 1.
epi. 1. &
Hilarius,
& Chry-
sost. &
Theoph.
in Matt.
Sacerdo-
tibus sol-
ui cen-
sent.*

AT vero de Principum legibus magistra-
tuumque sententiis censere non interest cæ-
terorum, quibus potius præceptum est, ne contra
iudices iudicent, & vt pareant siue Regi quasi
præcellenti, siue ducibus ab eo missis. Certè Chri-
stus Dominus, neque Cæsaris censum neque Sa-
cerdotū didracma reprehendendum, imminuen-
dumve putauit: sed cum hoc soluit, tum illum red-
dendum docuit. Neque illius Apostolus tributo-
rum vectigaliūve examen, sed redditionem inte-
gram imperauit. Quare vbi non est manifesta tri-
buti impositi iniquitas, & Præpositus tuta cons-
cientia petit, & subditus non tuta subtrahit, Itaque
Sacerdotes dum vel Patronorum res concionibus
versant, vel horum confessiones audiunt, non de-
bent nimij esse censores, ne nihil agendo pacata
perturbent, & sine vlllo fructu quieta pectora exti-
mulent: neque verò decet, quæ publica lege fir-
mata sunt, priuata auctoritate velle conuellere.
Hoc vt dixi, vbi lex non apertè esset iniqua. In quo
fortassis quidam zelo non secundum scientiam
vtentes, dum nimium emungunt, iuxta vetus pro-
uerbium eliciunt sanguinem. Habet hîc locum
illud

Prov. 30.

illud antiqui sapientis, ut ne quid nimis. Quin potius sic & Sacerdotibus Christi eiusmodi homines excipiendi sunt, quemadmodum manipulares olim à Ioanne Baptista, quibus de sua salute quærentibus breuiter cum magna moderatione respondit, Neminem concutiatis, neque calumniam faciatis, & contenti estote stipendiis vestris. Sed notanda sunt tamén conscientis istorum tractandis præcepta nonnulla, in quibus quantum ad rem, de qua nunc agimus pertinet, frequentiores esse iniuriæ solent. Primum quamvis in taxationibus tributorum publica lege conscriptis, authoritati Principis acquiescere possit Patronus, nisi aperta fraus, aut iniuria, aut vis intercedat, neque de hac re nimium hæere, aut sollicitari debeat Sacerdos, cui eiusmodi cura minimè incumbit, scire tamen, & hunc & illum oportet, si Indus aliqua ex causa peculiari non sit nisi magno suo detrimento soluendo, non posse tributum ab eo tutò exigere. Exemplis res fiet perspicua. Fortè accidit, ut anni inclementia agricola fruges, vel vitiatas, vel perexiguas collegerit: accidit, ut ægrotaret, ut vel rugurium ignis depastus sit, vel ouiculæ scabie interierint. Hic si Patronus rigidè tributum exigat, & infelicem Indum, cuius tenuissima, & in diem tantum res est, coniiciat in vincula, aut malè mulctatum dimittat, magnam facere iniuriam putandus est. Nam etiamsi ex mutuo, aut permutatione ista ille deberet, tamen cum tanto suo dāno soluere nemo equus cogeret, cū Propheta scuerè increpet eiusmodi rigidos exactores, dicēs, Percutitis pugno impiè, & omnes debitores vestros repetitis. Præterea verò, ut est supra definitum,

Luc. 3.

In Conc.

Turon.

c. 49.

Esai. 58.

tributum nullo modo debet nisi ex ijs, quæ habet, commodè habere potest, congruenti sibi familiæque sustentatione seruata. Quæ si casu aliquo subtrahantur, neque premi molestè debet, neque in sequentes annos præsentì exactione onerari. In qua re nonnulli nostri liberales se haberi volunt, quod ea remittant, quæ recuperare non possunt. Alij inhumana atrocique contentione seruitutis genus edicunt, vt tandiu laborare cogantur, quoad ipsorum arbitrio sit satisfactum. Illi quidem non admodum admirandi, cum id faciant, quod necesse est, fiat: hi verò prorsus etiam detestandi, quod ius suum iniuriam aliorum putent. Atque hoc est, quod olim sanctus Papa Gregorius valde cum Augusta expostulat, Corlicæ exactiones tam durè fieri, vt filios suos, Insulares vendere cogerentur, vt tributa persoluerent. Ipse verò Dominus Israëlìs improbitatem execratur, pro eo quòd vendiderit pro argento iustum, & pauperem pro calceamento. Qui conterunt, inquit, super puluerem terræ capita pauperum, & viam humilium declinant. Talia à nostris agitata cum Indis non ignorant regionis Americæ experti. Id ergo totum iniquum est, & extremæ rapinæ non absimile. Quin potius quoties graui egestate & damno propter annonæ caritatem, aut morbum quemvis grassantem aut rei familiaris infortunia Indos premi patronus videt, debet omnino non illa charitatis tantum lege communi, sed propria susceptionis suæ ratione, subuenire, ac de suo tribuere. Hoc igitur ita habet. Alterum verò documentum est, permutatione patroni facere ne sinantur, à quibus lege

*lib. 4.
epist. 33.*

Amos 2.

lege prohibentur. Solent pro veste, exempli causa, argentum, pro frumento vestem, pro radicibus aliud aliquid, sæpe etiam ipsorum operas quærere, quod totum periniquum experientia monstravit, lex interdixit. Etsi enim pretium æquale videntur & petere & capere, tamen reuera & sibi vtiliora, & Indis grauiora moliuntur. Hic ergo etiã vigilet Sacerdos Domini. Tertium idemque valde ad rem pertinens sit tum in exigendis tributis, tum in persoluendis operis seruitijsque Indorum oportere fraudes, atque imposturas vitare eorum, qui inter Indos ipsos excellunt, cæterisque præsunt, quos Curacas seu Caziques nominamus. Horum quippe fraude, & violentia miseri plerumque suo sudore frustrantur, sæpè multò plura conferre coguntur, quam lex ratiove præcipiat: cum sit subditorum tanta imbecillitas, tanta plebis inualidæ trepidatio, ut ne mutire quidem audeant contra suos illos Satrapas, sed viui ac videntes pereant potius, quam illorum imperijs minimum obloquantur. Hanc tam præpotentem tamque diu expertam tyrannidem nostri susceptores compescere certè deberent, atque eripere inopem de manu fortiorum, secus res haberet: vtrique compositò fabulam agunt, istis illi sponte conuiuent, illos isti patienter ferunt: ut simile quippiam paræmiæ lupi, atque vulpis agi videatur. Quod malum quam latè pateat, nemo non sentit qui res Indicas vel summis digitis attigit. Remedium verò quale sperare liceat, ignoro, cum inde pernicies proficiscatur, vnde salus maximè petebatur. Sed publica lege, ut eiusmodi sceleri, & dolo occurratur, caueri iam dici-

212 DE PROVVRANDA INDORVM
tur, hætenus certè cautum esse videmus nihil.
Vt cumque id habeat, peruestiget spiritualis medi-
cus, an hoc quoque loco, vt solet virus insideat,
aperiatque diligenter, ac ferro refecet, nec parcat
igni, si opus sit, quippe cum in lethali profundó-
que vlcere, seueriora medicamenta tutiora sint.
Ac nescio an hoc loco de Magistratibus, Sacer-
dotibúsque vsurpem illud sancti Leonis, inferio-
rum ordinum culpas ad nullos magis esse referen-
das, quam ad desides negligentésque rectores, qui
multam sæpè nutriunt pestilentiam, dum auste-
riorem dissimulant adhibere medicinam.

*Epist. 86.
ad Nic-
sam, diff.
86. infe-
riorum.*

C A P V T X V I I .

De seruitio personali Indorum.

SEquitur, vt de seruitio personali Indorum
differamus, seruitium personale solemus in-
telligere quicquid vtilitatis ex ipso hominum
labore, operaque percipitur. Quo in loco, quo-
niam impeditior, asperiorque est, & si quis
alius maximè necessarius, consistere aliquan-
tulum oportebit. Atque in primis Indos non
esse seruitute mulctatos, sed liberos prorsus, &
sui iuris ex iis, quæ in libro secundo disputa-
ta sunt, sumimus. Etenim, & publicæ leges,
ita statuunt, & consuetudo diuturna, & ratio
constans, ac certa, quòd qui nulla iniuria la-
cessunt, non possint reddi belli iure captiui. Nem-
pe sermo nobis est non de generali quadam
subiectio

subiectione , quam Aristoteles non admodum propriè vocat seruitutem naturalem , quàmque D. Ambrosius non natura introductam neque venditione comparatam , sed insipientiæ redditam dicit , ad Noë in Cham filium irreligiosum , maledictionem alludens : sed loquimur de ciuili legitima ac propria seruitute , quæ iure gentium victos victoribus subdit , quomodo solent definire Philosophi seruum , quicquid est , Domini esse. Liberi ergo isto modo Indi cum sint , operas illorum ac labores sua mercede frustrari iniquissimum est. Nam siue agrum tuum excolat , siue gregem pascat , siue domum ædificet , siue pabulum ac ligna comportet , siue onustus eat , siue literas cursor deferat , siue domi tuæ desidens ostia obseruet , denique quicquid operis agat , cuicunque vsui sit , dignus est operarius mercede sua , quam qui negat , sanguinis reus arguitur. Sic enim monet Spiritus sanctus in Sapiente , Qui aufert in sudore panem , quasi qui occidit proximum suum , qui effundit sanguinem , & fraudem facit mercenario , fratres sunt. Et in lege Domini disertè positum , Non morabitur opus mercenarij tui vsque mane. Per Malachiam quoque se Dominus minatur testem velocem in eos , qui calumniantur mercedem mercenariorum suorum. Neque mitiora Iacobus Apostolus , Ecce , inquit , merces operariorum vestrorum , qui messuerunt regiones vestras , quæ fraudata est à vobis , clamat : & clamor eorum in aures Domini Sabaoth introiuit. Terribilis sanè clamor , qui pro subducta mercede aures Dei aduersus potentes , & diuites interpellat. Quod si in alieno iumento onerando , vel equo

Q 3

ferendo

*Lib. 1.**Polit.**Lib. 2.**epist. 7.**Gen. 9.**Ecclesi. 34.**Leuit. 19.**Malac. 3.**Iacob. 5.*

ferendo pretium domino iuste rependitur, cur non iniquum valde existimetur hominis liberi corpus oneri laboris addicere, neque quicquam tamen soluere pro opera collocata? Illud quoque vigilantè audiendum, quod sermo diuinus non eos culpat, qui mercedem penitus abnuunt, immane enim id atque inusitatum relinquendum putauit, sed eos nominatim perstringit, qui vel morantur vel imminuunt, vel quovis modo defraudant pretium sudoris alieni. Ne mihi igitur obsoletum à te cibum porrectum commemorares, ne vestem annuam, ne agelli portiunculam illius vibus relictam referas. Adest iustus arbiter Deus, qui se etiam testem pro paupere & quidem velocem pollicetur. Quæres, quænam æstimatio iusta sit, vt scrupulus omnis tibi eximatur. Si lege præscriptum est pretium, vt in rebus plerisque est, ne alium quæras interpretem, quicquid de legitimo detrahis, rapina est. Si nulla lex est, communis æstimatio bonorum atque prudentium ponet modum, aut etiam vtriusque locantis, inquam, & conducentis mutua pactio, dummodo dolus omnis, & vis absit. Quo toto genere multum ac sæpe peccant, & patroni Indorum, & prætores, & ipsi passim parochi, dum subditis pro rerum occasionibus multa imperant, nulla aut pauca persoluunt, qui neque à culpa eximi neque à satisfactione excusari vllò modo possunt. Neque verò obsequendi facilitas, & prompta opera Indorum prætendi debet, cum genus hominum timidum ob id tam officiosum, atque obsequens se se præbeat, quod timeat sibi, atque consulat, dumque poena liberetur,

liberetur, pretium non audet repetere, id enim
seruili ingenij est. Alioqui cum se possunt sub-
ducere ex oculis, neque plagas timent, egregie
fugitant operamque detrectant. Igitur cuivis ope-
ræ, cuivis labori Indorum mercedem suam esse
reddendam perspicuum est. Sed quoniam lege
interdum præscriptum est, vt certus Indorum nu-
merus Patrono detur ad hoc illudve negotium, vt
ad pascenda pecora, aut agrum excolendum,
sementemve faciendam, quod olim vsitatius erat,
& nunc etiam temporis in nonnullis locis fit,
quærent multi, an id iniquum quoque sit, quod
videatur seruitium personale introduci contra
modo definitam quæstionem. Verum id sanè ini-
quum non est per se, cum tributi loco accipitur.
Nam quam essent aliàs pensionem reddituri, vel
argenti vel vestis, vel cæterorum, tantundem
si remittatur Indis, pro operæ mercede redditum
intelligitur. Vbi peruersitas illa cauenda est, ne
eiusmodi onera inæqualiter Indos premant, sed
per sortes, vicesque suas, tum vt huic detrahatur
de illius tributo, quod ipse seruiuit, ac non hu-
ius sudoribus alius lucrum faciat. Itemque illud
prouidendum, ne ob eas seruiendi vices sibi re-
busque suis in necessarijs desint. Quæ quidem
omnia dictare facile est, perficere verò, aut
infecta emendare perquam difficile. Libero
homini mercedem reddi oportere pro operâ ostē-
sum est: vtrum vero liberam quoque esse opor-
teat illius operam, ac nullo modo cogi, à mul-
tis merito quæritur. Mouet enim non parum
hinc, quod liber homo si cogitur, liber non
est, atque adeo qui ad opus inuitum trahit, non

leuem facere videtur iniuriam, seruire enim est pati vim. Inde verò non parum quoque vrget, quod si barbarorum ingenio, & voluntati indulgendum est, nihil operis vnquam fiet, nihil negotij conficietur, quippe qui otio desideant, ac sibi etiam ipsis vix necessaria laborent: alios verò nisi vi aut metu perculsi, nihili faciant, Atque hoc loco nō disputamus de ea coactione, quæ affertur cum ipsorum interest, vt cum sibi oppidum ædificare iubentur, aut templa extruere, aut fundos colere, cæteraque rei, vel publicæ, vel familiaris officia, est enim in aperto res, cum etiam ingenui omnes ad ista compellantur, cum militiæ pacisve negotia ita fieri exigunt. Magistratus cum ista & indicit, & vrget pro officij sui munere facere non dubitatur. At Respublic. hæc Indicana cum partim Europæis, partim Indicis hominibus constet coagmentataque sit, cumque sint multa, quæ nullo modo Hispani in his locis per se faciant, propterea quòd vel laboriosa, vel sordida ducunt, & vt quam maximè velint, non possunt tamen tanta perficere, quale est, humum effodere, rudera egerere, lateres cogere, onera baiulare, iumenta agere, cæteraque seruilis, quæ si desint, breui omnis ciuitas deleatur, necesse est: ad talia igitur si sponte sua barbari minimè ducantur, an liceat fasque sit per vim, metumve compellere, id prorsus in quæstionem vertitur. De qua re sunt, qui Indis vsque adeo patrocinantur, seridò vt affirmant grauem ferre iniuriam, cum ad ista coguntur: Hispanosque vel sibi seruire, vt in Hispania fit, vel si ingenui omnes esse pergunt, eos neque vesci, neque bibere iubent, siquidem

siquidem qui non laborat, ne manducare quidem
 eum Apostolus vult. At si dura ista omnia viden-
 tur, deferant, inquit, deferant quam cupiditate
 non vtilitate terram occuparunt, & ad patrias
 angustias reuertantur. Quorum etsi dictu ap-
 pareret liberalis, atque honesta sententia, tamen fa-
 ctu tā est & difficilis, & absurda, vt nihil præter-
 ea. Nam vt demus ex Hispanis non paucos posse
 seruilis ista tractare, propterea quòd natalis, edu-
 catioque non admodum abhorrent, & lucri spes
 potest fortassis excitare: tamen quota ista portio
 est hominum præ multitudine necessaria? Iubere
 autem vel ista cessare, vel nostrates ad sua re-
 meare, quis non videt, quam sit fidei & religionis
 lumen extinguere? Quamobrem non est impro-
 bandum, quod ciuitates omnes institutum te-
 nent, & seruant, vt Indorum ad ista necessaria mul-
 tudo deputetur, parèréque, si nolit, cogatur, dum
 modo & conueniens, vt dixi supra, merces labori
 retribuatur, & cum minimo salutis fortunarum-
 que suarum incommodo ab Indis ista exigantur,
 tum etiam inter ipsos iusta oneris vicissitudo ser-
 uetur, ne aliorum remissio, aliorum sit tribu-
 latio, sed ex æqualitate, vt dixit Apostolus. Si
 tria hæc custodiantur, nihil hîc inesse iniuriæ,
 nihil querelæ, primum proborum ac sapientium
 hominum consensus persuadet: qui & nunc, & ex
 ipso initio ita Remp. hanc administrandam intel-
 lexerunt, Deinde ipsorum barbarorum consuetu-
 do perantiqua ab ipsis Ingarum Regum exordiis
 ante Christianum nomen auditum multis sæculis
 conseruata. Postremo ius naturæ hoc habet, vt ad
 totius corporis, familiæ, ciuitatisve conseruationē
 necessariæ

necessariæ partes laborare iubeantur. Neque enim oculus calcare terram iubendus est, vel culinariam paterfamilias exercere. Vniuersa porrò Indorum, atque Hispanorum multitudo vna eademque Resp. habenda iam est, non duæ quædam inter se disiunctæ, siquidem, & Rege, & lege vtuntur iidem vtrique, & vtrique tribunal, & ius non aliud, atque aliud, sed idem certe. Quare quæ ab Indis nostris hominibus operæ impenduntur, non exteris & alienis collocari putandæ sunt, quod fortassis fallit nonnullos, sed suis potius ciuibus: quoniam & si testa ferro male cohæret iuxta Propheticum vaticinium, tamen eosdem statuæ huius pedes ambo componunt. Itaque mirandum non est, si testa ferro prematur interdum, illud potius optandum, ne penitus comminuatur, ac dissipetur. Denique Aristoteles magnus ciuitatis instructor, toto suo primo Polytico, aut nihil agit, aut hoc certè obtinet, vt secundum naturam in Repub. quidam seruiant, qui labori idonei sunt, quidam imperent, qui ratione potius præstant, dummodo alijs alij adiumento sint, oculosque alter ad videndum pedes alter ad ambulandum mutet. Quæ si vera sunt, manifestum est non esse ab æquitate alienum, quod publica diuersoria per vices suas, quas mitas ipsi dicunt, Indi & incolere, & viatoribus necessaria præbere prerio dato iubentur, quod ex veteri Ingarum disciplina nostri accepere, vt alia pleraque plena prudentiæ. Neque verò improbandum, quod mercenarij conductitij certo die, & loco adesse Magistratum decreto solent, quodque publicis operibus,

ut pontibus reficiendis, vijs expediendis, alijsque id genus distinentur. Neque illud vituperandum quod peculiare ob causas ad domestica ministeria quibusdam locis attribuuntur, ut in xenodochijs, in religiosis domibus, tum etiam publicorum nobiliumve hominum, aut contra grauius affectorum, & indigentium seruitijs suo ordine, & ratione assignantur. Abusio tamen illa amputanda est, & pro iniqua ducenda, cum in eiusmodi mitaios (sic enim vocitant) siue mercenarios iustum pretium imminutum est, vel maiora, quam vires ferant, imperantur, vel diutius retinentur quam pro ratione præscripta, quæ iniuriosa sunt omnia, & ex improbitate hominum potius quam ex vlllo vero iure profecta. Neque bona vnquam fide ista usurpata sunt, sed magna, vel temporis, vel hominum corruptione. At personalia seruitia quæ diximus, publica auctoritate inducta sunt. Priuata verò an fas sit aliquando barbaros nolentes ad opera opportuna compellere, non tam dubitare videntur multi, quam ipso suo facto dubitandum afferunt. Deprehensus, ut tritissimo utar exemplo, in media via Hispanus, cibi indiget sibi, pabuli iumento, aut etiam sarcinulis vectandis iumentum quoque. Orat Indum ut sibi subueniat, explicat causam, pretium offert, nihil ille mouetur, neque prece, neque pretio, neque verò flocci facit, vtrum yiam ille conficiat necne, imo ne si intereat quidem. Hic facti nulla esse solet quæstio. Nam dicto citius Indus capillis trahitur, calcibus tunditur: sedulo statim, atque copiose cuncta administrat, adeo, ut plerique iactent nostratum,

tium , persuasum Indis esse à suo Zupaio , idest diabolo , nihil vt Christianis sponte impertiant, sed per vim omnino , & iniuriam. Quæ quamquam militum licentiæ , & rapinæ fabula opportunè inducta est , tamen res ipsa non admodum abhorre videtur à vero. Etenim qui barbarorum confessiones pro veteri superstitione idolorum sacrifici hodie quoque audiunt, feruntur gravissimas pœnas ei iniungere , qui se se aliquid Christiano profuisse confessus sit. Neque mirum est eo usque progredi hostis antiqui in Christianos odium , in suos quibus potest modis transfusum. Sed redeo ad rem. Cum eiusmodi angustia incidunt aut ijs similes , quod in his regionibus percrebrum est, quid Deum timēti viro agendum sit, dicam, vt sentio. Primum si potest pactio-
ne transigi , id multo prius ac melius. Vbi non potest, si commodè conueniri potest magistratus aliquis, qui publica authoritate cogat, adeundus est. Hic quoque si desit, vt deest persæpe, ac negotij grauitas vrget , nihil aliud præcipi potest , neque breuius , neque planius , quam vt leges necessitatis obserues , quæ tibi necessaria sunt quærens cum quam minimo proximi detrimento. Hone-
sta certè aliqua vis, atque compulsio afferri potest , & terroris quædam significatio , tanquam puero alicui iusta , & commoda contemnen-
ti. Qua in re multum plerumque iusti , & æqui limites transiliuntur. Quorsum enim verbera , si verba sunt satis ? Quorsum plagæ , si vel metus incussus hominē subigit ? Iam verò an onera baiulanda Indis imponere crimen sit, multi quæ-
runt.

runt. Nam prima illa tempestate Hispanorum has regiones peragantiū, magnā esse hominum factam iacturam propter eius generis duras molestias non dubium est. Quamobrem & olim sæpe, & nuper, demum lege lata Indi onusti iter carpere prohibentur. Tamen consuetudo omnium propemodum secus habet, tum harum regionum incredibilis incommoditas, & penuria id veluti suo iure deponit. Sanè Indos onerari onustosque incedere per se quidem, neque iniquum est, neque perniciosum, cum ab antiquissimis annis, ita assuefacti sint, fueritque solemne toto tempore Ingarum, imò verò hodie quoque se suis sarcinulis ipsi onerent, quæ sæpe non leuius pondus habent, quam quod à nostris imponitur. Neque habet ea res plus miraculi, aut violentiæ, quam quòd in Europa baiuli onera etiam grandia dato pretio quovis vnde vis, portant. Quamobrem si & onus moderatum est, & via non longior æquo, & pretium non iusto minus, nihil res ipsa peruersi habet. Vtrum verò expediat necne Reipublicæ ista vel prohibere, vel sinere, non nostri arbitrij est decernere. Lex verò quatenus obliget consuetudine contra obtinente, nihil habet hîc propriæ difficultatis, sed commune est cum aliis plerisque. Certè ut est culpanda, vel detestanda potius veteranorum quorundam immanitas scèdissimè barbarorum ceruicibus abutentium, ita etiam quorundam delicata nimis hoc tempore trepidatio est
impro

222 DE PROCVRANDA INDORVM
improbanda, qui non vident, non solum con-
suetum vnicuique non esse molestum, verum
etiam iucundum, putantque omnium sensus, &
animos ex suis esse metiendos. Integrum æstiuum
diem metendis frugibus insudabit rusticanus,
aut aratro ducendo, qui si quartam horæ partem
vtrumque genu humi figere iubeatur, necem si-
bi prælagiet certam. Est suus vnicuique iucun-
dus labor. Itaque gentes Indorum apud nos baiu-
landis oneribus perassuetæ, si æquo plus non
vrgeantur, neque iniuriæ, neque incommodi
quicquam subeunt, cætera, vt dixi, moderata
sint, pondere, labore, pretio.

C A P V T X V I I I.

De Metallorum operatione.

AT illud durissimum videtur imperium, cum
metallis effodiendis mancipantur, quod vs-
que adeo ærumnosum & graue à priscis est iudi-
catum, vt quemadmodum nunc ad triremes dam-
nâtur propter insolentia crimina homines facino-
rosi, ita olim ad fodienda metalla damnarentur,
quod capitali supplicio proximum erat. Ad id er-
go homines liberos nihil mali commeritos adi-
gere inhumanum, atque iniquum valde videtur.
Deinde compertum est eo in labore multos absu-
mi, vel fatigatione fractos, vel discrimine extin-
ctos. Horror est dicere, quæ mineralium intra
ipsa abditissimæ telluris viscera delitescentium
facies sit, quæ vorago, vt verè tartarus ipse patere
videatur,

videatur, neque ineptè Poëtæ olim gazas apud Plutonem reconditas fabulati sint. Chrysostomus sui temporis laborem hominum in extrahendo metallo miratur, narratque eloquenter, verum illa omnia præ nostris fumus, & umbra sunt. Perpetua atque horrenda nox, aër crassus & subterraneus, descensus prolixus & perdifficilis, cum durissima rupe sæua contentio, statio periculosa, si vestigium nutet, actum est, humeris vectatio permolesta, per gradus obliquos, & male hærentes ascensio, cæteraque etiam cogitatu graua. Ad hæc cum argenti venæ in præruptis plerumque & inaccessibleis rupibus sitæ sint, terraque inhabitabili, ut curentur, à patria extorres veniunt, solum aëremque mutant, facillimè valetudine afficiuntur. Quid verò ubi argenti viui effodiendi labor est, cuius vel tenuissimus halitus, cum igne circumclusus exhalatur, præsentem necem affert? Quid de gemmis explicandis dicam? In oppido Rio de la hacha, vocato cum essem, comperi duram Indorum seruitutem extrahendis conchiliis, summo mane in ratem imponebantur, in pelagus descendebant magnæ sæpe profunditatis, ubi integrum penè horæ dimidium halitu compresso vrinatorum more, conchilia, ostreaque conquirerent immenso labore, summo periculo, cibis semper parcissimus: commercium omne interdictum custodia omnibus nocturna communis: vitæ ratio molesta, ac liberis hominibus prorsus aduersa. Hæc diu actitata, serò tandem animaduersione digna emendata sunt, sed sunt tandem Rege Catholico id semel, ac bis, ac tertio inquirente,

rente, & agente. Itaque Indi omnes liberi declarati sunt, & ab eo labore cessare iussis: quicumque superstites tam diuturno labori reperti sunt. Ad eundem ergo modum, & metallorum effodiendorum non admodum dissimiles ærumnæ sisti debere non paucis videntur. Habent enim cum iniuriam contra libertatem Indorum, quod seruire cogantur alieno lucro cum tanto suo incommodo patria sæpe liberisque desertis: tum vero exitiale periculum, cum cœli mutatione, laboris molestia rei ipsius discrimine impendere videatur interitus. At si metalla curari desierint, si argentum è venis non eruat subuersis à radicibus montibus, ut est apud S. Iob, si aurum ex fluuiorum obicibus non cogatur, mineraliaque cætera negligantur, actum est, Indorum negotium & Resp. interijt. Neque alios fructus Hispani tanto Oceani circuitu quærunt, neque alia ex causa, vel mercatores negotiantur, vel iudices præsident, vel ipsi quoque sacerdotes plerumque Euangelizant. Argentum aurumque si desit & se subducat ex oculis, omnis frequentia, omnis commeatio, omnis ciuilis & sacerdotalis concursus breui euanesceat. Testes sunt Insulæ Hispanica & Cuba, & sancti Ioannis, olim quidem frequentissimæ, dum auri materia circumfluerent, nunc penè desertæ & horridæ, postquam indigenarum penuria pretiosissima metalla, quæ illic abundant, elaborari non possunt: In omni hoc nouo orbe eas prouincias doctrina maximè florere cernimus, quas opibus quoque præstare constat, ut ad hoc commune emporium omnes undique confluere videantur.

Equidem

Equidem nescio vtrum potius faciam, querarne nostrorum temporum calamitatem, & charitatem refrigercentem, fidemque raro in quoquam inuentam, iuxta Domini verbum, tot animarum millia vt Christo lucrifiant, non satis merces videri dignas, quæ nostrorum animos excitent, auri argentineque cupiditatem longè plus valere apud nos, vt ista si defint, animarum salus pro nihilo fiat? An verò Dei bonitatem, summamque prouidentiam admirer, qui pro nostrorum hominum ingenio, vt gentes adeo remotas, & barbaras Euangelio adiungeret, aurum argentumque his terris tam copiosè donauit, hisque veluti illexit nostrorum cupiditatem, vt si charitas non inuitaret animarum, auri saltem cupiditas inescaret? Et quemadmodum olim incredulitas Israël salus fuit gentium, ita nunc Christianorum auaritia Indorum vocatio facta est. Quid enim? Siue per veritatem siue per occasionem Christus annuntietur? Sed in hoc gaudeo, sed & gaudebo, ait magnus Apostolus. Occasiones namque benefaciendi etiam Deus captat. Prima Euangelij diffusio ex trepidatione, & discipulorum ob Hierosolymitanam tempestatem nata est, Apostolis solis vel penè solis Hierosolymis persistentibus. Populus Israëliticus ob iram Dei sibi commeritam inter gentes dissipatus est, quibus magna ex parte salutis fuit. Itaque & populo suo iram, & alieno misericordiam eodem facto Deus impendit. Meritò Paulus compellat, cum ad ista venit, altitudinem diuitiarum sapientiæ, & scientiæ Dei. Itaque quis non diuini consilij arcanum suspiciat, atque admiretur, qui aurum argentumque omnium

*Luc. 18.**Rom. 11.**Phil. 1.**Ad. 8.**Deut. 28.**Hier. 9.**Tob. 13.**Rom. 11.*

126 DE PROCVRANDA INDORVM
mortalium perniciem salutem voluerit esse Indor-
um ? Quamobrem quæ sine Dei offensa, & fra-
trum injuria adhiberi consilia possunt, vt ista ne-
que intercidant, neque imminuantur, ea à sapien-
te & religioso Reipub. administratore negligenda non sunt. Et quoniam graui maturaque Theo-
logorum, iurisque prudentium consultatione non
ita pridem totum hoc de mineralibus per Indos
elaborandis negotium tractatum est, extantque
leges prouinciales scriptæ, quo ordine, quæue mo-
deratione metalla eruantur, vt saluti commodif-
que Indorum prospectum sit, non mihi videor
tantorum virorum sententiam improbare, multo-
que minus leges alias debere præscribere, quibus
tam aspera Indorum conditio temperetur. Tan-
tum capita repetenda sunt, breuiterque ponenda,
quibus eius rei facultas constringatur. Primum
igitur doctrinæ spiritualis ministri in his, qui me-
talla operantur, ne desint, vt sint qui Missas cele-
brent, qui in fidei rudimentis erudiant, qui mo-
rituros confessione excipiant, cæteraque necessa-
ria administrent. Deinde vt valetudini consulatur,
ne aut contrario valde cælo vtentes traducantur,
aut è longo valde tractu euocentur, aut laboribus
immodicis opprimantur. Mox, vt fortunis quo-
que suis non pessimè consuli sentiant, sed pretio
iusto tam molestus eorum labor compensetur, si-
nanturque lucella sua interim quærere. Adhuc vt
& valentibus opportuna alimenta suppeditentur,
& ægrotantibus solatia necessaria non desint. Ad
vltimum vt labor ipse distribuatur commode per
vices suas, ne diutius contra voluntatem suam à
patria abesse cogantur, nève vna prouincia sem-
per

per oneretur, alia semper in otio degat. Quas conditiones si, ut par est, legitime seruauerint nostri, quemadmodum à viris sapientibus enucleatè propositæ sunt, videntur tolerandi, ne commercio finito, cura quoque Euangelij concidat: at si negligentur hæc, & acerbius cum Indis tanquam cum mancipiis agatur, viderint ipsi, quas Patri pauperum & iudici orphanorum rationes reddituri sint. *Psal. 67.*

CAPVT XIX.

Quibus modis salus Indorum per seculares ministros procurari possit.

QVoniam humanam ac ciuilem administrationem Indorum hoc libro explicandam suscepimus, & quibus ex causis & qualibus conditionibus tum Patroni tum Magistratus obstringantur, vtcunque licuit, exposuimus, superest, ut dicamus quæ maximè ad eum finem facere videbuntur. Neque nunc tamen expectandum est, ut de optima Republ. differamus, legumve ferendarum rationem, cæteraque rectoris artis persequamur, quæ neque facultatis sunt nostræ, neque si maximè forent, ad præsens institutum pertinerent. Tantum quæ proposito negotio, id est, ut Euangelicam salutem barbari consequantur, propius inferuiunt, ea attingenda sunt. Quorum caput est omnium, quod quidam rerum Indicarum egregius æstimator dixit, in barbaris prius esse

curandum, ut homines esse discant, deinde ut
 Christiani, quod tanti ponderis est, ut inde vel
 falus certa, vel certa pernicies expectanda sit.
 Etenim feritatem inter nationes barbaras plu-
 7. *Eth. c.* rimum reperiri Aristoteles recte monuit, quam
 c. 1. non minus recte definiuit, vitium esse adeo
 2. *Mag.* exuberans, ut hominem feram potius efficiat.
 7. *mor. c. 3.* Tales vero habitus, etsi ille regionum extre-
 7. *Señ. 16.* mo vel æstui vel frigori non falso alicubi ascri-
 7. *Probl. 1.* psit, tamen & frequentius, & certius est con-
 7. *Eth.* suetudine maximè fieri, quod & alias docuit,
 cap. 5. & satis nos admonet huius Indici cœli mira
 temperies. Hos igitur sylvestres, ferinosque ho-
 mines ad humanitatem traducere, urbanisque
 institutis accommodare prima debet esse cura
 moderatoris. Frustra diuina & cœlestia docebis,
 quem ne humana quidem capere, aut curare
 perspicias. Prodest in ea re plurimum nostrorum
 hominum consuetudo, prodest cultus omnis ex-
 ternus, atque obseruantia maiorum, profunt
 conuentus certis, & diebus, & locis, pœnæ-
 que & contumeliæ irrogatæ negligentia; honor,
 & præmia rectè factis proposita: ex ipsis, qui
 elegantiores sunt, cæterorum magistros, censo-
 resque constituere. Ordo verò quidam tum op-
 pidorum, tum domiciliorum, ut non veluti
 cuniculi fortuitas sedes eligant, tum verò ut in
 conspectu, eorum omnis actio sit, neque late-
 bras petere sinantur. Ad hæc permixta illa ac sine
 ullo delectu spurca habitatio, ubi simul & mari-
 tus, & vxor, & filius, & filia, & frater, & hos-
 pes, & canis ipse atque sus cubat, accuratè
 auertenda est, quantum licebit, quæ causa est
 nullius

nullius pudoris, nullius paternæ reuerentiæ, generis quoque, imo & sexus contempti equinæ cuiusdam libidinis in obuia quæque sine vlllo pudore grassantis. Quæ tamen neque breui omnia exigenda sunt, neque desperanda vel serò. Videmus certè non parum esse perfectum, vbi nonnulla cura moderatoris effulsit, quæ si confirmata, vigilansque fuerit, non dubium, quin alium hominum statum efficiat. Vnus M. Franciscus Xauier, isque nulla ciuili potestate munitus, Insulam Morifertur ex immanissima feritate ad miram mansuetudinem traduxisse, neque adeo longo tempore. Quæ veto antiquorum inueterata consuetudine occalluisse videntur, vt in meliorem formam transferri nequeant, maioribus sua amantibus, peregrina penitus respicientibus, ea minorum, id est, puerilis, iuuenilisque ætatis accurata institutione emendanda sunt. Cui vni rei omni studio incumbere oportet rectores, si modo res Indorum aliqua ex parte curant. Iuuentutis, quæ ieceris fundamenta, eam tu perpetuo structuram reliquæ ætatis existima. Quamobrem non est quorundam contemnenda sententia, qui scholas, Ecclesiæ rudimenta, domicilia quoque & tempore procedente collegia nobilium maximè Indorum Hispanos viros maxime integros, & probatos curare debere censent, vbi à suorum consuetudine, quoad liceat, remoti mores nostros, sermonemque perdiscant, qui possint mox suis esse idonei præceptores. Quæ sanè sententia quamquam difficultates non paucas habet, tamen, vt minus prospere cedat, non poterit profecto non & plures, & maiores vtilitates asserre.

*Lib. 4. de
vita Ig-
natij.*

230 DE PROCVRANDA INDORVM
Iam illud maximi faciendum est, vt ab Indorum
populis defidia, atque otium diligentius ampu-
tetur, cui & naturaliter dediti sunt, & vita sensu-
que omni torpescunt, vitiis quoque impuris non
parum capti. De qua re quoniam quæ satis esse
puto, supra insinuata sunt, faciemus ad reliqua
gradum.

C A P V T . XX.

De ebrietatis malo barbaris familiari.

INter omnes verò barbarorum morbos, quibus
leuandis atque tollendis inuigilare debet Chri-
stiani rectoris prouidentia, nullus aut commu-
nior, aut perniciosior, aut etiam ad curandum
difficilior ebriositate. Qui res noui orbis optimè
callent, negant posse promoueri quicquam in re-
ligione, ac ne in qualicunque quidem institutio-
ne politica, nisi malum hoc latissimè sæuiens ab
Indorum finibus exterminetur. Ac profecto mi-
rabile est in tot tam vasti orbis nationibus reper-
tis, cùm nullus vini vsus, nulla penitus notitia ex-
titerit, temulentiaë tamen vsque adeo vitium om-
nibus esse commune, vt pro raro miraculo sit, si
qui sobrietatem non odio, & ignominia profe-
quantur, id quod de Tucumanis, & quibusdam
aliis sanè paucis accepimus, nescio an falso.
Quanquam vnum illud ebrietatis malum incre-
dibile est dictu, quot artibus, quam variis, quam
exquisitis procuretur. Ex oryza Æthiopas, & Si-
nas

nas expresse quodam ac decocto humore ebrias sibi temperare potiones vulgare est. Nostri indigenæ plerique ex fruge sua præmansa fermentum aquæ immergunt atque excoquunt, alij putrefacta potius vtuntur, vnde Sora ab ipsis dicta efficitur, quovis falerno potentior. Quidam ex ramulis quibusdam arborum decerptis sua vina conficiunt. Alibi ex palmulis expressus liquor ebrietatis mire efficax, quem & veteribus in usu fuisse scribit Chrysostomus. Insulani nonnulli servi saccareum succum quibusdam medicamentis ita inficiunt, vt vehementissima potio euadat, quam illi Guarapum nominant. Verum quid attinet innumerabiles temulentia species referre, vt quod in vna vite natura latere voluit, id peruersa ars ad tam multa transtulerit? Sed neque nouum hoc est, neque nostrorum barbarorum proprium. Scribit Plinius grauis author fuisse Occidentis populis suam ebrietatem fruge madida, Pluribusque modis, inquit, per Gallias, Hispaniasque nominibus aliis sed ratione eadem, Hispania iam & vetustatem ferre ea genera docuerunt (id est, instar vini diu in cellariis asseruati) Ægyptus quoque potus similes excogitauit. Nullaque in parte mundi cessat ebrietas. Hæc Plinius. Quo minus nostris barbaris irascendum est, quod vitis inopiam fruge compensant, suaque inde vina conficiunt, cum & veterum ista fuerint, & hodie quoque non dissimilia Cantabri in Hispania ex pomis factitent, & Belgæ ex hordeo exprimant. Quæ omnia potionum genera Siceræ nomine apud Hebræos comprehendere Hieronymus docet. Cum verò cibis vtantur Indi ferè vilissimis, & paucissimis, atq;

*Homil. in
c. 9. Esai.*

*Lib. 14.
c. 22.*

*In epist.
ad Gal.
c. 5.*

ingluuiem maxima ex parte ignorant, perpetuandam tamen nullus est finis, nullus omnino modus. Ac mihi tam prodigiosę bibacitatis causam aliquando requiręti ea occurrit in primis, quę Plinius eodę loco insinuauit. Namq; & hæc necessitas vitium comitatur, ut bibendi consuetudo augeat auiditatem, scitumque est, Scytharum legati, Quanto plus biberint, tanto plus sitire Parthos. Perinde est enim vinolentiam bibendo velle sedare, atque ignem materia apposita pergere extinguere. Nam quod naturę appetitioni datur, moderatum est; at vitiosa, & præter naturam libido nullo expletur, ut præclare Aristoteles de pecunię auiditate dixit. Id etiam

Hom. 29. Chrysostomus bene admonuit ebrietati vacantes
in Genes. nunquam satiari, sed quantum ingurgitat, tantum

Esaï. 5. siti flagrare, ita ut inflammatio quædam eis sit vini
vsius. Æstuant enim vino ebrij, ut nos legimus in
Esaïa, siue vinum comburit eos, ut alij significatius
legunt. Mihi verò præterea non solum delectatio
ipsa potandi ab ebriis quæri videtur, sed illa quoq;
longè iucundissima esse, quæ est summa infelicitas,
mentis emotio. Sensus illam caliginem, & noctem
offusam cerebro, dulcem sibi reuera esse ipsi barbari
iactant, & rebus ipsis copiosè probant, cum
portionibus interdum vtantur perquam acerbis,
interdum ne potionem quidem vllam adhibeant,
sed succo pigmentisve naribus resumptis, in quo
nulla esse potest saporis voluptas, ebrietatem ac-
cerfant. Nam in quadam insula cum nauigationis
commoditatem expectarem, didici ex Tabaco
contuso (genus id herbæ est ad permouendum
cerebrum mire efficax) seruos Æthyopicos nari-
bus exorbere vim solitos, grauemque sibi ac diu-

turnam

tūnam inde temulentiam excitantes, pro magnis deliciis ducere, vt vix minis plagisque ab ea consuetudine auelli possent. Verum præcipua causa tã effusarum compotationum, tamq; ardentis studij, Diaboli prorsus ars est, qui nescio quibus præstigiis insanos homines noctes diésque bibendo cōsumere pro summa felicitate, pro maxima religione persuasit. De his planè loquitur sapiēs cum idololatrarum mores explicat, Tot & tam magna mala pacem appellant. Aut enim filios suos sacrificantes, aut obscura sacrificia facientes, aut insanix plenas vigilias habentes, neque vitam, neque nuptias mundas iam constituunt, & cætera. Qui symposia barbarorum, & bibendi canendique vicissitudines, turbulentasque illas pernoctationes conspexerit, non potuisse melius significari dicet, quam per vigilias insanix plenas. Eam quoque antiquorum fuisse superstitionem, vt Deos suos effusa perpotandi licentia celebrarent, nocturnasque cantiones, ac saltationes libidinis furorisque plenas multo mero dedicarent, Philonis libri attestantur, Græcis pariter, atque Barbaris mira contentione certantibus, vtris potius ebrietatis palma concederet. Hinc Pæanes, hinc Orgia, cæteraque impudentia omnis Deorum cultibus attributa. Quo etiam exemplo Balthasaris cōuiuæ temulenti simul bibebant vinum, simul Deos suos laudabant aureos, argenteos, æreos, ferreos, ligneos, atque lapideos, vt scriptura commemorat. Quare ebrietatis malum non simplex quoddam hominis vitium, sed vniuersæ Reipub. pestem existimare debemus, quæ & numero, & diuturnitate vires sibi maximas compararit.

Sap. 14.

De vita
contem-
plat.

Dan. 5.

CAPVT XXI.

Quæ mala ex ebrietate oriantur.

*S*atis quidem ad fugiendam, detestandamque
 ebrietatem esse debebat, quod inter ea opera
Gal. 5. ab Apostolo numeretur, quæ qui agunt, regnum
1. Cor. 8. Dei non possidebunt, qui etiam tanquam vene-
 natam ebriosorum mensam vitandam docet.
1. Cor. 5. Quanquam ebrietatis verbo cum copiosam
 quandam saturitatem scriptura significat, non ne-
 cesse est crimen accipere, quemadmodum adno-
Hom. 29. tauit etiam Sanctus Chrysostomus, ut cum Ioseph
in Gen. cum fratribus inebriatum legimus, & apud Salo-
Gen. 43. monem, Qui benedicit, impinguabitur, & ine-
Prou. 11. brians, ipse quoque inebriabitur, quod in bonum
 accipiendum esse, non est dubium. At ubi vera
 temulentia & ebrietas est, ibi crimen esse dubi-
 tare non licet Christiano. Satis ergo mala est
 ebrietas ipsa per se, quæ excludit à regno Dei.
 Sed sunt longè grauiora, quæ ab ea mala profi-
Chrys. in ciscuntur. Verè enim à sanctis Patribus innume-
e. 5. Esai. rabiliū malorum fons perhibetur. Qua de re
 extat Magni Basilij elegans sanè, & copiosa ora-
 tio, cuius sententias exscribere, ut sæpe solet,
 videtur Ambrosius in libro de ieiunio, & Helia.
Conc. Tru- Tribus ergo, ut compendio dicam, nocet vehe-
ron. c. 48. menter ebrietas, Corpori, Moribus, Fidei. Ari-
Arist. 3. stoteles, & morbos, & causas persequitur in
proble. 5. Problematis, Plinius in naturali historia. Ex
lib. 14. nostris

nostris os aureum Ioannes ad suos Antiochenos, Non pauciores sed multo plures, & difficiliore animi, & corporis morbos immoderata vini parit potatio, passionum bellum, absurdarum hyemem cogitationum menti introducens, & corporis vim molliorem, & solubiliorem efficiens. Non enim ita terræ natura vexata aquarum superabundantia continuè dissolvitur, ut corporis vis mollescit, & diffluit, & exilis redditur, vini potu continuo ingurgitata. Cui Ambrosius concinit, Hinc phrenesis periculosa, hinc calculi grauis pœna, hinc exitialis cruditas, & reliqua. Neque tacuit ista sapiens, Sed quàm sufficiens est, inquit, hominì erudito vinum exiguum, & in dormiendo non laborabis ab illo, & non senties dolorem. Vigilia & cholera, & tortura viro infrunito, somnus sanitatis in homine parco, &c. Quæ cum ita sint, verissima eorum mihi sententia visa est, qui immaturos plurimorum obitus in hac regione nimiae ebrietati tribuunt. Sunt etiam viri pergraues, qui hanc inferiorem, ac maritimam oram olim Indorum populis refertissimam, & numerosissimam, nunc adeo imminutam, ob id inter alia sentiunt, & prædicant, quod post Hispanos ingressos effrænate suæ siceræ, & quidem exitiali maxime indulgeant, argumento esse, quòd montanos, quia & parcius bibunt, & natura frigidiores sunt, multitudine etiam auctos esse videamus. Id sanè magno Christianis opprobrio est Ingam Regem barbarum, & idolis deditum ab ebrietate subditos sibi populos cohibuisse: nostros vero, quos oportebat mores quoque perditos

c. 12.

Hom. 1.

ad Pop.

Ant.

De Helia

G. ieiunia

l. 1.

Ecc. 31.

ditos emendare, temulentiae incrementa tanta fecisse. Omitto interim tumultus quotidianos, plagas, necesse ab eiusmodi computationibus natas; quod & Indis, & seruis Aethiopibus familiare est: Vidi ipse ex taberna duos semicaptos vino egres-
 sos vix oboli causa, se mutuo vno codemque gladio confecisse, & quidem extracto bis è percussio corpore prae alterum ferendi furore. Itaque momento temporis exanimés ambo corruerunt. Ne-

Prov. 23. que enim frustra Salomon dicit, Cui vae, cuius patri vae, cui rixae, cui foueae? Cui sine causa vulnera, cui suffossio oculorum? Nonne his, qui commorantur in vino, & student calicibus epotandis? Adde quod sensum hominis ebrietas, etiam digesta reddit stupidum, & mentis aciem grauiter obtundit, atque hebetat, obliuionem rerum omnium affert, & vt Plinius dixit, mortem memoriae. Quid verò attinet dicere oris illum foetorem, gestus improbitatem, incessus titubationem, quidvis loquendi temeritatem, importunas corporis fordes, caeteramque illuuiem, vt homo breui in belluam transisse videatur? Quae quanquam in omni genere ebrietatis damna reperies, nusquam tamen cumulatiús, quam in istis barbarorum ingurgitationibus adeo portentosis, vt corpus instar vtris, aut canalis potius perennis, potu fluat, quae sanè pestis valetudinis, vitaeque humanae tanta est, si nulla Dei praecepta cogitarentur, nulla sceleribus intentata supplicia, tamen ob Reipub. incommoda diligentissime cuius legislatori, & magistratui cauenda, relegandaque sit. Corpora igitur infestat ebrietas, animos verò quid? Nempe nulla est morum corruptela maior. Audi, si vacat,

Basilium

Basilium in præclara de ista ipsa peste concione, Ebrietas, inquit, Dæmon est voluntarius ex voluptate animabus nostris inditus, ebrietas malitiæ mater est, virtutis inimica, fortem virum reddit ignaum, ex temperato facit lasciuum, iustitiam ignorat, prudentiam extinguir. Et post nonnulla, Quid opus est reliquam perturbationum cateruâ enumerare, morum peruersitatem, promptitudinem illam ad iracundiam, ad querelas, celerem ac repentinam animi ad omnia mutationem, strepitum multum, ac tumultum, facilem ad dolos deductionem, ad omnes iræ motus inconsiderantiam? Voluptatis verò incontinentia omnis ex vini fonte originem, vimque habens, præceps ad omnem impuritatem, atque intemperantiam ruit. Animalium omnium libidinum foeditatem superat, cum bruta naturæ leges in hoc genere noscant, atque obseruent: ebrij tantum in mare foeminam, in foemina marem quærunt, atque optant. Hæc Basilus, aliâque complura, quæ non augendæ orationis studio, sed quotidianæ experientiæ obseruatione prolata sunt. Obsidet hoc monstrum, atque infestat vniuersum terrarum orbem, verum nusquam grauius sæuit, quam inter hosce barbaros, apud quos ea est rerum omnium perturbatio, vt extremæ obscœnitates, & nefaria flagitia compotationis furore admissa in magna laude ponantur. Canitur more solemni, conueniunt sine vlllo discrimine omnis ætas, sexus, necessitudo: bibitur ad contentionem: dolia integra pene vno spiritu exhauriuntur: ducuntur choreæ perquam elegantes, saltitatur vsque dum Bacchus victos sternat: vigiliæ insania, atque petulantia

*Homil. in
Ebrietatem
et
luxum,*

tulanti libidine plenæ exiguntur : quidvis licet in quemvis, inuiolata lege compotationis. Hic quæ dedecora humani generis pudet referre. Non parçitur virgini, non defertur vel matri, nihil inter coniuges interest, furit etiam libido in viros, masculi in masculos turpitudinem operantur.

*In libr.
Nā Philo-
sophan-
dum sit
inter po-
cula.*

Gen. 19.

*Arist. in
Ethic.*

Lib. 22.

*con. Fau-
stum, c.*

*44. In
lib. de
Abrahā
cap. 6.*

*Arist. 4.
Ethic.*

Perfas compotationibus suis scorta tantum adhibere solitos Plutarchus refert, vxores nullo modo, quod dicerent, temulentiam fræna nescire. Ipse Loth vnus in vniuersa Sodoma iustus inuentus, ebrietate tamen victus filiarum incesta libidine non abstinuit, quid facient barbari? Quid meræ pecudes? Equidem assentior Pittaco duplices pœnas in ebrietate peccantes decerenti. Nam quamvis sciam Diuum Augustinum non incestum in Loth, sed ebrietatem culpa-re, Ambrosium quoque mitius in ebriorum crimina animaduvertere, tamen Philosophi sententiæ nemo repugnabit, qui per ignorantiam excusari peccatum negat, cum ignorantia ipsa, & scitur causa peccati, & nihilominus non cauetur, ne dum cum vel ob hoc ipsum placet, vt peccetur licentius. Ita prorsus res habet, consulto barbari temulentiam amant, tanquam libidinis omnis magistræ. Sunt verò Bacchanalia hæc, aut Orgia, aut Cibellia, aut Lupercalia, aut quovis nomine appellari malis, non annua vt apud veteres, sed menstrua, vel quotidiana potius. Nullus est mensis, qui ea celebritate vacet, nullus cætus cogitur, nulla res seria initur, non nubit filia, non parit pecus, non foditur ager, non Deo sacrificatur nisi ebrietate optima duce præcunte. Vna illa publicas, priuatâsque res ornat, & magnificentiæ,
&

& religionis argumentum. Misera prorsus stultorum hominum seruitus, qui cum ipsi natalibus parum à brutis absint, studio, atque opera omni contendunt, ut brutis quoque deteriores fiant. Mores quidem tales ebrietas efficit: Fidei verò ianuam intercludit, estque religionis Christianæ inter Indos hostis sæuissima. Præclare Beatus Ambrosius dixit, ebrietatem esse perfidiæ matrem continentiam Fidei, quod perspicuè docet sermo diuinus, Sedit, inquit, populus manducare, & bibere, & surrexerunt ludere. Quem ludum intelligat, quis ignorat? Vituli aurei adorationem explicant patres, & Paulus ipse, Neque idololatræ efficiamini, sicut quidam ex ipsis, sicut scriptum est, Sedit populus manducare, & bibere, & surrexerunt ludere. Certissimum est ebrietati esse sacrilegium plerumque coniunctum. Non ante Balthasar sacra vasa poposcit, ac profanè abusus est, quam temulentia imperauit, tum Deos suos cuique laudandi certamen exortum est. Reuera vinum, & mulieres apostatare faciunt etiam sapientes. Incredibili versutia Diabolus in hoc orbe omnem suum cultum ebrietate condiuit, omni vicissim ebrietati aliquid de suo cultu adhibendum docuit. Experientissimi morum Indicorum pro certo confirmant nullam esse paulo celebriorem compotationem, nullas vigilias statas, quiu peculiari superstitionis, & sacrilegij genere imbuantur: Huiusque sceleris obseruata est tanta calliditas, ut non aliter iam antiquum suum errorem & idololatriam tueantur, quam per occasionem solemnium compotationum, atque can-

*De Helia**& ieiun.**6.12.**Exod. 32.**1. Cor. 10.**Dan. 5.**Ecc. 19.*

tionum.

240 DE PROVVRANDA INDORVM
-tionum. Huc maximè spectat omnis eorum Ta-
qui, sic enim vocant celebres cantilenas inter po-
tandum potissimum adhiberi solitas. Ipso sacri
Parasceues magno die, quo Domini Iesu Christi
mortem Christiani pie colimus, Satanæ artificio
flagitiosissimi ludi ab ebrijs barbaris aguntur mo-
re solemni: quod tantum nostræ sanctæ Religio-
nis ludibrium etiam à baptizatis iam multis In-
dis, vt nobis viri fide digni narrarunt, occultè
quoad licet, frequentatur. Atque in hoc genere
sunt alia plurima veteranis magis comperta. Quã-
obrem sanctissimè est in Prouinciali Concilio in
hac vrbe celebrato decretum, vt eiusmodi com-
potationes tanquam idololatriæ fomenta sum-
ma diligentia excludantur, ac penitus exterminen-
tur: estque certa ac constans plurimorum senten-
tia frustra Indos Christianam Religionem doceri,
quandiu pestifera isthæc consuetudo inertis no-
strorum dissimulatione retinetur.

C A P V T X X I I .

*Quibus modis ab ebrietate Indi
compesci queant.*

VErum huic tam pernicioso malo & si non
dubitant omnes pij, & prudentes occurren-
dum esse, tamen quomodo occurratur, non est
omnium vna sententia. Sunt, qui non aliter ebrie-
tatem tollendam putent, quam vsu omni sicera,
idest Indicæ potionis exclusio. Id vt fiat grauissi-
mas

mas esse proponendas, & exigendas pœnas, si quis vel è fruge ea vina conficiat, vel confectis vtatur. Nisi enim materia omnis subtrahatur, nullo modo tantum incendium extinguere posse. Quorum vox nihil propemodum ab eorum sententia mihi abesse videtur, qui non ita pridem cum Romano Pontifice seriò agendum existimarunt, vt generali Ecclesiæ decreto vineæ omnes ab orbe Christiano extirparentur, relictis tantum in sacros vsus necessariis, quòd per vini immoderatam vim incredibilia mala dicerent euenire, idque in Septentrionalibus præsertim Europæ populis multis magnisq; documentis demonstrabant. Sed facile horum est explosa sententia. Neque enim vt scitè dixit Chrysostomus, vino, sed vinolentiæ, fræna adhibenda sunt. Eadem certè causa, & pecunias nullas esse iubeant, vt auaritiæ occurrant, & pretiosos pannos, vt fastus retundatur, & fœminas ipsas sepelire oportebit, ne libidine concitentur viri, quin potius oculos eruent, & linguam adiment, ne tanta peccemus. Omnino nihil est adeo sanctum, adeo bene prouisum diuinitus, quo non in perniciem suam abuti possit humana malitia. Et reuera sicut vinum decenter, & sobriè vsurpatum, & valetudini, & robori, & lætitiæ confert, quæ qui detrahit, iniuriam Dei prouidentiae facit insignem, emendare volens quæ ille sapienter fecit, ita planè siceræ Indicæ potiones utilitates habent non contemnendas, quas qui prorsus adimit, non mediocriter miseros premit. Nam & robustam, & salubrem, & assuefactis non iniucundâ esse siceram (sic enim iam dudum voco istam vulgarem Indorum potionem, siue Maicio, siue Cacao

*Chrysost.
hom. 31.
in 1. ad
Cor.*

Q. siue

siue quovis alio genere constet) nullo modo negare possunt, quicumque ista experti sunt, genus verò hominum inops, & tenue nullas alias delicias agnoscens, hoc vno adiumento priuare vel-
 le inhumanitatis est. Ergo non res in culpa est, sed
 modus quærendus est. Atque in primis quamvis
 sicera omnis non prorsus interdicenda videatur,
 tamen rectè admodum & sapienter Regio edicto
 cautum est, ne fucatæ illæ, & præpotentes po-
 tiones oppidoque damnosæ conficiantur, qualis
 ea est, quam nostri soram dicunt. Nam vbi non
 tam potum, quam ebrietatem quæri constat, iu-
 re optimo vitiosum potionis genus prohibetur.
 Hoc ergo excepto, non placet omnem potandi
 iucunditatem barbaris adimere. Sed si rectè con-
 cessa in ebrietatem conuertant, iam seueriore
 pharmaco putredo hæc resecanda est. D. quidem
 Augustinus valde in Africanas suæ ætatis compo-
 sitiones stomachans, consilium dat Aurelio
 Carthaginensi Episcopo, vt placidè, suauiterque
 ista emendare conetur, Non ergo asperè, inquit,
 quantum existimo, non duriter, non imperioso
 modo ista tolluntur, magis docendo, quam iu-
 bendo, magis monendo, quam minando, sic
 enim agendum est cum multitudine peccantium,
 seueritas autem exercenda est in peccata pauco-
 rum. Sic planè cum liberis, atque bene morige-
 ratis hominibus decebat Dei sacerdotem inge-
 nuè agere, & ratione magis, quam lege, doctri-
 na potius, quam potestate niti. Nam & nobiles
 Lacedæmonij ebrietatis remedium esse ducebant,
 ebriorum hominum spectaculum foedissimum
 conuiuiis suis proponere, vt in se discerent ea
 cauere,

Epist. 63.

*Plutar-
 chus in
 vita De-
 metrii.*

cauere, quæ in aliis tantopere abominarentur. At nostrorum barbarorum ebrietas longè alia via exterminanda est, quorum alij longè mores sunt, & ingenium natura ipsa seruire. Seruus verò, *Prov. 29.* vt dixit Sapiens, non potest verbis emendari, quod enim dicis, intelligit, sed obedire contemnit. Itaque & si exempla proponenda sunt, & si sacerdotales commonitiones, atque comminationes cessare non debent; tamen vt in vetustis vlceribus fit, asperiore medicamine sanies ista radenda est. Opus est potestate ciuili, opus est seria animaduersione in temulentos, ac nisi lege agatur, frustra surdis verba fient. Verum si putredo hæc ressecanda est, & tamen materia non demitur, quidnam remedij esse potest? Dicet quispiam. Audiui ex viro ornatissimo, eodemque totius rei Indicæ peritissimo plerisque videri difficilem, & permolestam eam cohibendi ab ebrietate prouinciam: sibi verò perfacilem, & iucundam. Cum me tantæ rei pollicitatione non mediocriter erexisset, subiecit præceptionem & mihi, & vt opinor, cuius prudenti valde probatam. Vituperabat ille eos, qui bibendi consuetudinem, aut ad certos calices definirent, aut priuatis mensis magnopere interdiceret. Censebatq; potius quandiu intra priuatos parietes priuatim ipsi biberet, etiam si fortassis excederent, vel dissimulandum esse, vel si proderentur, non admodum rigide excipiendum. At computationes publicas, statas, ac celebres, eas summis viribus esse exturbandas, ac profligandas, idque & expedire omnino, & factu non esse difficile. Vtriusque suæ assertionis causas afferbat egregias. Nam priuatim vniuscuiusq; per-

Q 2

putationem

*Prov. 30.
Epist. 63.
ad Aure-
lium.*

potationē infestē prosequi tum difficile est, quod latebras domesticas, atque horas importunas, & inusitatas varietates peruestigare nemo possit: tum verò nimis hoc arctum, & asperum est, ac meritò, verendum est, ne qui nimium emungit, eliciat etiam sanguinem. Quamobrem B. Augustinus quanquam ebrietati infestissimus, censebat tamen aliqua ex parte conniendum, sed feramus hæc, inquit, in luxu, & labe domestica, & eorum conuiuiorum, quæ priuatis parietibus continentur. Atque hæc quidem antiquis eam & robustis Christianis condonabat, barbaris & à patria superstitione recentibus, quique iudicio parum aduersus cōsuetudinem obistere queant, non minora certè condonaturus. Et si enim ebrietas per se quidem crimen est, tamen ob ea maximè vituperatur, quæ parit mala: quæ tamen in priuata mensa, neque ita multa, neq; adeo immania sunt. Nam tota illa incestuosa libido, illa sexus foedissima permutatio, mox cædes, truculentia, & quod est omnium caput, scelerata idololatriæ obseruatio, in priuata mensa ignorantur, vbi præter coniuges, vix est aliud? Quæ certè omnia in celebribus, & publicis compotationibus effusissimè sæuiunt. Imò vero horum causa licentius patratorum instituta sunt solemnī more conuiuia, quibus non solum licere sibi quidvis omnes intelligunt, verum improbissima quæque audere splendidum, & gloriosum putent. Ista ergo publica tollere penitus oportere dicebat, tum ob innumera, & grauissima damna inde vt à primo fonte manantia, tum ob pessimi exempli scandalum, quo Resp. tota labefactatur. Neque verò id esse arduum, & difficile,

difficile, non enim ita isthæc latere posse, vbi temulencia, & multitudine ipsa proditur, & temporum certa obseruatione deprehenditur. Quæ non differentis verba sunt tantum: sed res ipsa docuit expertum. Constituebat vir ille ex ipsismet Indis iudices, atque obseruatores, quibus negotium dabat; vt toto pomeridiano tempore conuentus omnes Indorum peruestigarent, si quem temulentia operam dantem offenderent, ad se se continuo deferrent, sin vel negligenter indagarent, vel inuentum scelus dissimularent, pœnas minabatur æcerbas non temulentis, sed obseruatori, qui non quæsisset, aut indicasset, negligentia, aut malitia conuictum obseruatorem pro concione semel, atque iterum mulctari iubebat, tertio opus non erat, tanto omnibus terrore commotis, vt deinceps in detegendis ebriis solertissimi essent. Iam verò cum obseruatorum cuiusquam industria delata esset ebrietas, eo conuolabat, recenti, ac flagranti delicto obnoxios capiebat: primum leuiore aliquo supplicio contentus, secundo, ac tertio augebat pœnas, aliquot ex primoribus verberatis, aut etiam crine detonsis, quod Indis acerbissimæ iniuriæ loco est. Affirmabat, cum Prætoris Cuzquensis munere fungeretur; quæ vrbs omnium caput, atque altera nostris Indis Roma fuit, breui iis artibus effecisse, vt ne vestigium quidem ebrietatis relinqueretur, in remotissimas quoque prouincias temperatiæ exempla à maioribus suis transmissa Indi cæteri sequerentur. Sed negligentia, & socordia successorum rem tantam excidisse, & ad pristina temulentia studia reditum esse. Idem; cum Chuquisacæ essem, suscepit me hortante;

pessimum illum morem abolere, Petiit vicissim &
 me, vt in concione ea de re verba facerem, reique
 fœditatem exprobrarem: ipse socium, quo ute-
 bar linguæ Indicæ bene docto, conuocata ad se
 Indorum concione legem de publicis compota-
 tionibus abolendis promulgare persuaderéque iu-
 bet: obseruatores deinde creat, quibus oppidi re-
 giones distribuit, se se certiores, nisi grauitè va-
 pulare malint, maturè facere imperat. Quid mul-
 ta? Semel deprehensa temulentia, vix secunda ani-
 maduersione opus fuit. Verum omnes isti cona-
 tus, nisi magistratus omnes conspirent, facile cor-
 ruunt. Reuera si qua decet constantia, & zelo,
 præfecti, atque ij, penes quos summa est, nego-
 tium persequerentur, poterat breui pestis hæc pro-
 cul exterminari. Plerique rei difficultates causan-
 tur, socordiam ignauiamque suam cum accusa-
 re potius ac dolere deberent. Quid verò ignauiam
 dico? De industria pernicies tanta conceditur,
 imò, verò appetitur propter priuatas nescio quas
 commoditates. Alij Indorum operas larga ebrie-
 tate concessa, sibi conciliant. Alij non solum bi-
 bere sinunt, verum ipsi quoque temulentiam pro-
 pinant. Complures officinam siceræ apud se ha-
 bent, publicæque coquunt, atque diuendunt, &
 apud se compotandi commoditatem offerunt.
 Neque tam turpis, infamisque quæstus pudet,
 neque siceram qualemcunque, sed furiosum il-
 lam soram lege contempta vendunt, gladium
 vtrò porrigentes insano. Atque hæc nostri Hi-
 spani factitant, lucrûmque eiusmodi ex anima-
 rum interitu etiam elegantiores religiosioresque
 captant, Quæ spes vltra restat infelicitium ho-
 rum.

rum salutis, quando ab iis venena porriguntur; à quibus erat antidotum expectandum? Vtinam terribilem irati Dei gemitum non audiamus, quem Propheta quidam scribit, Propinabatis, inquit, Nazaræis vinum, & Prophetis mandabatis, dicentes, Ne prophetetis. Ecce ego strido subter vos, sicut stridet plaustrum onustum fœno. Omnino Christus Deus noster suorum scelere, & parricidio premi videtur, sic enim peccantes in fratres, in Christum peccamus: Paulus neque manducare carnes, neque vinum bibere libenter suscipit, modo fratrum saluti consulat: nos vino etiam compositio fratrum animas enecare pergimus; ut lucrum vnde cumque radamus. Hæc tota populi Christiani ignominia, siue eo, quo diximus, modo, & industria; siue alijs artibus quæ ab alijs piè & fructuose excogitatae sunt, omnino releganda est per publicæ potestatis ministros, & diligentissimè danda est opera, ut publicæ saltem, atque sacrilegæ barbarorum temulentia, terrore, minis, poenæ acerbitate, modis omnibus propulsentur. Si enim sibi persuadere debent, nihil neque religionis, neque disciplinæ in Indorum animos influere posse, nisi omnium malorum fons ebrietas obstruatur.

Amos 2:

1. Cor. 8:

Rom. 14:

CAPVT XXIII.

De Prætoribus Indorum.

AD has igitur disciplinæ Indicæ seueriores leges exequendas, quoniam & necessariae

Q. 4. omnino

omnino sunt, & nisi seriò in prauaricatores animaduertatur, superuacaneus erit labor omnis, neque Sacerdotum est ita seuerè plectere, vt suo loco dicemus, videtur multis, mihi que ipsi perutile esse praeceptos, iudicésve peculiare dare. Cum enim à curia frequentiaque nostrorum Magistratum longius absint, pleraque oppida, nisi suos ipsi Praetores habeant, quos timeant, quos obseruent, facile aut delicta latebunt, aut impunita relinquentur, crescetque impunitate ipsa quidvis perpetrandi temeritas. Nam neque sacerdotalis officij est ista vlscisci, cum praesertim erit aliquid atrocius vindicandum, neque Patronorum curae tutò committi possunt, à quorum potentia, & iniuriis, vt defendantur, indigent saepè publica auctoritate. Itaque quod non ita pridem factitari coeptum est, vt certis Indorum prouinciis sui Praetores designentur, mihi non displicet, modò eo sint pietatis Christianae studio praediti, ea animi moderatione, vt merito religionem omni officio adiuturi videantur. Quorum tamen tanta est paucitas, vt vix eluceat, vtrum melius sit nullos Indis esse rectores, an tales esse, quales permultos cernimus, de quibus dictum videri queat, Quia cognoui multa scelera vestra, & fortia peccata vestra, hostes iusti, accipientes munus, & pauperes deprimentes in porta. Verum hominis ista sit culpa, non officij. Est enim perquam necessarium, primum ad legum custodiam, morumque correctionem, vbi vel bestiali flagitio praetemulencia peccatum est, vel frater à fratre violatus iniuria, vel ipse summus Deus sacrilega superstitione offensus. Deinde vt imbecillos à potentioribus tueantur,

Amos 5.

tueantur, Satrapas, Curacásque cohibeant, Patronos insolētius se se gerere ne sinant, iniusta, & dura seruitia non ferant. Mox vt disciplinæ ciuili humanóque conuictui assuefaciant, vt perditorum Hispanorum Indos deprædantium faciem auerant. Postremò, vt quæ erunt publicæ vtilitatis officia ab iis curanda, ne prætermittantur. Atque eo munere fungentem remunerari par est, idque ipsorum Indorū censu persolui non est iniquum. At illud perspicendum, an, quæ Patronis tributa pendantur, ad ista quoque sufficiant. Ob eam enim causam solui diximus, quòd Rex tueri subditos, & iustitia regere debet. Viderint ergo qui nouis ad ista prætoriana officia pensionibus Indos grauandos putant, an satis in tuto Patronorum res sint, qui cùm tanta emungant, parum ipsi, aut nihil ciuilis administrationis clientibus præstant. Hunc de præfecturis Indicis locum antequam præteruehar, admonendi sunt præfecti ipsi, ne tam se iudices, quam parentes exhibeant, neque prorsus solita in cæteros seueritate vtantur. Pueris se potius ludi magistros, quam forenses iudices cogitent. Neque iuris illa stricta norma vbi que seruāda, sed strepitu omni remoto, ex æquo & bono plerumque iudicandum, id quod etiam salutariter edicunt Regiæ leges, quæ scripta, & rescripta ferè adimunt, & pretium, si quo horum opus sit, accipere vetant. Causas more patrisfamilias componere, & pro arbitrato agere, sæpe tutius, atque commodius, nisi atrox aliquod facinus accidat, quod rarum est, cum pleraque nugarum, & puerilium concertationum similia sint. Qua in re illud viris grauibus vehementer displicere animaduerti,

animaduerti, quòd ab Indis testimonium iureiurando exigitur, cùm constet eos facillime peierare, vtpote qui, neque ipsius iuramenti vim sentiant, neque veritatis studio tangantur, sed testimonium eo modo dicant, quo credunt iudici gratissimum fore, aut à primo quoque suæ factionis homine edocti sunt. Hos igitur iurare compellere, & ipsis exitiosum est propter infinita, & quotidiana periuria, & causæ ipsi valde incommodum, cum firmitudo veritatis nulla speretur. Multorum ergo sententia est in Concilio Provinciali edici oportere, ne ab Indis iurisiurandi religio flagitetur, idque lege lata caueri debere. Etenim si pueri & infames à testimonio dicendo, à iuramento interponendo iure arcentur propter iudicij infirmitatem, falsitatisque suspicionem, cur obsecro Indi non longius amandandi sunt, quorum perspecta est plusquam puerilis inconstantia, & veri omnino contemptus? Quod cum experti satis essent Apostolici Inquisitores statuerunt, vt nobis aliquando dixerunt, Indi cuiusvis testimonium non esse prò integro accipiendum, imò ne iuramento quidem vt testem vrgendum, sed iudicij loco habendum, si quid detulerint, perinde atque à puero quopiam, aut homine semiinsanores diceretur, quod ad inuestigandum quidem moueat, sed ad credendum minimè persuadeat. Prouidenter sanè & magna æquitate decretum, vt omnia sacri illius tribunalis. Quod si plerásque controuersias nisi iuramento interposito iuxta Paulum Apostolum non posse finiri contenderis, equidem causas ipsorum inter se ordinarias dixi supra velut à ludi magistro potius quam à forensi prætore

*In Conc.
Turon.
cap. 34.
Summo-
pere, id
cautum
est.*

Hebr. 6.

prætores transigendas. Extraordinarium verò, & atrocius cum quippiam emerferit, lege decernitur, quo ordine agendum sit. Neque enim omnem pedem idem coturnus decet, neque verò leges Romanæ, & sacræ in omni causa æquè testimonia omnium vel repudiant, vel admittunt.

CAPUT XXIV.

*Mores Indorum Christo non repugnantes
permittendos esse, & de concordia
Prætoris cum Sacerdote.*

CHRISTIANIS moribus, disciplinaque nostra sunt quidem barbari paulatim imbuendi, omnes verò sacrilegæ superstitionis, aut barbaricæ feritatis ritus sensum amputandi: attamen si qua in re illorum mores à religione, & iustitia non discrepant, non existimo facile immutandos, sed patrias, ac gentilitias consuetudines ab æquo non abhorrentes retinendas esse, secundum eas ius dicendum, quemadmodum Indici senatus Regia decreta continent. Qua in re valde peccatur à multis vel propter ignorantiam municipalium observationum, vel ob nimium, & præmaturum communicandi nostra feruorem. Hic non morabor Plutarchi philosophi illustre præceptum de gubernanda Rep. apponere. Vertere se ad mores civium cognoscendos oportet, atque eorum penitus exploranda, atque tractanda ingenia. Etenim statim mores, & ingenia conari mutare populi;

*In Politi-
ca ad
Traia-
num.*

populi, nouisque ea legibus moderari extemplo velle, non modo non facile, verum ne tutum quidem omnino est, vt res quæ multo tempore, & ingentibus viribus indiget. Simile ducit ex vino perpulchrè, quod initio, bibentis arbitrio regitur, mox sensim calefaciens hominem commutat, & vertit ad se. Quamobrem multa dissimulanda sunt, nonnulla etiam laudanda: quæ tenacius hærent, & perniciosius lædunt, ea dexterritate quadam in bona similia commutanda. Cuius rei authorem Iululentum Gregorium magnū profero, qui rogatus ab Augustino Anglorum Archiepiscopo in simili causa, ita scribit Mellito, Dicite Augustino Episcopo, quod diu mecum de causa Anglorum cogitans tractaui, videlicet quia fana idolorum destrui in eadem gente minimè debeant, sed ipsa quæ in eis sunt idola, destruantur; vt dum gens ipsa eadem fana sua non videt destrui, de corde errorem deponat, & Deum verum cognoscens, & adorans ad loca, quæ consuevit familiariter recutat, Et qui boues solèt multos in sacrificio dæmonum occidere, debet his etiam de hac re aliqua solemnitas immutari, vt die dedicationis, vel natalitijs Martyrum tabernacula sibi circa easdem Ecclesias, quæ ex fanis commutatæ sunt, de ramis arborum faciant, & religiosis conuiuiis solemnitatem celebrent. Nec Diabolo iam animalia immolent, sed ad laudem Dei in esu suo animalia occidant, & donatori omnium de satietate sua gratias agāt: vt dum eis aliqua exterius gaudia reseruantur ad interiora gaudia consentire facilius valeant. Nam duris mentibus simul omnia abscindere impossibile

*Lib. 10.
Regif.
ep. 71.*

bile esse non dubium est: quia is, qui locum summum ascendere nititur, gradibus vel passibus, non autem saltibus eleuatur. Cuius etiam documentum exemplum profert in Israëlitico populo Ægyptiorum sacrificijs assuefacto, quem Dominus ab idolorum cultu reuocans, sacrificia vni Deo de pecudibus offerri imperauit. Quæ eo sunt fusiùs repetita, quo perspicua magis res fiat non solum præcepto Gregorij, verum etiam exemplo de bobus conuiuio mactandis, quos idolis suis sacrificare consueuissent. Quo planè modo conuiuia, & comotationes aliquando publicæ permitti barbaris possunt, ita dumtaxat vt in foro, quemadmodum Ingarum leges habebant, edant & bibant, vbi ebrietatis illa effusio non ita timenda est, cum testes habeat: ac vindices oculos nostrorum omnium. Denique quæ concedenda, quæ toleranda, quæ contrà commutanda, aut nullo etiam modo ferenda sint, dictabit abundè charitas Christi cum prudentiæ moderatione coniuncta. Superest tantum, vt ciuilem omnem potestatem admoneamus, vti in administranda Rep. Indorum cum Ecclesiastica germanè coniungatur, sitque Prætor Sacerdoti, quod Samuëli David, quod Hieremiæ Iosias, quod Esaïæ Ezechias, quod Syluestro Constantinus, quod Theodosius Ambrosio. Facile quidvis perficietur, si gladius vterque consenserit, ac vaginam eandem induerit. Contra, nihil ita perturbat, labefactat, euertitque religionem, morumque doctrinam, ac mutua inter sacrum, profanumque contentio. Scriptum est, Vnus ædificans, & alter destruens, quid proficit eis nisi labor? Et rursus, Non est dissensionis

Eccel 34.

1. Cor. 14.

1. Cor. 11.

Matt. 18.

1. Cor. 16.

Ephes. 4.

Phil. 2.

1. Cor. 10.

sionis Deus , sed pacis , Et alibi , Si quis videtur contentiosus esse , nos talem consuetudinem non habemus , neque Ecclesiæ Dei. Et væ certè est illi , qui vnum scandalizauerit ex his pusillis , qui credunt in Christum. Omnia ergo in charitate fiant , omnia secundum ordinem , omnia in vinculo pacis. Nihil per contentionem , neque per inanem gloriam. Non quæ sua sunt , singuli considerantes , sed ea , quæ aliorum. Et si sunt igitur officia distincta , & neque sacerdotem decet arma tractare , neque iudicem sacrificia offerre , tamen idem animus , mens eadem , idem perducendi omnes ad Christum studium. Itaque sibi mutuo adiumento vt sint , omnibus modis curandum est : atque alter quidem in iis , quæ ad Deum , alter in iis , quæ ad homines magis occupatus vterque Dei oues pascant , & salutem suorum quærant , non quærentes quod sibi vtile est , sed quod multis , vt salui fiant.





DE PROCVRANDA INDORVM SALVTE.

LIBER QVARTVS.

*Qualem oporteat esse ministrum salutis
Indorum, quibus Præsidijs hanc
prosequi debeat.*

CAPVT PRIMVM.

Excellentia Sacerdotalis officij.



VANQVAM omnis sermo diuinus sacerdotalis officij commendatione plenus est, tamen nusquam vel copiosius, vel breuius Euangelici doctoris magnitudinem edocemur, quam vbi ipsum sapientiæ fontem Dominum Iesum Christum audimus novos suos discipulos alloquentem, atque in his numerosam horum posteritatem instituentem. Vos, inquit, sal terræ, vos estis lux mundi, ita omnem ad virtutem capefendam, ac regnum cœleste obtinendum vim admirabili

Math. 9.

mirabili breuitate complexus. Quæ enim duo, bono expetendo, ac persequendo necessaria sunt, & quorum vtrumvis si absit, difficultate vincamur, nempe vt bonum ipsum non lateat, tum verò vt delectet, quemadmodum Augustinus optimè vidit, quorum vtrumque Dei ipsius est proprium, qui & lux est vera illuminans omnem hominem, & omnem suauitatis fontem in se vno continet, ea in suos ministros deriuat, magnificèque communicat: vt tum splendore doctrinæ illustrandas hominum mentes à se intelligant, tum vitæ, morumque condimento auersa, ac veluti stomachantia mortalium studia non solum virtutis fastidio leuent, verum etiam propensius excitent. Itaque quod veteri prouerbio tritum est, sole, & sale nihil esse vtilius hominibus, id in Euangelico sacerdotio veritatis suauitate percepta, atque gustata situm esse nemo non sentit. Quam sui muneris excellentiam tanti facit Apostolus Paulus, vt datâ sibi gratiam ad illuminandas gentes, & prædicandas inuestigabiles diuitias Christi, toto orbe sole clariorem ostendat, tenebras noctemque omnem procul depellens, tum se formam, atque exemplar publico spectaculo proponat, ita alios sui imitatores esse cupiens, vt ipse sit Dei. Salis nimirum copiose functus officio laboribus, sudoribusque consumptus, vt diuinum saporem alijs impertiat. Nisi enim liqueſcat, & à se deficiat quodammodo, cætera condire sal nequit. An vero quisquam aliud quam salem cogitet, cum audit illa dicentem? Puto quod Deus nos Apostolos nouissimos ostendit tanquam morti destinatos, quia

spectaculum

*De Nu-
prijs &
concupis.
Ioan. 1.*

Ephes. 3.

1. Cor. 11.

Phil. 3.

1. Cor. 4.

spectaculum facti sumus mundo, & Angelis, & hominibus. Nos stulti propter Christum, vos autem prudentes in Christo, nos infirmi, vos autem fortes, vos nobiles, nos autem ignobiles, usque in hanc horam, & esurimus, & sitimus, & nudi sumus, & colaphis cædimur, & instabiles sumus, & laboramus operantes manibus nostris, maledicimur, & benedicimus, persecutionem patimur, & sustinemus, blasphemamur, & obsecramus, tanquam purgamenta huius mundi facti sumus, omnium peripsema usque adhuc. An non hîc liquescit, & totus à se deficit Paulus, ut Iesu Christi gustu auditores sectatoresque suos imbuat? Quid illud? Etsi immolor supra sacrificium

fidei vestræ, gaudeo & congratulor omnibus vobis, idipsum autem & vos congratulamini mihi. An & illud non est mente propemodum excidentis, Cupiebam ego ipse anathema esse pro fratribus meis? Fratres in locum suum apud Christum subrogari præ charitatis magnitudine exoptant, ut nobilissimi Græcorum volunt. Ac certè quandiu hæ lucernæ in candelabro Ecclesiæ illuxere, copiosa in domum Domini confluentium turba introitum patefactum, expeditumque habuit, quandiu hæ ciuitates munitæ à Domino in monte positæ steterunt, bellantium aduersus Christum machinæ, tormenta, visque omnis euauit, ac iuxta Prophetam, nullo modo præualuit, sed refugium potius præsidiumque hominibus imbecillis contra omnes hostiles iniurias conspicuum vndique ac tutissimum reddiderunt, quandiu denique, & in morden-

*Phil. 2.**Rom. 9.**Greg. Nazian. in Apologotico.**Chrys. in l. de compun. cordis, &**Hom. 1. de Laudibus Pauli, & 2.**& 6.**Hier. 1.*

- probatum animi moribus salis naturam exhibuerunt, & sanati mortales, à mortēque ipsa vindicati, & Christum tanta gratia sapiebant, vt pro eo extrema perpeti gloriæ ducerent summæ. Tum sanè illa Dominus de suo Sacerdote libenter
- Mal. 2.* commemorabat, Pactum meum, inquit, fuit cum eo vitæ & pacis, & dedi ei timorem, & timuit me, & à facie nominis mei pauebat, lex veritatis fuit in ore eius, & iniquitas non est inuenta in labiis eius. In pace & in æquitate ambulauit mecum, & multos auertit ab iniquitate, labia enim Sacerdotis, inquit, custodiunt scientiam, & legem requirent de ore eius, quia Angelus Domini exercituum est. Talis dum fuit Sacerdos Domini, tanta sanè, ac talia præstitit,
- Matt. 5.* lux enim mundi, sal terræ. At si sal euanuerit, quid sequitur? In quo salietur? Ad nihil valet vltra, nisi vt mittatur foras, & conculcetur ab hominibus. Si in alios is esse desinat, qui iubetur, cæteros quidem vtilitate sua priuat, cæterum ita se ipse perdit, vt irrecuperabilis sit habenda quodammodo eius salus, & desperanda curatio. Neque in sterquilinum tantum projicitur, sed hominum quoque hinc pedibus proculcatur. Quam aptè propheticus ille sermo statim
- Mal. 2.* Euangelica ista subtexuit. Vos autem, ait, recessistis de via, scandalizastis plurimos in lege, irritum fecistis pactum Leui, dicit Dominus exercituum. Propter quod & ego dedi vos contemptibiles, & humiles omnibus populis, sicut non seruastis vias meas, & accepistis faciem in lege.
- Esai 19.* Infinitum esset cætera persequi, quæ contra hos
- Zach. 11.* fatuos Principes Tanaos, contra Pastores stultos,
- vel

vel potius idola pastorum, contra se ipsos potius
 pascentes, contra vāsanos Prophetas, contra Sa-
 cerdotes contemptores, atque arrogantes, contra
 stercus solemnitatum, contra popularis plausus
 captatores, contra inexplebiles pecuniæ gurgites,
 cæterasque pestes Propheticus sermo declamat.
 Vix aliās sancti Patres plenioribus velis feruntur
 in pelagus, quam cū de Sacerdotali contumelia
 oratio est. Gregorius certè vterque, & Romanus,
 & Nazianzenus, tam disertè, & copiose, vt nihil
 suprā. Huius Apologeticum, Pastoralem illius ne-
 mo est, qui sine summa trepidatione legere queat,
 modo sensus aliquid habeat. Augustini iam pres-
 byteri plenos dolore gemitus ad Valerium Epis-
 copum suum quis sine pudore vsurpati à se nomi-
 nis Sacerdos audiat? Cunctationem recusatio-
 nemque Sacerdotij apud Ioannem Chryso-
 stomum quis si virum inspiciat, non miretur? Sin ora-
 tionis vim totis quatuor libris attendat, non as-
 sentiatur? Quid Hieronymi nimia pene modestia,
 atque humilitas Epiphaniij literis contestata, qui
 diu à tremendo altaris mysterio celebrando ab-
 stinuit, idque cum in monasterio versaretur, in
 quo multitudo fratrum nullum alium presbyte-
 rum haberet, excepto Vincentio, qui eadem vere-
 cundia né ipse quidem sacra faciebat? Verum ni-
 si fallor hos omnes sicut antiquitatis autoritate,
 ita orationis sublimitate, & grādiloquentia quadā
 superare videtur Dionysius magni Præceptoris
 magnus ipse discipulus. Is in epistola quadam ad
 Demophilum indignos munere suo Sacerdotes
 his verbis obiurgat, Si igitur quæ illuminat, Sa-
 cerdotum est sancta distinctio, proculdubio ille à

Ezech. 34

Soph. 3.

Mal. 2.

Eccl. 3.

Hier. 5.

Mich. 3.

Epist. 148

In lib. de
Sacerdo-
tio.In epist.
sol. ad
Ioannem
Hierosol.
traducta
ab ipso
Hieron.

Epist. 8.

ad De-
mophilum
Monachum.

Sacerdotali ordine, & virtute omnino prolapsus est, qui illuminans non est, multoque sanè magis qui neque illuminatus est. Atque ut mihi quidem videtur, audax nimium huiusmodi est, si Sacerdotalia munia sibi assumit: neque metuit neque veretur ea, quæ sunt diuina præter meritum persequi, putatque ea latere Deum, quorum sibi ipse conscius sit, & se Deum fallere existimat quem falso nomine appellat patrem, audetque scelestas blasphemias suas (neque enim preces dixerim) facris aris inferre, easque super signa illa diuina ad Christi similitudinem dicere. Non est iste Sacerdos, non est, sed infestus, atrox, dolosus, illusor sui, & lupo in Dominicum gregem ouina pelle armatus. His plura aut maiora de Euangelici ministerij, & culmine, & præcipitio qui expectat, cuique ad resipiscendum non ista sufficiunt, infatuatum se iuxta Domini sententiam, & nullo vquam sale saliri posse demonstrat,

Mat. 5.

C A P V T II.

*Inter Indos maxime Sacerdotes
prestare oportet.*

AT vulgaris est, inquiunt, isthæc Sacerdotalis officij commemoratio, vetus ista querela est, quam declamas. Est ita sanè, non dissentior. Verum nusquam æquè necessaria commonefactio, à nemine magis excellentia illa flagitanda, quam ab eo, qui animas verbo Dei lucrificiendas Christo suscepit,

suscepit, & animas infidelium, idque apud Indos,
 hoc est, ubi adiumenta habiturus sit pauca, impe-
 dimenta quàm plurima. Vbi quo præclarius opus
 aggreditur, tanto in maiore periculo versatur, ne
 dum quærit alios, ipse pereat, imo verò ne & se, &
 alios perdat, quod utinam non tam verè, & crebro
 usurparet sermo diuinus; Laqueus ruinæ populi
 Prophetæ. Utinam væ illud ex ore veritatis non
 audiremus. Væ vobis qui tulistis clauem scientiæ,
 ipsi non intratis, & introeuntes non finitis intra-
 re. Etenim vbinam gentium illa verius Zacharias
 proficere possit ignoro. De pecoribus occisionis,
 quæ qui possederant, occidebant, & non dole-
 bant. Et vendebant ea dicentes, Benedictus Do-
 minus, diuites facti sumus, & pastores eorum non
 parcebant eis. Quis verò non sanctas istorum vo-
 ces audit, cum Deo grâtiâs agunt, quod de Sacer-
 dotio, & doctrina Indorum ditati ad patriam ar-
 gento onusti remeant? Et dicentes, Benedictus
 Deus, diuites facti sumus, non tamen parcunt gre-
 gi, ut ait sermo diuinus. Sed vomunt aliquando,
 quæ male glutierunt, & gement, qui nunc trium-
 phant. Vox ululatus pastorum (ita enim sequitur)
 quia vastata est magnificentia eorum, vox rugitus
 leonum. Et ego non parcam, ait Dominus, super
 habitantes terram. Tota ergo desolatio terræ inde
 profectò venit. Propter nefaria admissa Ophni &
 Phineës, ipsi quidem intereunt, populus autem
 sanctus turpiter tetra vertit, & quod est dolen-
 dum, arca Dei ab hostibus capitur, & ludibrio ha-
 betur. Quærit Dominus virum, qui stet oppositus
 pro domo Israël, nescio an inueniat. Pastores, in-
 quit, stulte egerunt, & Dominum non quæsierunt,

Ose. 9.

Matt. 23.

Zach. 11.

Zach. 11.

1. Reg. 4.

Ezech.
22.

Hier. 10.

R 3

propterea

propterea non intellexerunt , & omnis eorum grex dispersus est. Nulla ergo alia causa quærenda est , cur Domini greges in his saltibus dispersi erent , quam verorum pastorum magna penuria in tanta mercenariorum minimè lupos arcentium copia. Neque frustra Paulus cùm de prædicando

1. Tim. 2. Euangelio præcepta dat , Timotheum dilectum monet, sollicitè cura te ipsum probabilem exhibere Deo, operarium inconfusibilem, rectè tractantem verbum veritatis. Sunt enim operarii mali, subdoli, qui non tam Christo seruiunt, quam suo

Phil 3. ventri. Hi multi & multiplices nomine pastores,

2. Cor. 11. reuera versipelles lupi demoliti sunt vineam Do-

Rom. 16. mini Sabaoth , cauponantes verbum Dei secundum Apostolum , qui magnitudinem Evangelici prædicatoris admirans, & pondus Apostolici officij expendens vehementer exclamat, Et ad hæc

Hier. 11. quis tam idoneus ? Verè enim Apostolicos homines postulat Apostolicum munus , Crucem Iesu Christi & verbis , & factis annuntiandi , & in illius obsequium orbem vniuersum redigendi. At nos aliter censere solemus. Et ad hæc quis non idoneus ? Ad Indos docendos quis non sufficit, etiam si literis vacuus , etiam si moribus non ornatus ? Quo minus mirandum est, si vbi sementis faciendæ cura contemnitur, nullus ibi , aut rarus fructus appareat. Mihi sanè iam dudum certa, & fixa sententia est , Indicæ Messis inopiam operariorum vitio , non telluris sterilitate contingere.

CAPUT III.

Contra eos, qui Indorum tarditatem accusant.

NEque eos audiendos puto, qui quam in se deberent agnoscere, ac dolere culpam, in ludos rejiciunt, illorum ingenia nusquam non vituperantes, nosque dum contra asserimus, rudes rerum, imperitos, tyrones, infantes clamant, qui inepta quadam pietatis specie facile decipiamur: se veteranos, expertos, scientes, facto periculo, certa, & explorata proferre. Qui mihi *2. Reg. 18* Sibæ illius, quem Regum historia narrat, calliditatem imitari videntur, qui claudum Miphibosetherum suum, dum pro se non potest occurrere, & serui commenta diluere, accusans, prodicionem suam in illius criminationem vertit, atque hoc astu eum de omni fundo depellere pergit. Sed *Psal. 148:* Dominus erigit elisos, & soluit compeditos, & illuminat cæcos, pupillum & adueniam ipse suscipiet. Accusant igitur Indorum tarditatem ad capienda Fidei mysteria, obtusos esse, hebetes, truncos, qui nihil præter sua farra, cibosque crassos cogitare queant, ad cœlestia, & spiritualia cognoscenda stupidi, brutique sint. Frustra in iis edocendis tempus teri, denique post annos iam quadraginta ab Euangelij ingressu in tam imensa turba vix quenquam reperiri, qui symboli duo capita intelligat, quid Christus sit, quid vita

æterna, quid Eucharistia, vel crasse agnoscat. Pecudes potius habendos, quam homines. Verum qui ista iactant, respondeant mihi velim, qua diligentia, qua industria, qua constantia istos ipsi erudierint, aut ab alijs eruditos norint. Recitatur bis terte in hebdomada symbolum, idque Hispanico idiomate, cæteræque orationes eodem modo: iubentur deinde Hispanica isthæc ediscere, ac memoriter recitare, quorum ne syllabam quidem intelligunt, & pronuntiant ridiculè. Vulgaris, ac tritus doctrinæ tradendæ iste est modus. Hucusque Evangelici Catechistæ cura se porrigit. Vbi elegantius exquisitiusque res agitur, procedit eatenus, vt sermone Indico composita quædam in Catechismi formulam pueri recitent, quæ ipse Sacerdos ne attingit quidem, plerumque quia haud intelligit, quippe cum præter paucas voculas ad seruitia imperanda, cibosve petendos, linguæ Indicæ prorsus sit infans. Quod si peritus sit, quod rarum est, mysteria fidei, & regulas neque explanat, neque verò satis nouit, inepta quædam & frivola concionatur, vt mentam belli tempore dicas, si qua fortè attingit, ita alienè, ita parum auditorum sensibus accommodatè, vt nihilo magis intelligantur. Quis verò vnquam Catechista rationem auditorum exegit? Quis interrogando ex ignotis nota fecit? Quando Indus audiuit à Sacerdote suo, Heus tu fac memineris à me dictorum, pensum hoc in triduum tibi tribuitur, vt Christum, quem nos Christiani adoramus, quemque illic imagine expressum vides, & Deum esse scias regnantem in cœlo, ex omni æternitate, & hominem factum in terris propter donandum nobis

nobis regnum cœlorum. Si rectè responderis, laude, & præmio afficeris, sin perperam, publicè lues? Quid simile vnquam factitatum? Denique perinde Indis doctrina traditur, atque cum à mendicis stipis colligendæ causa preces, aut, versus aliqui cantillantur, qui illud tantum spectant, vt dicendo ipsi ad finem vsque perueniant carminis, vtrum verò auditores, vel attendant, vel delectentur, pecunia iam accepta, non admodum curant. Tota ergo catechizandi ratio vmbra-tilis est, & ludicræ similis. Ego verò si homines ingenio acerrimo, & discendi percupidi tales præceptores nacti essent, nihil aliud quam vt duplo ignorantiores euaderent, doceri isto modo arbitrarer. Olim in symbolo addiscendo, & intelligendo mysteriisque Fidei agnoscendis viri ingenio præstantes, & literatura celebres diu in Catechumenorum ordine tenebantur, cum Ecclesiastica disciplina vigeret, neq; ante ad Fidei Sacramentum admittebantur, quam multas ab Episcopo de symbolo conciones audissent, diu & multum cum Catechista contulissent, post quas omnes curas, & meditationes, magnum erat, si recta sentirent, consentanea responderent, quod religionis nostræ mysteria altissima, vt re vera sunt, ac difficillima intellectu haberentur: & nos valde supini, atque oscitantes grauitè Indos vituperamus, tardos, ac stupidos criminamur, quòd ea non teneant, quæ neque tradidimus ipsi, neque ab alijs illi accipere potuerunt, sublimia præsertim, & ab eorum sensu & consuetudine longè remota? Alioquin si tanta istorum est hebetudo, tam obtusum ingenium, quid causæ est, quod Fidem à nobis cum non didice

*Polus in
Prol.*

didicerint, didicerunt tamen alia tam multa, tam
difficilia, ipsis omnino antea inaudita, idque tam
probè, vt cum nostris certare queant? An non
musicos modos, & numeros tum voce, tum tibijs,
& plectro passim perquam concinnè reddentes
Indos audimus? Quidam etiam componentes pe-
ritos cantus Magistros videmus? An non Ecclesia-
stica officia peragere ritè solent? Scribendi, pin-
gendi, & quidvis fingendi alios aliàs artifices quis
ignorat? Quid quod lites ipsi, & intendere, & de-
pellere mirè iam norunt, cum heris vt suis sæpe
contendere, interdum etiam superare videamus?
Quæso vnde artes istas hauserunt? A quibus didi-
cerunt? An ad ista omnia ingeniosi & prompti, ad
sola salutis suæ necessaria documenta inepti, & tar-
di? An potius si quam in istis humanis magna
etiam ex parte non necessarijs curam vigilantiam-
que præstituerunt nostri, parem in doctrina Fidei
tradenda præstitissent, non ita tardos discipulos
offendissent, non ita ignaros reliquissent? Equidem
sic opinor, neque ab ea opinione auelli vnquam
potero; quin pessimo præceptor, omnes esse audi-
tores hebetes credam. Certè huius Regni Piru
multo maximam partem diligenter lustraui, & vt
de cæteris Indorum nationibus nihil modo pro-
nuntiem, hos ingenij expertes nullo modo prospe-
xi, quin magna ex parte subtile, acutos, quidvis si-
mulandi, ac dissimulandi non imperitos artifices.

CAPVT IV.

Contra eos, qui peruersitatem morum Indorum Fidei non receptæ causam asserunt.

ID ita habere cum plerique fateantur, tamen ab Indorum accusatione non recedunt: sed alia ex parte eos adoriuntur, ut ignorantiam non suo, sed istorum vitio tribuendam probent. Aiunt acutos quidem esse neque ingenij expertes: verum natura prauos, ad malum procliuēs, boni omnis hostes, sapientes, ut faciant malum, bonum autem facere nescire: tanta peruersitate salutaria sibi fastidire, ut non solum ad intelligendum, & discendum nihil laborent, sed etiam statim respuant, atque auersentur, ita nihil illis hærere memoriæ, nihil intelligentia percipi, propterea quod voluntate ad Christiana omnia alienissima sunt. Argumento esse manifesto, quod Christianorum consortia diligenter euitent, ad Ecclesias non nisi inuiti cœant, patres spirituales suos, si paulò accuratius eorum mores emendare pergant, conspiratione facta per falsas criminationes ad se depellant, nihil pium, & salutare nisi per vim agant, præsentem tantum Sacerdote Christianos se simulent: clanculum ubi datur facultas, auitas superstitiones studiosissimè obeant. Denique ipsos cultiores, & elegantiores inter nostros nutritos, quos Ladinos appellare

Hier. 4.

84p.12.

Matt. 9.

pellare solemus, quos oportebat magis Christianis moribus pollere, decuplo cæteris esse peiores, cuiusvis sceleris egregios fabricatores. Pueros, qui ad speciem pijs, probique sint inter nostros, ubi primum se ad suos receperint, ne gustum quidem probitatis vllius præferre, sed cæteris grauiora audendi duces esse, & Magistros, ut in istos omnes vetus condemnatio permanere videatur, Quoniam nequam est natio eorum, & naturalis malitia ipsorum, & non potest mutari cogitatio eorum in perpetuum. Atque hæc sanè differunt non ij solum, qui negligentia, ac somno suo præferre excusationem vndecunque velle videntur, verum etiam homines pijs, religiosi, non indiligentes, & qui pro longo rerum usu eximiè ista callere existimantur. At nisi ego vehementer fallor, horum quoque oratio magna ex parte aberrat à vero. Non enim ideo Euangelium ab Indis receptum non est, quia illorum mores pravi sunt, sed ideo potius moribus pravis sunt, quia Euangelium non receperunt. Prudenter, & verè quidam nostrum scripsit Pater non videri sibi ad Indorum horum animos penetrasse Euangelium, sed ad speciem tantum receptum: neque enim fieri posse, si in intimis sensibus radices egisset, quin copiosos, manifestosque fructus cerneremus. Quid enim potentius verbo Dei? Quid ad immutandos homines efficacius? An est vlla tanta peruersitas morum, quam non emendet spiritus Christi? An est vlla tam effusa barbaries, tam horribilis feritas, quam non domet, ac mansuefaciat lex gratia, si penitus animo admittatur? Certè Dominus vocare venit peccatores non iustos ad pœnitentiam

rentiam. Opinor Paulum ijs prædicasse, quibus dicebat. Et hæc quidem fuistis, sed abluti estis, sed *I. Cor. 6.* sanctificati estis, sed iustificati estis in nomine Domini nostri Iesu Christi, & in spiritu Dei nostri, obsecro, quænam intelligit, cum dicit, Hæc quidem fuistis? Non solum egistis, verum etiam consuetudine in illa veluti versi eratis. Quæ illa? Relege superiora. Nolite errare, neque fornicarij, neque idolis seruientes, neque adulteri, neque molles, neque masculorum concubitores, neque fures, neque auari, neque ebriosi, neque maledici, neque rapaces regnum Dei possidebunt. Et hæc, inquit, fuistis. Non video quæ his horribiliora nostris barbaris obijci possint. Et tamen ex illis facibus, ex tanta sentina mundauit Dominus *Tit. 2.* sibi populum acceptabilem, sectatorem bonorum operum, In ouili Dominico Leonem, & Pardum, & Vrsum simul cum oue, vitulo, & agno futuros, & omni feritate deposita eodem pabulo pascendos diuinus Propheta describit. Quin etiam *Esai. 11.* venenosas omnes bestias lusu potius, quam horro-
 ri futuras, cum primum paruuli manum senserint. Et delectabitur infans ab ubere super foramine aspidis, & in cauerna reguli, qui ab lactatus fuerit, manum suam mittet. Non nocebunt, & non occident in vniuerso monte sancto meo, quia repleta est terra scientia Domini, sicut aquæ maris operientes. Huic igitur salutari aquæ diuini sermonis, huic lauacro purissimo, & fecundissimo nulla est tam pestilens plaga, quæ non cedat, modo vim illius admittat. Et qui stat in signum populorum, ipsum gentes de- *Ibid.*
 precabuntur. Et mox post pauca, Et lenabit signum

num in nationes, & profugos Israël congregabit, tanta ferarum, & venenatorum commemoratione quid aliud significat Spiritus Sanctus, quam nullius nationis, aut gentis quamvis noxios, quamvis malignos mores Evangelicæ gratiæ obfistere posse, sed cedere, cum primum illius Parvuli de radice Iesse signum acceperint, vimque persenserint? Hoc tam illustre & Apostolicum, & Propheticum testimonium credo nemo contemnet. Sed cur in illius temporis gentibus ista locupletissimè impleta legamus, in nostri sæculi gentibus potius desideremus, quid putas causæ esse? Profectò si merita inspicias hominum, non erant illi meliores; si naturam, utrique homines, utrique eadem massa infecta propagati. At illi ingenio & quodam vigore naturæ longè superiores. Prorsus ita est. Verum quid hoc? An contemnemus Paulum contrà admonentem, Videte vocationem vestram fratres, quoniam non multi potentes, non multi nobiles, non multi sapientes secundum carnem, sed quæ stulta sunt mundi elegit Deus, ut confundat sapientes, & infirma mundi elegit Deus, ut confundat fortia, & ignobilia mundi, & contemptibilia elegit Deus, & ea, quæ non sunt, ut ea, quæ sunt destrueret? Quam copiosè quam fortiter istos naturæ observatores, & venditores refellit diuinus Apostolus, adeoque naturæ nostræ imbecillitatem, & abiectionem non repugnare gratiæ ostendit, ut etiam commodiorem affirmare videatur, propterea quod humilitatem plurimum iuuat, quæ ad gratiam consequendam, & prædicandam maximi fit. Hos ergo cum natura usque adeo humiles, usque adeo mansuetos, & patientes cernamus, qui possumus inde

Euange

I. Cor. I.

Euangelij introitum excusare, vnde maximè inuitatur? Sed neque isti vsque adeo inepti sunt, neque ita stupidi, neque verò ab æquo, & honesto tam auersi, quin, si suo quodam more ducantur, non facile consentiant, tametsi cum antiquis illis ingenij cultu & doctrinæ exercitatione nullo modo sint comparandi. Cur ergo illorum tanta messis, horum tam tenuis, & inops? Expende omnia subtiliter, & ad altiore reuoca intelligentiam, inuenies potissimam causam in eo esse, quod diuinis, & occultis quidem, sed iustis consilijs, antiquis gentibus prædicatores fuerint prædicatione sua digni, cum nostris tam sint plerique indigni, vt longè plus euertant, ac dissipent, quam ædificent, atque plantent. Itaque præcipua causa ad ministros parum idoneos redit. Quæ namque est prædicatione nostra? Quæ fiducia? Signa certè non edimus, vitæ sanctitate non eminemus, beneficentia non inuitamus, verbi ac spiritus efficacia non persuademus, lachrymis, ac precibus à Deo non impetramus, imo ne magnopere quidem curamus. Quæ ergo nostra querela est? Quæ tanta Indorum accusatio? Pudere nos potius deberet vitæ nostræ, horrore esse tantus Dei contemptus, odio esse tam supina fratrum nostrorum pereuntium obliuio. Et cum ad Apostolicum hocce munus gentibus Christum Euangelizandi deberemus esse lectissimi, sapientia, & sanctitate mirabiles, venimus sordidissimi quique & omnibus rebus extremi, vbi illud est, Parati omni poscenti vos rationem reddere de ea, quæ in vobis est, spe? Vbi & illud: Discite à me, quia mitis sum & humilis corde? Et Filius hominis non venit animas

1. Pet. 3.

Mat. 11.

Luc. 9.

mas perdere, sed saluare? Atque illud fixum, ratumque maneat sine vlla dubitatione, quod Indi non induerint Christum maxima ex parte ministrorum tum negligentia, tum improbitati esse tribuendum.

CAPVT V.

Messem esse copiosam, modo operarij idonei non desint.

QVamobrem rectè prudenterque scripsit Paulus rerum Indicarum & indagator curiosus, & æstimator prudens, tribus ex causis videri sibi, tam multo tempore, tam modicum promouisse Euangelium apud Indos. Primum quòd exempla praua nostrorum hominum fidem prædicationi Euangelicæ derogarint. Deinde quòd in cognoscendis, extirpandisque erroribus, superstitionisque opinionibus nullam prædicatores operam collocarint. Postremo, quòd vtilitatibus, politicæque administrationi Indorum vix serò consuli cœperit, quibus ex omnibus subtiliter ille colligit, falsò Indorum nationem, aut tarditatis, aut pertinaciæ accusari, cum neque rectè viuendo, neque apte docendo à nostris sint conuenienter legi Euangelicæ instituti. Neque dubitandum esse, si illa, vt par est, adhibeantur, quin futurus sit fructus longe copiosior opinione multorum. Nouimus ipsi qui pro vulgari existimatione de ingenio, salutèque Indorum desperatè sentirent,

& ab ijs edocendis vehementer abhorrent, qui
 mox obedientia perurgente animum appellen-
 tes ad rem, fideliterque ministerio suo functi, an-
 te non longum tempus tanta de insperato fructu
 spe ac voluptate perfunderentur, ut nihil sibi acer-
 bius cogitarent, quam ut ab Indorum doctrina
 auellerentur, qui nobis palam, serioque confir-
 mant, se se facto periculo abunde didicisse non
 mediocres fructus sperari debere, modo sacerdo-
 tes diligentia, & tolerantia operi suscepto non
 desint. Neque verò ita nihil est actum hactenus,
 neque labor omnis ante actus adeo cassus & irri-
 tus, quin si & tempora tumultibus plena cogi-
 tentur, & curæ ministrorum, ut parcissimè di-
 cam, sua magis, quam Christi quærentium, non
 amplius effectum sit, quam esset meritò expe-
 ctandum. Neque tam sunt Indi omnes infideles,
 neque usque adeo à Christo alieni, & auersi, ut
 plerique iactant. Nouit Dominus qui sunt eius.
 Profectò Ianaconæ nostri, id est, Indi nobis fa-
 miliares, si quemadmodum fidei nostræ assue-
 fiunt, ita etiam mores Christianos spectarent, non
 dubitandum esset, quin sicut fide & notitia re-
 ligionis Christianæ cæteros Indos Atunlunas
 longe excellunt, sicut etiam morum integritate
 superarent. Sed quæ vident, discunt. Rectè cre-
 dentes vident; credunt & ipsi rectè, improbè
 agentes vident: discunt, & ipsi improbè agere.
 Ego certè opinor non solum ætate nostra, sed
 superioribus quoque patres nostros in gētes hor-
 ridiores, & magis à vero auersas incidisse, fru-
 ctificasse tamen copiose, quod diligentia, ar-
 dore, patientiaque sua difficultates omnes cui-

*Heda in
hister.
Anglo.*

*In tertio
som. Con-
ciliorum
prope ini-
xiu.*

*Greg. ter-
tius in
epist. vl-
tima ad
Bonifa-
cium.*

*D. Bern.
in vi. il-
liu.*

cerint. Legat qui volet antiquos Anglorum mo-
res : duriores nostris Indis inueniet : at Augusti-
nus , Laurentius , Iustus , Mellitus cæterique à
Sancto Gregorio missi quanta effecerunt , quam
gloriosa in Insulæ illius conuersione ? Turin-
gos , & Saxones , aliasque nonnullas Germaniæ
nationes vsque adeo barbaras extitisse olim , vt
nihil magis , sanctorum Pontificum Gregorij se-
cundi , & tertij , itemque Zachariæ responsa
Apostolica satis indicant. Ab vno tamen Bonifa-
cio à Sede Apostolica prædicationis causa missa
quanta multitudo sub Iene Christi iugum cerui-
ces dedit ? Ad centum millia hominum non
longo tempore idem Pontifex scribit sacro ba-
ptismate ablutos. Quid nostri Hispanienses Astu-
res ? Quid Cantabri olim ? An non per viros Dei
mansuefacti , & feritate exuta , humanitati quo-
dammodo redditi sunt ? Quid de Malachia, quem
libro primo commemoravi ? Quid de cæteris di-
cam , qui non solum Græcis , & sapientibus , sed
barbaris quoque & insipientibus Euangelium sa-
lutis æternæ impertiti sunt ? Quod si magis re-
centia , & nostris proxima desiderantur , non ob-
scuræ famæ est quicquid in Prouincia Veræ Pacis
Dominicanæ familiæ Patres egerunt , cum In-
dos filiorum loco haberent , ab ipsis verè paren-
tes agnoscerentur , illéque in primis Frater Ioan-
nes , nisi fallor , nomine , vir Sanctus , & Pro-
phetiæ spiritu clarus. Eodem modo , & Mino-
ritæ , & Heremitæ , cæterique , vel monachi,
vel clerici zelo Fidei , & salutis animarum suc-
censi , non exiguam apud nos laudem , apud
Christum etiam cumulatam præmium laboris
sui consecuti sunt. Nostros verò quid attinet di-

cere in India Orientali, quorum sudores pro Christo felicissimi extiterunt? Qui ad fines usque terræ bonum Christi odorem diffundentes, vel ipsa commemoratione rerum gestarum animos Dei amantes exhilarant, atque imitandi studio vehementer inflammant. Quorum Dux Sanctus Magister Xavier Apostolici temporis splendorem, & claritate signorum, & rerum magnitudine, & laborum tolerantia renouasse videri potest. Quid huius sectatores Magister Gaspar in India citeriori, Cosmas Torres in Iaponia, Ioannes Nobrega in nobis continenti Brasilia, reliquique patres spiritu feruentes, parati pro fratribus animas ponere, & se ipsos impendere, ac superimpendere Euangelio Christi? Quod & fecere non pauci. Omnino si tales Indorum populis diuino dono Ministri contingerent, messem essent inuenturi lætissimam. Verum Paulus Apostolus illo iam tempore, quo primitiæ Spiritus sancti effusæ sunt, dolet, ac deplorat omnes quærere, quæ sua sunt, non quæ Iesu Christi, & se vix vnum Timotheum vnanimem, & syncerum coadiutorem habere, quid nos dicemus, qui in fæces mundi incidimus, quando & charitas multorum refrixit, & veniens Filius hominis vix fidem in terra inuenturus est? Attamen obsequendum est diuino præcepto, & assiduis, ardentibusque precibus rogandus est Dominus messis, ut mittat operarios in messem suam, qui non verbo, & lingua tantum diligant, sed opere, & veritate se ipsos idoneos noui testamenti ministros præbeant. Atque id quidem, ut Pater misericordiarum, & Deus totius consolationis In-

*Lib. 3. de
vita
Ignatij.
cap.
Littera
Patrum
societatis
ex India
Oriental.
Rom. 12.
1. Ioan 3.
2. Cor. 12.*

Philip. 2.

*Mat. 24.
Luc. 18.*

Mat. 10.

*1. Ioan. 3.
2. Cor. 3.*

Iean. 15. dorum Ecclesiæ largiatur, plena fiducia sperandum est, quia sine illo nihil possumus facere, qui quos vult, ponit, ut eant, & fructum plurimum permanentemque afferant. Sed quod nostra interest, quales esse oporteat tanti operis ministros, in quo rei bene gerendæ spes omnes sitas esse monstrauius, ipso Deo nostro adiuuante, accuratè deinceps persequemur.

CAPVT VI.

De peritia Indicæ linguæ necessaria.

TRia in omni Christi ministro, qui Indorum salutem sit curaturus, quærenda sunt, vita integra, doctrina idonea, copia sermonis: quorum si desit aliquid, & alijs profuturus non est, & periculum animæ suæ non leue ipse sustineat. De his modo sigillatim pro re præsentī dicendum est. Atque ut ab extremo ordiar, loquendi facultatem ei, qui docendi parte suscipiat adesse oportere nemo dubitat. Quamobrem Apostolos suos non ante ad docendas gentes Christus misit, quam gentium linguis spiritus dono loquerentur. Fides enim, sine qua saluus esse nemo potest, ex auditu est, auditus autem per verbum Dei. *Rom. 10.* Hic ergo sita est salus gentium in verbo Dei, quod sanè ad homines peruenire non potest, nisi vocibus hominum deferatur, quas qui non percipit, verbi Dei vim sentiet nunquam. Qua vna in re vel maximè sudare oportebit seruum Christi,

sti, si hominum amat salutem. Quanquam enim
duri, ac permolesti labores sunt alienæ linguæ di-
scendæ, barbaricæ præsertim, tamen & gloriosa
victoria est, & dulcissimi fructus, & Dei charita-
tis illustre testimonium, Occurrere animo debet
sanctus Ioseph, qui inter alias ærumnas suas non
leuem illam expertus est, ut linguam, quam non
nouerat, audiret. Idem procedente tempore in ea
ratione, cuius peregrinam linguam didicit, salu-
tis Princeps, & author singularis, qui adeo fami-
liarem sibi effecerat Ægyptium sermonem, ut pa-
terni quasi esset oblitus, cum fratribus Hebraicè **G**
per interpretem colloquerentur. Igitur si quis sa-
lutis Indicæ studio inflammatus est, sibi is seridè
persuadeat, nihil præclarum sperare oportere, nisi
sermonis colendi prima, indefessaque cura sit. Si
enim is, qui supplet idiotæ locum ad tuam be-
nedictionem, quam non intelligit, non potest di-
cere, Amen, quamvis enim tu bene gratias agas, **1. Cor.**
sed ille nihil ædificatur, quonam modo concio- **14.**
nanti sibi quamvis mirabiliter quamvis diuinè
de Christo, populus ignotæ linguæ & profundi
sermonis respondebit in corde suo Amen, hoc est,
animi præbebit assensum? Quomodo quamuis tu
rectè loquaris, ædificabitur ad Fidem & dilectio-
nem frater, cum voces tantum sparguntur in ven-
tum, ac more Babylonicæ confusionis qui sermo-
nibus dissident, nequaquam sensu animisque con-
spirant? Mihi attente sæpe diúque de salute Indo-
rum procuranda cogitanti nihil commodius, ni-
hil certius venire solet in mentem, quàm ut ho-
mines probati, atque integri, sermonis Indici cu-
ram susciperent, familiarissimam consuetudinem
S **haberent,**

haberent, copiámque ad dicendum sibi pararent cum arte tum exercitatione diuturna. Valde enim mihi persuadeo ita futurum breui, vt Euangelium Christi ad animos istorum penetraret, & vires suas expromeret, quod in hodiernum diem plurima ex parte tantum auribus Indicis insonuisse, non etiam intima cordis penetralia pulsasse videtur. Neque enim alia via orbis terrarum reliquus ad gratiam Christi peruenit, quam verbi Dei forti instantique prædicatione sicut in Actis Apostolorum sæpè legimus, & Ecclesiasticæ omnes historiæ tradunt. Neque verò alius aditus, aut alia via nationi Indorum ad Christum aperienda est, quam assiduæ efficacis ipsíque accommodatæ prædicationis verbi Dei. Qui secus opinatur, etiam atque etiam errat. Nam præter documenta diuina eadémque grauissima, attestatur nobis copiosissimè rei experientia. Videmus Indos, si quem nacti fuerint linguæ suæ peritum concionantem, attentissime audire, magnopere delectari facundia, impetu ipso dicentis rapi, atque ore hiantes oculis immotis hæere suspensos. Quod ego in sociorum concionibus cum notarem, adeo capiebar noua Indorum attentione, & voluptate, vt præ gaudio penè gestirem, spe concepta salutis istorum pergrandi, si modo aliquot nobis, vel Pauli, vel Apollines eloquentes adessent. Neque illi sanè dissimulabant, quomodo afficerentur, cum ad alios alij conuersi dicerent, Nunquam se Christi legem talem cogitasse, aut audisse, alij ab illo sibi patre cor ipsum scindi, dum verba de Deo faceret, affirmarent. Quod si qui populi aliquid vel intelligentiæ, vel probi-

tatis

tatis præferunt præ cæteris, inveniuntur sine
vlla exceptione ij esse maximè, qui sacerdotes,
aut habuerunt, aut habent veteranos sermonis
sui peritos. Perditissimi verò omnium, qui no-
uos & imperitos ministros ab Hispania recentes
sortiti sunt, quorum infantiam egregiè ridet,
elinguésque contemnunt.

CAPUT VII.

De Parochis Indici sermonis ignaris.

Qui tales igitur ad docendos Indos acce-
dunt, non solum parum aliis prosunt, muti
ipsi & elingues, sed sibi etiam officiunt non me-
diocriter damnationis periculum subeuntes, quòd
id oneri sibi imponunt, quod portare non pos-
sunt, quorum vel avaritia, vel arrogantia tanta sit,
ut ultra quam possint, conentur facere, qui mer-
cenarij cum sint non pastores, ostendunt abun-
dè nihil ad se pertinere de ouibus, propter pugil-
lum hordei, & fragmen panis animas viuificantes,
quæ non viuunt. Sunt huius generis hodie per-
quam multi, qui iniuncto muneri doctrinæ In-
dorum copiosè se satisfacere existimant, Oratio-
nem dominicam, & Symbolum, ac salutatio-
nem Angelicam, tum præcepta Decalogi Hispa-
nico idiomate identidem Indis recitantes, eorum
infantes baptizantes, mortuos sepelientes, ma-
trimonio iuuenes collocantes, & rem sacram fe-
stis diebus facientes. Hæc summa doctrinæ est.

Hier. 48.
Ioan. 10.
Exech.
13.

eccl.

Ioan. 10.

ita se parochi officio fungi satis superque opinantur, neque interim conscientia, quam vrinam cauteriatam non habeant, mordentur, quod dispersæ sint oues Domini, eo quod non sit pastor, factæque sint in deuorationem omnium bestiarum agri, errentque in cunctis montibus, omni colle excelsio, neque sit, qui requirat quod periit, nec qui reducat abiectum. Nam quomodo verbo fidei reducent, qui linguam non habent? Quibus vocibus lupos arcebunt, ouesque nominatim vocabunt, qui nullo modo, quid loquantur, intelliguntur? Oues, inquit, vocem eius audiunt. At vocem audire non possunt, quam pastor proferre non nouit. Atque accipiat licet quivis, ut volet, quod dicam: rigidum & morosum appellet, nihil moror: ego eum sacerdotem, qui linguæ Indorum ignarus est non nisi cum animæ suæ iactura Parochi officium suscipere posse iam pridem, & opinor, & assero, quod etiam manifesta ratione demonstro. Duo sunt de necessitate salutis, Fides, & Pœnitentia. Fidem docere ac prædicare non potest sermonis expers: Pœnitentiæ Sacramentum administrare non potest, qui neque quæ confitetur Indus, intelligit, neque quæ præcipit ipse, intelligitur, Eum verò, qui neque instruere in Fide, neque in Pœnitentia iuuare potest sibi commissas oues, pastoris nomen sine grandi crimine usurpare nemo rectè sibi persuaserit. Aiunt se per interpretem suos instituere, ac docere, quid credant, quid agant, quid fugiant. Atqui interprete vtuntur plerumque vel infido, vel imperito, qui vix intelligat ipse, quæ audit, vix etiam exponere norit, quæ intelligit, utpote

Indus

Indus ipse quoque, vel ab Indis prognatus, qui neque res, neque sermones nostros satis plerumque callet. Vt omittam, quam ægrè, quamque frigide per alienam linguam sensus transmissus veniat, atque in ipsa via anfractibus debilitatus sæpe corruat, vigore omni, qui est veluti animus sermonis, extincto. Sed demus Indos doceri interprete utcumque. Nam integre perfectèque doceri non posse certum est. Quid de Pœnitentia facient? An adhibebunt interpretem confessioni hominis? Omnino medicina maximè necessaria careant necesse est miseri Indi, & cum fragiles sint ac sæpe labantur, præcipuâque illorum spes in supremo spiritu posita sit, cum confessionem serio expetunt, salutis æternæ iacturam facient propter sacerdotis imperitiam. Occurrent hîc quoque se non vsque adeo omni Indici sermonis intelligentia destitui, quin vnum, & alterum verbum intelligant, vno vero audito crimine in mortis extremo periculo, vbi amplius fieri nequit, absolutionis sacramentum impendi debere morituris. Cui sanè rationi de absolutione eius temporis ego nullo modo dissentior, cum sit nostrorum Theologorum, ac veterum quoque Patrum certa sententia. Attamen qui factum eo in discrimine excusant, nullo modo similem licentiam, vbi nihil tale vrget, sacerdoti concedunt. Cum ergo omnes post baptismum lapsi ex diuino præcepto etiam citra mortis articulum ad confessionem teneantur, Ecclesiastico verò quotannis, quomodo potest Parochus audire confessiones suorum, cum quibus locutionis commercium nullum

*S. Leo ep.
91. ad
Theodo-
rum. De
Pœn. d. 1.
c. multi-
plex. 26.
q. 6. His
qui tem-
pore. Trid.
Sess. 6. c.
14. can.
29. sess. 14.*

l. 2. can.
6. De
Pœnitent.
ijs. cap.
Omnis.
Conci.
Trid. sess.
14 cap. 5.
Sess. 14. c.
5. 6.
can. 7.

282 DE PRŒCURANDA INDŒRVM
nullum habet? Quod si dicant id, quod mihi
ex hisce quidam aliquando respondit, similia in-
quirenti ex eo, se confessiones suorum audire, cum
nonnulla percipiant, atque id sibi satis esse, ut
absoluant. Ego sanè contra affirmo, cum confes-
sionis integritas ex iure diuino sit, eum non esse
idoneum Pœnitentiæ ministrum, quem propter
imperitiam dimidium, & eo amplius necessariò
latet, perinde enim est, ac si tantundem non au-
diret, quam esse integram, & idoneam confes-
sionem præter mortis periculum nemo utcumque
doctus existimat. Denique ubi Parochus non eà
facultate pollet, ut substantiam saltem, quæque iu-
diciū illius requirunt, possit integre assequi, ne-
que salutis Pœnitentis pro ratione personæ, & cri-
minum necessaria documenta adhibere, nullo
modo est ad audiendas confessiones reputandus
idoneus. Qui verò Pœnitentiæ sacramentum
communiter administrare non potest, hunc
ego Parochi officio rita conscientia fungi ne-
go, Damnas igitur, dicet quispiam, omnes &
Parochos, & Episcopos, & Patronos Indorum,
qui illis nullo alio consulunt modo, quam ho-
rum sacerdotum præsidio, qui noui, rudesque In-
dici idiomatis ex Hispania aliundèue aduentant?
Ego verò non omnes vitupero, & damno. Fie-
ri potest, ac sit non rarò, uti ministrorum ea pe-
nuria sit, ut si sacerdos ijs omnibus dotibus
exornatus expectandus sit, longo tempore In-
di sine vllō Christianæ religionis officio futu-
ri sint. Cum ergo alij peritiores, melioresque
non suppetunt, licet sanè, imò vero expedit hos
vocare, quicumque sunt, illisque iniungere, ut
sacrificio,

sacrificio, Baptismo, Matrimonio iuuent suos, Pœnitentia etiam animam iam agentes vt dixi, vitia publica amputent, exemplo ac beneficentia efficere adnitantur, quod minus sermone possunt. Sanè tunc temporis neque Præsul præcipiendo, neque Parochus parendo reus est, sed laude dignus vterque. Vt si scuta aurea in domo Regia affigi non possunt, ærea saltem suspensa cernantur. Porro interdum accidit, vt eiusmodi sacerdotes elingues quidem, sed manu alioqui prompti, plus in Indorum conuersione effecerint, quam alij vsque ad loquacitatē disertī. Quod si non ea paucitas sit ministrorum, Episcopus tamen tuus te eam prouinciam subire iubeat, debes sermonis imperitiam omnem tuam opponere, teque ineptum excusare, sin adhuc pergat iussa vrgere, tutò Prælato obedis, tutò oues, qua potes, facultate pascis. Debes tamen copię interim sermonis parandæ non indiligentem operam dare. Viderit verò Episcopus, quam Pastori magno, qui eduxit oues in sanguine testamenti æterni, rationem redditurus sit, qui nisi maximè idoneos suis præficiat, sanguinis sine dubio apud æternum iudicem reus erit. At hi, qui iubente nemine, nemine vocante, ipsi se intrudunt, ipsi Indorum Parochias anhelant, lucro prorsus intenti, nihil aliud, quam quæstum existimantes pietatem, cum sint alioqui ineptissimi, muti, elingues, qua ratione, & lege excusentur, quod speculatores se constituerint, qui clamare non norunt, alij iudicent. Ego certè tantam temeritatem, tantum Dei animarumque contemptum excusare nec volo, nec possum, cum liceat videre paruulos deficere vulneratos in plateis

3. Reg. 14.

Heb. 13.

1. Tim. 6.

Ezech. 3.

teis ciuitatis, atque exhalare animas suas in sinu matrum suarum, cum planè quos matrùm affe-

Thren. 2. ctum, & curam præ se ferre oportebat, struthiones potius voraces, atque crudeles experiantur,

Thren. 4. atque ita fiat vt lactentium in Christo lingua palato adhæreat, quod doctrinæ vbera vel clausa, vel
Ose. 9. arida inueniant, & grandiusculi panem petant, cum sit tamen nemo, qui frangat.

CAPVT VIII.

*Quod quidam non rectè inscitiae sermonis
Indici consulant.*

ATque hæc de necessaria notitia sermonis ei, qui animæ suæ interitum auertere cupit, dicta sunt: quæ tamen eam, quam optamus, & quærimus, idonei Dei ministri mensuram minimè implent. Nisi ergo linguæ vulgaris egregiè periti viri, doctrinæ atque instructioni tot populorum operam dent, mea quidem sententia parum admodum promouebit opus Domini. Vnus eiusmodi, cui Dominus linguam eruditam dederit, vt sciat lassum sustentare verbo, & infirmum in fide assumere, centum istis triuialibus Catechistis anteposendus est, cum solus vnica concione plus efficiat, quàm illi multi toto sæculo. Atque vti-
Esai. 50. nam tales dono verbi affluentes, si non quotquot opus esset, at pro numero saltem Prouinciarum haberemus, qui fiducia pleni loquerentur ad plebem de Domino Iesu, non dubito, quin Aposto-
Rom. 14. lica

lica exempla redirent. Sed quoniam & linguarum dona cessarunt, & studio atque diligentia rarus est, qui eos in sermone progressus faciat, meritò à multis quid huic malo remedij adhiberi queat, disputari solet. Sunt qui Indos ad nostrum idioma discendum seueris legibus cogendos censeant, in alieno nimium liberales, de suo parci. Hi Platonicae Reip. similes leges verbis, quod facile est, nudis effingunt, quæ si conferatur ad rem, mera fabula. Si enim pauci Hispani in aliena patria, sermonem tamen suum non possunt dediscere, & peregrino imbui, ingenio alioqui præstantes, & intelligendi necessitate obstricti, quid cerebri est innumerabiles gentes patrium sermonem in ipsa patria obliuisci, externo solum uti, quem rarò ac valdè illibenter audiunt? Intra parietes porrò domesticos familiaria cum tractant, materna lingua loquentes quis deprehendet? Quis deferret? Quomodo Hispanicè loqui adiget? Alij magis rationi consentanea solent optare, ut si non peregrinam linguam discere & frequentare cogantur barbari, tamen eam quæ generalis dicitur, ut ignorare non sinantur, quod non usque adeo factu difficile existimant, cum potuerit Ingarum consultissima lege perfici, ut omnes amplissimi huius regni Prouinciæ Cuzquensem illam, siue Quichuam scirent, adeo ut per tria mille millaria, & eo amplius hodie quoque in usu sit. Potuerunt ergo, inquiunt, barbari reges propter conseruandam imperij sui concordiam, & communionem, quam voluerunt tot & tantis populis linguam dare, non poterunt verò Christiani principes propter religionis usque adeo necessariam

causam,

286 DE PROVANDA INDORVM
causam efficere, ut eadem illa lingua ita percre-
brescat, ut omnibus vsui sit? Etsi enim primores
Indorum illam ferè callent, vulgus tamen mulie-
rum, puerorum, eorúmque quos ipsi Atuntunas
vocitant, genus hominum agreste, vix quicquam
satis illius norunt. Qua ex re, & prædicando ver-
bo Dei, & confessionibus audiendis impedinen-
ta fiunt sanè graua, cum idiomatum tam multi-
plex sylua sit, ut in his locis, quæ ipse emésus sum,
existimem plusquam triginta linguas numerari,
eásque valde & inter se abhorrentes & ad discen-
dum difficiles. Cui tam magno incommodo si
quo pacto possit occurrere nostrorum moderato-
rum vigilantia, optime de Indicana salute meri-
tos posteritas omnis laude celebraret. Sed dum
hæc vel fieri nequeunt, vel certè non fiunt, missa
Indorum informatione, nostrum ipsi non desi-
namus informare sermonem, quoniam charitatis
lege, illos à nobis potius quærì quam ab illis nos
debet. Sunt igitur (in quorum me numero ali-
quando fuisse confiteor) qui salutem Indorum edu-
candos, præficiendósque ex Indigenis Hispano-
rum filiis magistros arbitrentur. Hanc esse com-
pendiariam viam, propterea quod hi sermonis
abundè gnari sunt, cui ab incunabulis assuefacti
sunt, quoad quidvis explicandum familiari uti
queant: sensu verò & religione Christiani inte-
gri & solidi, cum ab Hispanis progenitoribus fi-
dem Ecclesiasticamque consuetudinem hæredita-
rio ferè iure retineant, idque pro summa gloria
ducant. Ac planè quicumque ex his probatæ diu-
que spectatæ virtutis reperti fuerint, doctrinæ
quoque non expertes, in ministròs sermonis assu-
mi

mi percommodum est, neque dubitandum quin horum studio & oratione, qui non solum sermones, verum res etiam ipsorum & norunt, & amant, si fidelem ac diligentem operam nauent, Indium multum adiuuandi, promouendique sint. Quæ si honestas morum satis eluceat, & diuturnis documentis pateat, quidvis aliud Indorum salutis posthabendum est. Neque valde scrupulosè natales eorum repudiandi sunt, atque odio & iniuria (quod à multis non rectè sit) prosequendi, qui patre Hispano, matre Inda prognati sunt. Fieri enim potest, ut inter istos quoque mixto genere, Timotheus quispiam sit patre gentili, matre Iudæa ortus, & tamen cum testimonium bonum habeat à fratribus, assumatur à Paulo, utilisque Evangelico operi reperiatur, qui cæteros quoque meritis & laude præcellat. Quid vetat alterum quoque Hiram similibus natalibus ortum à Salomone Rege euocari, & præclarissimis, difficillimisque templi operibus præfici, quod plenus sapientia, & consilio sit? Neque enim personarum acceptor est Deus. At quamvis hæc ita habeant, tamen certissima magistra experientia copiosè monstrat non posse nos, nec debere sollicitudinem omnem nostram studiūque deponere Indigenarum præsidio fretos, neque verò oportere rem tantam apto sermoni hominum committere, quorum mores non æquè apti sint. Ferè enim Indorum ingenia, & mores redolent, quorum & lacte, & consuetudine educati sunt. Magna prorsus est primæ consuetudinis vis, magna primi caloris impressio. Neque frustra tam religiosè Abraham famulum adiuravit de non danda filio suo Isaac vxore Chanaanæ:

Act. 16.

3. Reg. 7.

Act. 10.

Gen. 24.

nanza:

Gen. 27.

Is. 1.

nanæ: neque muliebriter, ac non potius sapien-
ter Sancta Rebecca Hethæ fœminæ coniungi
Jacob suum adeo exhorruit, vt vitam mallet
amittere. Sunt proprij cuiusque regionis mores,
quemadmodum & natiui fructus non iidem vbi-
que, sed varij. Cretenses semper mendaces, ma-
læ bestiæ, ventres pigri. Testimonium Poëtæ ve-
teri fert Apostolus, quod vera scripserit. Itaque
solerter ingenia inspicienda sunt hominum, mo-
résque diu probandi, vt patriæ minus temperatæ,
& constantis, vel potius lasciuæ, & levis opinio-
nem quis eluat. Periculo certè compertum est
ex istis plerósque plus obesse corruptis mori-
bus, quam verbo sano proficere. Quamobrem
ita istorum loquendi opportunitas contemnenda
non est, vt tamen ingenio & moribus nisi ple-
nissimè probatis, non tutò res tanta, tamque pe-
riculosa credatur.

CAPVT IX.

*Quod oporteat ad Indos venientes Prædi-
catores Indicum idioma diligen-
ter discere.*

ITaque laborandum nobis est, & quod vnum
restat ex omnibus, studio & tolerantia, ser-
monis facultas paranda. Id quamvis difficile, &
negotiosum sit, non tamen fieri nequit. Vide-
mus homines in Hispania natos, atque educa-
tos, quosdam etiam de nostris Theologos non
obscuri

obscuri nominis , qui obedientia duce ad has regiones venerunt , charitate illustrium conatum authore impellente, tanta se discendo idiomati Indico cura dedidisse , ut non minus facunde & copiose Ingarum sermone concionentur , quam materno possent. Deus enim quorum incitat mentes , ut ait Leo Papa , adiuuat *Epist. 12.* etiam actiones. Non nemo etiam haud quamquam vna lingua contentus plurium cognitionem adhibuit , quem nullo præceptore vsum intra tres , quatuorve menses in lingua Aymarayca , quæ post Cuzquensem secundum locum tenet , tam fœliciter concionantem audiuius, ut ipsi Indi Collani magnopere admirarentur. Hunc ego tam gloriosum laborem , & contentionem omni Theologici studij laudi antepono. Ac re vera si quis seriò adiecerit animum , non ita magno ac diuturno sudore omnem eam difficultatem quantacunque sit , superaturus est. Neque enim Hebraïci Chaldaïci que sermonis difficultatem Indicus æquat sexcentis partibus. Græci vero ac Latini prolixitatem , & multiplicem scitûque arduam copiam, multo minus, quin longe simplicior , inflexiones paucissimas habet, breuibûsque admodum documentis comprehendendi potest. In quo si interpositiones postpositionesque , quibus maximè à Græco , & Latino, atque Hispanico abhorret , & cum Hebraïcis affixis plurimum conuenit , semel deuoraue- ris , nihil ferè ardui reliquum fiat. Pronuntiationem verò barbaricam habet quidem plurima ex parte, sed cum Hispanica omnium quod ego sciam Idiomatum , maximè congruentem,

T

*In prolo-
go Gram-
matica
Indica.*

vt non immeritò Frater Dominicus Episcopus scripserit, videri sibi Hispanorum nationi has gentes diuinitus præparatas. Iam verò in illa sua veluti inculta barbarie adeo pulchros adeo elegantes idiotismos habet : formulásque dicendi mirabili breuitate multa complexas, vt delectet vehementer : quorum vnus vocis vim si Latinus, Hispanúsve exprimere velit, pluribus ipse vix possit. Sed spiritualium & philosophicarum rerum sicuti notitia plurimum carebant, vtpote barbari, ita verborum Indicorum penuria maxima est. At vsus Hispanicas voces Indicas fecit. Vt enim equum, bouem, vinum, triticum, oleum, multaque id genus quia non nouerant, ab Hispanis non solum res sed vocabula quoque acceperunt, pro quibus nos quoque alia Europæ vel animantium, vel frugum genera ignota mutuari sumus : ita equidem censuerim non magnopere laborandum, si Fides, si Crux, si Angelus, si virginitas, si coniugium, si pleraque alia non satis Indice ac propriè reddi possit. Licebit enim ex Hispanico mutuari, & propria facere, vsuque ipso linguam locupletare, quod & omnes fecere nationes, Hispanica maxime, vt alienà copia ipsa ditesceret, quod prudentissimus quisque Simiyachac, id est, Indici sermonis Magister frequentare iam solet. Pronuntiandi vero difficultas vbi veluti infartis assutisque multis syllabis pleraque dictiones in longum crescunt, non potest non esse molesta paternæ præsertim suauitati assuetis, multoque illa altera grauior, intelligendi Indos stridentes sæpe ore potius, quam loquentes, sed deuoranda est tandem vsuque ipso
atque

atque exercitatione vincenda. Cætera quippe facilia valde. Est autem ad certa præcepta neque multa, neque difficilia redacta ars omnis Indicæ linguæ : qua in re primis scriptoribus , etsi multa falso multa improprie & absurdè præceperint, tamen gratiæ habendæ sunt maximæ, multum enim adiuuat ars , methodúsque tradendi prima rudimenta. Sunt etiam iam satis multa scripta copiose & ornatè , quorum electione proficere studiosus auditor queat , & emergent quotidie plura & cultiora. In his & legendis, & ediscendis memoriter, itémque frequenti scriptione imitandis multum crescet sermonis cognitio. Quamobrem lectiones publicæ institutæ linguæ Indicæ perutiles sunt , ac nullo modo contemnendæ. Verum hæc omnia instar umbratilis pugnæ , & palæstra potius, quam acies. Ad rem ergo veniendum est, & frequenti colloctione cum Indis seriò iam agendum , ubi audiendo ac loquendo familiaris sermo fiat. Inde ad conciones progrediendum, & pudore metúsque deposito , sæpe & audacter errandum , ut aliquando non erretur. Initio quidem memoriter & res & verba dicenda , mox etiam sequentur verba res ipsas. Ista quidem , dicit, opinor, aliquis, præcipere in promptu est, exequi verò perquam remotum, ita sane habet. At tamen & labor omnia vincit , & laborem facit iucundum propensio animi. Mihi nulla in hac causa terribilior difficultas occurrit , quam auersæ voluntates hominum. Adeo enim ista non amant , adeo non curant , ut etiam contemnant, ac loco ignominia habeant cum Indis versari & loqui Indicè. Christi vero amatores atque

animarum studiosos eo amplius incitare atque accendere debent, quòd mundo ista fastidio sunt,

Gal. 6.

2. Reg. 6.

Paulo Apostolo nos prouocante, Mihi mundus crucifixus est, & ego mundo. Dauide quoque exclamante, Viuit Dominus, quia ludam, & vilior fiam. Omnino nihil pretiosius hac Crucis Christi inuentione, & exaltatione & triumpho. No- uit ille qui accipit. Quamobrem si Sacerdotes, ministrique Euangelij multum apud Indos pro- ficere cupiunt, illud modis omnibus curent, vt recentes ab Hispania antequam feruor ille, & si- tis animarum intepescat, nulla alia re occupen- tur, ac distineantur, quam accuratissimo studio discendæ Indicæ linguæ, & postquam didicerint exercendæ. Hoc nisi fiet, vix aliquid fiet, quod experimento compertum habemus. Sapienter er- go & religiosè Dominicanæ familiæ Patres in Guatimala prouincia, vt mihi fide dignus vir so- lebat narrare, inuiolabili statuto venientibus ab Hispania totum primum annum nihil aliud quam studium sermonis iniungunt. Anno integro exa- cto ad fructificandum mittunt, quod vtinam omnes sequeremur exemplum, fieret paucis an- nis sine dubio plusquam effectum est plurimis. Neque enim Societatis nostræ Beatus Fundator Ignatius Indicæ linguæ lectiones publicas frustra præcepit, vbi vtilis viderentur, neque vsquam ne- cessarium magis, quod Regulæ habent, vt Regio- nis, in qua degunt, sermone loquantur omnes: sunt enim perquam necessaria omnia ista præsi- dia, vt facultas paretur verbi diuini gentibus an- nuntiandi. At si quis vel per occupationes vr- gentes, vel per minus fœlicem ingenij sortem

Par. 4.

Conf. cap.

11. &

Declar.

lit. B.

. tanta

tanta consequi nequeat, non continuo debet sibi ab hoc Dei opere vacandum existimare, silentioque vitam agere. Potest multis modis facultatis suæ exiguitatem adiuuare. Primum si doctus ipse cum sit & probatæ virtutis, socio utatur sermonis perito, quem ipse sententiam seorsum doceat, & quid, quove modo dicendum sit, instruat, eumque ut Moyses Aaron interpretem habeat, ut per illum potius ipse loquatur. Non quidem, ut alter alterius verbis verba reddendo loquatur interpretis more (quod frigidum est tamen si ne id quidem contemnendum,) sed summam potius edoctus ante concionem oratoris partes impleat, quod nos perutile sumus experti, si socius contingat idoneus ac fidelis. Præterea non esset utilitatis exiguæ, si aliquot ipse conciones & breuem aliquam Catechismi expositionem memoriter disceret, atque ea identidem repeteret apud Indos. Neque enim verendum est, ne illos repetitione offendat, neque tam isti indigent magnis, & exquisitis rationibus, quam quibusdam facilioribus, accommodatis, iisque sæpius repetitis. Nam & gloriosissimus Dei Præco Franciscus eo modo instituisse fratres suos simpliciores prædicatione perhibetur: & Magister Franciscus noster apud Malauaricos ea industria multum in conuersione gentium profecit. Ac mihi cum missionem quandam obirem, venit in mentem id nobis non difficile, Indis verò valde commodum fuisse futurum, quod in missionibus loca subinde commutentur, doctrina verò eadem ubique repetenda sit, ut paruulis lac Euangelij præbeatur. Ad hæc possent

virorum grauium , & eloquentium scriptæ orationes de rebus Christianæ religionis publicè legi, & cum aliqua emphasi pronuntiari , quibus Indorum populi non solum instruerentur , verum etiam excitarentur. Quæ sanè consuetudo olim in Ecclesia diu retenta est , & à sanctis Patribus magnopere commendata. Sunt vero nostrorum scripta Indicè valde opportuna, quæ si relegantur, non dubito , quin auidè excipienda sint. Et spero equidem , modo ardor non desit spiritus Christi, & Christi paruulos complectentis, his aliisque rationibus, quas idem spiritus commode suggeret , magnos Fidei salutisque Indicæ prouentus aliquando affuturos.

CAPVT X.

De Scientia Sacerdoti necessaria.

SEquitur scientia , quæ tam propria Sacerdotis est , vt pectori insculptam Doctrinam gestare lex iusserit , significans Dei seruum doctorem esse oportere cæterorum , quorum suscipit curam, ne, si scientiam à se repulerit, repellatur ipse vicissim à Domino , ne Sacerdotio fungatur, atque ita pariter , & Propheta , & populus corruat. In plebeio homine habet ignorantia suam fortassis excusationem , at in Sacerdote vt Leo Papa scribit, vix ferenda est excusatio , quæ prætendat inscitiam, imo verò, vt in alia epistola scribit, in ijs, qui præsunt, inscitia nec excusatione digna

Exod. 18.

Ose. 4.

Epist. 4.

ad Episcopos
Si
sili.

Epist. 22.

gna est nec venia. Quatenus autem peritum esse *Dis. 3. 8. s. in laicis.*
 oporteat Sacerdotem, satis Patrum Canones in-
 dicant. Si prædicandi quidem verbi Dei fungitur *Lecep. 82.*
 officio, cum sit hoc proprium Pastorum, atque
 Doctorum, eum esse oportebit, quem Paulus des- *Tit. 1.*
 cribit, Amplectentem sanè eum, qui secundum
 doctrinam est fidelem sermonem, ut potens sit
 exhortari in doctrina sana, & eos, qui contradi-
 cunt, arguere, qui hæc præstare non potest, temerè
 Doctoris in Ecclesia usurpat locum, maius sibi
 iuxta Iacobum Apostolum iudicium sumens. *Iac. 3.*
 Quod cum tantæ magnitudinis tanti etiam peri-
 culi sit, nemo satis præstare potest, nisi missus à
 Domino, Quomodo enim, inquit, prædicabunt *Rom. 10.*
 nisi mittantur? Et, qui loquitur à semetipso, glo- *Ioan. 7.*
 riam propriam quærit. Et, ipsi loquebantur in no- *Hier. 29.*
 mine meo, cum ego non mandarem eis, & cætera
 id genus multa, quæ terrori sunt, ut nisi aut ex of-
 ficio incumbat, aut maiorum autoritate impona-
 tur, aut ipsa charitate apertè perurgente & exti-
 mulante, vitari non queat, nemo sui memor, onus
 magnis quoque viris formidabile subire audeat.
 Sed ut dixi, charitas Christi vrget æstimantes hoc, *2. Cor. 5.*
 quia Christus pro omnibus mortuus est, ut qui vi-
 uunt, iam non sibi viuant, sed ei, qui pro ipsis mor-
 tuus est. In Indorum autem prædicatione, & labo-
 ris est plurimum, & vanitatis perparum, ubi lau-
 des, applaususque populares non expectantur, ubi
 neque gustus nimium delicatus exquisitis illece-
 bris excitandus est, verum eius panis, qui nobis
 abundat, & præ copia penè vilescit, qualiscunque
 erogatio admirabiles, esurientibus epulas præbet.
 Itaque quò alias magis periculosum, & anceps
 T 4 Magistri

Magistri munus , cò inter barbaras gentes & fructuosius , & tutius , cum non hominum fauorem aucupetur , sed Dei pro paruulis suis gratam mercedem speret. Parochi verò Indorum , si quis munus obeat, Catechismo Concilij Tridentini , quid sciendum sit, satis dicetur. Vt primum, symbolum, mysteriaque Fidei præcipua norit exponere pro captu audientium ; mox præcepta diuina qui aut seruentur , aut violentur , tum quæ ad sacramentorum intelligentiam , vsumque pertineant. At modo probatæ ille vitæ laude floret, atque locutionis Indicæ facultate non careret, cum viros haberet, quos tutò in grauioribus causis consuleret, non magnopere ego scholarum apparatus, reconditamque illam doctrinam in eiusmodi Indorum Parocho desiderarem , quippe cuius munus magis prudentia quadam , atque ingenij, morumque Indicorum peritia constet, quam subtiliori literatura. Vt enim Magistri nouitiorum in religiosis domibus eliguntur, virtute prudentiaque præstantes , ipsoque vsu rerum spiritualium, propterea quod ea ars artium cum sit , non tam paginis euoluendis, quam internis spiritus motionibus discernendis paratur (tametsi cum fundamentum istud iacitur vitæ purioris ac sensus exercitati ad discretionem boni , & mali , sanctorum Patrum lectio, vt Gregorij, Basilij, Bernardi, ac cæterorum, Diuinæque scripturæ præsertim meditatio plurimum adiuuet:) ita planè in moderatione Indorum, qui nouitij quidam sunt religionis Christianæ, & quidem quibus omnia diuina, & Ecclesiastica valde noua , valde inusitata occurrant, exoptanda esset eximia quædam vitæ sanctitas in ministro

ministrò Dei cum pari prudentiæ ac dexteritatis laude conjuncta: scientiæ verò is modus eaque mensura, quæ communiter opportuna est, ut sciat quæ forma Catechismi seruanda, quis ordo Sacramentorum tenendus, quantum sibi liceat in absolutione, quæ sint reseruata crimina, quæ priuilegia Neophitorum à summis Pontificibus data, cæteraque talia, quorum notitiam ex Concilio Prouinciali Limensi petere potest. Ritus verò Indorum, auitas consuetudines, & superstitiones, modumque cum his agendi, & versandi non nisi longo usu rerum discere potest, hinc cum pendeat utilis administratio sacerdotij Indorum, valde dolendum est, usque adeo rarum esse Parochum, qui triennium integrum exigat in sibi commissa Paræcia: sed statim eum tædeat suorum, aut libido ambitioque aliorum huc illuc circunferat, ubique cursantes, nusquam consistentes, atque ita fructus exiguos afferentes. Deberent illud meminisse, & Episcopi, & Parochi, Diligenter attende vultum *Prou. 27.* pecoris tui, tuosque greges considera, non enim habebis jugiter potestatem, & corona tribuetur tibi, multoque magis illud boni pastoris de bono pastore documentum, Proprias oues vocat nominatim, & cum eas emisit, ante eas vadit. In Concilio quidem Limensi magno pondere verborum decretum est, Ne Parochi Indorum ante *Ioan. 10.* sexennium doctrinam, siue Paræciam mutare permitterentur, nisi ineuitabiles causæ acciderent. Nunc temporis prout libitum est, quia ampliores prouentus alibi sperat, aut cum Patro no intercessit iurgij quippiam, aut vrbica frequentia magis iuuat, sine vlla cunctatione grex *Const. 4.* commissus

298 DE PROVVRANDA INDORVM
commiffus deferitur, ignoto traditur: qui dum
subinde pastores mutat, neminem agnofcens, à
nemine agnitus nec numeratus facile difpergitur,
& luporum infidijs occiditur. Ipsi Epifcopi, quo-
rum intererat fuorum Parochorum leuitatem in-
constantiamque compescere, vel lenire, & miti-
gare fastidia, multo magis ad ifta conuiuent,
commutantes ipsi quavis de caufa Præpofitos.
Hæc tanta clades est animarum, vt fatis deplorari
non poffit. Nihil ergo Sacerdos Chrifti præclari
perficiet in falute Indorum fine familiari, & ho-
minum & rerum notitia: nunquam hanc confe-
quetur, nifi pedem fixerit. Talem igitur fcientiam
in Parocho Indorum plurimi facimus, illam vero
elaboratam Theologiæ cognitionem nullo modo
contemnimus.

C A P V T X I.

*Oportere in nouo orbe aliquos effe præ-
ftantes Theologos.*

Quin potius tametsi in plerisque mediocris
quædam doctrina fit fatis, tamen eos, ad quos
recurrunt cæteri, à quibusque velut à fonte hau-
riunt, tam effe oportet absoluta Theologiæ facul-
tate inſtructos in nouo orbe, vt nuſquam gen-
tium amplius. Id ita effe, qui rem accuratius ani-
maduerterit, certis indicijs deprehendet. Primùm
enim, vbi Fides Chrifti recens fundata eſt, tam-
que immenſis ſpatiis longè lateque propagata, ibi
fanè

sanè & ad veteres pellendos errores, & ad nouam
 tuendam religionem Theologiæ doctrina mag-
 nopere necessaria est, cuius partes Augustinus
 esse docuit, vt Fidem saluberrimam gignat, nu-
 triat, atque defendat. Olim cum audissent Apo-
 stoli, quia recepisset Samaria verbum Dei, mise-
 runt ad eos, non quosvis, sed Petrum & Ioannem
 Apostolorum facilè primos. Quam ob causam pu-
 tamus? Nisi quod religionis Christianæ exordia,
 præcipua quadam sapientia indigent, industria, di-
 ligentia, quemadmodum in nouis plerumque stir-
 pibus videmus accidere. Deinde in nouo hoc Or-
 be noua esse negotia oportet, nouos mores, leges,
 contractus, rationes denique vitæ vniuersas longe
 alias: militiæ, mercaturæ, nauticæ, totius Indicæ
 administrationis difficultates occurrunt quotidie
 nouæ & magnæ, quibus nisi sacræ doctrinæ lux
 adsit eaque copiosa, in magnis ignorantia tene-
 bris, ac certo periculo salutis suæ homines versen-
 tur necesse est. Quod si nulla secundum Deum le-
 ge, ac ratione contineantur & frænentur, auri-
 tiæ, atque libidini cuncta permissa breui sine vlllo
 modo misceri, ac turbari certum est, id quod per-
 spicue sermo diuinus per Esaïam minatur, Aufe-
 ram, inquit, consiliarium, & sapientem de archi-
 tectis, & prudentem eloquij mystici (quid sequa-
 tur attende) & irruet populus vir ad virum, tu-
 multuabitur puer contra senem, & ignobilis con-
 tra nobilem, & reliqua, quæ prosequitur. Salo-
 mon quoque breuiter, sed abunde, Cum defece-
 rit Prophetia, hoc est, Dei verbum, dissipabitur
 populus. Atque vtinam superiorum calamitatum
 quas Respub. hæc diu perpessa est, non ea causa,

12. de
Tri.
Ad. 8.

Esaï. 3.

Prov. 29.

vd

vel præcipua extitisset, quod ubi fuit potentia & armorum plurimum, ibi doctrinae, & Christiani consilij perparum fuit. Vix dici potest, quam ad continendos homines in officio diuinæ doctrinae præsidia necessaria sint. Postremo remotissima, & ab Hispaniæ, Europæque totius finibus longissimè dissita regio est, quam tenemus: causæ ut dixi, occurrunt variæ, vigent plerumque vehementer: habent momenta magna & animarum & corporum. Quis ergo conscientia remedium consiliûmque ab Hispania usque expectari æquo animo ferat, quod vel serum, vel inutile fortassis futurum sit, interdum etiam pene dixerim noxium? Difficile est absentium causas certò dijudicare, & ut Leo Magnus scitè ait, inter longinquas regiones in nimias dilationes tendunt veritatis examina. Tum etiam quæ de relatione tantum notitia constat, cum pro ingenio & studio hominum vario varia ea esse & incerta solent, periculosè de summis Christianæ salutis negotijs adhibet censuram suam. Euenit crebrò, ut quemadmodum medici etiam peritissimi absente ægroto consulti, dum neque morborum causas, neque hominis constitutionem satis perspectam habent, grauitè fallantur, & fallant: ita etiam nostri Theologi Hispanienses, utcûmque illi celebres, & illustres alioqui sint, tamen de rebus Indicis non mediocriter errent. Qui verò cominus ista considerant, oculis lustrant, ac veluti manu tenent, etiamsi minus periti illi sint, tamen longè certius, & fœlicius philosophentur. Paulus certè Apo-

mittit,

Epist. 31.

1. Cor. 11.

stolus quanquam multa Corinthijs præscribit absens, plurima tamen tunc se dispositurum pro-

mittit, cum fuerit apud eos. Multum omnino confert oculata experientia, & magnas sapientiæ occasionem præstat. Quamobrem nisi qui cæteros foueant, atque illustrent splendore doctrine, absoluti aliqui, & præstantes Theologi sint, dubium non est, quin magnam religionis totius causa in partibus Indicis iacturam factura sit,

CAPUT XII.

*Vitæ probitas in ministro Euangelij quòd
& à Deo & ab hominibus
requiratur.*

VItæ verò sanctitatem in Sacerdote (quod erat ex tribus primum) etiam nomen ipsum admonet eximiam esse debere, quod non solum sacras literas vbique sonare, sed etiam prophanas commendare scribit B. Ambrosius, qui Pythagoricum illud ad sacerdotes propriè accommodat. Cōmunem, atq; vsitatam populo viam non esse terendā, quod ab Hebræis, quorū & genus duxisse vult, accepisse asserit. Nihil enim in sacerdotibus plebeium requiri, nihil populare, nihil cōmune cum studio, atq; vsu & moribus incōditæ multitudinis. Sobriam à turbis grauitatē, seriam vitā, singulare pondus dignitas sibi vendicat sacerdotalis. Quomodo enim potest obseruari à populo, qui nihil habet secretū à populo, dispar à multitudine? Hęc ille. De qua re tā multa sunt in diuinis literis tradita, tā multa à sanctis Patribus explicata, vt si recitare pergam,

*Ad Iren.
num l. 2.
epist. 6.*

Luc. 6.

gam, Homilias declamare videar. Illud seriò dicam, quod etiam, atque etiam animaduerti, in ijs qui nouis gentibus præficiantur, vt non solum mores, sed Fidem ipsam ædificent, tam excellenti opus esse sanctitate, vt Apostolica verè debeat optari. Ipsos Apostolos Dominus noster quanta primum attentione misit, vt se præcurrerent, ac veluti velitarent? Orationem profundam perui-gil ante produxit, cum Patre rem tantam communicans, vocatos præterea ad se quibus verbis, quam grauibz officij admonet? Qua disciplina mittit? Quibus præceptis imbuit? Quanta integritatis, quanta mortificationis, quanta patientiæ commendatio? Quid obsecro hoc tali apparatu tantus Magister agebat aliud, quam vt informaret Ecclesiæ doctores, & pastores, ne cui manus citò imponerent; ne Euangelicæ prædicationis munus nisi selectissimis & probatissimis commit-tendum putarent? Idem mox à mortuis resurgens non patitur suos illos quamvis iam feruentes & accensos amore ipsius, quamvis scripturarum sensu donatos ad Euangelizandum prodire, sed domi se potius continere iubet, & magna meditatione expectare, donec induantur virtute ex alto. Quin etiam Paulus iam ad tertium celum raptus, & mira operatus, non prius cum Barnaba destinatur ad gentes, quam sanctis fratribz ieiunantibus, & ministrantibus Spiritus Sanctus eos sibi ad opus hoc segregari iubet. Diuturnam profectò vitæ immaculatæ probationem Apostolicum hocce munus efflagitat. Paulus ipse grauissime de eligendis fidelium præpositis admonet Titum, Vt constituas per ciuitates presbyteros, sicut

*Luc. 24.**Act. 13.**Tit. 1.*

&

& ego disposui tibi, si quis sine crimine est. Oportet enim Episcopum sine crimine esse, sicut Dei dispensatorem non superbum, non iracundum, non vinolentum, non percussorem, non turpis lucri cupidum, sed hospitalem, benignum, sobrium, iustum, sanctum, continentem. Ministros quoque præcipit alibi probari prius, & sic ministrare, nullum crimen habentes. Quæris, cur tanta exigantur in Euangelij ministro. Dicam equidem breuiter, quod neque Deo, neque hominibus, neque verò sibi ipsi satisfacere vlllo modo queat, nisi talis tantusque sit. Etenim Dei gratiam etsi certum est nullis proprijs meritis præueniri, tamen æquè quoque indubium est, iustorum sanctitate & precibus, præpositorum præsertim, effici solere, vt subditus populus Dei largam in se benedictionem, & gratiam experiatur. Idque multò maximè in initijs fidei, vbi nulla possunt eorum, qui vocantur, merita inuitare, & multa possunt crimina obstare. Scio equidem Dei gratiæ prorsus fuisse, vt tot millia Iudæorum Petri exhortatione pœnitentiam agerent, & in Christum crederent, vt tot millia gentium Pauli prædicatione idolorum vanitate reiecta Deum viuum, & verum colerent. Et hoc neque currentis esse neque volentis, sed Dei misipientis. At eandem Dei misericordiam hoc præparare, vt precibus meritisque suorum tanta donaret, qui negat aut dubitat, ipsi diuinæ gratiæ injurius est. Vult enim quodammodo pati vim, & hoc summæ est beneficentiæ, vt ad benefaciendum se pulsari sollicitarique velit. Ob id populo duro virum mitissimum, sibi-que amicissimum præficit, à quo sese etiam teneri clamitat,

1. Tim. 3.

Act. 2.

C. 4.

Act. 16.

C. 17.

Rom. 9.

Exod. 32.

Gen. 20. clamat, ne in impios furorem effundat. Ob
Gen. 25. id pro Abimelech, & populo Ægyptiorum
Iob. 42. Abraham, pro Rebecca Isaac, pro amicorum ig-
1. Reg. 12. norantijs sanctum Iob, pro Israël's populo, tum
4. Reg. 19. Samuëlem, tum Daud, tum Ezechiam & pro
Esa. 37. ipso Ezechia, Isaiam, pro Samaritanorum plebe
Ab. 2. Petrum, & Ioannem, pro Epaphrodito ægrotante
Phil. 2. Paulum, itemque pro conuauigantibus, tum pro
Ab. 27. alijs alios patres, amicosque suos Deus orare vult,
& preces, sacrificiaque offerre, vt perspicuè do-
ceat sese, vt minorum misereatur, in quibus non
suppetunt ea merita, maiorum studio prouocari
velle. Habet enim hoc diuinæ prouidentiae ordo
mirabilis. Hinc Dionysius, si quis per seipsum, in-
quit, ad Deum accedat, sanctosque despiciat, hic
diuina nunquam familiaritate potietur. Atque,
hoc est, quod per Prophetam expostulat, Quæsiui
virum, qui se medium interponeret, & non inue-
ni. Hoc quoque alius propheta deplorat, Non est,
qui consurgat, & teneat te. Quin potius impro-
borum præpositorum peccatis eo usque prouoca-
tur ita diuina, vt non solum beneficia conferre
cesset, verum etiam vindictam acceleret. Quare
seuerè quidem sed verè Gregorius deterret indig-
nos præpositos, cum ait, Qua mente apud Deum
intercessionis locum pro populo arripit qui fami-
liarem se eius gratiæ esse per vitæ merita nescit?
Aut ab eo quomodo alijs veniam postulat, qui
vtrum sit sibi placatus, ignorat? Qua in re est
etiam formidandum, ne qui placare iram posse
creditur, hanc ipse ex proprio reatu mereatur.
Cuncti enim liquido nouimus, quia cum is, qui
displicet, ad intercedendum mittitur, irati animus
ad

ad deteriora prouocatur. Quæ cum ita sint, verendum profecto, ne Indorum in fide exigui progressus, in multis etiam initia non facta, nostris malis meritis coram Deo æqua lance respondeant. Quo enim hi magis à Deo alieni, & à cœlesti luce seiuncti, eo Sacerdotis, & patris merita illustriora esse oportet, vt quod deest illis, apud optimum patrem Deum ipse sufficiat. Dixi *1. Cor. 4.* præterea hominibus sine vitæ integritate prodesse vix posse, quia reuera regnum Dei non est in sermone, sed in virtute, plusque commouet vita pura, quam oratio culta. Contra, mores corrupti doctrinam sanam facile euertunt, & inane reddunt. Sergius quidem Paulus Proconsul *Act. 13.* vir prudens tunc credidit admirans super doctrina Domini, cum verbis vidit facta succedere. Nos verò prodigia; quibus Euangelicas voces confirmamus, nulla producimus, neque verò est opus: vita vna restat ad plenam confirmationem, vt ait Chrysostomus, quæ si desit, cætera ruant, necesse est. *Hom. 33. in 1. Cor.* Indorum verò ingenium esse dixisse me memini, vt incredibili attentione de factis maiorum pendeant, illa obseruent vigilantissimè, inde hos iudicant, & aut contemnunt, aut suspiciunt, & pro Deo habent. Cuius verò vita despicitur, necesse est, vt etiam prædicatio contemnatur. Non ergo aliis proderit sine vitæ puritate, & splendore Sacerdos, sibi autem nocebit plurimum, quod est diligenter intuendum.

CAPVT XIII.

*Qudd ij, qui inter barbaros versantur,
humanis ad virtutem auxiliis
sint destituti.*

SVnt intergentes Indorum versantibus huma-
na ad virtutem adiumenta perpauca, impe-
dimenta permulta. Quo minus oportet eos salu-
tis suæ negligentes esse, sed & integritatis radi-
ces altas egisse, & ingruentium contra ventorum
tempestati fortiter repugnare, renouantes de
die in diem interiorem hominem, Apostoli Pau-
li semper memores, qui talis, tantusque cum es-
set, castigabat tamen & in seruitutem redigebat
corpus suum, ne cum alijs prædicasset, ipse repro-
bus efficeretur. Quam curam nisi quisque sui dili-
gentē gerat, cum in Indorum commorantur oppi-
dis parochi, neminem sunt habituri adiutorē. Ma-
gnū virtuti præsidium, societas bonorum. So-
cius exemplo excitat, sermone recreat, consilio in-
struit, orationibus adiuuat, autoritate cōtinet, quæ
omnia solitudini defunt. Sapienter admonet Salo-
mon, Melius est duos esse simul quàm vnum. Ha-
bent enim emolumentum societatis suæ. Si vnus
ceciderit, ab altero fulcietur. Væ soli, quia cum
ceciderit, non habet subleuantem se. Horreri peri-
culoque immenso est tanta in parochijs Indorum
solitudo. Atque vt mihi quidem videtur, quantum
fieri posset danda esset opera, ne minus quam duo
degerent,

degerent, cum præsertim multa oppida reductione iam facta frequentia sint, quibus vnus minimè sufficiat. Etenim Christus Dominus discipulos ad prædicandum binos misit, cum possent tamen singuli plures populos obire. Sed præceptor noster tum consolationi, tum cautioni suorum ipsa societate consulendum putauit, tum etiam ædificationi securitatique externorum. Quam formam tenuere postea Apostoli, cum Petrum & Ioannem mitterent, cum Barnabam & Paulum, cum Iudam & Sylam, & rursus Barnabam & Marcum, Paulum & Sylam, atque ita penè perpetuo. Apud nostros vero Euangelij ministros mira solitudo. Ex qua primùm desidia paulatim oritur: deinde licentia, cum sine teste peccetur, reprehensio nulla timeatur, postremo iam lapsi sera, & difficilis resipiscentia cum medico careat. Hinc in malo consuetudo, boni præterea omnis obliuio, denique vitæ melioris desperatio. O quot ita misere corruere, vt meritò vlulare debeat abies: cum viderit altissimas ac nobilissimas Cedros Libani cecidisse. Non loquor antiqua, non repeto Herones, Tertullianos, Origenes, Nicolaos, Salomones, cæteraque documenta veterum. Recentia & quotidiana intueor. Et quid obsecro prodest homini, si mundum vniuersum lucretur, animæ verò suæ detrimentum patiatur? Imo verò qui sibi nequam est, cui bonus exit vnquam? Omnia ergo adiumenta & præsidia humana, quæ ex aliorum vita, moribus, doctrina, autoritate proficiscuntur, desunt propemodum parocho Indorum. Quonam igitur modo nisi multum in virtute profecerit, suæque ipse disciplinæ custos integerrimus ac vi-

Matt. 10.

Acto. 8.

Act. 13.

Act. 15.

Zacha. 11.

Mat. 16.

Eccli. 14.

308 DE PROVVRANDA INDORVM
gilantissimus sit, suscepto muneri sine ingenti suo
damno satisfacere queat ?

C A P V T X I V.

*Quæ libidinis & auaritiæ incentiua
occurrant ?*

AT qui solitudo etsi omnibus istis auxiliis ca-
ret, tamen olim expetebatur à multis, pro-
pterea quòd etiam occasionibus laqueisq̃ue va-
caret, vbi libidinis, & cupiditatis materia omnis
abesset. At barbarorum commoratio ita est omni
humanitate destituta ad bonum, vt tamen ma-
lum nihil illa magis pertrahat & irritet. Impudi-
ciæ omnis vorago ingens, vbi hominum timor
nullus, fœminarum mira lasciuiâ & procacitas,
pudor penitus omnis ignotus: occasio frequen-
tissima, non tam quæsitâ ad libidinem, quàm libi-
dinem ipsa quærens. Timor quidem Dei poten-
tissimus est ad resistendum peccato: At vbi pudor
re pariter ac metu humano destituitur, tum verò
vrgetur ipsa facilitate peccandi, facillimè, quæ
nostra est miseria, abiicitur. Vbi enim & tentat
procliuitas, & suadet impunitas, quid non obti-
neat illecebra? Quis verò castus & pudicus, nisi
fugiendo materiâ libidinis? Nam ea semel admo-
ta, quid sequatur, Salomon, & præcepto monet,
Prov. 6. (Quis ambulabit in igne, & plantæ eius non com-
burentur?) & exemplo docet, qui & dilectus à
3. Reg. 11. Deo insigniter, & sapientia tanta ditatus, & senex
iam

iam succubuit victus, omnemque illam celebritatem suam eius maculae labem foedavit. Scripsit quidam beatus Pater; pudorem diuinitus datum esse mulieri, ne, si deesset, non fieret salua omnis caro. Apud barbaras foeminas pudor tam deest, ut nihil hac parte à pecude distent: imò verò cum pecudes pudore non superent, libidine superant. Quis igitur ex tanto incendio sospes exhibet, nisi quem gratia diuina protexerit, & quotidiana carnis mortificatio vallauerit? Est alia quoque tentatio grandis, cui sine magna animi constantia resisti non potest; dominatum exercendi in Indos, quorum naturalis atque vitata subiectio, & nulla ad resistendum audacia, animos facile tollit rectori, ut quicquid collibeat, sine cunctatione ad rem conferendum putet. Sunt enim qui dominantur fidei suorum, qui cum austeritate imperant, & fas omne ac nefas pro suo arbitratu statuunt, verè ab Apostolo descripti operarii, qui deuorant, qui accipiunt, qui extolluntur, qui in faciem cædunt, qui Deo non seruiunt, sed suo ventri. Qui ita tenere primatum amant, ut non recipiant quosvis alios, quamvis vitæ probatæ, & doctrinæ sanæ, & in opere Dei exercitatos. Inde fastus quidam insolens: Quod si quis frater verbum exhortationis habeat ad plebem, ingratè prorsus accipere, inuidiam concitare, nihil iuris aliis facere. Neque ignoro esse complures, qui coadiutores in Dei opere non solum accipiant, sed vehementer etiam efflagitèt. Inde quoque cupiditatis habenæ laxissimæ cum campus latè patens occurrat, vbi quicquid quæstus exerceri velit, nemo sit contradicturus, opera prompta Indorum ad quidvis. Si scelera

*Ioannes
Clyma-
cus.*

2. Cor. 11.

Rom. 16.

310 DE PROCVRANDA INDORVM
maiorum dissimulare pergat, argenti quidvis cor-
radet, si mulctare pecunia, si seruitia imperare, ob-
sequia omnium parata. Denique absoluti cuius-
dam imperij & auaritiæ tam est effusa materia, vt
nisi quis temperatissimo animo sit, virtute iam
confirmata, in transuersum breui agi possit.

C A P V T X V .

Contra abusus Indicorum Parochorum.

PRæclarè verò ageretur cum rebus Indorum,
si Sacerdotum ea saltem modestia esset, vt vi-
tiorum occasionibus humanè oppugnarentur, ac
non quærerent etiam ipsi de industria vitæ solu-
tioris licentiam accersentes vtrò sua damna, po-
Sap. 1. nentes sponsonem cum morte, & tot & tam
Sap. 14. magna mala pacem existimantes. Neque enim la-
queos diaboli effugiunt, fœminas consortio suo
Ecl. 41. & vitæ vsibus adhibentes. Quod si à vestimento
tinea, & à muliere iniquitas viri procedit, quæ po-
test esse castitatis tanta custodia, quæ hostem per-
petuo insidiantem, domo, lare, & indiuidua con-
suetudine accipiat? Aiunt sibi nec cibos coquere
nec cætera seruitia parare debere, ad hos vsus fœ-
minas necessariò adhibendas esse. Quasi verò, &
viri ista præstare non possint, Indi præsertim ad
omnia obsequia promptissimi. Aut si fœminarum
omnino munditias cupiunt, non possint anus, quæ
neque ignem neque fumum, vt dicitur, pariant,
reperire. Nescio an alia in re maiore cura labora-
tum

tum sit ab antiquis Patribus, vix plures aut seueriores canones legas, quam vbi id agitur, ne cum foeminis habitent clerici. In Concilio magno Niceno quam grauitur de subintroductis mulieribus clerico vitandis cautum sit, nemo non nouit. Omnes prouinciales Synodi plenae sunt. Patrum decreta vehementer clamant, vnusque Hieronymus satis esse potest vsque ad inuidiam hoc loco decertans: Hospitiolum tuum, inquit, scribens ad Nepotianum clericum, aut raro, aut nunquam mulierum pedes terant, quia non potest cum Deo habitare, qui foeminarum accessibus copulatur. Foemina conscientiam secum pariter habitantis exurit, nunquam de mulierum formis disputes, foeminae nomen tuum nesciant, & cetera. Nulla profecto excusatio hinc admitti potest, vbi si minus conscientiae, famae saltem suae consulere debet parochus. Negotiationem vero Sacerdotes exercere, atque vsuras insuper quærere, omnium Conciliorum, atque Pontificum, Leonis praesertim vocibus interdictum est, & Pauli ipsius, vel potius Domini, quod scirent omnium malorum radicem esse cupiditatem, & saecularia negotia militiam Dei plurimum impedire. Hic ego quid commemorem exquisitas mammonae artes, emptiones, distractionesque rerum, pacta & conuenta secretò inita, argentum ad negotiandum institoribus datum, vt cum foenore redeat, quod plerumque meritò nullum reddit, & sorte quoque exclusi, & actione qui se se eorum fidei dedunt, qui imposturam facere clerico indulgentiam

V

4

tiam

Conc. Eliber. cap. 19. & 20. dist. 88. per totam, & lib. 3. decreta. tit. vltimo.

Dist. 32. c. Interdixit. Conc. Aquisgran. c. 39. Lucius Papa in ep. ad Episcopos Gallia & Hispan. Concil. Turon. c. 7. In 3. lib. decret. tit. de cohabitatione clericorum, & mulierum. Hieron. ad Nepotian. ad Rustic. ad Paulin. & ad Oceanum. Gratian. sub vno textu coniungit d. 32. c. Hospitiolum. 14. q. 4. Quoniam multi. Lea ep. 1. c. 3. & 4.

tiam putant? Iam verò auri cum argento permutationes ipsiusque argenti probati, & puri cum impuro, industriam tempora observantem, & fidelium oblationes vendentem, cum Patronis mutua sub certa lege, & mille alias avaritiæ fraudes recensere longissimum est. Itaque illæ potissimum Paræciæ Indorum appetuntur, & magno sæpe ambitu, & pretio obtinentur, quæ licet proventus habeant fortasse minores, negotiandi tamen commoditates vberiores præbent. A Sacerdote usque ad Prophetam omnes avaritiæ student, ait sermo diuinus. En Indici Sacerdotij Charibdis, & Syrtes, ad hos scopulos miseranda, & quotidiana naufragia. Quid verò de aleatoribus? Et hos grauissimè damnant Canones, sed frustra, quantum video, ad nos. Ponitur mensa fortunæ, dies noctesque alea iacitur, collusores, ut ad cadauer vultures, vndique accurrunt, si morantur, etiam accersuntur. Populare est in Sacerdotis domo ludendum. Integri anni stipendia vno sæpe iactu raduntur. Fastidia plerique solitudinis & otij obtendunt, qui ægroti confessionem, aut rudis catechumeni instructionem, si quartam horæ partem excedat, molestam, & prolixam accusant. Insomnes nocte, multo iam die sacra peragunt, idque cursim, ut mirum sit eos pictas chartulas pro sacris paginis non referre. Non inuchor equidem, neque maledicendi animo ista depromo. Sed cogor vicem nostram dolere, qui fabula, & ludibrium facti sumus vicinis nostris. Alij verò venationes, aut aucupia exercere honestissimum ducunt, plus sæpe in venaticis canibus insumentes, quam pauperibus erogantes præsepia ad obequitandum plena, acci-

pitres

*Hier. 6.**In 6. Syn.**gener.**c. 50.**dist. 35. c.**Episco-**pue.**L'sai. 65.*

p̄itres magno studio alere, greges Indorum post se trahere, montium iuga frequentius terere quam Ecclesiæ limina. Aduersus has ineptias multa quoque sancita in Conciliis Patrum, Gallicanis præsertim. Sed collapsa est iam pridem disciplina Ecclesiastica omnis, idem, & sacerdotes, & præfules, & monachi actitamus. Reprehendi iam illa non possunt, quæ cōmunia sunt omnibus. Itaque is cui pastoralis Indorum cura committitur, non solum contra Diaboli machinas, & naturæ incentiua pugnare debet, sed iam etiam confirmatæ hominum consuetudini, & tempore, & turba præpotēti se se obijcere, & ad excipienda inuidorum, ac maleuolorum tela forte pectus opponere, qui si quid à profano suo instituto abhorrētem viderint, proditorem, hypocritam, hostem clamāt. Hæc ergo, quæ breuiter attigi, & in aliis curare, cum eorum forte confessiones audierit, & in se cauere bonus Christi minister debet, quod ut pro dignitate præstet, quāta opus sit gratia Dei, quanta vitæ obseruantia, ipse perpendat. Adijciā deniq; ad calcem sancti Isidori sententiam de sacerdotij sanctitate, ut hunc totum locum amplius de Parochi vitæ integritate concludam. Sed quid plura subiiciamus, inquit? Si enim is, qui in presbyterio, vel episcopatu positus mortale aliquod peccatum admiserit, retrahitur: quanto magis ante ordinationem, si peccator inuentus est, cauendum est, ne ordinetur. Quapropter quia lex peccatores à sacerdotio remouet, consideret se vnusquisque, & sciens, quia potentes potenter tormenta patientur, retrahat se ab hoc nō tam honore, quam onere. Quid enim erudiendis, atque instruendis de virtute populis præerit,

*In Synodo
Franci-
ca, &
Suessio-
nensi,
& Turo.
cap. 8. &
Forsu-
liens. c. 6.
De cleri-
co venan-
tore, cap.
Episco-
pum, ex
Conc.
Aure-
lianensi.*

*Etymo.
lib. 7. c. 6.*

314 DE PROVAND A INDORVM
prærit, necesse est, vt in omnibus sanctus sit, &
in nullo reprehensibilis habeatur.

C A P V T XVI.

De Orationis præsidio Euangelizanti necessario.

Qualem oporteat esse ministrum salutis Indo-
rum, dictum est hætenus, dicendum deinceps,
quibus præsidiiis hanc, quam expetit, In-
dorum salutem consequetur. Mihi ad tantam rem
efficiendam quinque omnino necessaria videri so-
lent; vt vir Euangelicus oratione Deum sibi con-
ciliet, Exemplo homines moueat, beneficentia
alliciat, Catechismo instruat, sacramentis sancti-
ficet, quæ sanè sigillatim Parochos, pastoresque
Indorum, quoties res incidit mihi horum con-
scientias tractanti, rogare soleo, quantum memi-
ni, & commendare diligenter. De quibus etiam
vberius modo differendum puto. Igitur vniuer-
sæ sacerdotalis curæ, negotiiq; gerendi caput
orationem esse non dubito, modò ea feruens,
assiduaq; sit. Etsi enim omni negotio spirituali
inchoando, & proseguendo orationis præsidia
prima præcipuaq; sunt, authore Dionysio, vel po-
tius Christo, qui semper orare monet, neque vn-
quam deficere, tamen vbi de conuersione anima-
rum agitur multo maximè, quòd gratiæ res tota
sit, quæ impetrari precibus potest, meritis præue-
niri non potest. Quod si non de quavis conuer-
sione

*De diuin.
Nom. c. 3.
Luc. 18.*

sione res est, sed de prima, de maxima, de difficilissima, quando vocatur infidelis ad Fidem, quando non affectum solum, sed ipsum quoque sensum iubetur exuere, & sese penitus abnegare, ut in obsequium Christi captiuo intellectu eat, tam est profecto orationis singulare præsidium, ut qui cætera omnia adhibeat, hanc si omittat, nihil acturus sit in hasta & clypeo veniens, non in Domino fiduciam habens. Neque enim in gladio suo possederunt terram, & brachium eorum non saluauit eos, sed dextera tua Domine, & illuminatio vultus tui, quia complacuiti in eis. Plus longè, sine vlla dubitatione, Paulus orationibus egit, quàm concionibus, plus lachrymis, & gemitibus, quam exhortationibus. Iidemque Petrus, & Ioannes, cæteri que militiæ Christianæ duces. Orationi Stephani Saulum donatum vult Martyr Cyprianus, sicut Monicæ matris lacrymis regenerationem suam magis acceptam fert Augustinus, quam Ambrosij concionibus. Quamobrem ante omnem diuini verbi tractationem orandum ardentè monet idem beatus Pater, Deoque dicendum ex animo, In manu tua Domine sumus & nos, & sermones nostri. Idcirco pro infidelibus tam diligenter sancta mater orat Ecclesia, ut iidem Cyprianus, Augustinusque notarunt, quod eos tenebris suis profundissimè immerfos lucem diuinam aspicere minimè liceat, nisi sol iustitiæ sedentibus in regione vmbrae mortis clementer illuxerit. Ego P. Franciscum Xavier, tot millia hominum Christo peperisse facundia non puro, qui etiam in materno suo sermone non admodum eloquens perhiberur à nostris, ne dum in aliena lingua barbarica

Psal. 43.

Serm. de
bono Parti-
tione.Lib. Conf.
lib. 4. de
Doctrina
Chr. c. 15.
c. 30.
sap. 7.

rica verba vix frangens potius quam proferens; sed feruentissimis certè precibus, ardentibus lacrymis, gemitibus, suspiriisque ex imo ductis, in quibus totus erat noctes integras peruigil; quibus multo fortius, & continentius Deum pulsabat, quam homines vlla dicendi vi. Atque in hoc ipso Regno nouimus, qui simplici quidem sermone & imperito, sed spiritu Dei feruens plus in conuersione Indorum effecerit, quam multi præclari locutores. Immensum esset antiquæ ætatis exempla narrare. Vnus Paulus Apostolus pro omnibus esse potest, cuius in orando incredibile studium pro verbi victoria nullus hominum fide dignum putaret, nisi Spiritu sancto teste eum mentiri non posse cognosceret. Euolue ex ordine illius omnes epistolas: inuenies, ad Romanos Deum sibi testem aduocantem, quod sine intermissione semper in orationibus suis memoriam eorum faceret: pro Corinthiis semper gratias agentem Deo: pro Ephesiis genua flectentem, ut Christus habitaret per fidem in cordibus horum: pro Philippensibus omnibus semper in cunctis orationibus cum gaudio deprecantem: Colossensibus non cessantem postulare, & orare, ut agnitione Dei impleantur: Thessalonicensium memoriam faciētem in orationibus sine intermissione: Timothei discipuli memorem, & hunc desiderantē nocte & die: Philæmonis quoque, & domesticæ eius Ecclesiæ in orationibus semper memorem, quod de Tito quanquam tacet, tamen debemus accipere, qui maior digniorque apud Paulum erat. Nam Hebræorum, quibus de hac re nihil videtur significare epistolæ exordio paululum commutato, & propter argumenti magnitudinem,

gnitudinem, & sublimitatem stylo pene oratorio
 magis quam epistolari vsus, ad Romanos scribens, *Rom. 10.*
 an memoria excidisset sibi, satis indicat, cum tristi-
 tiam sibi magnam doloremque continuum refert,
 adeo ut separari à Christo quodammodo pro illis
 cuperet, pro quibus dicit quamuis obstinatis & *Rom. 10.*
 duris obsecrationem tamen à se fieri salutis causa.
 Galatas, ut ne hos quidem prætermittamus, quan-
 quam acriore oratione utendum ratus pro neces-
 saria obiurgatione, suauitatem illam orationum
 premendam existimarit, tamen quantum oratio-
 nibus adiuuaret, quibus lachrymis prosequeretur,
 non solum inde discimus, quod solitudinem suam
 alibi omnium Ecclesiarum perhibet, verum etiam *2. Cor. 11.*
 quod materno quodam affectu flebiliter conue-
 nit hos, Filioli mei, quos iterum parturio, donec
 formetur Christus in vobis. Omnino stupore di-
 gnum fidemque omnem propemodum superans,
 tot Ecclesiarum, tot domorum, tot hominum me-
 moriam perpetem in vno Paulo hæere, quos sem-
 per, quos sine intermissione, quos in cunctis ora-
 tionibus etiam iurisiurandi religione interposita
 sibi scribit esse præsentem. Ego Pauli charitatem à
 Christo deriuatam, qui omnes, cum oraret, nomi-
 natim recordaretur electos, eo modo intelligo,
 quo immensum pelagus in suum aliquem magnum
 influit, atque hac orandi diligetia, quod tanta per- *Act. 27.*
 egerit, desino penè mirari, qui meminerim ora-
 tioni nihil esse difficile. Itaque ut ducentarum se-
 ptuaginta sex animarum vita mortalis donata est
 Paulo precanti, ita innumerabilium vita animi
 æterna. Quid Petrus, cuius tantus ardor extitit, *2. Petr. 1.*
 ut etiam post obitum suum frequenter suos apud
 se

Eccl. hist.
lib. 4.
cap. 15.

Epist. 97.

Act. 6.

Marc. 9.

se habiturum polliceatur? Ac certè verum esse mihi persuadeo, quod D. Chrysostomus scripsit pastores Ecclesiæ solere prius atque studiosius suorum in oratione meminisse, quam sui. De Polycarpo Ioannis discipulo Eusebius narrat, cum à lictoribus quæreretur, martyriumque suum adesse cerneret, impetrato orandi spatio duas horas in commemorandis Christi fidelibus nominatim sibi commissis exegisse, sui fortasse mentione vix habita. Tanta erat in suos charitas priscorum illorum Patrum, tantus ardor orandi. Et est prorsus verum, quod ad Augustinum beatus Innocentius scripsit, plus nos proficere alternis, & communibus orationibus, quam singularibus, & priuatis. Postremo qui in vocatione gentium laborat, meminerit se Apostolorum fungi officio, qui alia alijs omnia demandantes, duo tantum sibi sumpserunt, ut orationi & ministerio verbi instantes essent. His duabus functionibus oratione ad Deum & oratione ad homines Apostolica cura definita est, quas si quis seiungat, ac distrahat, tam fieri nequit, ut optatam fratrum salutem acquirat, quam si longum pelagus enauigare contendens, vel nulla vela suspendat, vel plenis velis nauim statione non soluat. Qui velit igitur in Indicana vinea fructuose operari, orandi studium nunquam sibi intermitendum persuadeat, se ipsum verò iuge sacrificium offerens, lachrimis, fletibus, ieiunijs, vigilijsque crebris, atque omni corpusculi maceratione Deum sibi propitium reddat, ut Euangelium crescat, atque fructificet in vniuerso mundo. Opinor sane in illo genere dæmoniorum multa versari inter Indos, quæ non nisi ieiunijs, & orationibus ej-

ciantur.

ciantur. Inter omnia verò venerabilis illa agni immaculati victima principem locum tenet, quam Patri quotidie immolet toto mentis affectu, plenaque fiducia, fidentissime postulās, ut eos, ad quos legatione fungitur, filij sui cohæredes & concorporales esse dignetur, pro quibus ille sanguis effusus est. Fieri non potest, ut tali oblatione tam bene munitæ preces ab eo, qui diues est in misericordia & propter nimiam charitatem suam, cum & ipsi essemus mortui, conuiuificauit nos Christo, repulsam ferant.

Ephes. 2.

CAPVT XVII.

De vitæ exemplo.

EX frequenti cum Deo consuetudine, vitæ quoque diuinæ gustus quidam efficitur, & quamvis sobrij alijs esse pergant, qui alioqui mente excedunt Deo, & illius cellarijs sæpe intersunt, non possunt tamen non ebrietatis illius, atque dulcedinis abundantiam eruċtare, Deumque redolere. Et quicquid Moyſes caput obuelet, ne fulgoris magnitudine plebis oculos perstringat, tamen ex consortio Dei ita cum immutatum redire necesse est, ut ne ipse quidem se agnoscat, ignorétque faciem sibi alteram, postquam diuino colloquio potitus est. Itaque orationis præsidio non solum alijs Dei gratia impetratur, pro quibus orat, sed ipse quoque nouo igne succenditur, ut vitam cœlestem, Deoque

2. Cor. 5.

Cant. 5.

Psal. 144.

Exod. 34.

que dignam instituat. Vitæ verò conspicuam puritatem in Fidei præceptore apud Indos summo-
 pere necessariam esse vt docendo proficiat, &
 aliàs sæpe iam diximus, & est sæpius adhuc re-
 petendum, cum nulla alia maior, & certior spes
 sit salutis Indorū incorrupto boni pastoris exem-
 plo, contra nulla validior pestis stulti pastoris
 pessimo exemplo, quem pulchre sermo pro-
 pheticus idolum potius pastoris appellat. Agat
 ergo sedulò minister Christi, vt Christum, vi-
 ta ipsa testetur, vt cognoscant omnes illius dis-
 cipulum, cuius doctrina gloriatur. Discat à
 Christo mansuetudinem, discat humilitatem,
 discat perfectam illam, & maximam charita-
 tem, vt vitam etiam pro ouibus promptè expen-
 dat. Meminerit operibus bonis ita lucere co-
 ram hominibus, vt videntes glorificent Patrem
 qui in cœlis est. Hoc esse omnium ad persuaden-
 dum potentissimum miraculum certò sciat, quod
 cum ex tot tantisque illius primæuæ Ecclesiæ re-
 lictum sit, indefesso studio conseruare debemus.

1. Pet. 5. Petrus quidem à Domino pastor Ecclesiæ vni-
 uersæ constitutus pastores admonet, obsecratque,
 vt se formam gregi ex animo exhibeant, quod in
 maiorum exempla intueri subditi soleant, atque
 inde informare naturaliter mores. Quare fidenter

1. Cor. 11. Paulus prouocabat suos ad se intuendum, Imita-
Phil. 3. tores mei estote, sicut & ego Christi, & alibi, Ob-
 seruate eos, qui ita ambulant, sicut habetis formā
 nostram. At quibus in rebus formā se præbere vi-
1. Pet. 2. tæ ministri Christi maximè debent? Petrus sanè fa-
 stum, & importunam dominandi arrogantiam,
 tum cupiditatis omnis suspicionem vehementer
 exagitat,

exagitat, Neque dominantes, inquit, in clero, neque turpis lucri grátia. Paulus verò talem se ipse commemorat apud Thessalonicenses, Neque aliquando fuimus in sermone adulationis sicut scitis, neque in occasione auaritiæ, Deus testis est, neque quærentes ab hominibus gloriam, neq; à vobis, neque ab aliis, cum possemus vobis oneri esse vt Christi Apostoli, sed facti sumus paruuli in medio vestrum, tanquam si nutrix foueat filios suos, ita desiderantes vos cupide volumus vobis tradere non solum Euangelium, sed etiam animas nostras, quoniam charissimi nobis facti estis. Quid non isto animo Paulus efficeret? Cuius vel ferreum pectus hac tanta dulcedine non molli-
ret? Quem sæculi etiam sapientem, etiam rerum mortalium amatorem non vinceret, flecterétque tanta illa integritate, tam mirabili rerum omnium contemptu? Verum præter hunc, & sui & rerum omnium contemptum, & inflammatam in fratres charitatem, castitatis exemplum peculiariter Timotheo præscribit, Exemplum, inquit, esto fidelium in verbo, in conuersatione, in charitate, in fide, in castitate. Titum quoque eodem modo admonet, In omnibus te ipsum præbe exemplum bonorum operum, in doctrina, in integritate, in grauitate. Non solum castitatem omnibus notam esse iubet, sed integritatem quoque, & grauitatem, vt nihil leuitatis in eo notari queat, non oculus liberior, non vultus fractior, non verbum petulantius, nihil lasciuum, nihil impudici cordis studium redolens extet, sed aspectus ipse, incessus, colloquia omnia plena iucundæ cuiusdam grauitatis. Illud senis Hieronymi obseruet, Quicquid

1. Thess. 2.

1. Tim. 2.]

Tit. 2.

*In epist.
ad Nepo-
tianum.*

*In 1. ad
Tim. ho.
10.*

1. Cor. 4.

de te probabiliter fingi potest, ne fingatur, ante
deuita. Denique in his duobus, continentia in-
quam, & pecuniæ contemptu etiam opinionem
hominum captet. Multa quidem alia Apostolis
crimina obiecta ab aduersarijs fidei Chrysostomus
dicit, cæterum cupiditatis, aut impudicitiae etiam
ab inimicis, & mendacibus nunquam fuisse incu-
satos, quod in his omnes, vellent nollent, testimo-
nium veritati dare cogerentur. Id quod in Christo
Rege nostro aduertere est, cum tamen inuidiosis-
simè, & iniquissimè oppugnaretur, ac proscindere-
tur ab impijs. Mihi ad hos Indos proficiscenti sa-
pienter quidam noster suggessit frater in Orientali
India diutissimè ipse veritatus, non solum verita-
tem in hac parte, sed etiam opinionem studiosè
esse quærendam, vt te (sic enim me ille alloque-
batur) hypocritam agere interdum minimè pœni-
teat, Vt enim virginalis fama, sic sacerdotale de-
cus sinistra suspicione facile violatur. Ita ergo sese
comparat minister Euangelij, vt omni momento
spectaculum se esse Deo, & Angelis, & hominibus
cogitet.

C A P V T XVIII.

De Beneficentiâ.

Beneficentiam tertio loco numerabamus.
Quamvis autem ipsa verbi Dei impartitio be-
neficentiæ sit præclarissimæ, neque tam stulti si-
mus, vt panem quo venter esurientis impletur in
elcemo

eleemosynæ genere præferamus Dei verbo, quomens discantis instruitur, ut Augustinus admonuit: tamen eam modo beneficentiam propriè nomino, qua fratrum saluti fortunisque consulimus. Hanc in omni Rectore aduersus subditos magnopere necessariam eleganter Gregorius ostendit. Egentis, inquit, mentem doctrinæ sermo non penetrat, si hunc apud eius animum manus misericordiæ non commendat. Tunc autem verbi semen facilè germinat, quando hoc in audientis pectore pietas prædicantis rigat. Nam quasi iure ut diximus, à percipienda prædicatione gregis animus frangitur, si cura exterioris subsidij à pastore negligatur. De hac externorum bonorum communicatione, & prouidentia Petri Apostoli vocem illam accipiendam dicit, Pascite, qui in vobis est gregem prouidentes non coactè, sed spontaneè secundum Deum. Huc quoque illud adiungit, Si quis suorum maximè domesticorum curam non habet, fidem negauit, & est infideli deterior. Et certè hunc fuisse ab Apostolis traditum morem longa ætate retentum, ut Ecclesiæ pastores de Ecclesiæ bonis, deque suis ipsorum egentibus omnibus opportuna suppeditarent notius est, quam ut Conciliorum decreta innumerabilia, & Ecclesiastica gesta referre opus sit. Hanc ob causam Diaconos inter alia creatos ab Apostolis constat, ut mensis pauperum ministrarent, adeoque Agape illa culta est tunc, quæ postea paulatim elanguit, & quasi vestigijs tantum conseruata est, ut nullus inter eos egens esse sineretur. Hac prouidentia Ecclesiastica, paternaque misericordia in pauperes plenè sunt literæ Sanctorum, Ambrosij præser-

*De Cat.
rud. c. 14.*

*2. lib.
Past. c. 7.*

1. Pet. 5.

1. Tim. 5.

Act. 6.

Greg. 1.
Dial. c. 1.
August.
de Civ.

tim, atque Chrysoſtomi, quam eo proceſſiſſe ſci-
mus, vt nonnulli Pontifices ſua omnia diſtrahe-
rent, quidam ſudoribus ſuiſ pauperes alerent, Pau-
linus Nolanus Epiſcopus, vt magni ſcriptores fi-
deque digni referunt, ſeipſum quoque vendendum
tradidit, ſeruitutiſque ſuæ pretio inuſitata miſeri-
cordia alterius calamitati ſuccurrit. Lōgum eſt, &
minimè neceſſarium antiquorū patrum vel facta
narrare, vel decreta relegere, qui eoſdē voluerunt,
& verbi Dei ad paſcēdas animas eſſe miniſtros, &
bonorum ad ſeruanda corpora diſtributores. Qua-
re etiam OEconomos Chriſti vocandos cenſue-
runt. Re autem vera ſi nihil in hac parte nos ad-
iuuaret antiquitas, tamen ipſæ res moreſque Indo-
rum ſatis hoc tempore ſtudioſos Dei miniſtros
admonerent excitarentque vt ſi fructum ſpiritua-
lem verbi cupiant, beneficentiam nullo modo ſibi
perire patiantur. Nam ſi lacra animarum ſitimus,
nulla magis compendiarĩa via beneficentia. Bene-
ficentia animos facile expugnat, atque deuincit,
quicquid vult copioſè perorat, atq; perſuadet. Nā
vt in ſuperioribus libris dixiſſe me opinor, ideo
Chriſti Apoſtolorumque ſigna, tam ad Fidem
aſtruendam fuēre potentia, quod omnia penè uti-
litati hominum impenderentur. Inde facile, ac li-
benter conciliati animi hominum ſalutiſ conſilia
ab optimè de ſe meritis hauriebant. Mortuos, in-
quit, ſuſcite, leproſos mundate, infirmos curate,
dæmones eiſcite, & ad cumulum omnium, gratis
accepitiſ, gratis date. Hoc extremum ſi ſyncerita-
te Euangelio digna in Dei præconibus gentes
cernerent, quamvis barbaræ, quamvis feræ, breui
profecto manſueſcerent, omnique illa feritate de-
poſita

Luc. 10.

posita lenissimo Christi jugo victa colla summitterent. Et canes & pisces, & ipsi immanes leones beneficia sentiunt, & ea gratitudinis suæ argumenta historicis conscribenda dederunt, quæ homines nisi flectant, saxeos mōstrent. Falsa prorsus, & improba sententia multorum est, Indos nihil beneficia sentire, humanitate non tangi, gratitudinis ne vestigium quidem ostendere, quos in eos clementior beneficentiorque sis, eo deteriores reddi. Sed quamvis nonnulla ex parte de barbarorum seruili ingenio, & minimè ingenuo, ita existimare procliue est, tamen quod ad cohibenda humanitatis, & beneficentiæ in eos officia attinet, non satis vigilanter ista dicuntur. Namque apud eos, quibus se non satis Indi committunt, quorum fidem suspectam habent, tenet sanè vulgaris ista opinio locum. Libenter enim beneficium accipiunt, breui obliuiscuntur acceptum, raro, aut nunquam gratiam referunt. Causa est naturæ ipsorum imbecillitas, & timiditas. Vt enim canis alienus nec mēse tuæ assuefactus objectam offam, aut frustum rapit, atque ita abit, si plura non videt: at mēse herili assuetus adest aliter, herumque iam sibi notum sequitur: ita profecto barbari natura alieni à consortio, & humanitate non se credunt tibi etiam benefacienti, timentque adhuc potius quàm amant. At si longo usu didicerint te sibi beneuolum verè, profecto & grati sunt, & se ipsos etiam dedunt. Dicant sanè Hispani, qui Ianaconas experti sunt, an sit genus hominum obsequentius, heroque suo deuotius? Dicant Patroni Indorum, an si sacerdotem sibi beneficum, & commodum experti sunt, non excedentem deplorent, ac

*1. Indos
domesticos, sue
familiares.*

requirant, apud patronos præfulesque etiam contestentur eo Patre nullum sibi esse chariorem. Dicant sacerdotes ipsi, qui in eos fuere liberaliores, an non sentiant ad quævis obsequia promptos, an non Dei verbum videant eos libentius suscipere, & animum ad nostra germanè accommodare? Nos certè ipsi exiguum quiddam beneficij imperiti, tamen excedentes, & lachrymas illorum videbamus, & clamores exaudiebamus, & quosdam longo itinere nos consectantes vel inuiti retinebamus. Quod si illam nostrorum hominum urbanitatem, verborumque elegantiam, atque animi grati significationem officiosam, quia in Indis minus inueniunt, apud ingratos frustra beneficia collocari iactant, falsò sanè in barbarica consuetudine mores cultiores quærunt, quos ne apud rusticos quidem suos Hispani reperiunt. Quod si constantem æstimationem benemeritorum librantem omnia iustissima lance desiderant, nimium istud est in ijs præsertim, qui nos longè sibi duriores, quam humaniores experti sunt. Sed est tamen sensus beneficiorum apud Indos, qui ne feris quidem deest, saltem vt commoditates suas cogitantes eos libenter audiant, quos de se benemeritos vident. Benemerendo igitur multum ad conciliandas aures animosque Euangelio proficitur. Quod si nihil aliud, certè Christiani nominis honor nos maximè mouere deberet, vt intelligant Indorum gentes non omnes Christianos esse auaros, quæstuarios, alienorum expilatores, quod in plerisque viderunt: sed esse etiam humanos, beneficos, liberales, qui se non sua quærant. Illos à Christo esse alienissimos,

hos

hos Christi, & verba, & exempla sectari, verè enim glorificant Deum, Christumque magni faciunt, cum tales eius ministros vident. Nam illa, quæ de regno cœlorum commemorantur à nobis deque præsentium rerum contemptu, vel non capiunt, vel non faciliè sibi persuadent, cum sermo factis evertitur. Ingens Helisæi laus quòd exter- 4. Reg. 5.
num Naamanum lepra mundans argentum aurumque respuerit: graue Giezi facinus, qui Prophetæ Dominique sui puritatem, & splendorem, argento eius nomine falso postulato offuscauerit. Itaque perpetua lepra mulctatus etiam posteros nequitie suæ testes reliquit. Id nunc fit à plerisque, qui Christi se seruos profitentur, & quam eorum Dominus pecuniam repudiavit beneficio liberalissimè collocato, hanc isti repetunt illius nomine, sed lepra impleti infidelitatis suæ poenas iustissimas dant. Infidelitatem qui in alijs curant, infideles ipsi, eorumque tota posteritas. Ergo opere- Gal. 6.
mur bonum ad omnes, maxime autem ad dome- Eccli. 7.
sticos fidei, neque pigeat Euangelicum ministrum ægrotum visitare, xenio aliquo recreare, famelicum cibario saltem pane pascere, nudum operire, pauperem, cui non est adiutor, à diuitum calumnijs, & potentia eripere, pro afflictis principem magistratumve conuenire, cœlibes matrimonio honestè quæsito collocare, rem familiarem consilio augere, morientibus sedulò & benignè astare, sepulturam curare, eos, qui quærentur ad mortem, eripere, lites & dissidia componere: omni denique officij genere cumulatè prosequi, siquidem certissimè sciat Christo Christianæque religioni honorem maximum, ad spiritualem fratrum

828 DE PROVANDA INDORVM
salutem viam apertam, sibi præmium copiosum
parari, si verum illud est, quod veritas dixit, Quod
Matt. 23. minimis istis fecistis, mihi fecistis.

CAPVT XIX.

De correptione & disciplina.

1. Thes. 5. **C**VM verò Christianæ dilectionis sit non modo consolari pusillanimes, sed etiam corrumpere inquietos, hanc quoque beneficentiæ partem, quæ perperam admissis corrigendis insistit, minime sibi prætermittendam parochus existimare debet. Ac sicubi disciplinæ seuerioris cura adhibenda est, ea profecto opus est maxime in natione Indorum, quòd & natura seruili, & moribus plerumque puerilibus sint qui sese ita comparant, vt nisi timoris stimulis excitentur, facile de via deflectant, aut pigri consulant. Rectè prorsus Salomon scripsit, Virga & disciplina tribuunt sapientiam, &
Prou. 29. alibi, Stultitia colligata est in corde pueri, sed virga
Prou. 22. disciplinæ fugabit eam, & rursus, Non emendabitur
Prou. 29. verbis seruus durus. Seruus non potest verbis
1. Cor. 4. erudiri. Paulus quoque Apostolus non solum mansuetudinis spiritum, sed virgam quoque præfert interdum. Sed quomodo & quatenus castigatione vtendum sit sacerdoti Dei, id certè quæritur. Plerique persuasi nisi per vim & metum nihil se apud Indos proficere, vsque ad plagas defæuiunt, neque verentur Deo sacratas manus, in colaphos suorum vertere. Rem prorsus inhonestam,

nestam, & sacerdotali authoritate maximè indignam eum, qui patris nomen vsurpet, qui Christi teneat locum, tam vilem carnificinam exercere. Apostolus quidem inter cætera, quæ in eo qui Ecclesiasticæ familiæ præficiendus sit, requirit, hoc etiam meminit, Ne sit percussor, siue ut legit Ambrosius, verberator. Ac ne quis interpretetur in subditos talia exercere licere peccantes correptionis gratia, id quoque Canon Apostolorum, cuius à Tarassio Patriarcha in septima Synodo mentio fit, disertè prohibet. Cuius verba, ut à Gratiano in decretis referuntur, sunt hæc, Episcopum aut Presbyterum, aut Diaconum percutientem fideles delinquentes, aut infideles iniquè agentes, & per huiusmodi volentem timeri, dejici ab officio suo præcipimus, quia nunquam nos docuit hoc Dominus, sed econtrario ipse cum percuteretur, non reppercutiebat, cū pateretur non comminabatur. Quod si vniuerse Apostoli ministros Dei ab eiusmodi violentijs abstinere voluerunt, profecto nostrorum Sacerdotum percutiendi ac sæuiendi licentiam grauissimè accepturi fuissent, cum & se infestos & prædicationem suam odiosam reddant, quod ad magnam pertinet Euangelij iacturam. Ferè enim Dominos magis, quam Patres, & ultionem potius quærentes suam, quam ipsorum emendationem Indi arbitrantur. Adde quod à cæteris Hispanis vexati, nisi Sacerdotum benignitate reuocentur, Christianum nomen exhorrescunt. Ipsi quoque parochi præter insigne dedecus, quo ordinem suum afficiunt, ut in Concilio Bracharense legimus, aliorum apparitores effecti, etiam iracundiæ flammæ excitant,

Tit. 1.

7. Synod.
act. 3.Dist. 45.
c. Episcopum.Dist. 45.
De clerico
Per-
cussor.

ut

*a. Si quis.
ex Cor. e.
Agathēs.
Cap. 116.*

vt & animo perturbati, & vultu ipso indecori passim tumultuentur. Quibus ex causis omnibus prouidenter in Concilio Limensi ab omni cæde, verberibus, detonatione comæ, cæterisque in Indos designari solitis abstinere parochi iussi sunt, multandi, si secus faciant, suorum præsulum arbitrio. Hic iam vociferantur plurimi sibi omnem docendi, & emendandi suos facultatem eripi, Indos nisi Sacerdotem timeant, pro nihilo illius monita habere, facile iussa contemnere, si impunè se abituros intelligant, nihil boni sponte facturos, quo liberalius cum ijs agitur, eo deteriores reddi. Pueros esse moribus, & ingenio, puerorum more tractandos, qui nisi præceptoris flagellum præ oculis habeant, neque discere, neque parère sciant. Vbi primum Indus intelligat nihil sibi à paracho suo timendum, neque ad Missam venire diebus festis, neque ad doctrinam conuenire, neque confessiones curare, Christianæ omnia religionis officia flocci facere, ebrietatem inuerecundè sectari, insanire in fœminas, superstitionem cultumque antiquum repetere, ariolos suos consulere, simulacra adorare, omnem disciplinam, fidem denique ipsam funditus perire. Hæc se & olim expertos, & quotidie experiri certissime. Itaque Sacerdotum manus qui à supplicio Indorum cohibent, nihil aliud quam Indorum manus in nefas omne dissoluere. Quorum profectò non potest contemni oratio, aut omnino conficta reputari. Quamvis enim illi pulsando cædendoque excedant, tamen hi cum digna sæpe vindicta admittunt, tum nisi vindicetur, facile verba contemnunt. Indigent ergo seueriore interdum disciplina, indigent prorsus

sus. Horum verò crimina aut negligentiam spiri-
 tuali gladio (quod est Ecclesiæ proprium) vl-
 cisci minime expedit. Nam interdicta Ecclesia-
 stica , excommunicationes ac censuras si pro-
 vindicta iubeantur excipere , facile paruipen-
 dent, quia harum vim neque vident neque agnos-
 cunt , & ad superstitionis suæ tenebras facile sunt
 redituri Ecclesiæ luce interdicti. Vt ergo belluas
 castigare solemus plagas infligendo , quæ mul-
 tum sensus ac doloris habeant , periculi mini-
 mum, essetque reprehensione dignissimus, si quis
 phrenetico aut insano correptionis gratia gla-
 dium iugulo admoueret , aut mucronem pe-
 ctori opponeret , ac non potius verberibus turd-
 sæuiret in furas aut scapulas , quòd illic mentis
 inops necem citius , quam correctionem admit-
 teret, hîc contra salutis causa dolor ipse fieret : ita
 sanè in novos Ecclesiæ paruulos minimè oportet
 censuris agere , quarum discrimen sine emenda-
 tione adirent , magisque corporeæ ac sensibiles
 pœnæ infligendæ sunt , quibus & læduntur nihil,
 & multum omnino adiuuantur. Eam ob causam
 sanctissimi Romani Pontifices cum Hispanos in-
 terdicti aut excommunicationis causa teneret
 obstrictos , peculiari priuilegio neophitos hos
 minimè comprehendi voluerunt. Consequens er-
 go est , vt corporalibus pœnis in officio barbari
 continendi sint. Eas verò à Sacerdote irrogari
 exclusum est supra. Quid igitur ? Non paruz
 occurrunt angustiaz , cum hinc Sacerdotalis di-
 gnitas , & paterna beneuolentia necessariò con-
 seruanda , inde disciplinæ necessitas , ingeniũm-
 que seruire concertent. Primum igitur , quod su-
 periore

332 DE PROCVRANDA INDORVM
periore libro differebam, prætor ac iudice sæcū-
lari opus esse ad disciplinam Indorum; hic pro-
fecto quam verum sit, dilucide patet. Horum
enim propriè interest ista vindicare & plectere.
Hos igitur administratos esse Sacerdotum æquissi-
mum est, & quicquid durius designandum erit
in noxios, sæculari potius manu intentari. Dein-
de quoniam & prætores omnibus populis adesse
non possunt, & occurrunt quotidie peccata le-
uiora, quæ correptione quidem indigent, sed non
illa asperiori & iudiciaria, vt cū ad rem sacram
non venit, aut Catechismo abfuit: tum etiam
sunt quædam, quæ à sæcularibus vindicari nullo
modo debent, quod illorum forum recusent, vt
cum Quadragesimalem confessionem Indus ne-
glexit, cum impedimenta matrimonij non dixit
sciens, cū religionis Christianæ ritum contem-
psit, cum aruspices & veneficos consuluit, &
multa talia, tunc sanè Ecclesiastico iudicio in
tales animaduerti oportebit. Ac mea quidem sen-
tentia taxatas iam ac definitas pœnas decreto pu-
blico esse oporteret talibus criminibus, quæ
sciret Indus sese certo subiturum, cum illud aut
illud admitteret. Fieret hoc modo vt plus timo-
ris pœna iam proposita incuteret, tum minus
odij contraheret parochus executionis mandans,
quod esset lege decretum. Non enim tam ipse
tunc vindicare quam lex videretur, atque ita &
terrori esset supplicij irrogatio & minus infestus,
qui imperaret. Quam ob causam in Synodo Pro-
uinciali pœnas esse taxatas certis criminibus cre-
do, tametsi parum eæ curantur, sed suum potius
Parochus quilibet iudicium sequitur, aut etiam
iracundiæ

iracundiæ legem. Postremò siue publico canone
sint pœnæ decretæ, siue priuata sententia decer-
nantur, illud modis omnibus obseruandum est,
vt nihil parochus manu propria vindicet. Id enim
& odiosum est, & indignum, & valde periculo-
sum. Iubeat vero ipse quid facto opus sit: Appa-
ritor autem aut Fiscalis aut LiCTOR aut Guataca-
maius iussa facessat,

CAPVT XX.

*Quid obseruandum in correptione
Indorum.*

Qua in re tria præcipienda sunt. Vnum vt
causas vindictæ exponat, & intelligant ipsi,
qui corripitiuntur, mitius secum agi quam pro meri-
to. Et ne tam iracundiam, quam disciplinam inter-
pretentur, non irascatur & sæuiat in suis, sed in
Dei offensis. Turpe enim est valde, vt, si mox atque
Indum mulæ suæ fœnum ferre cessantem viderit,
aut non promptè imperatos cibos afferentē, nimis
sæuiat: eundem mox & adulterum, & idololatram
sciens vix contingat. Hinc odia exardescunt in pa-
rochos, hinc omnis disciplina contemnitur. Ma-
gnopere ergo curandum est, vt castigatio discipli-
næ causa adhibita, non ultionis, aut iracundiæ im-
petum præseferat. Secunda præceptio est, vt con-
fessionis Sacramento, & existimationi diligentissi-
me consulatur. Ea enim sunt ignorantia isti, vt fa-
cile sibi persuadere possint, cum ad confessiones
faciendas

334 DE PROCVRANDA INDORVM
faciendas accedunt, Patrem, quæ ex illis audiue-
rit, acriter postea vindicaturum, ac propalaturum.
Itaque hoc timore correpti simul conscientia-
suarum vulnera non admodum curantes, facile fictas
ac mendosas confessiones facient, rarè veritatem
integrè aperient Sacerdoti. Qui etsi multum cul-
pandi in tanto sacrilegio forent, tamen quod ne-
gare non possumus, ex duritia & imprudentia
parochorum occasionem non exiguam tam ma-
gni sui exitij haberent. Hoc ergo quod est om-
nium grauissimum, in Sacerdotali seueritate in-
commodum modis omnibus cauendum est. Ac
præstat omnino disciplinæ neruum tantisper de-
bilitari, & infringi, quam tam salutaris, tamque
necessarij sacramenti existimationem prodi. Sed
potest vtrique rei consulere prudens charitas, si
confessionis forum longè diuersum esse & verbis,
& re sæpe persuaferit, si nihil in confessione au-
ditum, etiam alioqui cognitum plectat, vt ma-
gis asylum quam prodicionem confessionem esse
cognoscant, si blande illic, & paterne se gerat, si
instante confessionum tempore à seueritate absti-
neat, si se grauissimas pœnas daturum doceat ob
tenuissimam auditæ culpæ reuelationem. Postre-
mò perspiciendum est, vt supplicij modus is sit,
qui semper paternam & Ecclesiasticam clemen-
tiam redoleat. Argenti modica quædam mulcta,
coniectio diurna in compedem, plagæ aliquot in-
terdum inflictæ, sæuissimum omnium crinium
detonsio, quæ extremæ ignominia apud Indos
loco est. Neque mirandum aut ab Ecclesiastico
instituto alienum existimandum, si id genus pœ-
næ adhibeantur, cum sacris & antiquis canonibus
non

non rarò verberum mentio fiat. Nihil enim quod ad continendos in officio homines valere potest, Ecclesiastica cura à se alienum putat. Sed quicquid in hac tam magna quæstione præcipitur, imbecille est, & ieiunum, nisi vñctio spiritus accedat, quæ doceat de omnibus. Magnus enim est doctor Charitas, vt sanctus Chrysostomus ait. Hæc cum sincere & germane salutem suorum affectat, docet plenius & certius, & quando indulgendum, & quando vindicandum, & quomodo, & quatenus. Huic vni rectè ea omnis cura committitur, vt lucrifacere fratrem cum minimo ipsius dispendio studeat.

Dist. 45.

c. Cum
beatus.

Homil.

33. in

1. Cor.

CAPVT XXI.

*De Catechismo & Catechistæ
radio leuando.*

DEinceps de catechizandi cura dicendum est, quò cætera, quæ dicta sunt, omnia penè referuntur. Est autem ea pars, vt necessaria maxime, ita molesta & laboriosa summopere, si qua opus est diligentia tractetur. Multa enim sunt quæ fastidium faciant, multa quæ quamvis promptum, & alacrem Catechistæ animum retardent atque debilitent. Et re quidem vera detracta illa quæstus specie, quæ plerosque ad id oneris sustinendum mouet, ac multò longius relegata dissolutè flagitiosèque viuendi licentia, quæ non paucos allicit, si modestè temperantèrque viuendum est,

vt

vt Euangelij ministrum decet , magnum est & perdifficile inter Indos velle versari , & in iis instituendis perdurare , propterea quod genus vitæ tum iniucundum, tum humile , tum verò molestis plenum apparet. Sed huic morbo ante omnia occurrendum est , & remedia quærenda secundum Deum , quibus ea pestis depellatur ex animo. Solet autem tædium , & tristitia partim ex opere ipso catechizandi nasci , partim ex Indorum ingenio , & natura. Opus quidem ipsum rudes imbuendi molestum est , quòd eadem sæpius ac propemodum semper inculcanda sunt, tritaque illa valde , & elementa sermonum Dei, neque his omissis ad perfectiora ferri conceditur , sed lac semper paruulis in Christo oportet dare. Huius autem ægritudinis leuandæ remedia ex nullo alio melius petere possumus quam ex B. Augustino in eo opere , quod de hoc ipso argumento, id est, de catechizandis rudibus scripsit, vbi inter alia sic ait : Iam verò si vsitata & paruulis congruentia sæpe repetere fastidimus , congruamus eis per fraternum, paternum, maternumque amorem, & copularis cordi eorum etiam nobis, noua videbuntur. Tantum enim valet animi compatientis affectus , vt cum illi afficiuntur nobis loquentibus , & nòs illis discentibus , habitemus in inuicem, atque ita, & illi quæ audiunt, quasi loquantur in nobis, & nos in illis discamus quodammodo quod docemus. Nonne accidere hoc solet cum loca quædam ampla & pulchra vel urbium, vel agrorum, quæ iam nos sæpe videndo sine aliqua voluptate præteriebamus , ostendimus eis, qui antea nunquam viderant , vt nostra delectatio

Cap. 12.
de Cat.
Rud.

in

in eorum delectationis nouitate renouetur, & tanto magis quanto sunt, amiciores? Quanto ergo magis delectari nos oportet, cum ipsum Dominum iam discere homines accedunt, propter quem discenda sunt, quæcunque discenda sunt, & in eorum nouitate innouari? Huc accedit ad comparandam lætitiā quòd cogitamus & consideramus, de qua erroris morte in vitam fidei transeat homo. Idem in eodem opere, Cogitemus quid nobis prærogatum sit ab illo, qui demonstraui nobis exemplum, vt sequamur vestigia eius, qui cùm in forma Dei esset, semetipsum exinaniuit formam serui accipiēs & cætera vsque ad mortem Crucis. Quam ob causam? Nisi quia factus est infirmus infirmis, vt infirmos lucrificeret? Audi eius imitatore alibi etiam dicentem, siue enim mente excessimus, Deo, siue temperantes sumus, vobis. Caritas enim Christi compellit nos iudicantes hoc, quia vnus pro omnibus mortuus est. Quomodo enim paratus esset impendi pro animabus eorum, si eum pigeret inclinari ad aures eorum? Hinc ergo factus est paruulus in medio nostrum tanquam nutrix fouens filios suos. Num enim delectat, nisi amor inuitet, decurtata & mutilata verba immurmurare? Et tamen optant homines habere infantes, quibus id exhibeant. Et suauius est matri minuta mansa inspuere paruulo filio, quam ipsam mandere ac deuorare grandiora. Non etiam recedat de pectore cogitatio gallinæ illius, quæ languidulis plumis teneros fœtus operit, & susurrantes pupulos confracta voce aduocat, cuius blandas alas refugientes superbi præda fiunt alitibus.

Cap. 10.

Phil. 2.

1. Cor. 9.

1. Thes. 2.

Mat. 23.

*1. eodem
placito.*

*Hom. 33.
in 1. Cor.
1. Cor. 13.*

Phil. 3.

tibus. Si enim intellectus delectat in penetralibus
sincerissimis, hoc etiam intelligere delectet, quo-
modo charitas quāto officiosius descendit, ad in-
fima, tāto robustius recurrit in intima per bonam
conscientiā, nihil quæredo ab eis, ad quos descen-
dit, præter eorum sempiternā salutem. Hæc sapien-
tissimus, & Dei amantissimus Pater, quæ si tran-
quillo animi vultu non obiter inspiciantur, vel
sola sufficiunt omnem mærorem, fastidiūque
depellere, & ad nutriendos paruulos Christi ma-
gna suauitate inuitare. Neque aliena ab his au-
reum illud Chrysostomi flumen: Non est, inquit,
charitas fastidiosa (sic enim legit ille in Paulo,
quod nos. Non est ambitiosa) Maiores natu vide-
mus sapientia præcellentes viros cum liberis suis
sæpe balbutire: & id cum faciunt, nec reprehen-
dit eos quisquam, neque ipsos rei illius pudet, sed
digna laude adeo videtur, vt quanquam improbi
sunt, qui instituuntur, perdurent tamen ipsi hor-
tando, turpia castigando, horum illos nihil pudet.
Non est enim fastidiosa charitas, sed alis aureis
omnium quos complectitur, vitia tegit. Ita Chry-
sostomus charitatis ingenium exprimit. Quare
neque infantilia dedignatur, neque assidua repe-
titione tædio afficitur. Eadem enim repetere mi-
hi quidem non pigrum, inquit, vobis autem ne-
cessarium. Nonne videmus artifices eadem ipsa
cum faciant, & modò eodem repetant, nihil ta-
men fastidire, sed lucro potius intentos vehemen-
ter delectari? Nam & cytharædus, & cantor,
& grammaticus, & ludimagister rudimenta ea-
dem inculcare non molestè ferunt, quod ea do-
cendo quæstum ampliorem faciunt. Et prorsus in
doctrinā

doctrina Christi, quæ à laceffente iam aut defesso dicuntur quæque ipsemet languida putat, ea sæpe vehementius Deo ita agente, auditorum animos permouent. Quoties nobis accidit, cum confessiones peccatorum audimus, & fessi iam alios excipimus, tam nobis frigide loqui videri, & fastidiosè, vt ipsi nobis displiceamus, & tamen illa ipsa languens, vt nobis videtur, & toties singulis repetita exhortatio, præter spem nostram, lacrymas ac singultus intimos excitat, declaratque re ipsa pœnitens noua illa sibi & mirabilia videri? Mihi quidem sæpe ita euenit, & tamen sæpe contra, cum mihi ardentè agere viderer, & ad flectendum quoque lapidem efficaciter loqui, intuens vultum auditoris, deprehendi oscitantem, vt satis mihi persuaderem, neque qui rigat esse aliquid, neque qui plantat, sed eum qui administrat semen seminanti, & dat fructum, cum vult. Ipsum ergo repetendi, & inculcandi eadem tædium magnæ mercedis est, & fructum habet copiosum. Quod si abiectum & indignum nobis puerilia ista tractandi munus recusamus, præterquam quod & charitatis vacui, superbix pleni, nobis suspecti esse debemus, & stulti prorsus qui certa lucra non amemus, incerta magis & periculis plena sectemur, hoc igitur vt omittam, quæso honor & dignitas, apud quem tandem æstimatorem collocanda est? Deumne, an homines iudices intuebitur? Siquidem hominum iudicium respiciamus, nihil abiectius Pauli officio, quippe cum pro magno diceret, Non erubesco Euangelium, & Noli erubescere testimonium Iesu Christi, neque me vinctum eius. Talis erat apud homines existima-

*Rom. 1.**2. Tim. 2.*

tio prædicationis Euangelij. At apud Deum : Nihil Apostolatu maius in terris. Principes constitues eos super omnem terram. Paruulos igitur Christi Euangelij lacte nutrire , vile : Indos, gentem despectam & sordidam erudire, viro graui indignum. Ita sanè mundus existimat. At apud Deum nihil sublimius , nihil gloriosius , & reuera in Ecclesia Dei nihil Apostolicum magis. Hoc enim proprium Apostolorum est. Neque enim

1. Cor. 2. Paulus tantum suum esse putabat sapientiam loqui, sed parcè id quidem & rarò nec nisi inter perfectos. Cæteris verò quid ? Nihil , inquit , me arbitratus sum scire inter vos nisi Iesum Christum , & hunc crucifixum. Ne ergo vile habeatur officium , quod non Angelis modo commisit, sed & Christus ipse suscepit. Quantoque quis maior est , tanto eum magis decet ad ista descendere exemplo Christi , vt Augustinus optimè admonuit. Quod sapienter cùm secum reputaret parens noster Ignatius Societatis Iesu institutor firmissima ac perpetua constitutione sanxit , vt quicumque professionem facerent , qui gradus est in nostra societate sublimior, cæteris votis suis conceptis & hoc expressè adiiceret. Et promitto peculiarem curam circa puerorum eruditionem. Vt norint nostri omnes rudimenta Christianæ doctrinæ non solum viros, quibus discere opus sit, sed etiam pueros docere tam esse suum , vt nisi fide Deo violata , huic muneri deesse non possint. Itaque nobis non iam de laude , de palma cogitandum est, cum ad rudes catechizandos accedimus, sed de fide potius liberanda. Euangelizandi enim paruulis necessitas nobis incumbit , & vix nobis est , si non euangelizemus.

*Part. 3.
Const.*

CAPVT XXII.

*De fructu ex catechizandis Indis
sperando.*

Nihil tamen æquè laborem catechizandi auget & tædium; ac ea cogitatio, quòd operæ pretium non succedat. Hoc etiam Augustinus advertit. Facit, inquit, loquenti tædium auditor immobilis; non quia humanæ laudis nos avidos esse decet, sed quia Dei sunt, quæ ministramus, & quanto magis diligimus eos, quibus loquimur, tanto magis cupimus, ut eis placeant, quæ ad eorum porriguntur salutem: quod si non succedit, contristamur, & frangimur, quasi frustra operam conteramus. Huic molestissimæ cogitationi ita occurrit. Consoletur nos, inquit, Dominicum illud exemplum, qui offensis hominibus ex verbo suo, & tanquam durum refugientibus, etiam his, qui remanserant, ait, Nunquid & vos vultis abire? Satis enim fixum atque immobile debet corde retineri Hierusalem captivam ab huius sæculi Babylonia decursis temporibus liberari nulumque ex ea esse perituum, quia qui perierat, non ex illa erat. Firmum enim fundamentum Dei stat habens signaculum hoc, Novit Dominus, qui sunt eius, & recedat ab iniquitate omnis, qui inuocat nomen Domini. Ista cogitantes & inuocantes Dominum in cor nostrum minus tenebimus incertos exitus sermonis nostri propter incertos motus auditorum, delectabitque nos ipsa

De catech. rud. cap. 10.

etiam perpeſſio moleſtiarum pro miſericordi opere, ſi non in eo noſtram gloriam requiramus. Tunc enim eſt verè opus bonum, cùm à charitate iaculatur agentis intentio, & tanquam ad locum ſuum rediens, rurfus in charitate requieſcit. Hæc Auguſtinus. Itaque perſuadere in primis ſibi Dei ſeruus debet laborem ſuum, ſiquidem Deo placet, nunquam eſſe inutilem poſſe: fructum verò in electis eſſe certum, propter quos omnia

1. Tim. 1. libenter ſuſtinere debet vt Paulus: in cæteris ſi non conſequatur quòd cupit, non eſſe mirandum, cùm & Apoſtolis id crebrò contigerit, & Angelis, qui vident faciem patris in cœlis, qui cum impiis etiam ad tutelam dati ſunt, nihil prætermittunt, quod ad illorum ſalutem pertinet iuxta præſcriptum Dei, cum tamen tam multos perire videant. Quin ipſe quoque Angelorum Dominus idem toleravit in ſe, qui non ſolum diuina ſua concione de pane vitæ non flexit animos hominum, ſed etiam, quæ eorum prauitas eſt, magis alienauit à ſe. Conſtantiem verò Dei prædicatorem docens, & non hominum gloriam quærentem, conuerſus ad reliquos dixit, Nunquid & vos vultis abire? Vt intelligamus ardorem quidem proximos lucrandi maximum eſſe debere, ſed tamen cum per te non ſteterit, quominus vota ſuccedant, ſummè quietum atque tranquillum. Non enim, vt dixi, perire poteſt charitatis opus. Hæc igitur humiliter primum cogitanda ſunt. Deinde

1. Cor. 9. quoniam debet qui arat, arare in ſpe fructus percipiendi, certò ſibi perſuadeat Catechiſta fructus futuros maximos, atque mirabiles laboris ſui. Nam ſi opinionum vel ſegnitiæ, vel ambitione

ortarum

ortarum caligo pellatur, serenisque oculis res Indicæ iudicentur, non est dubitandum, quin labore, & molestia longè maior appareat quæstus animarum. Hoc non solum viri religiosiores, & experiuntur, & prædicant, verum etiam prudentissimus quisque sæcularium, qui diuturniorem usum horum habere potuerunt. Et surgit quidem paulatim, sed quotidie maior copiosiorque messis, ac pro ingenio, & natura istorum etiam gratia ipsa lenta & suspensa quodammodo videtur, re tamen vera non cessat. Tolle avaritiam, adhibe vitæ integræ exemplum, pro captu Indorum opiniones eorum vanas refelle, viam veritatis demonstra, atque his diligenter insiste minister Euangelij, ita ego te fruar Domine Iesu Christe, ut copiosam messem, & lætam futuram intelligo. Sed nos cito operando cessamus, & properatas, ac plenas fruges statim volumus. Non est autem tale Regnum Dei, prorsus non est tale, sed quale Christus exposuit; Sic est, inquit, Regnum Dei, *Mar. 4.* quemadmodum si homo iaciat sementem in terra, & dormiat, & exurgat nocte & die, & semen germinet, & increscar, dum nescit ille. Vltro enim terra fructificat primum herbam, deinde spicam, deinde plenum frumentum in spica. Advertamus obsecro nostrum esse sementem iacere in terram, idque iuxta Ecclesiasten mane, & *Ecc. 11.* vespere esse faciendum, quia nescimus quid magis oriatur hoc an illud, & si vtrumque simul, melius erit. Itaque etsi dormiendum est aliquando, & vacandum Deo, sed tamen nullo modo ab opere cessandum, sed surgendum nocte, & die. Et licet semen sepultum lateat, neque nos

laboris nostri succellum videamus, sustinendum tamen est, quia nobis etiam nescientibus semen germinat, & increfcit. At neque properandum est nimium, neque statim plenæ maturæque fruges expectandæ. Sed primum herbam quandam cuiusdam externæ speciei, & significatæ Christianitatis gratè accipiamus, mox calamum visuri robustioris fidei, postremo plenos gratiæ, & charitatis fructus demetemus. Hoc non in vno quovis homine tantum saluator noster voluit intelligi, sed multò magis in ipsa hominum multitudine, quam Evangelici seminis iactus attingit. Sensim enim vocatio Dei vires suas exerit, & euulsis tribulis, & carduis errorum præparatur terra futuræ sementi Fidei, sensimque cœlitus affluente diuini fauoris imbre, nouum germen in Christo oritur, crescit, maturefcit in frugem. Ergo cœlestis oraculi perspicua promissione confirmatus Evangelicus operarius certissimè intelligat laborem suum non esse inanem, sed magna emolumenta salutis hominum allaturum, quia qui promisit, fidelis est, & negare se ipsum non potest, tametsi succellum interdum ipse non videat quam vellet citò, interdum ne tarde quidem fortassis, quia fieri potest, quod Euangelium habet, vt alius sit, qui seminat, alius qui metit. Sed qui metit, mercedem accipit, & congregat fructum in vitam æternam. Non tamen sibi soli metit, mercedemque accipit, sed potius vt & qui seminat, simul gaudeat, & qui metit. Siquidem omnes in Christo vnum sunt. Addo etiam in præfenti fructum laboris sentiri, & cum magna suauitate decerpi ab iis, qui curam suam iactant in Domino, & commisso officio

non

non desunt, si qua decet patientia, & longanimitate, quos Deus expectat, ipsi quoque expectare non dedignentur. Neque enim fructus affertur nisi in patientia. Luc. 9.

CAPVT XXIII.

Quid restet de Catechismo dicendum.

HOc animo instructus qui ad erogandum diuini tritici mensuram accedit alacer, siquidem hilarem datorem diligit Deus, quid traditurus sit, tum qua methodo, & ratione cogitare debet, ut in altero fidelis, in altero prudens sit. Quæ ergo nouas gentes, rudes Fidei populos doceri oporteat, & quibus ea rationibus, ut animo hæreant, effici queat, quoniam præcipuus est scopus catechizantis, noua disputatione explicandum est. 2. Cor. 9.





DE PROCVRANDA
INDORVM SALVTE.
LIBER QVINTVS.

*Quenam Indorum Populos, quibúſve
rationibus edoceri oporteat.*

CAPVT PRIMVM.

*Finis Christianæ doctrinae Christi cogni-
tio, & dilectio.*

Rom. 8.
1. Tim. 1.



Gal. 5.
Aug. De
catechi.
rud. c. 4.

FINIS legis Christus ad salutem om-
ni credenti, & finis præcepti chari-
tas de corde puro, & conscientia
bona, & fide non ficta, Hic vniuer-
sæ doctrinæ Christianæ summa est,
quæ nihil aliud commendat quam Christi fidem
per dilectionem operantem. Præclare D. Augu-
stinus illa duo his verbis colligit, Omnis scriptu-
ra diuina quæ ante scripta est ad prænuntiandum
aduentum Domini, & quicquid postea manda-
tum est literis, & diuina autoritate firmatum,
Christum narrat, & dilectionem monet. Hæc
verò

verò dum vnum esse quodammodo Ioannes aperte docet, Hoc est, inquit, mandatum eius ut credamus in nomine filij eius Iesu Christi, & diligamus in alterutrum, sicut dedit mandatum nobis.

1. Ioan. 3.

Etenim in hoc apparuit charitas Dei in nobis, quoniam Deus filium suum vnigenitum misit in mundum, ut viuamus per eum. Verè ergo & finem

1. Ioan. 4.

Christum, & finem charitatem scriptura dicit: verè in illo verbo legem pendere, Diliges, & plenitudinem esse dilectione: & verè nihilominus, in Christo euacuari legem, & impleri omnia, siquidem nullus est alius diuinæ institutionis scopus, quam Christus cognitus & dilectus. Etenim vita æterna

Matt. 22.

Rom. 13.

2. Cor. 3.

est cognitio Christi vera & perfecta. Nam qui dicit se nosse eum, & mandata eius non custodit, mendax est. Quoniam igitur duæ sunt rationalis naturæ partes, cognitio, & appetitio: duæ humanæ vitæ rationes, contemplatio & actio, duo quoque sunt doctrinæ Christianæ lumina, cognitio Christi, & dilectio, necesse est duas etiam esse doctoris. Euangelici functiones, docere, & exhortari, atque doctrinæ omnis, & cognitionis finis est Christus, omnis exhortationis, & actionis finis est charitas. Porro cognitio Christi, quam Fidem dicimus, symbolo traditur, charitatis omnis actio Decalogo continetur. Ergo prædicatoris Christiani est, & Fidem docere, & mores instituere.

1. Ioan. 3.

A Fide verò inchoandum est, sine qua impossibile est placere Deo, cuius author, & consummator est Christus. Quamobrem illa prima, ac præcipua cura esse debet ministri Euangelici, ut gentibus Christum annuntiet, cum sit nullum aliud nomen sub cælo datum hominibus ad salutem

Heb. 11.

Heb. 12.

Act. 4.

1. Cor. 3.

consequendam.

- Ioan. 10.* consequendam. Neque verò potest quisquam aliud fundamentum ponere, neque est aliud ostium, neque via alia ad vitam æternam. Christus lac paruulis, cibis grandibus, Christus Alpha, & Omega, & principium sapientiæ totius & finis. Desinat Christi minister quærere quid aliud doceat quam Christum, qui factus est nobis sapientia, & iustificatio, & redemptio. Absint procul hæreticorum calumniæ. Christum nobis esse omnia cum dicimus, & nihil præter hunc sapere oportere, non tam sumus stulti, ut idcirco manendum in peccatis sentiamus; quod Paulus execratur, alioqui quomodo Christus vita erit, si nondum peccato mortui sumus? Itaque & dixi, & dicam Christianæ prædicationis fidem esse Fidem Christi non tamen otiosam & mortuam, & quam *1. Cor. 13.* Paulus nihili facit, sed viuam illam, & efficacem, & fructuosam, quæ per dilectionem operatur. *Gal. 5.* Quamobrem quid Fides Christiana habeat, deinde quos mores exigat, differendum est.

CAPVT II.

*Christi annuntiandi curam præcipuam
esse debere.*

- Mat. 19.* **M**ihi verò monstri simile semper est visum, inter tot millia Indorum Christiano nomine donatorum tam esse rarum, qui Christum agnoscat, ut quod Ephesij olim Paulo de Spiritu sancto responderunt, possint hi de Christo

sto melius vsurpare, Neque an sit Christus, audiui-
 mus. Cum verò sint hæc prima elementa
 sermonum Dei, cumque nihil aliud insonet om-
 nis scriptura diuina, quid causæ putemus esse,
 quod vix in hoc loco consistunt aliquando Ca-
 techistæ, vt Christum ostendant, atque impri-
 mant menti Neophytorum? Nam si paulo cu-
 riosius interrogas, vix pleniorẽ de Christo no-
 titiam in plerisque reperias quam de Petro, aut
 Paulo, aut Dauide, aut alio quouis homine,
 interdum ita noua accidit his Christi comme-
 moratio, ac si de Ænea, aut Romulo mentio
 fieret. Quod tantum Euangelij dedecus, tantam
 Christiani nominis contumeliam nescio quo
 fulmine satis vindicari posse existimem, vt ho-
 mo Christianus, & annos iam viginti, aut trigin-
 ta terens Ecclesiam, rogatus de Christo, neque
 quis sit, neque verò an sit, prorsus intelligat. Ac
 docent multi nescio quæ friuola, quidam præpo-
 stera omnino, plerique Christum quidem annun-
 tiant, sed ita cursim, & obscure, vt nihil hîc magis
 Indus consistat animo, quam in cæteris omnibus.
 Hæc ergo prima & maxima Euangelici Catechi-
 stæ præceptio sit, vt Neophytus Christum teneat,
 & memoria, ac intelligentia menteque tota, quan-
 tum capax est, capiat. Et quamvis res notissima
 sit, quam loquor, nullisque testibus egeat, tamen
 dignum est primos Euangelij prædicatores con-
 templari, quid docuerint, & quo omnis eorum
 spectarit oratio. A Christo instructi, & redempti
 nihil aliud quam Christum Magistrum, & Re-
 demptorem perpetuò loquebantur. Siue enim
 Apostolorum Principem Petrum cum plebe, cum,
 principibus

Act. 2. 1.

4. 10.

Act. 7. 8.

Act. 13.

16. 17.

*Act. 13.**16. 17.**Act. 23.**26.**1. Cor. 1.**Ioan. 1.**Ephes. 3.**Gal. 3.*

principibus Iudæorum, cum gentibus differentem, siue Stephanum, siue Philippum, siue Paulum, & Barnabam ad gentes, siue solum Paulum ad gentes sæpe verba facientem, sæpe ad populum Hebræorum, siue cæteros omnes parentes, & præceptores nostros spectes, ne vnā quidem concionem inuenies, in qua Iesu Christi Dei nostri annuntiatio non vel totum argumentum orationis sit, vel certè præcipuus scopus, quod cætera tandem referantur. De Epistolis superuacaneum est dicere, cum quævis illarum pagina Christum loquatur. Cur hoc? Nos prædicamus Christum crucifixum Iudæis quidem scandalum, gentibus autem stultitiam, ipsis autem vocatis Iudæis, atque Græcis Christum Dei virtutem, & Dei sapientiam. Hæc est, inquit, virtus Dei ad saluandum, & Dei sapientia ad docendum, siquidem, & gratia, & veritas per Iesum Christum facta est. Nihil ergo aliud oportet scire, neque aliunde vires, & salutem sperare. Merito Paulus gloriatur sibi id diuinitus datum, vt mysterium Christi excellenter ostenderet. Mihi, inquit ille, omnium sanctorum minimo data est gratia hæc in gentibus Euangelizare inuestigabiles diuitias Christi, & illuminare omnes, quæ sit dispensatio sacramenti absconditi à sæculis in Deo. Itaque gloriantes addit, prout legentes potestis intelligere prudentiam meam in mysterio Christi. Neque verò Euangelici tantummodo & Apostolici studij fuit Christum mundo indicare, verum etiam Prophetæ, & Legalis ætatis, quando velut paruuli tenebamur sub pædagogo conclusi in eam fidem, quæ reuelanda erat, Nam & tunc, & lon-

gè antè cum primum homini Deus innotuit, omnia & gesta, & scripta Christum prænuntiabant, Christum significabant, quemadmodum Apostolus Petrus ostendit, Huic omnes Prophetæ testimonium perhibent. Et Paulus Apostolus velamen veteris testamenti in Christo euacuari. Et ipse Dominus prædicaturos discipulos instituens, Omnia quæ scripta sunt in lege, & Prophetis, & Psalmis de me. Quamobrem cum omni homini in Christi cognitione salus posita sit, cuius eminentem scientiam tanti facit Apostolus, ut præ illa cætera sterco putet, hæc prima hæc potissima, ac propemodum singularis Christiani magistri cura sit, & infatigabilis ardor Christum annuntiandi, Christum docendi, ut Christum omnes agnoscant à minimo usque ad maximum, illamque propriam sui muneris existimet vocem, cognosce Dominum.

Act. 10.

1. Cor. 3.

Luc. 24.

Phil. 3.

Hier. 31.

CAPUT III.

*Contra opinionem eorum, qui sine Christi
notitia posse aliquem saluum
esse volunt.*

QVæ cum ita habeant, vix satis mirari possum, quid præceptoribus quibusdam scholasticis, viris certè grauibz nostri sæculi in mentem venerit, ut nunc quoque temporis post tandiu reuelatum Christum sine Christi notitia salutem cuiquam æternam contingere

re posse confirmant. Quorum opinio tam mihi semper visa est, ac modo quoque videtur absurda, ut nullo modo dubitem antiquos patres Augustinum præsertim in homine Christiano nedum Theologo molestè id accepturos fuisse, ac nescio sanè an etiàm à seueriore censura temperare potuissent, à qua tamen propter authorum & eruditionem, & pietatem abstinendum nobis est, quorum vestigia potius solemus sequi. Sed illud & liberè & vere dicendum est non dignam Theologo esse sententiam, quæ nihil in sacris litteris, nihil in sanctis Patribus firmitudinis habeat, tantum humana quadam suspitione introducta propter eorum infinitam multitudinem, qui in hoc nouo orbe tam longa ætate Euangelii luce caruere, quibus aditus in cælum omnis præcludi videtur, si ad salutem fuerit Christi notitia necessaria, quam rebus humanis ita labentibus consequi nullo modo potuerunt, cum haberent nullos Fidei præcones. Quid igitur, inquit? An his omnibus impossibilem esse salutis viam sentiendum est, in quorum potestate non fuit Oceano traiecto ab Euròpa prædicatores accersere? Ipsos verò sponte venientes sero tandem post mille quadringentos annos viderunt? Quin potius cœlestem ianuam illis aperimus, & notitia sibi concessa saluos esse posse censemus? Rigidum est enim & à Dei qui omnes homines vult saluos fieri, charitate alienum, ut exigat, quæ neque ipse dat, & homines per se præstare non possunt. Hæc illorum ratiocinatio est, qua eo quoque impulsæ sunt quidam, ut sine Fide per naturalem tantum cognitionem salutem consequi

i. Tim. 2.

consequi istos posse confidant, quorum sententia, tametsi Catholici ipsi sint tam est apertè hæretica, ut nihil magis repugnet Fidei, quam sine Fide saluum esse hominum quenquam. Porro alij inde pedem referentes, ne ex tam lubrico, & periculoso loco in præceps sese darent, tutius illi quidem, sed quam consentaneè ipsi viderint, asseruerunt sine Fide quidem neminem esse saluum, sed tamen Fide nihil aliud de necessitate salutis opus esse cognoscere, quam quod naturali ductu intelligi potest. Quasi verò Fides ab Apostolis necessaria definiatur ad illa percipienda, quæ à creatura mundi per ea, quæ facta sunt *Rom. 1.* visibilia, cognosci possunt, ac non potius ad ea quæ in cor hominis non ascenderunt, nobis verò reuelavit Deus per spiritum suum. Nam ad *1. Cor. 2.* naturalia, necessariò cognoscenda natura ipsa non usque adeò deficit. Fides verò est sperandarum *Heb. 11.* substantia rerum, argumentum non apparentium. Quæ ergo non apparent, idest, supra captum, & rationem hominum sunt, de quibus scribitur, Plurima supra sensum hominum ostensa *Ecc. 3.* sunt tibi, ea per se ad Fidem pertinent, cætera verò per accidens. Igitur ut rem propius attingam, post nouum hunc eundemque vastissimum orbem inuentum nostri Theologi talia cœpère & docere, & scribere, cum per mille quadringentos annos, neque in sacris, neque in scholasticis Doctoribus vestigium eius sententiæ extet, quod equidem sciam, quin omnes consentienter affirmant sine explicita Fide Christi neminem esse saluum. Hanc autem suâ sententiam ex quadâ Sancti Thomæ opinione confirmandi occasionem *In 3. d. 26*

libenter arripuerunt, de primum veniente ad
 vsum rationis, quem ad Deum conuerti, & posse,
 & debere vult, atque è vestigio si faciat, gratiam
 iustificationis accipere. Ex quo colligunt nihil
 eiusmodi puero opus esse alia cognitione quam
 boni honesti, quod pro illa ætate potest agnosce-
 re. Horum, pro Indorum salute patrocinium eo li-
 bentius amplecterer, quo me huius causæ studio-
 siorem profiteor, nisi valde reuocaret, quod ad
 Patrem nemo venit nisi per Christum, quod nul-
 la alia est via, qua eatur, nullum aliud ostium, quo
 intretur ad vitam. Ac re quidem verâ, si potest si-
 ne Christi notitia salus esse aut iustitia, ergo gra-
 tis Christus prædicatur. Frustra Apostoli mittun-
 tur in orbem, frustra præcipitur. Qui crediderit,
 & baptizatus fuerit, saluus erit. Non frustra, in-
 quiunt, Christus annuntiatur. Nam & plures &
 facilius, & vberius salutem consequuntur. Ego ve-
 ro existimabam Christi annuntiationem, hoc est
 Euangelium, non vt plures, & melius salui fie-
 rent, necessariam esse, sed vt omnino possent ho-
 mines salutem consequi. Ita sanè existimabam,
 imo verò non existimo, sed tam certò, & apertè
 mihi persuadeo Pauli hanc esse sententiam, vt ne-
 minem putem repugnaturum, qui sincere, & at-
 tente illius verba expendat in eo loco epistolæ
 ad Romanos, vbi expressè hoc versat. Finis le-
 gis, inquit, Christus ad salutem omni credenti.
 Quam sententiam postquam confirmavit, & æquè
 docuit Iudæis, & gentibus Christi fidem neces-
 sariam esse, omittens Hebræos, de quibus satis
 multa dixerat superiore capitulo, transit ad gen-
 tes, & illa propositione prolata, Quicumque
 inuocauit

*Ioan. 6.**Ioan. 14.**Ioan. 10.**Marc. 16.**Rom. 10.*

inuocauerit nomen Domini, saluus erit, affert quæ-
stionem & vrget vchementer, Quomodo ergo
inuocabunt, in quem non crediderunt? Aut quo-
modo credent ei, quem non audierunt? Quo-
modo autem audient sine prædicante? Quomodo
verò prædicabunt, nisi mittantur? Et mox. Ergo
Fides ex auditu, auditus autem per verbum Chri-
sti. Sed dico, Nunquid non audierunt? Et qui-
dem in omnem terram exiuit sonus eorum, & in
fines orbis terræ verba eorum. Hæc Apostolica
responsio est, & difficillimæ quæstionis absolutio.
Quomodo inuocabunt, inquit, in quem non cre-
diderunt? Consentiunt hîc nobiscum Fide opus
esse ad salutem. At quomodo credent ei, quem
non audierunt? Profectò si istorum opinio vera
est, facillime respondetur Paulo, & verissimè,
neque prædicante, neque mittente opus esse, ne-
que vtro audiente, siquidem potest homo con-
cipere Fidem sine aliqua reuelatione aut prædi-
catione; potest sibi sufficere ad salutem sine no-
titia Euangelij, potest inuocare Deum, quem per
ea, quæ facta sunt, conspicit. Nonne ita nobis
respondent, cum Christi notitiam dicimus ne-
cessariam ad salutem? Falsò ergo Paulus docet
neminem sufficienter inuocare, & credere ad
salutem, qui non audierit Euangelicam prædi-
cationem, si vera ista sunt. Quod si Paulus falli
non potest, profectò ista vera non sunt. Si pergas
Paulum interrogare, Quid de ijs, qui nunquam
audierunt Euangelium? Respondet tibi, In om-
nem terram exiuit sonus eorum, & in fines or-
bis terræ verba eorum, nimirum prædicatio-
nem eorum saluti, qui salui futuri sunt ex gentibus,

Rom. 10.

toto orbe terrarum non defuturam, qui verò ex
 iis perierint, suorum scelerum, non ignorati
 Evangelij pœnas duros. Dicis durum hoc esse,
 & asperum, at memineris ab Apostolo eos re-
 prehendi, qui iustitiam suam volentes statuere,
 iustitiæ Dei non sunt subiecti. Non enim hic
 agitur, durumne hoc, & seuerum sit, an be-
 nignum, & liberale, sed vtrum verum necne.
 Alioquin eadem pietatis specie cogentur etiam
 paruulis eorum, qui Euangelium audire non po-
 tuerunt, sine baptismo salutem dare per quam-
 cunque Fidei protestationem parentum, vt olim
 fiebat in lege naturæ? Cur enim paruuli sine
 Euangelico sacramento salui esse non possunt, &
 tamen grandiores sine Euangelicâ lege possunt?
 Quod si fatentur Euangelica lege iam promulga-
 ta nusquam gentium ad iustificandos paruulos
 antiqua sacramenta satis esse, & pro iis omnibus
 vnum dumtaxat valere baptismum (neque enim
 hoc sine aperto errore negari potest) quid quæ-
 so rationis habet, maioribus notitiam legis na-
 turæ ad salutem posse sufficere? Etenim quicquid
 contra nitantur, fateantur pariter necesse est,
 modo sine Euangelica lege homines posse sal-
 uari, quod qui non putat absurdum, cum eo
 ego amplius minimè disputem. Paulum profe-
 ctò apertius loquentem nemo desideret: cuius
 omnes sancti expositores sensum esse, quem
 dixi, probant, maximè Beatus Thomas, cu-
 ius commentationem asferre non moror, cu-
 ius se hi scriptores in primis authoritate tuen-
 tur. Post enarratum ergo locum Apostoli, ita
 dubitat, Nunquid illi, ad quos non peruenit
 prædica

Thom.
 lect. 3. in
 e. 10. ad
 Rom.

prædicatio Euangelij, vt potè si fuerunt nutriti in syluis excusationem non habent de peccato infidelitatis? Ad hoc dicendum est, quòd secundum sententiam Domini, quæ habetur Ioannis 16. Illi qui loquentem Dominum, vel per se, vel per discipulos suos non audierunt, excusationem habent de peccato infidelitatis, non tamen beneficium consequentur, vt scilicet, iustificentur ab aliis peccatis, quæ vel nascendo contraxerunt, vel malè viuendo addiderunt, & pro his damnabuntur. Si qui tamen eorum fecissent, quod est in se, Dominus secundum suam misericordiam prouidisset mittendo eis prædicatorem Fidei, sicut Petrum Cornelio, & Paulum Macedonibus. Hactenus Thomas. Augustini autem de hac re tam est aperta sententia, vt nullo modo subterfugi queat. Aded enim Christi notitiam ad salutem necessariam vult, vt iis etiam, qui ex gentibus ante tempus Euangelicum seruati sunt, minimè id contigisse dicat absque reuelatione vnus mediatoris Dei & hominum Iesu Christi. Nam vt cætera missa faciam, ita scribit in libris de ciuitate Dei, Diuinitus autem prouisum fuisse non dubito, vt ex hoc vno sciremus (loquebatur autem de sancto Iob) etiam per alias gentes esse potuisse, qui secundum Deum vixerunt, eique placuerunt, pertinentes ad spiritualem Hierusalem. Quod nemini concessum fuisse credendum est, nisi cui diuinitus reuelatus est vnus mediator Dei, & hominum homo Christus Iesus. In secundo quoque libro de gratia Christi id ipsum multis confirmat. Neque tamen displicet mihi illa quorundam tem-

Aug. 10.
c. 16.

Aug. li.
18. de Ci-
ui. c. 47.

*Aug. lib.
2. de gra-
tia Chri-
sti. c. 24.
25. & 26.
Gal. 3.*

peratio, vt implicita quidem fides Iesu Christi, explicita vero vnus mediatoris satis fuerit ad salutem consequendam ante Euangelicum tempus. Tunc enim, vt ait Paulus, tanquam paruuli custodiebamur inclusi in eam fidem quæ reuelanda erat. At post reuelatam fidem, patere alicui vitæ ianuam nisi per reuelatam, & expressam Christi cognitionem nullo modo assentior, omnibus & antiquis, & nouis scriptoribus hac parte stantibus præter paucos quosdam scholasticos, qui neque ratione aliqua firma, neque veterum auctoritate, sed sua potius suspicione ducuntur. Neque verò extremam salutem tantum, sed iustitiam etiam primam sine Euangelij cognitione post promulgatum orbi Euangelium cuiquam contingere existimo, in quo alij minus molestè, sed tamen falso contradicunt. Neque Augustini alium fuisse sensum quicquid hi contenderint demonstrabunt. Non enim Cornelij (quoniam hoc loco vrgent) eadem causa est, & infidelium huius temporis. Etenim quemadmodum Iudæis fides vnus mediatoris tunc temporis sufficiebat ad iustificationem, antequam Iesus Christus euangelizaretur, ita quoque Cornelio Iudæorum, & libris, & consuetudine instructo sufficere potuit, vsque dum à Petro disceret Christum. Nunc verò postquam toto orbe terrarum Iudaica, & lex, & sacramenta prorsus abolita sunt, vt non mortua solum, sed etiam mortifera sint, omnino Euangelica mensura quærenda est fidei, sine qua nemo, quod satis est, credit, cum lex fidei sola iustificet, id est, nullum aliud salutis initium sit præter fidem Iesu Christi. Quod si quis pergat quærere.

*Aug. lib.
de Prad
sanctor.
c. 7.*

quærere. Ex quonam tempore explicita fides Christi cœperit esse necessaria ad iustitiam, equidem respondebo ex illo ipso, cum primum promulgatum est orbi Euangelium. At Indis non erat hætenus promulgatum, inquis, ita ego sanè arbitror, verum nihil ad rem. Neque enim de ea promulgatione sermo est, quæ cuiusvis ignorantie locum nullum relinquit, sed de ea potius, quæ cum solemnibus sit, & pro legislatoris voluntate conueniens, omnes contrarias leges abrogat, contractusque dissolvit. Scimus igitur sacramenta omnia, & legis, & naturæ abolita esse, scimus Euangelicam legem quæ est fides Iesu Christi, omnes mortales aliquando cœpisse obligare: quo verò primum tempore sufficienter promulgata fuerit, aliis aliter statuentibus, nos nescimus. Cornelij certè tempore nondum plenè propalatum fuisse Euangelium Gentibus, vel ipse Petrus testis est, cui ea de re erudiendo cœlesti visione opus fuerit. Nunc ergo cum æquè vel notum, vel ignotum sit Gentium populis siue esse aliquem mediatorem diuinitus prouisum, siue hunc esse solum Iesum Christum, non est, cur sine Euangelij notitia remissio peccatorum alicui tribuatur. Alij sentiunt Cornelium non verè iustificatum esse coram Deo ante Petri prædicationem, cum & animali immundo comparetur, & audita remissione peccatorum per Christum ceciderit Spiritus sanctus, neque ab ea sententia valde abhorret Chrysostomus: verum quia difficile est, quem scriptura religiosum, & timentem Deum, & acceptum Deo & operantem iustitiam dicit, non eundem vere iustificatum intelli-

*Ita sentit
apertè D.
Greg.
hom. in
Exec. 9.*

*Beda in
acta, fide
operantem
tribuit
Cornelio*

gere , commodius explicatur accersendi Petri necessitas , non vt absolutè gratiam consequeretur , sed vt Euangelicam gratiam ea plenitudine & firmitate qua per Iesu Christi fidem conferebatur. Modo verò post latè prædicatum Euangelium eiusdem necessitatis putamus credere , &

Tho. 1.2.

q. 113.

pr.4. ad

2. & 3.

Cōc. Tri.

sess.6.c.6

ficari neminem & olim beatus Thomas, & nuper sancta Synodus Tridentina decreuit. Sed quid agemus de infinitis hominum millibus , qui neque audierunt Euangelium, neque verò audire potuerunt ? An eorum neminem saluum esse posse censebimus ? Minime vero. At sine miraculo fidem doceri non possunt. Primum miraculum dici non debet Dei peculiaris prouidentia vel Angelum, vel hominem destinantis , vt Euangelizet ei , qui quod potest, præstitit. Nam vt rarum hoc est, & rarissimum vt in natura iam obscurata, & grauissimè saucia ad tam præclaros quisquam conatus assurgat, idque sine præueniente Dei auxilio facere nequit, ita prouidentia singulari non destituentum ipsa ratio confirmat, cui tam singulare contigerit studium boni. Quod si adhuc miraculum vocandum perstant, quid de nomine digladiandum est ? Certè hi tanquam eiusmodi opera Deo graua aut angusta & inusitata forent, ita parcè & arctè cohibenda putant. An non ad ipsum illum Cornelium, & Angelum, & Petrum missos legunt ?

Acto. 10.

Acto. 8.

Acto. 16.

An non ad Eunuchum Candacis Reginae Philippum Diaconum ? An non ad Macedones , & ad Lydiam Paulum ? Quod si noua quærimus , præsto est Paulus ille Iapponensis , qui tanto tempore criminum suorum medelam exoptans, & Francis-

cum

cum Xauerium quærens tam longo maris circuitu, eoque non inuento abiens Malacam tempestate reuocatus est ex ipso Sinensium aspectu, vsque dum in illum rediens incideret, & Christi Euangelio audito per fidem non solum ipse seruatus sit, verum amplissimæ genti suæ Christum annuntiandi Francisco fuerit, & hortator & dux, Ad hunc sanè modum de cæteris, si qui tales extiterint, sentiendum esse non tam ego quam Thomas ipse respondet: à quo cum obiectionem suam dilui videant, nescio quomodo in eam sententiam vocare possint, quam refellit. Sed de puero veniente ad vsum rationis negotium nobis ex Sancto Thoma facessunt. In quo si nulla neque ab Angelo, neque ab homine doctrina expectanda est, certè neque Christi, neque Dei notitiam pro illa ætate firmam habere potest. Itaque iustificabitur is, qui Deum adhuc non nouit, & falsum erit quod Apostolus de fide necessaria, vt placeatur Deo, scripsit, Credere oportet accedentem ad Deum quia est, & quia inquirentibus se remunerator est. Quod si & hoc ipsum implicitè credi satis esse dicunt, profectò nihil dixit Apostolus. Nam implicitè non illa solum credere oportet accedentem ad Deum, verum & illa, Adam extra paradysum formatum esse, & octo animas in arca Noë seruatas, & Tobia filium fuisse cognominem, & quicquid diuinæ literæ tradunt, Quod si certa aliqua fidei mensura designanda est, & firma saltem de Dei maiestate & prouidentia conceptio, profectò à quo hanc fonte puerulus haurire potest nulla doctrina imbutus, nulla experientia ductus, ab eodem facile

*Th. 14. de**Verit. ar.**10. ad 10.**Grin c. 10.**Rom. lect.**3.**Hebr. 11.*

facile hauriet, & Christi mysterium, cum vtrumque vel diuinitus, vel humanitus edocendus sit. Itaque vel opinio illa D. Thomæ non vsque adeo tenaciter est tuenda, quam etiam illius plerique discipuli non satis sibi persuadent, vel si retinenda est, ad eum modum explicanda est, quem antiquiores illius discipuli sequuntur, vt etiam pueri iustificationem reuelatio Christi antecedit. Neque enim propter incertas opiniones dogmata debemus certa deserere. Cum ergo fides infusa necessaria sit, non vt credat homo, sed vt aliquid credat, id est, non tam propter actum quam propter obiectum, quærenti quodnam sit illud, nihil aliud occurrit, quam quod Patres tradunt, vt credamus vera esse, quæ diuinitus reuelata & promissa sunt, atque illud in primis à Deo iustificari impium per gratiam eius per redemptionem, quæ est in Christo Iesu. Quamobrem mysterium Christi primum ac potissimum docere debemus, si illius sapientiam sequi volumus, qui dicebat, Nihil aliud arbitratus sum me scire inter vos nisi Iesum Christum & hunc crucifixum.

Cont.

Trid. Sess.

6.6.6.

1. Cor. 2.

CAPVT IV.

Contra errorem illius, qui Christianos rudiores sine Fide explicita Christi asseruit posse saluari.

BEne autem habet quod nemo scriptorum Christi notitiam necessariam negat iis, quibus fides prædicata est, quin potius disertè admonent

monent præceptum de Christi mysterio explicitè credendo, & diuinum esse, & omnibus hominibus necessariò propositum, tum vero eos, qui fidem audierunt sine illius mysterij cognitione saluos esse non posse. Aiunt verò infideles barbaros, quibus Euangelium non est nuntiatum propter ignorantiam excusari à peccato, quod nos quoque libenter damus: sed eosdem, si fecerint quod in ipsis est, sine fide explicita Christi salutem consequi posse censent, quod nobis nequaquam placet, sed interim teneamus illud, quod nemo Catholicus potest abnuere, De mysterio Christi expresse sciendo Christianis omnibus sine exceptione diuinum esse præceptum, neque verò quenquam eorum, quibus Euangelium prædicatur, ad salutem iustitiæve coram Deo peruenire posse nisi per fidem explicitam Christi. Qua de re non ita pridem in hoc nouo orbe vir quidam diu, & insigniter doctus, & valde religiosus habitus, iam vero magnus, vel factus, vel patefactus Hæreticus nouum dogma, vt ille quidem iactabat, pium & salutare, sed reuera valde impium, & perniciosum inducere conatus est, idque multis prolixisque commentationibus egit, vt persuaderet, Nempe Indorum populis cæterisque hominibus rudioribus non esse necessarium ad salutem, vt mysterium Trinitatis, neque verò mysterium Christi explicitè crederent: sed satis esse, vt scirent vnum esse Deum, eumque bonis præmia, malis supplicia digna reddentem, in cæteris verò legem nostram, hoc est Christianam, diuinam esse & certò tenendam. Denique præter illa

duo

duo nihil aliud quam vt crederent communiter & implicite, quæ tenet Ecclesia. Quamobrem hæc ipsa Indis prædicanda esse, cætera non ita magnopere curanda. Causam huius sui dogmatis ille reddebat, quod Deus ad impossibile neminem obliget: esse verò tam obtuso & absurdo ingenio plerosque, vt neque mysterium Trinitatis, neque mysterium Christi percipere possint, quos si cogas isthæc explicitè credere, nihil aliud agas, quam vt cœli ingressum miseris occludas. Addebat porro cum diu de hac re secum ipse deliberasset, atque ita sentiret, vt dixi, diuina se reuelatione penitus confirmatum vsque adeo, vt Paulum ipsum Apostolum per reuelationem dixisse affirmaret, Rudioribus non esse necessarium ad salutem credere Christum esse hominum Saluatorem. Quis verò Pseudopaulus ille, & pessimus dæmon fuerit, Angelus lucis haberi volens, satis iam ac plus etiam quam vellemus, innotuit. Sed authore misso, ipsum dogma tractemus eoque accuratius, quod iugulum ipsum Euangelij ferire contendat. Omnis penè prædicationis Indicæ labor & cura tollatur necesse est, si vera illa sint. Paucis verò non solum impiam, sed stultam quoque assertionem perspicuè demonstrabo. Quid enim impium magis, quam & apertæ Domini sententiæ, & gentium salutis per Christum obtinendæ contradicere? Ite, inquit, in mundum vniuersum, & prædicate Euangelium omni creaturæ, qui crediderit & baptizatus fuerit, saluus erit, qui vero non crediderit condemnabitur. Euangelium ergo suscipere & credere omnem creaturam oportet, si salua esse velit. Atqui Euangelium, & Christi notitia no-

mine

Marc. 16.

mine quidem sunt duo, re ipsa penitus idem. Quomodo enim Euangelium nouit, qui Christum non nouit? Ex quo planè apparet, quam stultè illud dicatur, vti is, qui fidem Christianam habet, Christum tamen ignorare possit. Nam si quis Æneida aut Odyssæam tenere sese diceret, neque tamen Æneam aut Vlyssæm vnquam audisse, quis obsecro risum tenere posset? Præterea quis nouit se fieri aut esse Christianum, & non Iudæum aut pagani, qui Christum non nouit? Quomodo eam legem profiteri potest, qui quid lex habeat, ignorat? Omnis Christianus, quatenus Christianus est, Christum profitetur. Itaque docere quendam Christianum esse debere, si saluus esse velit, neque tamen opus esse, vti Christum agnoscat, nihil aliud est quam cum ratione insanire. Ad hæc quam ineptè & fatuè iubetur Indus credere, quæ credit Ecclesia, qui tamen Christum ignorare permittitur? Omnino repugnat vtrumque. Etenim Ecclesiam nisi congregationem fidelium Christum verè tenentium intelligat, non magis Ecclesiæ credit quam synagogæ Iudæorum, aut Scholæ Atheniensium, sine Christo enim Ecclesiæ neque esse, neque intelligi potest. Siue ergo Ecclesiam voces, siue Christianorum legem, siue fidelium coetum, nisi Christum Indus agnoscat, Ecclesiæ mysterium scire non potest. Vt illud præteream, quantæ insanix sit mysterium Ecclesiæ mysterio Christi præponere in necessitate fidei explicite. Ioannes certè Apostolus ita colligit, Et hoc est mandatum eius, vt credamus in nomine filij eius Iesu Christi. Et hæc est, ait, victoria quæ vincit mundum, fides nostra. Quæ autem sit fides

1. Ioan. 3.

1. Ioan. 5.

fides nostra, statim adiungit, Quis est qui vincit mundum, nisi qui credit, quoniam IESVS est filius Dei? Igitur eiusdem præcepti, eiusdem necessitatis est Christiano credere, & in Christum credere, eadem fides Christiana, & fides Christi. Docendi ergo sunt Indi, & gentes omnes mysterium Christi, & qui genus aliquod hominum inde excipit, grauitè errat, ne hæreticum apertè dicam, quod tamen nonnulli graues authores intrepidè affirmant. Sed homo absurdus est, inquit, rudis, hebes, senex est iam decrepitus, Æthiops est trunco similis, Vrus est vix quicquam à pecude distans. Hosne atque horum similes Trinitatis mysterium discere coges, quod est vsque adeo difficile magnis etiam & promptis ingenijs? Mysteriumne Christi, quod captum superat mentis humanæ ex tam stolido sensu exiges? Ego verò mysterium Christi (nam de cæteris dicam postea) intelligere neminem cogo, quod est paucorum, credere verò omnes debere dico, quod nemo non potest. Nemo enim tam est absurdus, qui nequeat utique cogitare Deum & hominem. Doceri ergo potest, Deus factus homo, hic est Christus IESVS, addat, cur id sit factum, ut nos prorsus à peccatis eriperemur, & vitam consequeremur, atque ita discet esse vnicum Saluatorem nostrum. Mox ordinem quoque doceatur, quod conceptus sit Spiritus Sanctus opera ex Virgine, & natus, & crucifixus, & post mortem resurgens in vitam immortalē. Hæc profectò cogitatione percipere non est impossibile, quin potius si Paulo Apostolo credimus, prope est valde verbum in ore nostro & in corde nostro, hoc est verbum Fidei, quod

*Domini-
cus S. 10
in 4. d. 5.
art. 2.*

Rom. 10.

quod prædicamus, quia si confitearis in ore tuo Dominum IESUM, & in corde tuo credideris quòd Deus illum suscitauit à mortuis, saluus eris. Cum ergo quæritur, quid in mysterio Christi gentes docendæ sint, respondetur, Dei filium factum hominem propter nos crucifixum resurrexisse, quam summam esse Euangelij rectissimè dixit Chrysostomus. Itaque tria quædam breuiter insinuantur, Primum Christum esse Deum & hominem, deinde mortuum esse propter peccata nostra, tertium, vitam immortalem, & beatam possidere, quam nobis communicare vult. Hæc qui nullo modo percipere possit, neminem esse arbitror, si congruenter doceatur. Nam & corporali imaginatione cogitari possunt, quod est hominibus facillimum, & vtcumque depingi, & verbis exprimi satis queunt. Memoriter verò tenere, & acutè intelligere, & aptè explicare scio non omnes posse, & Deum bonum nihil exigere ab homine, quod præstare non possit. Quod si quisquam tam obtusus & saxeus vel fingatur, vel reperiatur, qui nullo modo cogitare & percipere possit Christum esse hominum Saluatorem, & Dominum, hunc ego vel sensus humani expertem existimabo, vel propter sua crimina diuino iudicio retardari, ne vel fidem doceatur congruenter, vel beneuolè capiat. Neque enim dubitamus esse non paucos, qui non habent aures audiendi, quibus licet foris insonet Euangelij tuba, intus tamen surdissimi sint. Vt iuxta verbum propheticum audientes non audiant. Nam & consentire verbo fidei percepto diuinæ gratiæ est, & ipsum quoque quantum satis est, mente concipere, & cogitare

Esai. 6.

cogitare non nullius est gratiæ, ita vel illud vel hoc sicut negatur, diuini iudicij est, cuius effectus cum sæpe cernamus, causas tamen planè ignoramus. Denique quicumq; diuinitus ad fidem Christianā idoneus iudicatur, sine qua salus & iustitia esse non potest, idem ad mysterij Christi agnitionem, quantum satis est, idoneus existimandus est, quam si vel neglexerit, vel assecutus non fuerit, ostium vitæ æternæ nondum inuenisse sine vlla dubitatione existimandus est.

CAPVT V.

Quodd præcepto cetera mysteria, quæ continentur in Symbolo, scire omnes Christiani constringantur.

Tit. 2.

Mysterium verò Christi nemo potest perfectè, & vt par est, cognoscere, nisi mysterium quoque & Trinitatis, & Ecclesiæ doceatur. Nam Iesus Christus Dei filius de Spiritu Sancto conceptus est, mortuus est autem, vt suo sanguine mundaret sibi populum acceptabilem sectatorem bonorum operum, in quo esset remissio peccatorum, & salus æterna per fidem, & Sacramenta Christi. Itaque tribus hisce mysterijs, Christi, Trinitatis, Ecclesiæ, Christianæ fidei summa definita est. Quamobrem ab Apostolis tribus veluti partibus symbolum distributum est. Et quæ quidem ad naturam

diuinitatis pertinent, in primo loco patri attributa sunt, quæ verò ad dispositionem redemptionis nostræ, secundo loco Dei filio Iesu Christo: porrò quæ ad fidelium gratiam & sanctificationem, ea tertio loco Spiritui sancto ascripta sunt. Neque verò illorum est modo error refellendus, qui plebeio & rustico homini satis esse putant, vt se tenere profiteatur, quæ tenet Ecclesia, qui ab ipsa iam pridem Ecclesia damnati sunt. Quin potius audiamus Augustinum eorum sententiam data opera refellentem, qui sentiebant sufficere ad percipiendum baptismum confessionem Iesu Christi filij Dei. Ita enim scribit in lib. de Fide & operibus, spado (inquiunt) ille, quem Philippus baptizauit, nihil plus dixit, quam credo Dei filium esse Iesum Christum. Et in hac professione continuo baptizatus est. Num ergo placet, vt hoc solum homines respondeant, & continuo baptizentur? Nihil de Spiritu sancto, nihil de Sancta Ecclesia, nihil de remissione peccatorum, nihil de Resurrectione mortuorum? Postremo de ipso Iesu Christo nihil, nisi quia filius Dei est? Non de incarnatione eius ex Virgine, de Passione, de morte Crucis, de sepultura, de tertij diei resurrectione, de Ascensione, ac sede ad dexteram Patris aliquid dicendum est catechizanti, & profitendum credenti? Quæ necesse habemus etiam cum ad baptismum temporis vrget angustia, exprimere interrogando, vt baptizandus ad cuncta respondeat, etiamsi ea memoria mandare non valuit. En quid exigat Augustinus idque ex recepta consuetudine totius Ecclesiæ. Et nos dubitabimus teneri quemvis Christianorum symboli mysteria nosse, & expli-

*Aug. lib.
de fide, &
ope. c. 9.
Act. 8.*

*Leo epist.
13. ad
Pulche-
riam Au-
gustam.
Concil.
Laod.
c. 46.
2. Concil.
Brach. c. 1*

cate credere, quæ à morituris quoque exigeban-
tur ante baptismum? Certè Leo Papa nulla exce-
ptione facta, Quod continetur, inquit, in symbolo,
Dominus noster in Ecclesia neminem vtriusque
sexus voluit ignorare. Concilij Laodicensis decre-
tum extat, symbolum disci oportere & reddi Epif-
copo, aut Presbytero ante baptismum. In Bracha-
rensi Catechumeni totum symbolum Apostolo-
rum doceri iubentur. Sed notior res est, quam ut
testimonijs, quæ sunt plurima, indigeat. Igitur om-
nes Christiani nemine excepto fidei capita, quæ
continentur in symbolo, quantum illorum captus
fert, explicatè tenere diuina autoritate coguntur,
qua de re scriptores quidam docti non doctè pro-
fectò dubitant, quorum de hoc diuino præcepto
refellendo aut cohibendo sententia, vix in opinio-
num numero referri potest, cum nostri & multitu-
dine, & autoritate multis partibus superiores
sint. Quoniam verò ea, quæ communiter præci-
piuntur, propter vrgentes aliquas causas excusari
nonnunquam possunt, non est dubitandum, quin
temporis angustia, aut sensus hebetudo, aut minus
idonei doctoris facultas, sæpe imbecilliores excu-
set, si non vsquequaque omnia illa fidei mysteria
norint. Si enim baptismi percipiendi, itémque Eu-
charistia sumendæ, & confessionis peccatorum
Christiano faciendæ, cum iuris diuini præcepta
sint, tamen potest nonnunquam homo excusari,
vel ministro absente vel ipsa materia, vel sua ipsius
impotentia ad loquendum, vel alijs etiam ex cau-
sis, neque tamen si voto & animo præstet quod
potest, cum vero corde Deum quærat, excludetur
à regno, nihil profecto est cur, quamvis diuinum

*Tho. 2. 2.
q. 2. ar. 7.
c. 8.
Mag. in
4. di. 1. c.
Scholasti-
ci ibi, c.
in 3. dist.
25.*

de fidei præcipuis mysterijs ab Apostolis traditis cognoscendis, & expresse profitendis præceptum fit, tamen excusari & absolui non possint multi, quorum sensus tam est exiguus, ut non usquequaque sufficiat, aut ætas grauis, aut præceptoris inopia, aut aliud extrinsecus obiectum impedimentum. Neque enim contemnet hos, qui fecit illos, *Sap. 6.* quoniam pusillum & magnum ipse fecit, & æqualiter est illi cura de omnibus, neque deerit Dominus fidei & bonæ voluntati hominis, qui quod potest, bona fide præstat. Itaque sunt illa quidem omnia symboli capita docenda, discendaque diligenter, & omni studio incumbendum, ut hæreant, idque nulla negligentia detrectari potest, nulla occupatione præpediri, nullius negotij magnitudine contemni, cum sit ipsa animæ salus fides Ecclesiæ: sed tamen ubi necessitas & impotentia obstant, non debemus putare defuturum Deum, si modo ea mensura non desit, quam necessariam diximus omnibus, neque valde difficilem, sine qua salus nemini patuit. Ea verò est, ut credat in vnum Deum per Iesum Christum vnicum Saluatorem peccata hominibus remittentem, & sibi obedientibus æterna bona præbentem, sine qua fidei mensura neminem Christianorum fuisse, neminem fore saluum mihi sanè persuadeo.

CAPVT VI.

De mysterio Trinitatis omnibus tradendo.

*Damasc.
lib. 4. de
fid. 10.*

DE Trinitatis ergo arcano an omnes etiam valde imperiti & rudes necessariò docendi sint, partim rectè dubitatur partim non rectè. Nam aliqua ex parte omnes illud debere cognoscere præter Patrum auctoritatem ea vna ratio apertè declarat, quod nemo Christianus fiat percipiatque baptismum (quod fidei Sacramentum antiqui vocant) nisi in nomine Trinitatis. Qui ergo Christianum se esse nouit, non potest iure ignorare mysterium, in quo vnico Christianus effectus sit. Adde quòd ex Apostolica & veteri traditione nemo baptizatur in Ecclesia Christi, nisi prius rogatus, an credat in Deum Patrem, & in Iesum Christum Dei Filium, & in Spiritum sanctum, responderit firmiter sese credere. Quantumvis ergo hebes sit, si iudicij aliquid habet, & ita rogatur, & ita respondet, prorsusque ita expresse credere iubetur. Namque implicitè & inuolutè non isthæc solum, sed quæcunque diuinæ literæ produnt, credit, de quibus tamen non omnibus interrogatur, quod ea expresse scire omnia illi minimè opus sit. Præterea cum nemo tam imperitus Christianæ disciplinæ sit, quin & se & res cæteras signare salutariter doctus sit in nomine Patris, & Filij, & Spiritus sancti, quoniam modo ei ignorare fas erit, quod quotidie frequen-

tat.

tat ? Nihil ergo est , cur propter Æthyopum In-
 dorumve barbariem nouum dogma cudatur , de
 Trinitate non necessario docenda , quod plures
 grauiioresque Theologi , & Ecclesia ipsa , nisi fal-
 lor, in Athanasij symbolo satis redarguit. Sed sub-
 tile est, inquiunt, mysterium, & valde sensum hu-
 manum excellens:istorum verò sensus tam est ob-
 tusus , vt ne cogitare quidem Trinitatem queat.
 Primum qui ita differunt, velim an se fortassis
 cogitare posse respondeant. An præter certos ac
 definitos loquendi modos ex Ecclesiæ , & Theo-
 logiæ regulis sumptos, quicquam amplius in tam
 sublimi arcano Theologi norunt ? Nihil opinor.
 Nam de me certus sum equidem. Quid enim sen-
 tiendum , & quomodo enuntiandum sit , rustico
 literatus præstat: quid porro id sit , & quomodo
 cogitandum , nihil propemodum inter vtrumque
 interest. Non ergo intelligentia, quæ valde pau-
 corum est, tanti mysterij, quam non tam lectione
 librorum , quam diuinitus luce perfusa mens ca-
 pit , vt Augustinus optimè docuit , sed simplicem
 synceramque Fidem postulat Sancta mater Eccle-
 sia , à qua cur alienare quosvis homines debeat-
 mus omnino non video. Quemadmodum enim
 sacrificia olim offerebantur Deo pia populi reli-
 gione , quorum tamen vim , & significationem
 pauci admodum satis perciperent , & nihilomi-
 nus à suis Deus ista exigebat, quod in iis, quæ vi-
 debant, ea, quæ non videbant, protestabantur : ita
 planè in nouo testamento , vbi cruentæ abolitæ
 sunt victimæ, & vituli acceptissimi sunt labia con-
 fitentium Domino , vult profectò Deus fideles
 suos offerre , & cordis , & oris confessionem se-

Tho. 2. 2.
 q. 2. schol.
 lastici in
 3. d. 25.

August.
 l. 14. de
 Trin.

*Phil. 2.**Hosius
lib. de Fi-
de, c. 2.*

cundum spiritum Fidei, vt Patrem, & Filium, & Spiritum Sanctum adorent, & colant; quamvis quid ore proferant, quid mente credant, vix plerique percipiant. Nam & ipsa Fides est argumentum non apparentium, quam etiam sacrificium quodam loco vocat Apostolus. Sed premunt adhuc nonnulli hæc ipsa amplius. Trinitatis mysterium in hoc esse aiunt, vt tres diuinæ personæ in vna eademque essentia credantur. Atqui inuenies quam plurimos, qui neque quid sit distinctio personarum, neque quid essentiae vnitas cogitare queant. Ego sanè tales esse non in India & Æthiopia solum, sed in ipsa Hispaniæ, & Italiæ curia plurimos arbitror. Hos ergo excludemus ex notitia Trinitatis? Minimè verò. Quin potius doctissimi Cardinalis Hosij, & de Catholica Ecclesia optimè meriti sententiam valde probo. Distinctionem inquit, personarum & vnitatem substantiæ, si qui sunt rudiores, quam vt comprehendere possint, non est adeò necessarium ad salutem omnibus explicatè credere, vt si quis minus hæc fuerit assecutus, de eius salute dubitandum sit. Rectè prorsus ac piè. Namque vt rudiores mysterium Trinitatis, quantum satis est, credant, satis omnino est illis, si verè credant in vnum Deum Patrem, & Filium & Spiritum sanctum. Neque opus est ista morosè premere apud tales, quæ si subtilius exquirantur, de illorum exiguo sensu elabuntur. Teneant ergo, vnum esse Deum omnipotentem, omnium rerum creatorem, teneant hunc esse Patrem, & Filium, & Spiritum sanctum. Quod si præterea facultas suppetat, doceri possunt has tres esse distinctas personas, & æquales per omnia, sed Deum om-

nino

nino vnum, propter vnam eandemque omnino substantiam. Quicquid enim de hoc mysterio sentiendum est, Ecclesia breuiter posuit, Vt in personis proprietates, in essentia vnitas, in maiestate adoratur æqualitas, ad quæ ferè Augustinus confert *August. epist. 102.* omnia à se disputata per quindecim libros in ea epistola, quam scripsit Euodio, sed sicut religiosa diligentia ista plebi exponentium laudanda est, ita improbanda quorundam importuna morositas de distinctione personarum, de vnitae essentiae à rudissimis hominibus rationem extorquentium, quæ neque comprehendere satis possunt, & cum vt-cunque comprehendunt, penitus explicare non possunt, nisi fortè verbis conceptis memoriæ mandarint, quod vt in puerili ætate non est inutile, ita non firmum est intimi sensus indicium. Opus ergo est, vt omnes doceantur credere in vnum Deum Patrem, & Filium, & Spiritum sanctum, quemadmodum religio Christiana veneratur, idque & rudibus satis est, & pro eorum tenuitate non impossibile.

CAPIT VIL.

De mysterio Ecclesiæ tenendo.

DE sancta verò Ecclesia articulus à vulgari-bus Catechistis ferè omittitur, causam eam opinor, quod in mysteriis Fidei explicandis non tam symboli Apostolici seriem sequantur, quam vsitatam istam distributionem articulorum Fidei

in septem ad diuinitatem pertinentes, & totidem ad humanitatem, quæ sanè distributio vt non est contemnenda, ita nullo modo, aut præferenda aut comparanda symbolo, quod ab Apostolis esse

*Clemens
epist. 1.
Cypri. in
symb. ex-
po. Leo ej.
13.*

*Aug. ser.
181. de
Temp. &
serm. 115.
Th. in Di-
rect. In-
qui. p. 1. in
Decre. de
summa
Trinit.
Tho. 2. 2.
q. 1. art. 8.*

compositum Cypriani, Clementis totiusque Ecclesiæ consensu accepimus (& quidem certis ab vnoquoque sententiis collatis in medium, si Leoni, & Augustino clarissimis Doctoribus credimus) & est omnino non minoris authoritatis apud fideles, quam Euangelium Ioannis. At vulgaris ille articulorum ordo, qui in puerorum tabella apud nos circumfertur, in commentario quodam S. Thomæ Aquinatis inuenitur, (authorem antiquiorem certi nominis me legisse non memini.) At in hoc ipso Ecclesiæ mysterio explicando valde deficit. Nihil illic de Ecclesia, nihil de communionem Sanctorum, nihil de remissione peccatorum per Sacramenta, quæ tamen nosse summopere refert. Nam quod Thomas in articulum Saluatoris rejicit Ecclesiam, communionem Sanctorum, & peccatorum remissionem, non est quidem falsum, sed ita obscurum, vt illo verbo nihil tale populus suspicari queat, nisi à Doctore commonefiat. Hanc igitur ob causam opinor hunc articulum vulgo non ita notum.

*Aug. sæpe
cōtra Do-
natistas.*

Est verò per quam necessarius, ab Augustino, cum de catechizandis rudibus agit ac sæpe alias, vsque adeo commendatus, vt dicat sæpius & planius in scripturis Sacris de Sancta Ecclesia, quam de ipso Christo prophetatum. Adde, quod ab hoc vno, si non dissentiat Christianus, quamvis in cæteris fortè labatur, Christianus esse non desinet: huic vni si sese subtrahat, Fidelis esse non potest. Est enim

enim Ecclesia Domus Dei viui columna, & firmamentum veritatis. Doceantur ergo Indi de Ecclesia tria præcipue. Primum, quid illa sit, congregatio certè hominum Christum, doctrinamque Christi profitentium, non Hispanorum, aut barbarorum, aut nationis, & gentis cuiusdam numero, & sorte definita, omnia terrarum spatia, omnes temporum successiones complectens. Hoc nihil est aliud quam ipse populus Christianorum, singuli enim, vt præclare Augustinus dixit, filij sumus, & partes Ecclesiæ, omnes verò simul, ipsa met mater Ecclesia. Huius verò caput esse Romanæ vrbis Pontificem Petri successorem, Christi vicarium, plenissima ipsius in terris autoritate polentem, cui cæteri omnes Christiani etiam Reges, & Principes pareant. Hoc est Ecclesiam Catholicam credere, & vniuersalem. Secundum, hanc eandem Apostolicam, & sanctam esse. Nimirum huius Ecclesiæ doctrinam à Deo esse perfectam, neque vnquam errasse, errareve posse: quicunque verò ab ea recesserint, sine vlla dubitatione grauissimè errare, præterea in hac vna esse salutem, vt nemo, qui ab ea alienus sit, saluus esse possit, quocunque ille religionis nomine gloriatur, itaque soli populo Christianorum patere cælorum aditum. In ea quoque licet plurimi reperiantur, peruersis moribus, esse tamen alios puros & sanctos, illosque ipsos prauos ipsius Ecclesiæ præceptis non obtemperare, ac proinde graues improbitatis suæ pœnas daturos. Postremum sit, introitum in hanc Ecclesiam esse per Baptismi sacramentum, quo peccatorum omnium remissio donatur, iis verò, qui in ea iam sunt abluti salutari

*August.
quæst.
Evang.
lib. 1. c. 18.*

salutari lauacro, alia esse sacramenta diuinitus data velut pharmaca, & dona cœlestia tum ad remittenda peccata, si denuo committantur, tum ad vberiore gratiam promerendam, præsertim Pœnitentiæ, & Eucharistiæ, in qua sit Christus pro nobis oblatus, factus, & hostia pro nobis, Deo placando, & nostris animis reficiendis cibus suauissimus. Hoc enim magnum est pietatis sacramentum, id est, Ecclesia Christi, quod manifestatum est in carne, cum sit Ecclesia visibilis, iustificatum est in spiritu pro internorum donorum magnitudine, apparuit Angelis per Ecclesiam multiformis gratia Dei, prædicatum est gentibus eas esse concorporales, & participes Christi, creditum est in mundo Euangelio ubique crescente, & fructificante, assumptum est in gloria, quando mortale hoc absorbeatur à vita. In tanto ergo diuinæ sapientiæ mysterio, id est, Ecclesiæ sanctæ articulo novis Fidei tyronibus commendando, & exponendo nullo modo decet Parochorum diligentiam studiumque cessare.

1. Tim. 3.

Ephes. 1.
ibi.

Col. 1.

1. Cor. 15.

CAPVT VIII.

*Quid in extremo mortis discrimine Indi-
docendi sint, ut baptizentur.*

QUod si cui repentinus morbus incidat, qui spe vitæ exclusus Christianum se fieri velle significet, quod sæpe vidimus, is verò & rudis sit,

fit, & temporum impediatur angustiis, ne Christianæ doctrinæ rudimenta satis accipere possit, meritò quæritur, quidnam satis esse existimandum sit, ut salutari lauacro perfundi possit.

Augustin. quidem etiam in tanta temporis coarctatione, de omnibus symboli articulis interrogari vult hominem, & sic baptizari, quod *De Fid. & oper.* c. 9.

sanè in eo Catechumeno, qui aliquandiu res nostras audiuit, non est difficile, ut rogatus, & ore, & corde respondeat. At si rudis sit omnium, & ad imbuendum mora sit brevis, quid sit agendum adhuc quæritur, ne aut homini salutis aditus præcludatur, aut baptismus detur indigno.

De qua re in Synodo prouinciali Limensi decretum est, ut quam possit breuissimè præcipua tantum doceatur. Quorum primum est, ut credat in vnum Deum Patrem, & Filium, & Spiritum sanctum: secundum, hunc esse omnium creatorem, & eundem gloriam bonis æternam præstantem in cœlis, & malis supplicia sempiterna: tertium, à peccatis neminem liberari nisi per Iesum Christum Dei filium hominem factum, passum, & mortuum propter nos, hunc esse Dominum & redemptorem nostrum, & spem vnicam, qui regnat gloriosus in cœlis: quartum, Huius Iesu Christi hominem fieri seruum per baptismum, in quo omnia peccata remittuntur, & vita donatur æterna. Hæc si ut potest & credat, & confiteatur, rogandus est, an verè præteritæ vitæ criminum pœniteat, præcipuè idololatriæ, & an in posterum velit rectè viuere secundum Dei, & Christiani populi leges atque præcepta. Si se & præterita dolere responderit, & futura adimplere

Synod. Limen. c. 33.

ptere

380 DE PROCVRANDA INDORVM ,
plere cupere ex animo , non est differendus , sed
Christo ex aqua & Spiritu sancto regenerandus.
Illud autem sine vlla dubitatione confirmo, in ta-
libus , si voluntas sit bona , & diuinitus præpa-
rata , qua verè velint esse Christiani , nunquam
intellectui lumen deesse quo quantum oportet
necessaria salutis suæ percipiant , Deo plerumque
illustrante mirificè tenebras mentis humanæ. No-
bis cum in Prouinciis superioribus versaremur,
euenit , vt in Vrum incideremus extremè ægro-
tantem, corporis tanta deformitate , vt vix homi-
nis simulacrum retineret , mentis verò vtpote
Vrus tanta hebetudine , vt truncus magis exi-
stimaretur. Hic petiit instanter , vt fieret Chri-
stianus , breui de Fidei præcipuis mysteriis edo-
ctus tanta alacritate cuncta percepit , vt esset
admirationi. Itaque baptizatus à socio, cum ma-
gno animi gaudio Christum alloquebatur , Do-
mine siquidem me Christianum esse voluisti,
transfer in cœlum , atque in his vocibus Deo
gratam efflauit animam , cumque esset abie-
ctissimæ etiam inter suos conditionis, nescio quo
impellente , præcipuo quodam honore tumula-
tus est , & nobis , & ipsis diuinæ bonitatis gra-
tiam celebrantibus. Itaque neque Deus homini
deest, neque homo Deo , quamvis breui temporis
interuallo , si quem Deus efficaciter ad salutem
vocat.

CAPVT IX.

De præceptis Decalogi, & de idololatria barbarorum.

ALtera doctrinæ Christianæ facultas in moribus formandis versatur, ut ambulemus iuxta Apostolum digne Deo, qui nos vocauit vocatione sua sancta, & de tenebris transtulit in admirabile lumen suum. Omnis autem vitæ Christianæ ratio ex charitate dependet, qua Deum amamus & proximum, illum colentes, hunc adiuvantes ut possumus. Huc ergo spectare debet omnis Catechistæ nostri labor, ut Dei vnus verum cultum, hominis quoque in hominem officia opportuna persuadeat. In primis nihil est æquè laborandum, nihil tanti faciendum, quam ut ex futuro, aut iam factō Christiano omnis idololatriæ amor & sensus penitus euellatur. Nam & omnium ea pestis perniciosissima existit, cum sit, ut sapiens *Sap. 14.* dixit, omnium malorum initium & finis, veræ religioni omnibus modis obsistens, & quod est in humana conditione mirabile, nullum virus ita intimis visceribus hæret, cum est semel ebibitum, nullius turpiter amantis in scortum suum tam insanus amor, quam est idololatriæ in idolum defixus animus. Quamobrem fornicationis meretriciique cuiusdam amoris nomine scriptura sacra idololatriam frequenter notat, cuius cæcum quendam furorem, pertinacemque *Hier. 2.*
Ezer. 16.
Ose. 4.
Pf. 105.
contentionem

§2 DE PROCURANDA INDORVM

contentionem multarum rerum commemoratione demonstrat. Id quam verè sit in diuinis literis commendatum, nostri barbari satis in se declarant. Nescio equidem quibus verbis significem non tam imbutos, quam in idololatriam penitus transformatos istorum animos, vt neque in otio, neque in negotio, neque in publica re, neque in priuata quicquam peragant nisi idolorum suorum prius superstitione adhibita. Non letari in nuptiis, non lugere funus, non epulum præbere aut accipere, non denique aut pedem efferre domo, aut operi manum admouere sine sacrilegio gentili. Vsq̃ue adeo Diabolus oppressos eorum sensus tenet seruitute miserima. Quanto verò artificio ista sua omnia celent, atque dissimulent, cum publicè agere haud liberum sibi esse perspiciunt, quanta rursus impudentia, cum licere sibi putant, insaniant, mirari potius possum, quam satis dicere. Scripsit sanè Ioannes Damascenus idololatriæ tria esse genera. Primum Chaldaeis attribuit, qui cœlestes globos, & signa, atque elementa colerent: quos diuina scriptura cum reprehensione commemorat. Neque operibus attendentes, inquit, agnouerunt, quis esset artifex, sed aut ignem, aut spiritum, aut citatum aërem, aut gyrum stellarum aut nimiam aquam, aut Solem, & Lunam rectores orbis terrarum Deos putauerunt. Horum errorem præclarè confutat adiungens, Quorum si specie delectati Deos putauerunt, sciant quanto his Dominator eorum speciosior est, speciei enim generator hæc omnia constituit. Aut si virtutem, & opera eorum mirati sunt, intelligant ab illis, quoniam qui hæc fecit fortior est illis, à

magnitu

*Damasc.
in his.
Barlaam
& Iosaphat.
Sap 13.*

magnitudine enim speciei, & creaturæ cognoscibiliter poterit creator horum videri. Secundum genus idololatriæ refert ad Græcos, quo homines mortui coluntur pro diis, in quo genere Iuppiter est, & Iuno, & Saturnus, & Ceres, & cætera Poëtarum cœna. Huius verò exordia, & infœlices progressus graphice scriptura describit. Acerbo luctu, inquit, dolens pater citò sibi rapti filij fecit imaginem. (Belum tamen patrem à Nino filio inter Deos relatum, à quo simulacra primum orta sint, graues authores volunt, ex eoque omne penè idolum apud Hebræos Bel dici solitum.) Itaque adiungit, Et illum, qui tunc quasi homo mortuus fuerat, nunc tanquam Deum colere cœpit, & constituit inter seruos suos sacra, & sacrificia. Deinde interueniente tempore conualecente iniqua consuetudine hic error tanquam lex custoditus est, & tyrannorum imperio colebantur figmenta. Et post pauca, multitudo autem hominum abducta per speciem operis, eum, qui ante tempus tanquam homo honoratus fuerat, nunc Deum æstimauerunt. Et hæc fuit vitæ humanæ deceptio, quoniam, aut affectui aut Regibus deseruientes homines incommunicabile nomen lapidibus, & lignis imposuerunt. Tertium genus addit Damascenus Ægyptiæ idololatriæ, qua non solum sidera, aut homines habentur pro Diis, sed animantia quoque sordida, & vilia & saxa ipsa, & ligna sensus expertia diuino honore afficiuntur. Nam & bœuem, & caprum, & canem ipsum, atque mustellam, & truncos, & lapides inter Deos retulerunt, Osyrim, & Typhonem, & Orum, & mille alia

Sap. 14.

Hier in e.
2. Ose.Aug. li.
22. cœtera
Fausium
c. 17.
Naziāz.
orat. 2. de
Theol g.

*Sap. 13.**Ibidem.**Rom. 1.**Plato in
Timæo.**Trismeg.
in Ascle-
pio. De
quo Aug.
lib. 8. de
Ciu. c. 23.*

alia commenta fabulantes. Hoc totum idolola-
triæ genus grauissimè infectatur Sapiens, Nam
vbi mentionem illorum fecit, qui solem, & side-
ra coluerunt, sed adhuc, inquit, in his minor est
querela. Infelices verò sunt, & inter mortuos spes
illorum est, qui appellauerunt Deos opera ma-
nuum hominum aurum, & argentum, artis in-
uentionem, & similitudinem animalium, aut la-
pidem inutilem opus manus antiquæ. Hos ve-
rò ita refellit: Non erubescit loqui cum illo, qui
sine anima est, & pro sanitate infirmum depre-
catur, & pro vita rogat mortuum, in adiutorium
inutilem inuocat, & pro itinere petit ab eo, qui
ambulare non potest, & de acquirendo, & de
operando, & de omni rerum euentu petit ab eo,
qui in omnibus inutilis est. Equidem cum hæc
ipsa lego, & vniuersum pene terrarum orbem an-
te oculos pono tam copiose insanientem, non
satis constituo, vtrum dolere magis an indignari
oporteat quod qui putantur sapientes stulti fa-
cti sunt, mutantes gloriam incorruptibilis Dei in
imaginem corruptibilis hominis, aut quadrupe-
dis, aut serpentis, aut cæterorum, quæ Aposto-
lus dicit. Neque vulgarem fuisse hunc errorem,
sed excellentissimos quosque non Poëtarum mo-
do & Rhetorum, sed Philosophorum eiusmodi
nugas, & factio, & oratione esse admiratos. An non
diuinus Plato de Diis maioribus, & minoribus
multa differit, vel delirat potius? Quid ter maxi-
mus ille Mercurius, qui tanta de Trinitatis, tanta
de incarnati Verbi mysterio scribit, idem tamen
simulacrorum potentiam, & maiestatem prædi-
cat, & quod ridiculè dictum videri poterat, nisi
tam

tam serio commendaret, miratur artem Deos faciendi mirabiliter hominibus esse collatam? Plañe vt noster dixit Apostolus, obscuratum est insipiens cor eorum, & dicentes se esse sapientes stulti facti sunt. Redeo ad causam Indorum, si tot superstitionum genera à Græcis, & sapientibus inuenta retentaque sunt longo tempore, immeritò sanè & indoctè prorsus quidam barbarorum nostrorum ritus indignantur, quos oporteret potius miserari, pro eo quod vani sunt sensus hominis, quibus non subest scientia Dei. Illud magis cogitandum est hæreditarium esse impietatis morbum, qui ab ipsis matrum visceribus ingenitus, ipso vberum lacte nutritus, paterno & domestico exemplo confirmatus, tum diuturna consuetudine & legum publica authoritate munitus, nullo modo nisi copioso Christianæ gratiæ munere & magna doctoris Euangelici, atque indefessa cura sanari queat. Quid igitur accusamus barbarorum in idololatria deserenda tarditatem, & cunctationem, cum debeamus potius nostræ desidiæ irasci, qui pauca quædam, & friuola, contra Guacarum, & Homorum superstitionem susurrantes, victoriam statim canimus, re prorsus infecta. Hic hinc ergo oportet Catechistam prudentem pedem figere, & ad idololatriæ intimas fibras cuellendas ex Indorum animis omnem cogitationem, industriam, operamque conferre. Nam omnia à nobis eius genera commemorata apud barbaros vigent maxime. Solem quidem nostri Peruenes in honore primo habent, secundum eum Tonitru, illum Punchaum, hoc Illapam vocitantes. Quilam quoque id est, lunam, Cuillor, id est, sidera, B b terram

terram quoque Pachamamam, & mare Mamia-
 cocham Chaldaeorum more venerantur. Porro
 Reges suos homines præcipui nominis diuinitate
 donatos colunt, quorum etiam corpora admiranda
 arte integra, ac viuida adhuc vsque conseruant, ita
 primum Mangocapam, & Viracocham, & In-
 ga yupangum, & Guaynacapam, & cæteros suos
 progenitores religiosissime statis festis, & sacrifi-
 ciis prosequiebantur, cum eis ista licerent, vt cum
 omni Græcia ingenio certare possent in conser-
 uanda maiorum suorum memoria. Iam vero quod
 ad Ægyptiorum superstitionem attinet, tam late
 patet apud nostros barbaros, vt prorsus enume-
 rari nequeant sacrilegiorum genera, atque Gua-
 carum, siue montes, siue cliui, siue saxa pro-
 minentia, siue aquæ commode scaturientes, siue
 fluuij celeriter fluentes, siue edita culmina ru-
 pium, siue arenæ immensa congeries, siue fo-
 ramini obscura vorago, siue arboris proceritas,
 & annolitas, siue metalli index vena, siue lapilli
 cuiusvis minus vsitata, aut paulo elegantior spe-
 cies, quicquid denique vt semel omnia dicamus,
 cæteris sui generis insigniter præstare deprehen-
 dunt, illic protinus numen agnoscunt, & sine
 vlla cunctatione barbari adorant. Hac idolola-
 triæ infestissima lue pleni sunt montes, plenæ val-
 les, oppida, domus, itinera, nullaque est Pe-
 ruensis agri portio, quæ sit ab eo sacrilegio libera.
 Quot autem victimarum, quot libaminum, quan-
 to cæremoniarum ordine istorum omnium cul-
 tum persequerentur Ingarum proceres, infini-
 tum est dicere, legat qui vult accuratam ea de
 re historiam à Polo viro prudenti & graui con-
 scriptam.

scriptam. Inueniet intra vnius Cuzquensis vrbis terminos plus trecentis & sexaginta Guacas numeratas, quibus omnibus diuinus honor haberetur, quibusdam quidem fruges, quibusdam etiam pretiosa vellera & argentum aurumque offerebatur, nonnullis non sine multo innocentium infantium cruore litabatur. Ac re ipsa, certoque vſu obseruatum est eas Indorum nationes plures ac grauiores superstitionis diabolicæ species tenuisse, in quibus Regnum ac Reip. maxime potentia & peritia excelluit. Contra qui tenuiorem fortunam, minusque Reip. accommodatam sortiti sunt, in his multo idololatria parcior est, vsque adeo vt nonnullas Indorum gentes omni idolorum religione vacare quidam pro certo confirmant, easque à se se esse inuentas atque exploratas, testentur.

C A P V T X.

Contra idololatriam remedia.

Huius verò curandi morbi illa plerisque nostrorum expedita ratio visa est, vt simulacra, & Guacæ, cæteraque superstitionis Indicæ monumenta inuenta quidem extorquerentur inuitis, atque ferro & igne abolerentur, vt inuenerentur verò, si fateri verbis Indi recusarent, verberibus certè, vt proderent, esse agendum. Neque hoc militaris modò turbæ institutum, sed doctissimi, atque optimi cuiusque sacerdotis

religiosum consilium fuit. Quod planè, si in nostros, id est, iam baptismo donatos tantum designatum esset, poterat certè ferri, tametsi ita ea in re peccetur quotidie, ut qui religionem Christianam commendatam & confirmatam volunt, nihil aliud maximè agant, quam ut eam odiosam reddant, propterea quòd quæ de manibus Indorum idola eripiuntur inuitis, ea in animis illorum amplius infiguntur, verum id in Christianis non est alienum à ratione ut fiat. In iis verò qui Fidem Iesu Christi neque professi sunt, neque satis perciperunt, neque verò edocti sunt, conari per vim ante idololatriam auferre, quàm sponte Euangelium suscipiant, mihi certè cum grauissimis ac prudentissimis viris nihili aliud videtur, quam aditum Fidei Christianæ præcludere, quem maximè aperire contendunt. Sæpè enim est dictum & est etiam sæpè dicendum Fidem esse volentium, neque quenquam Christianum fieri debere per vim. Quamobrem præclare Augustinus eiusmodi factum reprehendit, & grauissimè docet prius esse idola de cordibus paganorum auferenda, quam de altaribus, quod etiam in hoc Perueni Regno vir quidam grauis, & prudens multum, ac sæpè accusabat, cum facillimè fieri posse affirmaret, ut idololatria omnis funditus euerteretur, si sapienter, & placidè Indorum Procures deorum suorum vanitatem edocerentur, atque eos ut contemnerent, atque abolendos curarent cum ratione & autoritate, tum modestia & beneuolentia, atque omni officio adducerentur. Hosce nullo negotio reliquo vulgo quicquid sentiant persuadere, quicquid velint efficere. Nam quod mi-

*August.
serm. 6.
de verbis
Domini,
tom. 10.*

rari quispiam inae possit, tanta regum in sub-
 ditos populos authoritas extitit, ut eos tantum
 Deos vrbes, prouinciæque suscipèrent; quos rex
 Inga tribuisset; neque liceret cuiquā aliud nu-
 men colere; quam quod ille statuisset. Itaque
 deos ipsi; & Guacas toto hoc orbe distribue-
 runt, in hac quidem prouincia Illapæ numini;
 in illa Punchao; in alia Guanacauro aliis at-
 que aliis modis litari imperatum, vsque adeo
 imperita plebs de maiorum suorum authorita-
 te pendebat. Adhibebat Polus huius suæ senten-
 tiæ illustre sanè documentum; quod postquam
 ipse primoribus Ingarum Cuzqui de idolis tol-
 lendis legem persuasisset; horum ipsorum ope-
 ra breui plusquā trecenta idola ex vicinis op-
 pidis nemine cogente ad se se essent delata. Quo
 instituto; si cætera processissent; hodie in hoc
 regno vix idololatriæ vestigium superesset, quam
 constat passim perinde atque ante annos cen-
 tum vigere. Hoc igitur idololatriæ tollendæ pri-
 mum præceptum sit; ut prius de animis au-
 feratur præcipuè regum, Præfectorum, Cura-
 carum, quorum authoritati cæteri facillimè, &
 libentissimè cedunt. Ut autem id noster Catechi-
 sta præficiat, & simulacrorum non solum con-
 temnendam vanitatem, sed etiam execrandam
 pestem perluadeat, non erit illi opus apud hos-
 ce barbaros exquisitis admodum philosophicis-
 que rationibus; neque Clementis Alexandrini
 Stromata; neque Theodoriti Cyrensis morbo-
 rum Græcanicorum curationes plurimi faciet:
 Sed breues, faciles, & ante oculos omnium po-
 sitas obiectiones proferet, easque repetendo,

*Baruch.
cap. 6.*

exaggerando, auditorum ipsorum experientiam interrogando, in animis Indorum insculpet. Argumenta huic rei idonea nusquam melius & plenius quam in diuinis literis, in sapientia præsertim Salomonis toto capite decimo tertio, & decimo quarto, & in Isaia Propheta cap. 44. & 46. & in Hieremia cap. decimo. Pulcherrime autem, & ad vulgarem sensum accommodatissimè in Propheta Baruch idolorum vanitas confutatur. Notum, inquit, sit vobis quia non sunt dij, ne ergo veneremini eos, sicut enim vas hominis confectum inutile efficitur, tales sunt dij eorum. Constitutis illis in domo, oculi eorum pleni sunt puluere à pedibus introeuntium. Lucernas autem accendunt illis, ex quibus nullam videre possunt, sunt autem sicut trabes in domo, nigrae fiunt facies eorum à fumo, qui in domo fit. Supra corpus eorum, & super caput eorum volant nocturae, & hirundines, & aues etiam similiter & cartæ. Vnde sciatis quia non sunt dij. Si ceciderint in terram à semetipsis non consurgunt, sicut mortuis munera illorum apponuntur illis. Hostias eorum vendunt Sacerdotes & abutuntur. Vnde ergo vocantur dij. In domibus eorum Sacerdotes sedent. Neque si quid mali patiuntur ab aliquo, neque si quid boni poterunt retribuere. Neque regem constituere possunt, neque auferre, similiter neque dare diuitias possunt, neque retribuere. Si quis illis votum vouerit, & non reddiderit, neque hoc requirent. Hominem à morte non liberant, neque infirmum à potentiori eripiunt. Lapidibus de monte similes sunt. Quomodo ergo æstimandum est eos esse deos. A fabris & aurif

aurificibus facta sunt, nihil aliud erunt nisi id, quod volunt esse Sacerdotes. Nunquid ergo possunt ea, quæ ab ipsis fabricata sunt esse dii? Quomodo ergo sentiri debeat quod sunt dii, qui nec de bello se eripiunt, neque de malis se liberant? Si inciderit ignis in domum deorum, Sacerdotes quidem ipsorum fugient, & liberabuntur, ipsi vero sicut trabes in medio comburentur. Quomodo ergo æstimandum, aut recipiendum quod sunt dii? Non à furibus se liberabunt, quibus iniqui fortiores sunt, & reliqua. Tria ergo hinc argumenta ad idololatriam confutandam capere potest minister Christi. Primum ex natura & substantia Deorum. Siquidem ligna, aut lapides, aut metalla sunt, quibus artis humanæ accessit industria Sacerdotum auara prædicatione munita, aut regum violento imperio. Deos autem facere homines nequeunt, cum sint ipsis meliores rebus à se fabricatis. Si idololatria circa cœlestia, aut naturalia corpora versetur, substantia illorum facta, & motibus variis subiecta ostendi facile potest, quod à Dei natura alienum est. Quod si reges priscos adorant homines barbari, eorum corpora nihil sentire, & tabe iam consumpta doceri possunt, neque à cæteris quicquam differre. Alterum argumentum est ex impotentia & ignorantia. Simulacra quippe se ipsa defendere nequeunt ab ignis, aut latronis, aut ruinæ iniuria, neque verò aut vident, aut sentiunt aut mouere se omnino possunt. Naturalia autem corpora nullo suo arbitratu mouentur, sed leges sibi ab authore præfixas semper tenent. Tertium est ab humanarum rerum providentia, quod præcipuum est. Vbi ipsa barbarorum

392 DE PROCURANDA INDORVM
rum experientia compungenda, & in medium
procuranda est. Vtrúmne in morbo, aut bello,
aut fame deorum suorum vtilitatem aliquam
senferint? Vtrum religiose illos colentes, an
pro nihilo facientes melius habuerint? Quot
& quanta mala perpeffi neque tamen à diis ad-
iuti, releuatiq̃ue sint. Ad hæc autem omnia
plenius confirmanda, quoniam sæpe aliqua signa
sensus aut vocis in simulacris apparent, inter-
dum etiam minæ, & præcepta exaudita, do-
cendi sunt barbari, cum res ita tulerit, diaboli
ea omnia esse commenta, tum verò quis diabo-
lus sit, qui illius satellites dæmones, quid agant,
quæ illorum in homines inimicitia, & fraudes,
& nequitia, vt timorem in horum potius o-
dium conuertant. Hoc enim commune apud
omnes pene barbaros est, vt Deum quidem om-
nium rerum supremum, ac summe bonum fa-
teantur, spirituum verò quorundam peruerfo-
rum non obscura opinio sit, qui à nostris bar-
baris Zupay vocari solent. Igitur & quis ille
summus idemq̃ue sempiternus rerum omnium
opifex, quem ipsi etiam ignorantes colunt, & quẽ
nos annuntiamus, per omnia doceri debent,
mox quantum ab illo illiusq̃ue fidelibus mini-
stris Angelis absint gens pessima cacodæmonum,
hominum generi infestissima, accuratè & dilu-
cide oportet exponere, vt idola omnia sua Indi
vel contemnant, vt vana & inutilia, vel etiam
execrentur, & oderint, quæ dæmonum astu
etiam perniciofa didicerint. Neque satis esse debet
studiofo Catechistæ, vt communiter idolorum
vanitatem refellat, addat etiam oportet peculia-
rem

rem deorum Guacarum, & superstitionum suæ plebi familiarium confutationem, in quibus inuestigandis & perdiscendis vtilissimum quin potius summopere necessarium studium existit. Quare plerique grauitè peccant incuria & socordia, cum morbos, quos non didicerint, rectè curare non possint. Neque verò idolorum tantum formas varias, sed infinitas etiam superstitionum species inde manantes persequi debeat. Exempli causa cum Indus solem Orientem aspicit, & salutat, cum tranandum fluuium verbis conceptis conciliat, cum garritus aut gemitus auium nocturnarum, aut cæterorum animantium obseruat, cum sortes de rebus agendis init, cum sementis aut frugum liba quædam offert telluri, cum susceptos liberos fideri consecrat, cum nuptias certis cantibus dedicat, cum computationibus cantillando identidem studet, cum mortuos lugubri carmine effert, & sepulcrum comœatu instruit, cum ægrotus vates suos accersit & consulit, cum denique cætera facit superstitionis antiquæ, cuius tam est omnis istorum vita plena, ut nulla ab ea peste actio libera sit. Sed ut nusquam grauius Indi laborant, ita neque facilius curari possunt, si non desit industria, & studiū salutis ipsorum. Eiusmodi enim omnes nugæ simul atque detectæ sunt per se se facili negotio euanescent, ac veluti deprehensæ erubescunt, si modo barbarorum præfectorum, maiorumque suorum authoritas compefcatur. In confessionibus verò audiēdis omni cura incumbendum est, ut hæc omnia minutè ac sigillatim, ubi opus est, sacerdos interroget pœnitentē,

&

394 DE PROCVRANDA INDORVM
& confessum doceat atque deterreat. Ferè quia
negliguntur, occidunt: eadem adhibitæ curationi
non difficile cedunt.

C A P V T X I.

De euertendis idolorum signis, & templis.

QUamvis autem prima esse cura debeat sacer-
dotis, vt idola de auditorum cordibus au-
ferantur, idque docendo & exhortando maximè
fiat, tamen vt de oculis quoque atque vsu remo-
ueantur, nullo modo negligendum est. Qua in re
diuinæ historiæ illustria & documenta, & facta
proponunt. Aras, inquit, eorum destruite, lu-
cosque succidite. In quo genere mirificè Asa &
Iosiam celebrat sacra historia, quin etiam ab Eze-
chia rege Moysis serpentem illum æneum confra-
ctum cum non parua laude commemorat. Illud
ergo, & sacerdotes, & principes studiose curare
debent, vt idololatriæ omnis etiam suspicio
aboleatur. Quod duobus modis rectè & ordine
fit, & secundum Christianæ legis disciplinam.
Primum in ipsis iam Christianis, qui baptismo
perfusi sunt, in quibus gentilitiæ superstitionis
monumentum aliquod ferri minimè debet, sed
idololatriæ species omnis tum acriter insectanda
si deprehendatur admissa, tum præcauenda dili-
genter omnibus illius signis sublatis. Hoc Augu-
stinus, & à se factum commemorat, & fieri debere
demonstrat. Hoc cuiusdam Concilij Canon di-
scit

*Deuter. 7.
& 12.
3. Reg. 15.
4. Reg.
23.
2. Par. 14.
& 34.
4. Reg.
18.*

*August.
Serm. 6.
de verb.
Domini.*

fertè præcipit illis verbis, summo decertare debent studio Episcopi & eorum ministri, ut arbores dæmonibus consecratae, quas vulgus colit, & in tanta veneratione habet, ut nec ramum, nec surculum inde audeat amputare, radicitus excindantur atque comburantur. Lapidés quoque, quos in ruinosis locis atque syluestribus dæmonum ludificationibus decepti venerantur, ubi & vota vouent, & deferunt, funditus effodiantur, atque in tali loco proiiciantur, ubi nunquam à cultoribus suis venerari possint. Et omnibus adnuntietur, quantum scelus sit idololatria, & qui hæc veneratur, & colit, quasi Deum suum negat, & Christianitati abrenuntiat, & talem pœnitentiam debet suscipere, quasi idola adorasset, omnibusque interdicator, ut nullus votum faciat, aut candelam, vel aliquod munus pro salute sua rogaturus alibi deferat, nisi ad Ecclesiam Domino Deo suo, & cætera. Quem canonem libenter recitavi, quòd videam in eius generis ritibus, & multum Indos iam baptizatos labi, & parum à sacerdotibus animaduerti. Non solum ergo simulacra ipsa, & insignes idololatriæ notæ, verum etiam vestigia quævis superstitionis veteris, eradenda sunt. Atque eam ad rem imperio, & authoritate, si opus sit, utendum erit. Et hæc ad Christianos Ecclesiæ filios. Ad infideles verò quid? Prorsus distinguenda causa est. Si enim ita suos ritus, & cæremonias agunt, ut fidelibus scandalo non sint, sed vnusquisque lege sua viuere facile sinatur, permittendi sunt cæcitati suæ vsque dum ab Altissimo illuminentur. Huc enim pertinet illud,

Eos

1. Cor. 5.

Eos qui foris sunt, Deus iudicabit. Quod si Ecclesiae principibus subsunt, & Christianis hominibus scandalo sunt, profecto tolerandi non sunt.

August.

Epist. 48.

ad Vinc.

cent.

Ambros.

lib. 5.

Epist. 31.

ad Valen.

tinianum.

August.

Concil.

Elib.

cap. 4.

Quo in genere B. Augustinus laudat Constantini magni leges, quibus Paganorum templa clausit, & idola detraxit, itemque Ambrosius aduersus Symmachum urbis praefectum, Fortunae aram à Curia Romana eiectam magnis viribus eloquentiae defendit. Concilium quoque Eliberinum, ut domini seruorum idola comminuant, edicit. Atque hoc modo in subditis fidelibus, cum praesertim nouis fidelibus, nocent paganici ritus atque idololatria per potestatem auferri & potest, & debet, nisi maiora inde incommoda, & tumultus consequi sapiens administrator iudicarit. Sed illud summopere curandum est, ut pro noxiis ritibus salutare introducantur, & caeremoniis caeremoniae oblitterentur. Itaque & aquae benedictae usum, & imaginum, & rosariorum, & granorum, & cereorum, & palmarum, & caeterorum, quae Ecclesia sancta probat ac frequentat, neophytis perquam opportunum esse sibi persuadeant sacerdotes, atque ea omnia in concionibus popularibus multis laudibus prosequantur, ut pro veteri superstitione nouis religiosisque signis imbutos assuefaciant. Ita fiet, ut melioribus atque elegantioribus occupati obsoletam sectae suae superstitionem de manibus ac de mente deponant.

CAPUT XII.

De recta dilectione sui.

Post Dei veri cultum traditum, superest, ut proximi dilectio explicetur. Est verò unicuique proximus diligendus, sicut ipse sibi. Se autem ipsum nemo, ut oportet, diligit, qui animi corporisque salutem atque constantiam abijcit. Id ergo magnopere Indi præsertim barbari docendi sunt, ut primum vitam valetudinemque suam tueantur, neque vel desperatione, vel obstinatione prodigant, quod sæpe faciunt. Etsi enim naturale est, non homini solum sed cuivis animali vitam amare, sui perniciem, quoad potest, auertere, tamen irrationali quodam impetu & lege apud plerosque barbaros necis sibi afferendæ consilium iandiu obtinuit, ut vel impendentia mala deuitarent, vel fortiter rem gessisse viderentur, vel diis suis aut regibus alioqui gratificarentur. Quanquam in hoc Peruensî regno præ aliis minus id usitatum fuit, quod legibus, & moribus esset excultius, Neque miranda est ea barbaries in cæteris cum Græcæ, Romanæque historiæ Themistocles illos, & Mitridates, tum Mutios, & Cato-nes, & Brutos, aliosque innumeros, ut viros fortes non parum ambitiose celebrent, atque ipsi etiam, qui Christiani haberi volebant, Circumcelliones in Africa creberrime ita interierint. Etenim vel laudis amor quidam insanus, vel cæcum vitandi mali consilium complures ingenio
etiam

etiam atque doctrina præstantes viros vsque ad
 sæuam sui necem sæpè compulit. Quod cum
 exemplis maiorum apud barbaros pro magno du-
 citur, naturali sensu propemodum extincto etiam
 iucundum mortis genus habetur. Pertinet etiam
 ad rectam sui dilectionem, vt mentis vsus per re-
 mulentiam ne intercipiatur, atque ex homine
 pecus fiat, vel potius maximè noxia, & ferox bel-
 lua. Sed de ebrietate vitanda, quod est præ cæ-
 teris vitium maximè familiare barbaris, satis in
 tertio libro dictum est. Huc etiam pertinet, hu-
 manarum carniū esus, in quo non tam defuncto
 homini, qui nihil aut sensus aut doloris capit,
 quam ipsi humanæ naturæ iniuria fit. Id enim na-
 turali legi ita repugnat, vt nulla quantum ego sen-
 tio, famis inopiæve causa licere possit. Assentior
 enim doctissimo Theologo ita sentienti, quan-
 quam alij aliter sapiant. Genus autem hoc vitij
 apud Indos Carybes dictos, quales sunt Brasi-
 lienses, & Chunchi, & Chiriguanenses, & alij
 plerique in vsu & pretio habitum sacrosanctæ
 literæ grauitè auersantur, quæ veteres illos
 idolorum adoratores inter cætera multum accu-
 sant, tanquam humanarum viscerum comestores.
 Philosophia quoque ferinum id esse docet apud
 Aristotelem, qui eiusmodi facinus inter extrema
 opprobria actionum humanarum numerandum
 putat. Quare vt seminis humani fundendi hone-
 sta causa esse non potest leuatio corporis, nisi alio-
 qui matrimonio legitimo, etiam si ex eiusmodi
 humore coacto interitus cōsequatur, ita profectò
 neque ex humano cadauere epulas quantacunque
 famis

*Victoria
 relect. de
 tempe-
 rantia, n.
 5. & 6.
 sed Caiet.
 & Abul.
 aliter
 sentiunt.*

Sap. 12.

*Arist. 7.
 Ethic.
 cap. 5.*

famis depellendæ necessitas iusta esse permittet. Ad communis quoque naturæ dilectionem spectat, ut defunctorum corpora non vio lentur, atque adeo ne sepulchra quidem effodiantur, in quod auaritiæ, & inhumanitatis genus leges Imperatoriæ, & Pontificiæ acerbè animaduertunt, & in hoc regno Concilio Limensi seuerè admodum nostrorum hominum licentia coërcetur. Verum in quo rectam sui dilectionem barbari offendunt maximè, minimèque id putant, illud est, quod ab Apostolo Paulo vno verbo luculenter est dictum, quòd contumeliis afficiunt corpora sua. Ita enim omnes impudiciæ & libidinis præposteræ sordes exposuit. Atque est illud quoque ab eodem verissimè ostensum idololatriæ scelus omnia flagitia statim consequi, tanquam riuulos primum fontem, quod est à Sapiente sapienter etiam animaduersum. In hoc genere sunt concubitus cum maribus, cum bestiis, cum ipsis lignis, incestuosi amplexus cum sororibus, cum matribus, cum filiis apud quosdam barbaros non concessi solum, sed interdum lege sanciti. Nostros Ingas non nisi sororem legitimo sibi coniugio copulare solitos constat, ex quibus duo ad fidem conuersi & baptizati in antiquo matrimonio permanere à præsule quodam permissi feruntur, factumque Paulum quartum Pont. max. grauissimè tulisse, verbisque seuerissimis obiurgasse fama est. Verè à Sapiente scriptum est, Initium fornicationis est exquisitio idolorum, & adinuentio illorum corruptio vitæ est. Et post nonnulla, Neque vitam, neque nuptias mundas iam custodiunt, sed alius alium per inuidiam occidit, aut adulterans

*Conc. Tol.**4. c. 45.**Conc.**Melden.**6. 72.**Conc.**Lim. cap.**113.**Rom. 1.**Sap. 14.**Sap. 14.*

400 DE PROCVRANDA INDORVM
adulterans contristat : & omnia commixta sunt,
sanguis , homicidium, furtum & fictio, corruptio
& infidelitas, & cætera, inter quæ natiuitatis im-
mutatio , nuptiarum inconstantia , inordinatio
mœchiæ, & impudicitia. Infandorum enim ido-
lorum cultura omnis mali causa , est & initium,
& finis. Hæc Sapiens , Quæ omnia carnis flagitia
à Catechista assiduè & grauiter insectanda sunt,
& seuerius cum violatoribus legis naturalis agen-
dum. Interea verò fornicationem , quam fere
gentes licere putant , multis modis legi Dei &
naturæ ipsi contrariam docere debent , atque vt
persuadeant , non solum sacræ authoritates pro-
ferendæ , verum etiam humana argumenta , quæ
poterunt : illudque præcipuè ab opinione isto-
rum remouendum , vt fœminas non ante matri-
monio sibi iungendas arbitrentur , quam in so-
lutis periculum fecerint , qua ex causa concubi-
nas prius penes se retinent , quam easdem ducant
vxores. Quin etiam adeo virginitas vilis est fœ-
minis , vt opprobrio propemodum detur, si qua
ad nuptias nondum corrupta perueniat , tan-
quam sui amatorem antea inuenire nequiuerit.
Hæc atque id genus alia barbaricæ stultitiæ mon-
stra diligenter ab hominum sensu , & vitæ vfu
quoad liceat releganda sunt , & docendi omnino
barbari , vt se ipsos , sensum , corpusque suum
diligere & conseruare congruenter naturæ
discant.

CAPVT XIII.

De dilectione proximi.

Proximum est, vt qui se rectè diligit, fratrem quoque vt se ipsum diligit. Quod sanè fit duobus modis. Vno, vt ne cui omnino noceat, siue vitam corpusque lædendo, siue uxorem violando, siue fortunas contrectando, siue existimationem opinionemque imminuendo, quibus proximus aut re aut verbo læditur. Et vt sit perfecta iustitia, à quibus perpetrandis abstinet, ab iisdem etiam per libidinem affectandis se se cohibeat. Horum quippe omnium lex naturaliter hominum inserta atque impressa animis est. Vt quod tibi ab alio fieri nolis, id in alterum ipse ne facias. Altero quoque modo diligimus proximum, cum non modo non lædimus, verum etiam opportunè adiuuamus, atque adsumus. Atque hîc planè omnia Christianæ charitatis officia versantur: & quædam quidem salua charitate prætermitti nō possunt, vt si debitus honor parētibus, si extremè aut grauitè indigenti res familiaris, si periclitanti necessaria vitæ subsidia subtrahantur. Quædam verò etsi non omnino charitatem vitiant, grauitè tamen debilitant, vt si non doceas, quos commodè potes, si hospitio non excipias, si non pascas, cum ipse abundes, & reliqua id genus. Quæ cum dicta vniuerse sint, & omnium mortalium gentibus communia habeantur, tamen illud est proprium Indorum moribus,

*Mat. 7.**Tob. 4.*

quantum ego notare potui, accommodandum, vt
 mutuis inter se officiis honeste certent, idque &
 humanitatis & Christianæ disciplinæ maximum
 ac propemodum singulare decus sibi persua-
 deant. Etenim cum plerisque in rebus Europæos
 homines naturales Indorum mores longe ante-
 cellant, quod is facile concedet, qui horum mo-
 destiam, lenitatem, avaritiæ fastûsque contem-
 ptum, laborum tolerantiam contemplatur, ta-
 men hac vna valde horum ingenio offendor, quod
 parum omnino benignitatem atque humanita-
 tem inter se se obseruent. Nam in nostros homi-
 nes siue seruitute quadam oppressi, siue admira-
 tione commoti, siue ne in se sæuientes expe-
 riantur, timore correpti, liberales certè sunt, &
 pro sua tenuitate copiosi. At inter ipsos vix est,
 qui stipem vilem, aut pugillum frumenti vltro al-
 teri præbeat. In ægrotos parum misericordes, in
 senes & egentes illiberales, in labore, & ærum-
 na oppressos inhumani. Vix filij parentibus de-
 ferunt honorem. Senectus ipsa vt aliis est vene-
 rabilis pro rerum vsu, & consilij authoritate, ita
 his barbaris vulgo fastidio, & opprobrio habetur.
 Itaque plerique senes atque anus, quoniam su-
 stentandæ vitæ rationem inueniunt nullam, vi-
 ribus destituti, & ab aliis contempti, eam po-
 tissimum ineunt, vt sortibus, auguriis, diuina-
 tionibus, veneficiis stipem colligant, & suam
 apud cæteros opinionem tueantur. Obserua-
 tum est à viris valde prudentibus nullos esse in
 natione Indorum istarum superstitionum arti-
 fices, & architectos, nisi homines abiectos, ino-
 pes, decrepitos, qui omnibus aliis rebus ex-
 clusi

clusi ad eas se artes vulgò conuertunt. Obseruatum etiam parentes filiis in nullo esse pretio si indigeant, ægrotis nihil ferè opis adferri: defunctis multa prodigi, quæ si viuis concederentur, diutius essent in vita retinendi. In nostris verò nihil perinde barbari suspiciunt, & admirantur, nihil æquè apud se commemorant, & laudibus tollunt, atque mutuam beneficentiam, & liberalitatem, cum præsertim eam ad se se redundare perspexerint. Verum est enim Saluatoris elogium: In hoc cognoscent homines, quòd discipuli mei estis, si dilectionem habueritis adinuicem. Hanc ergo Christianæ charitatis partem, quæ in beneficentia sita est, excolendam atque illustrandam, & verbis, & factis sibi præcipuè reputare debet minister Christi. Et certè discunt barbari humanitatem, discunt mores suauiores, discunt effusam etiam in suos liberalitatem, si diligenter & crebro ea de re commonefiant, & exhortationibus Sacerdotum paria exempla non desint.

Ioan. 14.

CAPUT XIV.

*De Catechismo vulgo Indorum
necessario.*

Multa quidem sunt in Christianæ doctrinæ explicatione fusius & vberius Indis repetenda. Verum ea à me commemorata sunt, quæ

peculiarem videntur habere difficultatem. Nos
verò ex vastissimi orbis innumeris gētibus, quan-
tum est hoc, quod experti sumus? Itaque alij alia
notare, & commendare potius curabunt, quæ no-
uis Euangelij stirpibus magis opportuna ani-
maduerterint. Ego quod Peruensibus maximè
conferre existimo, vt potui, exposui hætenus, &
deinceps exponam. Hæc autem omnia vt com-
modius, & Catechistæ doceât, & Indi percipiant,
opus in primis est duplici quodam Catechismo:
vno compendiaro & breui, quem memoriter
etiam si fieri potest, addiscant, vbi summa sit eo-
rum omnium, quæ ad fidem, & mores homini
Christiano necessaria sunt, altero vberiore, vbi ea-
dem amplius dilucidiúsque dicantur, & copiosius
confirmantur. Vt ille prior discipulis potius, hic
posterior ipsis præceptoribus vsui sit. Opus est
etiam breui, & absoluto aliquo confessionali, vt
sacerdotes rudiores conscientias Indorum exami-
nare, & purgare sciant, vbi ea maximè peccato-
rum genera explicentur, quæ istis familiaria sunt.
Atque ad eundem modum quæ in matrimoniis
Indorum, cæterisque sacramentis conferendis in-
terrogare opus sit. Hoc vtrumque opus si quis
vtraque lingua, & Indica, & Hispanica simul scri-
beret, ac Theologorum illustrium atque egregiè
linguæ Indicæ peritorum auctoritatè munitum
diuulgandum curaret, salutis profectò vniuer-
sæ Reipub. Indicæ immortale beneficium con-
ferret.

C A P V T . X V .

*In instructione Indorum diu esse
perseuerandum.*

IAm verò de residentia Parochorum , de quæ
missionum auxilio , vt hanc de catechizandis
Indis partem absoluamus , dicendum deinceps
est. Neque magnopere modo incumbendum est, *Prov. 27.
Ezec. 34.
Ioan. 10.*
vt pastoris præsentiam omni quidem gregi in pri-
mis necessariam , etiam Indorum populis deesse
nullo modo debere monstremus. Nam vt pastor
attendat vultum pecoris sui , suosque greges con-
sideret ; vt requirat abiectum , & infirmum con-
fractumque alliget, & forte custodiat, vt proprias
oues nominatim vocet , & vadat ante eas , & lu-
pos arceat , & se ipsum , si opus sit , pro ouibus
Christi exemplo offerat discrimini , cæteraque si-
milia , quorum nos diuinæ literæ admonent , huc
præcipuè desiderari res per se ipsa quovis etiam
tacente loquitur. Quæ verò absentia pastorum
damna fiant, non minus experimur nos, quam sa-
cri Canones prædicant, atque ille præsertim Con-
cilij Parisiensis, inter cætera, inquit, quæ religio- *Conc. Pa-
ris. lib. 1.
c. 29.*
ni Christianæ aduersa sunt, hoc nihilominus con-
trarium , & periculosum extat, quòd quorundam
prælatorum temerario ausu Ecclesiæ suis ad tem-
pus viduantur sacerdotibus , & post pauca , Non
attendentes quod eorum absentia ; & loca Deo
dicata sibi cultu debito priuentur , & homines

sine confessione & infantes sine baptismatis regeneratione plerumque moriantur. Quamobrem in Parochos sedes subinde commutantes, & præsules eos alio euocantes his statim verbis decernunt. Quanti autem sit discriminis & personæ mittentis, & eius, qui mittitur, animarum pericula, quæ subinde in huius rei causa fiant, liquido produnt. Proinde omnibus Prælati cauendum est, ne illicita sibi presbyterorum transmissione animarum suarum habeant damnationem. Presbyteri porro qui non sui Prælati imperio coacti, sed potius voluptatum suarum delectatione imo auaritiæ æstuatione succensi id facere præsumunt, perpendant necesse est quam luctuosam, & quæ sequuntur. Quæ ad verbum repetenda duxi, ut tam pernicioſa licentia commutandi subinde Parochias Indorum, & de iis veluti negotiandi, & licitandi aliqua ex parte reprimatur. Sed missa ut faciam hæc de residentia Parochorum communia documenta; sunt valde peculiare, & propriæ causæ quæ prorsus persuadent, nihil de salute neophytorum sperandum esse, nisi firma, ac diuturna fuerit doctoris in catechizando diligentia. Ut enim tenera arbuta nisi assidue inuisantur, curentur, foueanturque, facillime vitiantur, difficile iam vitiata emendantur: ita teneræ neophytorum mentes cum infirmas adhuc in Christi Fide radices egerint, vel errore corrumpuntur, vel flectuntur libidine, omnesque Diaboli atque hominum peruersorum impressiones excipiunt. Ita enim natura comparatum est in omni noua disciplina vsque dum consuetudine confirmata sit, ut parua negligentia industria omnis, & labor

labor citò euanescat. Huc accedit harum gentium minus perspicax ingenium ; quod neque multa de rebus diuinis breui percipere , neque percepta satis retinere potest. Nam mihi quidem Indi sæpe videri solent iis persimiles, qui vel ætate , vel morbo stomachum habent debilitatum, ægrè coquentem cibos ingestos : quorum si aut crassitudine , aut copia obruantur, illico acescit, & vitio cruditatis vires potius frangit, quam confirmat. Opus ergo est , quod medicorum ars habet infirmo stomacho parum , & sæpe alimentum instillare. Ita enim & vincit & ad edendum excitatur. Haud ergo promittat sibi quisquam exigui cuiusdam temporis labore magnos ex Indorum populis fructus , neque existimemus bis aut ter de tota Fidei causa edoctos non amplius indigere doctore. Quin potius & assidue differendum est & modicè , vt quæ audierint , percipiant atque conseruent. Sic enim Christus ipsos suos discipulos instruebat , præceptores orbis terrarum , multa habeo vobis dicere , quæ non potestis portare modo. Præter has autem communes ferre infirmitatis humanæ rationes ; est illa maxima , & certissima natiuæ cuiusdam istorum leuitatis , qui cum primum sibi relinquuntur , mirè lubrici omnia accepta deponunt, & aut veteres sequuntur errores , aut in obuium quodque , prout fors tulerit , feruntur sicut paruuli fluctuantes , & circumferuntur omni vento doctrinæ. Quamobrem , ne in his frustra laboremus, & ne excidant à simplicitate Fidei corruptis serpentis astu sensibus , neve ab iis, qui contradicunt veritati , consentiant vero iniquitati trans-

*Ioan. 18.**Ephes. 4.*

uerſi agantur, infinitis modis neceſſarium eſt, vt
 in iis docendis, arguendis, exhortandis, confir-
 2. Cor. 13. mandis, tuendis, & gremio denique ipſo geſtan-
 2. Theſ. 2. dis, nutricis diligentia ne momento quidem ab-
 ſit, hoc eſt ſpirituales magiſtri, & patres apud eos
 immobiles perfeuerent. Ita fiet vt ex paruis initiis
 incrementa magna ſuccedant, ac non contra, quod
 ſæpe & videmus, & geminus, lætiſſimæ ſpes &
 fœlicia primordia inepta quadam ſocordia cor-
 rumpantur.

CAPVT XVI.

*An expediat Parochias Indorum Regu-
laribus committi.*

*In appen-
dice ad
Synodum
Lateran.
ſub Ale-
xand. 3.*

PARochias verò Indorum vtrum tenere regula-
 res deceat, & vtri accommodatiores ſint neo-
 phytorum adminiſtrationi Eccleſiaſticę ſuſcipien-
 dæ, hinc, an preſbyteri ſæculares, inuidioſe, ac
 moleſtè quidam ſolent contendere. Sed quam-
 vis inter antiquos Canones legamus, Ne religioſi
 in Eccleſiis Parochialibus ponantur, vituperari
 tamen non debet, neque verò poteſt, quod Apo-
 ſtolicæ Sedis authoritate & Regio decreto fit. Cõ-
 ſtat verò ſummos Pontifices hanc mendicantium
 in Indis adminiſtrandis operam non ſolum pro-
 bare, verum etiam multis magniſque priuilegiis, &
 Conceſſionibus inſigniter prouocare. Neque alie-
 num ab inſtituto religioſo cenſendum eſſe, ſi Chri-
 ſti amori, fratrumque ſaluati cedat interdum accu-
 rata

rata illa cōmunis vitæ, & regulæ disciplina, Christi præsertim Vicario ita & publicas, & priuatas leges interpretante. Nemo verò sit adeò absurdus, & à studio Regularium auersus, quin apertè fateatur religiosorum operæ & labori deberi potissimum huius Indicanæ Ecclesiæ primordia. Religios autem sumptus & diligentiam in transmittendis nouo orbi religiosorum gregibus vt nulla ab Hispania classis his fœlicibus mercibus vacua soluat, quis tam erit ineptus, qui aliorum interpretetur, quam vt curam Indorum hi potissimum suscipiant, regiamque conscientiam, quoad licet, exonerent? Præterea ne illud quidem negari potest à religiosis, religiosius accuratiusque neophytos institui, fereque vitæ exemplo magis, quam à sæcularibus adiuuari. Nam vt nihil aliud, ipsa habitus professio cohibet, vt castius vitam instituunt. Quæ cum ita sint, non est cur ab officio cessare monachos, & solum sæcularibus Parochias omnes Indorum quisquam concedere velit. At inter has omnes rot & tantas cōmoditates duo mihi videntur incommoda. Vnum est illud ipsum quod regularibus, cum priuilegiis suis exempti sint, non satis bene cum Episcopis conuenit in administrandis Parochiis Indorum. Hinc quanta mala profecta sint, dici non potest. Primum enim si in officio sunt negligentes, Episcopi, quorum hoc munus est proprium, suis occurrere non possunt Parocho, aut castigato, aut commutato, siquidem neque visitare, neque plectere, neque amouere male meritos possunt. Præfecti verò Prouinciales subiectos sibi Regulares corrigere quidem possunt, sed cum oves alienæ sint, vix ad illos

illos serò tandem querela peruenit. Et omnino habet nescio quid perturbationis Parochum Episcopo suo non subesse, ac duplici veluti capite regi. Hinc porrò dissidia acerbæque contentiones inter Episcopos, & Regulares cum Indorum certè magno malo. Hinc querela Episcoporum, quod

Dent. 22. oues sibi commissas satis pascere nequeant. Denique vestem ex lana linoque contextam, & aream eandem vario semine aspersam, videre est simplicitati Euangelicæ, & sumministrationi spiritus, quam Paulus tanti facit, sæpenumero non parum incommodasse. Hoc igitur detrimentum ex Indorum ratione considero. Alterum verò meo iudicio non isto inferius in ipsosmet regulares recurrere sentio ego, imò verò sentiunt & gement ipsi, quorum prudentissimus, atque optimus quisque copiosè deploret propter susceptas Parochias Indorum religiosorum ordines esse collapsos, atque inde & disciplinam extenuatam, quod certè dolendum est. Siquidem hi auxiliares à Christo Domino dati sunt, & fidem iuxta Sapientem, pro amico spondentes, ex officio habent, quod sequitur, festinare, discurrere, amicum suscitare, ut debito satisfaciat. Ac nescio quonam modo in hoc orbe commutata est ratio instituti regularium. Neque enim, ut in Europa, cum prædicant verbum Dei, confessiones populi audiunt, cæteraque faciunt, Parochis adiumento sunt, & professione sua retenta, greges Christi, quoad licet, curant. Quin potius singularia hæc omnia diuisaque sunt, unusquisque Parochiam suam tenet, & neque suos ab aliis iuuari patitur, neque ipse adducitur, ut alios iuuet. Ita finibus quisque suis septus est,

ac si de agro partiendo res esset, alienam ditio-
nem nisi suam faciat, neque adire ipse, neque adiri
suam æquo animo fert. Scripsit ad me ex noua
Hispania quidam de nostris mirari sese tam ab-
surdam, & ab Indorum salute alienam consuetu-
dinem inuectam esse Indiæ Occidentali. Quam-
obrem si sacerdotes sæculares, & merito & nu-
mero pares Indorum Parochiis inuenirentur, for-
tassis esset magis è re Indorum, vt religiosi nostro
muneri non deessemus, sed Parochis ipsis, atque
Episcopis auxiliares manus præberemus, & cum
summa eorum beneuolentia verbum Dei inter
Indos disseminaremus, atque eos audiendis con-
fessionibus cæteroque omni officio prosequere-
mur. Quod si hoc vniuersè fieri nequit, vt certè
nequit, profecto qui ex religiosis hoc instituti ge-
nere militare possunt, omnino plurimum causæ
Indorum conferre putandi sunt.

CAPVT XVII.

*Salutem Indorum Societati IESV pro
viribus esse procurandam.*

SOCIETATIS autem IESV eò potissimum institu-
tæ, vt in missionibus obscundis per varios or-
bis terrarum tractus Ecclesiæ Dei seruiat, hoc
tam est proprium munus, vt nihil magis. Atque
id quidem quanquam vbique gentium præstare
debet pro sua virili, tamen nusquam æquè atque
inter nationes Indorum, ad quas Deo concilian-
das

das præcipuo, vt ego sanè opinor, studio diuinitus instituta est. Ac dabunt mihi æqui omnes libenter veniam, si quandiu sum Indorum seruus, honorificum ministerium meum. Itaque si in hac parte vel cesseret difficultatibus victa, vel desidia torpeat societas, non mihi dubium est, quin grauem præ cæteris & Dei, & hominum incurrat offensam. Etenim quo alio pertinet familiare illud in professionibus solemnibus votum, quod nos quartum solemus vocare, de parendo Pontifici circa missiones? Quorsum toties facta mentio in Sacris Bullis instituti professionis ad Indos? Quid in beati Patris Ignatii constitutionibus, tantopere repetitum, & commendatum, quam vt prompto alacrique animo præsto vnusquisque sit, siue ad fideles siue ad infideles ire iubeatur, etiam si remotissima orbis regio lustranda sit? Videre sanè est ex ipsis primordiis suis huius societatis aucthores Indicanas professiones potissimum spirantes, easque literis factisque suis, & toto vitæ genere velut exculpentes. Pauci numero & vix dum professione sua confirmata cum essent, tamen duos ex ipsis ad Orientalem Indiam destinandos putarunt. Quorum vnus Franciscus Xauier, quanta Deo magnificè adiuuante peregerit, & quale suis exemplum reliquerit, inter abruptissimas difficillimasque Barbarorum rupes iter ostendens Dei verbo planissimum, alij melius loqui poterunt, & tacentibus nobis res ipsæ Dei benignitate non tacent. Hunc cæteri socij secuti, quantam Christi Iesu in se propensionem experti sint, quantam in promerenda salute hominum vim, nimis durus ingratusque est in nobis, qui non

& agnoscit, & cœlesti beneficio gratias immortales agit. Neque ego sanè dubito, quin dulciori quadam ac familiari cura Dominus Iesus eos prosequatur, qui se totos studiaque sua huic operi consecrant, quod eo charius iucundiusque Deo nostro est, quo & per se insuavius, & ab hominibus magis neglectum. De veris operariis loquor, nam mercenariorum, & sua quærentium plena sunt omnia. Etsi verò ad hanc Occidentalem Indiam serius aliquantò, & parcius Societas IESU euocata est, tamen de benignissima Domini providentia certò mihi persuasum habeo, non inferius futurum operæpretium, neque vllò vnquam tempore societatis huc missæ operam cessaturam. Nam cum tot tantisque rationibus rei Indorum procurandæ constricti teneamur, militiæ desertiores penè etiam proditores habeamur necesse est, si non omnes nervos in hoc opus Domini, vel prætermisiss cæteris contendamus.

CAPUT XVIII.

Cur multis videatur Societas Parochias Indorum debere suscipere.

QUoniam verò in hoc orbe nulla alia Evangelizandi ratio hætenus suscepta est præter eam, quam Parochi suis adhibere solent, videntur multis huius Societatis homines nisi Parochias Indorum ipsi vſitato more suscipiant, nihil ad salutem neophytorum conferre posse, vniuersumque

uersumque eorum aduentum ex Europa esse pro-
 pmodum superuacaneum putant. Itaque censent
 huic omnino oneri ceruices subjiciendas, curam-
 que Indorum propriè subeundam. Cùmque in hac
 parte cunctationem nostram vident, indulgen-
 tiam nobis deliciasque objiciunt, quod detrecta-
 to labore & vita agrestiori, urbanam frequentiam
 amemus. Quidam timori trepidationique nostræ
 substomachantur, amico illi quidem animo, sed
 voce libera objurgantes, si Patres Societatis
 IESV parochias Indorum sibi vitandas ducant,
 de Indorum desperanda salute ferre sententiam.
 Quis enim, inquiunt, discrimini huic objiciet se
 se pro salute fratrum, si vos Patres detrectatis,
 & tergiuersamini, quorum alioqui animarum
 studium, & inflammata in Deum pietas perspe-
 cta est? Quorsum verò missionem tantam susci-
 pitis, tantum terræ pelagique emensi ad ignotas
 terras trajicitis, si Indorum causam deferitis? Aut
 qua ratione professioni, nominique vestro con-
 sulitis, si quod alij omnes religiosi viri ample-
 xati sunt, vos perhorrescitis, non inferiorem alias
 animarum zelum præ vobis ferentes? Quod si
 Hispanorum nostrorumque hominum salutem
 appetitis, nonne satius erat in media Hispania
 Europaque consistere, vbi & numero, & gradu
 superiores sunt infinitis partibus istæ merces? Alij
 quidem aurum argentumque apud Indos quæ-
 runt, quod apud suos, si æquè occurreret, haud-
 quaquam patria deserta tam longam, tam mole-
 stam, tam periculis omnibus plenam peregrina-
 tionem susciperent. Vos verò Patres quid auri
 quid argenti huic quæsituri aduentastis? Si qui-
 dem

dem Hispanorum animas , certè apud vos aurum istud abundabat copiosè. Quod si Indos Christo Iesu lucrifacere in votis erat , & questum maximum , ut est planè , existimantibus pietatem , Euangelij gloria , & propagatio cordi 1. Tim. 6. erat, quo tandem consilio vix aggressi rem , terga vertitis ? Illi ipsi profani , auarique homines , qui in hunc orbem rei augendæ causâ penetrarunt, tamen nihil laboris , nihil periculi recusarunt, modo copia exoptata potirentur : vos verò omnia prius tuta , omnia vndique quadrata circumspicitis , ac velut in vmbra res gerenda sit , nihil periculorum adeundum putatis. Atqui vestri socij ij , qui in India Orientali in Malabarica , in Malaca , in Ormucio , in Malucis , in Æthiopia , in Iapponia , in Sina , cæterisque Orientis regionibus tanta præstiterunt , & tanta cum gloria rebus ab iis gestis per ipsorum epistolas cognitis in omnium ore versantur , non sine magnis sudoribus siue ingenti periculo eam sunt laudem consecuti. Quod si vrbes tantum Hispanorum incolas vobis existimatis , si Mexicum , Limam , Cuzcum , ac non in medijs Indorum populis sedem figitis , si Carangas , Collas , Sacacas , Yauyos , cæterasque Prouincias barbarorum vitatis , vmbra tantum ac ludicra vestra omnis de Indis procuratio sit necesse est. Quomodo enim eam gentem Christo expugnare poteritis , apud quam sedem figitis nullam , nulla certa præsidia constituitis , nullas moras ducitis ? Cum nulla alia re perinde opus sit ad salutem Indorum procurandam , atque perseverantia & improbo quodam labore. Sic enim habetote Patres , quantum

418 DE PROCVRANDA INDORVM
tum nos veteranos, & mores horum barbarorum
diuturno vsu edoctos causa admonet, nisi perpe-
tuo, ac constanter verbum vitæ, & curam salutis
harum gentium meditemini, vanos omnes ve-
stros conatus & telæ Penelopes similes prorsus fu-
turos.

CAPVT XIX.

*Quæ rationes à suscipiendis Parochiis In-
dorum Societatem deterreant.*

HÆc atque horum similia expostulare nobis-
cum solent, qui causæ Indorum studiosi, se-
gniores nos in suscipiendis Parochiis accusant,
quorum me oratione ita sæpenumero perculsum
fateor, vt propemodum victus cederem, omnia-
que alia saluti neophytorum posthabenda existi-
marem, atque equidem pene contemnerem. Sed
contemni profecto non possunt, cum occurrant
nobis tot viri religiosi & pij, qui non minus ami-
co, & sincero animo trepidationem nostram in
suscipiendis Parochiis vehementer probent, con-
firmantque se longa experientia didicisse religioni
suæ plurimum ejusmodi Parochias incommodas-
se. Itaque permulti graues, & pij viri in suis Capi-
tularibus Conuentibus agitarunt de Indorum Pa-
rochiis deferendis, ne & regularibus suis nocere
pergerent, & maximas ab Episcopis, à Patronis,
à Præfectis Regiis molestias sustinerent. Quod
& si effectum non est, Rege regiisque ministris
contra

contra nitentibus, tum verò sententia aliorum, vel charitate, vel quavis alia causa obtinente, tamen illud omnes, aut penè omnes experti nobis gratulantur, quod eos scopulos nos præteruecti simus. Neque enim in nouo orbe antiquam Domini sententiam obliuisci debemus: Quid prodest homini si mundum vniuersum lucretur, animæ verò suæ detrimentum patiatur? Aut quam dabit homo commutationem pro anima sua? Et illud Sapientis: Secundum virtutem tuam recupera proximum tuum, & attende in illis, ne fortè incidas. Præterea illud ante oculos ponere oportet, Qui sibi nequam est, cui bonus erit vnquam? Et illud Pauli, Attende tibi quibus ita salutem fratrum iubemur quærere, vt ne negligamus nostram, imò verò nullam esse ab aliis sperandam, si in nobis prima defecerit. Atque vt omittam reliqua, quæ non leuia sunt, duo manifestè habent Parochiæ Indorum grauissima incommoda. Vnum est continentiae periculum, propter Parochorum miram solitudinem, ac libertatem quidvis perpetrandi, cum perpetua quadam esca libidinis ex foëminarum aspectu, colloquiis, rei familiaris usu. Ad quæ accedit, vt cumulum faciat mira ipsarum foëminarum facilitas, rarus pudor, resistendi vis propemodum nulla, sæpè etiam spontè oblata copia. Hoc igitur vnum est: alterum verò non leuius iudicio meo, quod ex lucris specie nascitur, cupiditatis opinione siue vera illa siue falsa sit, omnia Parochi studia respergit propemodumque corrumpit. Nam & victus suppeditari solet ab Indis, quod illi Camaricum dicunt, & à Patronis Dominisque Indorum salarium penditur.

Matth.
16.

Ecccl. 19.

Ecccl. 14.
1. Tim. 4.

Hic cum Indis imperando, exigendo, commo-
dissimum quodque eligendo, minus copiosum
Camaricum recusando; quanta turbatio inter ip-
sorum fraudes, & Parochi cupiditatem. Itaque
omnem ad Parochi quæstum vel fallendum si
possunt, vel si non possunt, explendum, salutis
sue curam, cogitationemque conuertunt. Cum
Patronis rursus Indorum, cum prætoribus, quæ
tragœdiæ quotidie? Quot iurgia, & lites, quibus
Regia subsellia assidue crepant. Hinc simultates,
hinc odia acerba, hinc calumniæ graues. Coniu-
rat cum Curacæ Patronus aduersus Parochum,
& quidvis ut obijciat, testes habet ad votum. Hæc
qui non vidit, ad exaggerationem fortassis cumu-
lata putabit: qui interfuit, & rem totam oculis
perlustravit, rerum fide inferiora testabitur. Igi-
tur vel continentiae naufragium, vel sæua certè
tempestas subeunda est, tum verò auaritiæ gurgēs
ipse si euitetur, species profecto auaritiæ, &
existimationis iactura euadi nullo modo posse
videtur.

C A P V T XX.

*Quæ in suscipiendis Parochiis moderatio,
adhibenda sit.*

INter has verò tantas difficultates, illa hæte-
nus sententia mihi magis probata est, usque
dum melius, & certius aliquid eluceat, Paro-
chias Indorum, neque esse societati nostræ temerè
complectendas.

complectendas, neque usquequaque tamen repudiandas. Sed siquidem duobus illis incommodis incontinentiæ, & avaritiæ satis occurri queat, tum verò Episcoporum pace, & amicitia retenta, cætera omnia officio aduersus Indos esse posthabenda. Sin verò vitari nulla ratione queant, pro certo esse intelligendum aliam esse adiuuandi has gentes quærendam viam, neque dubitandum hanc vulgarem diuinitus nostris esse præclusam. Nam præter communes Euangelizandi leges est illa societati nostræ vel prima, vel maxima, vt ministerij sui impensi in proximos nullam omnino patiatur mercedem, mercedisve speciem ad se redundare. Itaque quod alijs valde, & licet, & sanctum est, eleemosynas pro missa dicenda, pro funere, pro concione, & accipere & petere, nostris etiam vltro oblatas admittere nullo modo fas est, idque & constitutionum & literarum Apostolicarum præceptis disertè, & sæpe cautum est. Quare nihil est quod tantopere quidam mirentur, si Parochias Indorum Camarico, & salariò instructas minus cum nostra professione congruere existimemus. Verum ea, quæ dixi, incommoda vitari satis posse videntur mihi in iis præcipuè Parochiis, quæ vel in vrbibus Hispanorum sitæ sunt, vel ab iis non admodum remotæ, qualis hæc Limensis est S. Iacobi, quam nostri tenent. Nam & subesse possent Rectori collegij, qui Indorum doctrinæ dant operam, atque illorum religioni & modestiæ satis consuli potest, cum vita omnis illorum, superiorum oculis subiecta sit, qui vt, & sibi & officio satisfaciant suo, facile curant, Vitæ ergo liberioris licentia superio-

rum cura prope inuigilantium in hominibus alio-
qui probatæ integritatis, satis sublata videri potest.
Etenim & magnum Indorum fructum ita experi-
mur, & incommoda omnia facile anteuertimus.
Sed quoniam sacerdotes doctrinæ, & administra-
tioni Indorum necessarij sine sumptu & quidem
copioso vbi frequentes illi sunt, alii non possunt, nō
est recusandus moderatus, & congruens victus,
dummodo illud inuiolabile sit, vt ab Indis ipsis ni-
hil exigatur, neque cum præfectis ipsorum sordidæ
contentiones de quæstu aut mercede concitentur.
Id vt fiat, censent plerique magno adiumento fore
eam constitutionem, quam noua lege iam vide-
mus editam, vt de publico ærario sacerdotibus an-
nui prouentus tribuantur, quod si sincere, & can-
dide obseruetur, non dubium est, quin honestis, &
religiosis hominibus percommodum, & iucundū
sit: ipsi vero ædificationi, & saluti neophytorum
magnopere conducat. Hoc genus ergo Parochia-
rum collegiis Societatis vicinarum mihi iis, quas
dixi, conditionibus suscipi minimè displicet. Sed
quoniam maius aliquid homines in societate re-
quirunt, neque eo modo satis vel expectationi
de se conceptæ, vel harum gentium extremæ ne-
cessitati nostri faciunt, ne illud quidem omitten-
dum est, quod nos admonuerunt opportunè viri
primarij. Esse quasdam prouincias Indorum fre-
quentes, vbi collegia societatis erigi possent, at-
que inde sacerdos prodire ad parochias procu-
randas, qui tamen superioris, & curæ, & oculis
penè subcessent, & religiose iuari, & inuisi, &
commutari cum esset opus, facile possent. Ita
enim fieret, vt Indorum rationibus consuleretur
ordinaria

ordinaria nostrorum præsentia, & ipsis religiosi instituti nihil deperiret. Atque hoc genus doctrinarum, ut vocant, plerique regulares maximè probant, quod est in Nova Hispania vñtatum, vbi monasteria, ut audio, in oppidis Indorum passim ædificata sunt. Et in hoc ipso regno Peru sunt non pauca huius exempli. Quanquam & diaboli inueteratæ inuidiæ & hominum fragilitati nihil est vnquam satis tutum. Verum in re ardua atque vñdique difficultatibus plena, quæ à periculo longius absunt, ea pro tutis consilia reputari debent.

CAPUT XXII.

*Missionum vsus in Ecclesia antiquus
& frequens.*

SI quid in parochiis tenendis minus Indorum salutì præstamus, certè Missionũ commoditate copiose rependi potest. Missiones verò intelligo eas excursions, & peregrinationes, quæ oppidatim verbi diuini causa suscipiuntur, quarum & vsus & authoritas longè maior est, & latius patet, quam homines opinantur. Etenim in prima illa florentissima Ecclesia videre est hoc duplex genus Euangelizantium. Alij certas plebes moderandas instituendasque cura propria ac perpetua suscipiebant, de quibus Paulus Apostolus loquitur: Huius rei causã reliqui te Cretæ, ut constituas per ciuitates presbyteros, quos etiam Hierosolymam adiens ex Epheso euocauit Miletum.

Tit. 1.

Act. 10.

Attendite, inquit, vobis, & vniuerso gregi, in quo vos posuit Spiritus sanctus regere Ecclesiam suam, quam acquisiuit sanguine suo. Hos quoque Petrus alloquitur: Seniores pascite, qui in vobis est, gregem Dei, non turpis lucra gratia, neque dominantes in clero. Hos Ioannes in sua Apocalypsi Angelos salutât, Smyrnæ, Ephesi, Philadelphiae, & cæterarum urbium. De quorum perpetua residentia apud plebes sibi commissas tam multa sancti Canones edicunt, vt sacra & antiqua Concilia relegentibus tædio penè sit eadem causa toties ac tantopere repetita. Hunc ergo locum in Ecclesia Dei parochi tenent Indorum certè nouis fœtibus pernecessarium & salutarem. At fuit alterum genus in Ecclesia sancta Dei ministrorum, qui non firmas sedes tenerent, sed prout temporis opportunitas, & fratrum necessitas postularèt, varias Ecclesias odirent, in iis pro re moras traherent, proprios pastores iuuarent, infirmos confirmarent, fortes perficerent, omni ratione Christi rem promouerent. Nam vt in exercitu sapienter instructo præter militares copias certa sede dispositas, quibus nihil magis curæ sit, quam vt locum suum ne deserant, cum in eo victoria sit, vt caput potius ponant, quam semel fixum pedem referant, sunt etiam auxiliares copiae leuissimæque armaturæ equites, quorum sit contra munus huc illuc discurrere, vbi discrimen sit, promptè adesse, labantem iam militem confirmare hostem irrupentem excipere, omni negotio adesse, quorum fidei & diligentiae plerunque victoria accepta referenda sit: ita profectò in hac militia Christianæ velut castrorum terribili & ordinatissima acie,

acie, duo sunt ordines, vnus eorum, qui certo loco decertant, alter eorum, qui per omnia discurrunt, vt omnibus opem ferant. Quod militiae genus tanti in Ecclesia factum est, vt duces nostros summos, id est, Apostolos sibi sumpsisse videamus. Quid enim aliud agebant Paulus & Barnabas cum inter se dicerent, Reuertentes visitemus omnes Ecclesias, in quibus prædicauimus: Quid Petrus dum transiret vniuersos, & deueniret ad sanctos, qui habitabant Lyddæ: Hoc prorsus Timotheus, quem mittebat Paulus, vt confirmaret Thessalonicenses. Hoc Titus apud Corinthios egit. Hoc Iudas & Silas Antiochiam ab Apostolis missi. Hoc Paulus ipse cum Sila perambulans Syriam, & Ciciliam confirmans Ecclesias & præcipiens custodire præcepta Apostolorum. Et quamvis hoc Episcoporum, qui hac parte Apostolis successerunt, munus sit, tamen neque Episcopi omnia præstare possunt, & ipsi suarum Dioceseon limitibus conclusi sunt. Quamobrem ad eum cui vniuersalis est Ecclesia commissa à Christo, Romanum inquam Pontificem in Petro oues omnes Christi pascendas suscipientem singulari quadam ratione pertinet, quia per se ipse non potest, vt à se destinet, qui ipsius autoritate hoc tantum munus obeant. Itaque cernimus in Ecclesia multorum Patrum religiosos ordines successisse, qui Apostolica autoritate freti totum terrarum orbem doctrinae luce illustrarint, vitæ pietate & ardore inflammari. Quo in genere societas hæc minima nihil sibi aut nouum, aut nimium sumit, si vocationem suam agnoscit, vt in Christo omnibus seruiat, & cum nulli sæpe, aut loco, aut per-

*Act. 15.**Act. 1.**1. Thes. 3.**2. Cor. 7.**8. 11.**Act. 19.**Ibid.**Ioan. 21.*

426 DE PROVVRANDA INDORVM
sonæ addicta sit, omnes tamen officio prosequatur suo. Neque vlllo modo dubitandum est, quin vocationi si suæ ipsa non desit, eius, qui ad rem tantam vocare dignatus est, gratiam & largitatem vberrimè expertura sit.

C A P V T X X I I .

Missionum utilitates inter Indos.

Missionum autem utilitates inter Indos multæ magnæque sunt. Prima quòd omni cupiditatis occasione procul remota cum neque ministerij sui mercedem exigant, neque fructum alium expectent, quam salutem Indorum, neque in postulando Camarico molesti sint, deinde continentia, & integritatis lumen præ se ferant, admirabile dictu est, quam in sui doctrinæque suæ admirationem & studium Indos rapiant. Neque enim, quod sæpe dicere soleo, illustriora miracula ad Euangelij commendationem Indis adhiberi possunt, quam vt neque auaritiæ occasione neque libidinis sinistro rumore, doctrina ministri Euangelici decoloretur. Secunda, quòd cùm seuerius obiurgare & male facta vindicare ad parochos proprie pertineat, missionū verò ratio ea sit, vt potius consolandi, intercedendi, ac bene de omnibus merendi partes sibi sumat, valde in nostros studia Indorum excitantur, & fit animorum magna coniunctio: ex qua & fidē dictis facile commodant, & se suaque omnia libentissime

bentissime impertiunt atq; communicant. Tertia hinc quoque manat, & est copiose vsu comperta, quod ad confessiones nostris faciendas, etiam generales, etiam ingentium scelerum, ac diutissime conectorum, vltro ipsi non inuitati veniunt, qui tamen parochorum omnium vna sententia, raro verum in confessione sacramentali ipsis aperiunt, quippe qui parochos pertimescant. Eo omni metu odioque sublato ad nostros, quos sibi experiuntur beneuolos, nihilque læsuros certò sciunt, certatim accurrunt, crimina omnia aperiunt, vitæ consilia libenter accipiunt, summa deuotione imperata exequuntur. Hæc vna commoditas missionum, quam in prouinciis superioribus cum versaremur, abundè sumus experti, tantè est apud me, vt si nullus alius missionum fructus expectaretur, sola sufficeret. Ac quemadmodum in sacro Tridentino Concilio propter fragilem muliebre sexum sacramentalium pudori & metui Patres ita consulendum putarunt, vt præter ordinarium voluerint aliquoties extraordinarium illis confessarium dari: ita equidem Indis etiam consulendum arbitror, quorum est fides infirmior, & duriores in se parochos experiuntur. Itaque eo missionum auxilio mirifice eorum infirmitas recreatur. Quartam demum utilitatem ex ipsa diuini verbi tractatione numero: quæ triplex est in missionibus. Vna, qua pueri & rudiores simpliciter, & memoriter catechismo imbuuntur, idq; statis diebus & horis, partim canendo partim recitando fructuose admodum fit. Altera, qua docentur, & instruuntur familiariter pro suo quisque captu tam in mysteriis fidei percipiendis, quam in moribus honestè instituendis.

*Concil.
Trid. sess.
25. c. 10.*

Postrema

Postrema est ea, quæ ad exhortationem spectat, qua pro concione excitantur ad salutaria omnia, ac vi ipsa dicendi dicentisque authoritate flectuntur. Hic mirificè & capiuntur, & cedunt, si concionatorem linguæ bene peritum, & apposite dicentem nacti sunt. Quod cum rarum in parochiis sit; vnus eiusmodi Indice bene doctus, missionum excursionè multis parochiis prædesse potest. Atque ad has quatuor exempli, Beneficentiæ, Sacramenta administrandi poenitentiam præsertim, & verbi denique diuini disseminandi redigi cæteræ possunt utilitates, quæ ad Indos pertinent.

C A P V T XXIII.

Quod Parochi Missiones utiliter & libenter accipiant.

Est alia quoque his non inferior utilitas missionum, cum ad parochos ipsos beneficium deriuatur. Paulus quidem dicebat, Deo autem gratias, qui semper triumphat nos in Christo Iesu; & odorem notitiæ suæ manifestat per nos in omni loco, quia Christi bonus odor sumus, quod suo quoque modo vsurpare possunt, si qui sunt discursus Apostolici sectatores. Nostri certè experti sunt sæpenumero parochos ipsos vitæ consuetudine colloquiisque captos ad Christum aspirasse, neque parum ad virtutis officia commotos esse. Nihil enim vitæ exemplo potentius præfertim

fertim in morum quadam suauitate, tum ipsa familiaris collocutio studia similia parit. Cumque se se adiuuari à nostris sedulo nulla interim mercede expectata vident, atque onere ipso non parum leuari horum opera, beneficio allecti de se bene meritos amant. Iam verò cum ad conscientiam suam fructum hunc deriuant, ad suos longè diffundunt exemplo instructi, æmulatione excitati, fructu prouocati. Ad hæc omnia illud accedit, quod cum sæpe binæ ac ternæ aut eo plures parochiæ valde inter se etiam diiunctæ vnius parochi curæ commissæ sint, atque adeo neque baptizare, neque confessiones audire, neque in doctrina instruere omnes suos commode potest, fit, vt maximam anni partem oues pastore prorsus careant, qua ex re quot milia periclitentur imò verò manifestè intereant, dici non potest. Possunt ergo qui Missionibus vacant, bonam temporis partem in ea parochia consumere, à qua parochus abest, & omni boni pastoris officio perfungi, quæ res non solum est ipsis Indis salutaris, Verum etiam Episcopis, parochis, patronisque gratissima, quibus omnibus eiusmodi supplementa magnam conscientiæ quietem afferunt. Quamobrem à multis iam agitatatum est, vt collegia Societatis, aut residentiæ in frequentia maxima Indorum collocarentur, unde tanquam ex munita arce subsidiarij milites regionem omnem opportunè excurrerent. Ad hæc, vt filios nobilium Indorum à pueritia instruendos educandosque susciperent, in qua vna re totius gentis salus vniuersa posita est. Neque ego sane diffido futurum breui, vt his omnibus modis

430 DE PROCURANDA INDORVM
modis atque rationibus societas nostra saluti In-
dorum procurandæ, quod tantopere cupit, feli-
citer operam nauet.

C A P V T XXIV.

Quid cauere oporteat in Missionibus.

AC missionum commoditates eæ ferè sunt;
quas exposui. Vt verò in omni præclaro ne-
gocio euenire solet, non carent suis quoque non
leuibus difficultatibus. Primum enim inuidia pa-
storum, & plebis contemptus eorum præ nostris
diligentissime cauendus est ea vna ratione, vt om-
ni, & verborum, & rerum significatione testentur
se nullo modo esse parocho superiores, sed hunc
verum legitimumq; pastorem, se verò tantum illius
adiutores, & administratos. Itaque omnem honoris
in illum significatione ne prætermittant, vt & ipse
intelligat nihil ab iis ambitiosè agi, & populus fa-
ctione nullo modo meditetur, sed subditus sit per
omnia Parocho suo. Vix dici potest, quantopere
inter Indos obseruetur is, qui cæteris imperat, &
præest, vt statim oculos in ipsū Apo, vt illi vocant,
animumq; conuertant. Qua ex re nisi humilitatē
nostri insinuent, & circumspectè parochorum au-
thoritatem tueantur, atque commendent, certum
est inuidia, & calumnia omnia statim bona studia
corrumpi. Præterea & illud omnibus modis curā-
dum, ne odiosi parochis simus, dum vel nimiam
integritatem ostentamus, vel reformatorū ac cen-
sorū partes importune assumimus. Meminisse po-
tius illud oportet à Spiritu sancto dictum, Noli esse
iustus

iustus multum, neq; plus sapias quam necesse est, ne obstupeſcas, Itemque illud Apoſtoli, Omnibus omnia factus ſum, vt omnes facerē ſaluos. Et illud Domini, Dicite, Pax huic domui, & ibi manete comedentes, & bibentes, quæ apud illos ſunt. Denique vnusquiſque proximo ſuo placeat in bono ad ædificationē. Etenim Chriſtus non ſibi placuit. His aliisq; diuinæ Scripturæ ſentētiis docemur, ita religionis diſciplinam conſeruare, vt charitati fratrum multum demus. Multa toleranda ſunt in homine præſertim ſæculari, ſæpe etiam profano: nonnulla interdum concedenda ſalua conſciētia, & ita agendum, vt conſuetudinis ſuauiſſime alliciatur potius, quam aſperitate offenſus reſiliat ſtatim. Itaque neque viſitatores, neque cenſores, aut Momos aliquos vel Sycophantas exiſtimare nos debet, ſed ſibi amiciffimos, & humaniſſimè affectos. Nouimus ex prudenti diſſimulatione non paucos egregiè captos tandem Dei verbo manus dediffe: quos ſi nimia ſeueritate offenderis, mille cōcioniſ reuocare non poteris. Verum ita humanitatis leges ſeruandæ ſunt, vt neque religionis exiſtimatio lædatur, neque conſcientiæ coram Deo puritas offuſcetur. Nam & virū religioſum & Apoſtolicum munus obeuntem nihil, aut leuitatem, aut faſtum, aut laſciuiam redolēs decet. Quoniam verò cum ad aperiendas conſcientias ſuas in cōfeſſione parochi accurrunt, imploranda impenſe eſt diuina gratia, vt & officio non deſis tuo, & fratris animam grauiſſimè interdum ſauciam à morte reuoces. Ego ſanè in cōfeſſionibus audiēdis nihil æquè formidare ſoleo, quòd Sacerdotum quotidie cœleſtia ſacramenta tractantiū vix

medicina

1. Cor. 9.

Matth.

10.

Rom. 15.

medicina vlla morbi curari possunt, cum semel
cœperint peruenire ad cor durum, atque illud
Gregorij plerunque, cum eiusmodi duritiem con-
templor, venit in mentem. Plerique eorum à Do-
mino impœnitentis cordis caliginem proiciun-
tur, & nulla hominis adhortatione resipiscunt,
Ergo in primis illud tenendum est, vt placendi vo-
luntas, & humanus affectus nullo modo domine-

*Gregor.
lib. 1. ex-
posit. in 1.
Reg. 6. 3.*

Ezech. 13.

Petr. 1.

1. Tim. 3.

Sap. 8.

*August.
epist. 64.
ad Aure-
lium.*

tur, ne puluillos sub omni cubito, & ceruicalia
sub omni capite statuamus, iuxta propheticam
comminationem, quin potius veritas in omnibus
dominetur, & præsit, propter quam si homines
aliquando scandalizantur, non magnopere curan-
dum est. Dei enim iudicium est, ait scriptura. Ita-
que si is, qui parochus nominatur, concubiniarius
sit, si aleator, si fœnerator, si simoniacus, si liti-
gator, si turpis lucri sectator, si officij sui negli-
gens, si sermonis Indici imperitus, & contem-
ptor, veritatis falce resecanda sunt vitia, ac nisi
tibi ipsi in Domino satisfeceris peruidendum, ne
alienis peccatis ipse communices manus pœni-
tentia cito imponens. Cæterum hæc ipsa etiam
lethalia, & vetusta vlcera oleo simul foueri pos-
sunt, atque ita vino perfundi, vt pariter, & mor-
deantur, & ferant. Attingit, inquit, à fine vsque
ad finem fortiter, & disponit omnia suauiter diui-
na Sapientia. Opus forte, modum suauem esse
oportet. Multum interest, qua manu, qua dexte-
ritate vulnus chirurgus infligat. Non imperiosè
non duriter, magis monendo, quam minando,
magis iuuando, quam iubendo, vt ait Augustinus,
ista tolluntur. Vidimus sæpe Sacerdotum con-
scientias deploratas, de quibus ego planè diffide-

ram.

ram eo quod ad cor durum peruenisse mihi viderentur, & iuxta Hieremiam propter multitudinem iniquitatis dura facta esse peccata, ministeriis tamen nostris, vel potius diuinæ gratiæ ita cessisse, ita resipuisse, ita ad cor rediisse, ut magnificas Dei bonitati gratias ageremus, & spem non vulgarem conciperemus, societatis nostræ homines, quorum sunt parochi penè omnes valde studiosi, præclarissimos fructus in lucrificandi Domino eiusmodi hominibus allaturos, Hæc in parochos obseruanda. Porro Indi, ipsi quoque curam quandam mediocritatis efflagitant. Ut enim eos oderunt, qui nimij in exigendo sunt, ita etiam à se auersos putant, qui ab ipsis oblata repudiant. Accipienda ergo sunt humanè munuscula eorum, & benignè vel eadem, vel plura si liceat, pauperibus communicanda. Quod si ipsorum opera interdum opus sit, dum ea moderatione, qua decet, utaris, nihil offenduntur, imo verò si te alioqui sibi beneuolum experiuntur, amplius diligunt. Illud quoque obseruatum auctoritatem quandam retinendam esse aduersus eos, paternæ grauitati coniunctam: neque tam summissionis, quam liberalis cuiusdam imperij speciem præferendam. Amant enim hoc modo, quæ istorum est natura, tractari. Sed neque necessario nostrorum apparatu offenduntur, neque paupertatem magnopere admirantur, magisque præclariora nostros non posse afferre, quam non velle interpretantur. Quamobrem quæ ad vitæ necessitatem aut etiam commoditatem pertinent, prætermittenda non sunt, nam & locorum, & rerum magnæ difficultatis id exigunt ad hac prouinciarum Indicarum

tanta

tanta asperitate & inopia, & Indorum ingenia diuinitus ita comparata sunt, vt ædificationis isto necessario vsu nihil amittant. Illud enim non extremo loco cogitandum est, & penitus prouidendum, ne dum Apostolicæ abdicationi quidam inhærent, vitæ commoditatibus destituantur, atque ita vel labore victi, vel viribus destituti bene institutum cursum reuocent. Nam qui aliquando

Luc. 10. suis dixerat, Nolite portare sacculum neque peram, idem alio tempore iisdem dixit, sed nunc

Luc. 22. qui habet sacculum tollet, similiter & peram. Quo in loco Bedam venerabilem audire licet,

*Beda
lib. 6. in
Euang.
Luc. 6. 22.*

Nobis quoque, inquit, datur exemplum, iusta nonnunquam causa instante quædam de nostri propositi rigore posse sine culpa intermitteri, verbi gratia, cum per inhospitales porrò regiones iter agimus, plura viatici causa, quam domi habebamus, licere portare. Indicas sanè peregrinationes notasse videri potest. Atque hæc ad difficultates Indicarum missionum considerandas hætenus dixisse sit satis, Illud postremò adiiciendum puto. Indicas & commoditates, & difficultates non ex aliarum nationum lege aut consuetudine, sed ex sua ipsarum esse metiendas, & Dei zelo præeunte tum verò experientia duce, illud in omnibus intuendum, vt non quæramus quod nobis vtile est, sed quod multis, vt salui fiant.



DE PROCVRANDA INDORVM SALVTE.

LIBER SEXTVS.

*Breuit̃ ea de Sacramentis attinguntur,
quæ rudibus Indorum Populis ne-
cessaria visa sunt.*

CAPVT PRIMVM.

*Quatenus modo de Sacramentis
agendum sit.*



E diuinis Sacramentis admini-
strandis, quod vnum ex iis, quæ
proposuimus, restat, si pro argu-
menti dignitate disslerendum es-
set, magnum opus existeret, &
quod in alterius parte numerari
cùm ipsum per se tantum sit, meritò quodammo-
do indignaretur. At nos rem tantam nullo modo,
aggredimur, qui de Sacramentis contra impuden-

436 DE PROCVRANDA INDORVM
res Nouatorum calumnias, & ab ipsa Ecclesia in
magno & œcumenico Concilio Tridentino co-
piosè grauitèrque definitum, & illustres nostræ
ætatis scriptores nusquam aut vberius, aut fœli-
cius quam in illis asserendis, explicandis, com-
mendandisque elaborasse, non ignoremus. Igitur
cum Hæreticis res nobis modo non est, sed ne
Catholicos quidem antiquos, & in religione con-
stantes admonendos, cohortandosve existima-
mus, quorum illud insignem eruditionem, hoc
dicendi facultatem non vulgarem requirit. Tan-
tum breuiter, ac penè cursim ea de Sacramentis
attingemus, quæ rudibus Indorum populis neces-
saria videbuntur, atque in iis maxime insistemus,
quæ per imperitiam, aut incuriam quorundam
contra veterem & Ecclesiasticam disciplinam in-
ter hosce neophytos obrepisse & percrebuisse no-
tauimus.

C A P V T II.

*Multa in his regionibus contra Ecclesiæ
consuetudinem geri.*

NAm ex quo tempore obedientia duce ad
has regiones Indicas venimus, non pauca
in Sacramentorum functione minus conuenien-
ter Ecclesiasticis institutis, nonnulla perturbatè
prorsus atque ineptè geri, & diu mirati sumus, &
dolenter sæpe commemorauimus. Causa mihi
cogi-

cogitanti nulla certior occurrit , quam quòd Euangelium non tam prædicatorum , quàm militum manu in has nouas orbis nationes inuentum sit : quorum socordia cum imperitia coniuncta multa absurdè peperit , quæ accedente consuetudine confirmata tanquam legitima habentur. Ita priores posterioribus errandi viam munierunt , vt vix liceat doctis & piis hominibus veterem totius Ecclesiæ consuetudinem restituere , habeanturque rerum Indicarum imperiti , qui religionem & Sacramenta Ecclesiæ integrè , ac pro dignitate Indis tradere cupiant. Quid plura ? Cum in Prouinciali Concilio Limensi ab omnibus Peruensibus Episcopis , cæterisque grauibus viris ad ea vitia emendanda multum operæ & studij collatum sit , atque edita extent egregia decreta de reformatione permulta , nihil tamen amplius perfectum est , quàm si ab otiosis nautis de Republ. moderanda consultatum esset. Quis verò non doleat Baptismo plerosque adultos initio passim , & nostro tempore non rarò ante perfundi , quàm Christianam catechesin vel mediocriter teneant , neque an vitæ flagitiosæ , & superstitiosæ pœnitentia tangantur , neque verò id ipsum , quod accipiunt , an velint accipere , satis constet ? Quid illud , quod confessiones sæpe ita fiunt , vt neque Indus intelligat sacerdotem , neque intelligatur ipse , quid dicat , tam supinè parochis nonnunquam dormientibus , vt neque peccatorum rationem exigant , neque doloris sensum requirant , nihilque magis curent , quam vt à se quam citissimè confitentes ablegent. Porro Eucharistiam qua le-

458 DE PROCVRANDA INDORVM
ge contra omne & diuinum, & Ecclesiasticum
ius non solum quotannis adulti Indi, verum etiam
morientes ritè confessi prohibentur accipere?
Quam si quispiam nostrium porrigere velit, & via-
tico munire migrantem, nouitatis accusatur, &
sacrilegij propemodum reus agitur. Quod si hoc
venerationi Eucharistiæ prætexitur, cur saltem
quæso Extrema vnctio subtrahitur? Neque in syl-
uis tantum aut remotis oppidis, sed in ipsa no-
stra vrbe, in ipso sacro Xenodochio morituri
tanto bono priuantur. Horum similia sunt plu-
rima. Etenim matrimoniorum errata vel socor-
dia, vel imperitia ministrorum admissa longum
esset enumerare. Quales sint infidelium nuptiæ,
quibus gradibus apud Indos contractæ valeant,
quæ impedimenta Apostolicis literis his neophy-
tis sublata sint, quæ etiam dum integra restent,
pauci scire laborant. Hanc igitur tam vastam
syluam ingressi illos tantum errores refellere cu-
pimus, qui & perniciosiores, & magis vulgares
sunt.

C A P V T III.

De voluntate Baptismo necessaria.

Igitur in Baptismo, barbaris præsertim, conse-
rendo, tria spectare debet fidelis, & prudens,
dispensator mysteriorum Dei, Voluntatem, Fi-
dem, Pœnitentiam, Voluntas sanè omnino co-
gnosceda est eorum, qui ad Fidei Sacramentum
aspirant,

aspirant, nec nisi petant, & instent, Christianæ vitæ professione donandi sunt. Ecclesiæ consuetudo tenet, vt priusquam catechumenus baptizetur, ter interrogetur, & tertio respondeat, baptizari se velle, quod intelligerent Sancti Patres magnum esse Christianæ Religionis pondus, magnas Evangelicæ turris expensas; nec nisi re admodum deliberata, & perspecta hominum imbecillitati temerè rem tantam debere committi. Quod profectò non nuda cæremonia obseruandum est, sed multo magis spiritu & veritate. Vt non solum infideles Indi diligenter explorèntur, verum cognita iam, & perspecta voluntate diu in catechumenorum ordine teneantur, quò & instructiores veniant & pluri faciant mysterium salutis suæ. Quam Ecclesiæ veterem disciplinam ita in hoc nouo orbe neglectam intuemur; vt nusquam contra Euangelij dignitatem magis irreligiousè, & contra hominum salutem magis perniciosè peccatum esse intelligamus. Dum enim quoquomodo per fas, & nefas, per dolum, & vim gentes barbaras Christianas efficere properant homines imperiti, aut improbi, nihil aliud agunt, quam vt Euangelium ludibrio exponant, & Fidei temere susceptæ desertores certissimo exitio afficiant. Non enim tales, vt est in Decretis Patrum, inuiti saluandi sunt, sed volentes, vt integra sit forma iustitiæ. Equidem censerem Prouinciali Concilio nihil grauius decernendum fuisse; ac fore deinceps, nihil etiam seuerius vindicandum, quam vt Indi adulti ante baptismum per annum, aut etiam amplius, nisi discrimen mortis vrgeret, in Fidei mysteriis perdiscèdis;

*Cōc. Tol.
4. c. 55.
d. 45. De
Indiis.*

& voluntate bona confirmanda distinerentur. Ita fieret vt serius impetratam baptismi gratiam pro magno haberent, & diligenter conseruarent, quemadmodum in concedenda Eucharistia vsu venisse cernimus. Sed quid agimus de iis, qui contra salutare hoc Ecclesiæ institutum baptizati sunt? Certè si nullam habuisse voluntatem perspicerentur, atque omnino inuiti & repugnantes, & contradicentes baptizati sunt, nullo modo Christianum characterem accepisse existimandi sunt, quemadmodum est ab Innocentio tertio definitum, neque enim sine suscipientis voluntate Sacramentum constare potest, quod accipere non potest, qui non præbet vtcumque consensum. Verum si voluntas nonnulla non defuit, tametsi vel vi, vel mihi extorta, quia re vera caractere Christi insignitus est, cogendus est Fidem semel susceptam conseruare, ne Christi Sacramento magna fiat iniuria, si profanum per licentiam reddatur, quod est etiam ab eodem Pontifice secundum Toletani Concilij decreta declaratum. Illud autem habet quæstionem non facilem, vtrum cum barbarus baptismum prorsus ignorat, & tamen non contradicens baptizatur, verè Christianum characterem accipiat necne. Nam rei ignoratæ voluntas esse non potest, cum nihil ametur nisi cognitum aliquo modo. Itaque qui interrogatus, an velit in se fieri, quod sit in aliis, aut etiam nihil interrogatus baptismo perfunditur, nihil inter baptismum, & profanam aquam discernens, nihil ibi religionis agnoscens, is profectò quomodo velit, quod nunquam cogitauit, non facile potest dici. Cum verò Sacri Canones

nihil

De baptismi, & eius effect. c. Maiores, §. itē qua.

Ibidem.

nihil aliud tradant obstare baptismo, quàm voluntatem baptismo renitentem, & contradicentem, cumque hoc loco hominem nihil dissentire, nihil reclamare ponamus, iterare postea baptismum, si ille saluus esse velit, difficilis exempli apparet. Quam quæstionem ne quisquam otiosam putet, sciat apud nos esse frequentem in iis præsertim Æthyopibus seruis, qui ex Cabouerde asportantur. Hos enim si conuenias, an Christiani iam sint, audies non raro, sese cum essent impuberes simul cum aliis plurimis in naui, aut litore deprehenso baptizatos esse, cum certè quid secum ageretur, ignorarent nisi quod multi simul à clerico, aut milite quopiam aqua aspergebantur, & exinde Christianos se fieri audiebant, cum neque hoc etiam ipsum quid esset edocerentur, neque rem ipsam penitus intelligerent, & homines barbari iumentis similes, minimè quid illud esset scire curarent. Digladiantur quidam, vtrum si neutra voluntas detur, baptismus sit ratus. Diuus quoque Augustinus non parum hæret in fine librorum de baptismo, vtrum baptismus per jocum & non serio collatus habendus sit certus ac constans. Vbi ita scribit: Solet quæri, vtrum nihil intersit quo animo accipiat ille cui datur, cum simulatione, an sine simulatione; si cum simulatione vtrum fallens an jocans sicut in mimo. Et quibusdam interpositis quibus se Ecclesiæ iudicium expectare ea de re profitetur, adiungit, Nequaquam dubitarem habere eos baptismum, qui vbicumque & à quibuscumque illud verbis Euangelicis consecratum sine sua simulatione & cum aliqua fide accessissent, quanquam eis ad salutem spiritualem non

Caiet. 3.

p. 9. 68.

art. 7.

Sor. in 4.

d. 5. ar. 7.

D. Aug. l.

7. de Ba-

ptismo

cōtra Do-

natistas,

c. 53.

De conf.

d. 4. c. 50.

let.

prodesse, si charitate caruissent, qua Catholicæ insererentur Ecclesiæ. Et mox, vbi autem, neque societas esset vlla ita credentium, neque ille, qui ibi acciperet, ita crederet, sed totum ludicre & minicè, & joculariter ageretur, vtrum approbandus esset baptismus, qui sic daretur, diuinum iudicium per alicujus reuelationis oraculum, concordii oratione, & impensis supplici deuotione gemitibus implorandum esse censerem. In hac ergo dubitatione cum de voluntate Indi, aut Æthyopis temerè baptizati quæritur, illud mihi certum est, si satis meminit se sine simulatione, & cum aliqua fide, vt Augustinus dixit, suscepisse baptismum, hoc est, intellexisse illud esse ritum aliquem Christianorum, atque ita in se fieri permisisse, quamvis cætera Christianæ religionis non sit edoctus, approbandum esse baptismum, minimeque repetendum. Re enim vera consensisse putandus est, qui cum videret in se fieri quod ad Christianam religionem pertinere vtcunque sciebat, non contradixit. Quod si nullo modo quid esset baptismus, agnouit, neque illum à profana & quacunque alia aspersione distinxit, penitus Christi, & Ecclesiæ Fidem ignorans, non magis voluisse intelligendus est, quam si dormiens, aut amens baptizaretur, cum nulla antea eius significatio extitisset. Quem sanè nullo modo baptizatum esse ego non dubito, quemadmodum ne illum quidem, de quo Augustinus valde dubitat, qui per jocum prorsus, ac non serio baptizaretur. Nam & dissentire, atque abruere putandus est, qui contra vetus institutum suum aliquid noui prorsus ignarus accipit: & satis est eum nullam baptismi voluntatem habere, ex-

*De ba-
ptismo, c.
Maior. 5.
istò qua-
ritur.*

*ex-
pressam,*

pressam, neque interpretatiuam, quam in adultis ad substantiam sacramenti requiri sanior, & certior Doctorum sententia habet. Ac satis id docuisse Innocentius III. videtur, cum de baptismo dormientis aut insani improbando, si antecedentis voluntatis signa non extent, sententiam tulit. At verò cum neque barbarus ipse satis exploratam habet præteritam voluntatem suam, neque notitiam illius temporis, neque verò indicibus manifestis percipi res potest, quod frequens est in hac superiorum temporum perturbatione, & barbarie, salutare consilium Alexandri III. sequendum est, & conditione adhibita baptismus iterum conferendus. Porro voluntatem parentum in baptismo paruulorum suorum ad substantiam sacramenti necessariam esse, quamvis asserant quidam, rectè tamen asseri non potest. Sed tamen parentibus inuitis, si infideles sint, eorum paruulos non esse baptizandos, quanquam non sine patrocínio nobilium authorum vtrinque in scholis res agitur, tamen Thomæ sententia & Ecclesiæ consuetudine & Concilij Prouincialis authoritate longè præferenda est, dummodo in mortis periculo constitutū paruulum nulla expectata parentū voluntate baptizare licere & decere quoque cōcedamus, quod authores quidam pij & docti pro illorum salute defendunt, & à nostris aliquando cum laude factum meminimus. Cū verò ex duobus parentibus alter filium paruulum Christianum fieri vult altero repugnante & contra nitente, iuxta Concilij Toletani, & Limensis decreta, baptismo fauendum est, & illius ius præferendum, qui de filij salute melius cogitat. Atque

Ibidem

*De baptismo, c.
De quibus. Dur.
in 4. dist.
4. q. 6.
Pal. c. 4.
Contra sententiam
Cai. 3. p.
q. 68. ar.
10. & Sotus in 4.
d. 5. a. 10.
D. Th. 2.
2. q. 10.
a. 12. Con.
Lim. Cōf.
27. Sot.
in 4. c. 5.
ar. 10. in
fine, idem
confirmat
Cōc. Lim.
Const. 27.
Cōc. Tol.
4. c. 51. 28
q. 1. Iudæi
qui.*

hæc

444 DE PROVANDA INDORVM
hæc de voluntate baptismum suscipientium obi-
ter attigisse sit satis.

C A P V T IV.

De Fide & Pœnitentia ad baptismi gratiam necessaria.

Ad. 20.
G. 2.

Idem verò in Dominum Iesum Christum, & Pœnitentiam in Deum, quam Paulus prædicabat in gentibus, Petrus ab Hebræis exigebat, necessariam esse, ut baptismus non solum Christi militem faciat, sed gratiæ etiam & salutis donatio afficiat, nemo est tam ineptus, qui dubitet. Verum quæ Fidei mensura exigenda sit in catechumeno, & quibus modis agendum, ut satis instructus, & firmus veniat ad la-uacrum Christi, satis est in libro superiore explicatum. Pœnitentiam autem hoc est anteaetæ vitæ veram detestationem, atque in posterum firmum corrigendæ consilium, rarus est certè in Parochis, qui pro dignitate requirat. Nam & pristinae superstitioni vulgo hærent, & concubitus nefarios retinent, & ebriositatem suam non deponunt: plerique honoris causa baptismum ambiunt, ne ab Ecclesia arceantur, nonnulli ut Hispanis Dominis ea in re gratificentur, atque eiusmodi fictionibus apud barbaros plena sunt omnia, nostra certè maxima ignavia, qui supini, atque oscitantes ea de re cogitamus, digni certe, qui tanti sacrilegij pœnas luamus. De hac vitæ
emendatio

emendatione curanda & exploranda in competentibus multa antiqui Canones, multa noua synodalia decreta præclare præcipiunt: sed facile omnia contemnuntur ab iis, qui quæstum amant, salutem hominum, & Christi dignitatem non amant. Itaque ex antiqua Ecclesiæ consuetudine perquam commodum mihi videretur, vt catechumeni aliquot dies, si menses longum esset, ieiuniis & precibus aliisque piis operibus pro facultate sua exercerentur ante baptismum, tum verò vt testimonium ferrent temperasse se à flagitioso concubitu, ab omni superstitione gentilica, præcipueque ab ebrietate, Ecclesiam quoque frequentasse, & omni officio vitæ superioris emendationem declarasse. Ita fieret, vt paratiores venirent, & quam tandiu probati gratiam adipiscerentur, non ita facile reuersi ad vomitum corrupturi essent. De qua re legi Gratianus potest in quarta distinctione de consecratione, & cæteri, qui de catechesi, & præparatione baptismo necessaria copiosè scripsere.

CAPUT V.

*De iis, qui se baptizatos vel negant
vel mentiuntur.*

DE iis verò, qui baptismum vel datum sibi esse mentiuntur, vel acceptum iam à se negant, cum sit vtrumque paris sacrilegij & periculi, merito synodalia decreta cautos esse Pa
chros

chos iubent. Sunt enim qui reuera baptizati non sunt, cum tamen Christianis nominibus appellentur, & Ecclesiastica mysteria conuentusque frequentent. Hoc ex temporum superiorum perturbatione accidisse constat. Atque in horum aliquot nos incidimus, qui cum diu Christiani haberentur, & Ioannes, aut Francisci, aut Petri vocarentur, tandem concionibus nostrorum permoti simulatione deposita baptizari se postularunt, & re diligenter discussa, inuentum est eos non fuisse reuera Christianos, sed à parentibus Indis substractos per Hispanicos Dominos eiusmodi nominibus fuisse donatos. Nonnulli quoque Æthiopes cum sæpe confessiones annuas peregissent, rogati aliquando ea de re se nunquam esse baptizatos apertè confessi sunt. Erit igitur adhibenda non exigua diligentia præsertim erga aduenas & ignotæ regionis homines. Contra alij ea occasione se baptizatos sæpe dissimulant, baptismumque supplices petunt, quem re vera iam acceperunt, eo sanè consilio, ut vxores nouas ducere liceat, cum veteres displicent. Eum fucum prudentiores Pastores deprehendere solent. Ne igitur, vel grandi sacrilegio iterato sacramento contaminentur, vel à necessario excludantur, vigilare Sacerdotes oportet. Et cum res liquido constare non potest, atque is qui baptismum petit, alioqui testimonium habet integritatis suæ, probabiliq; ratione dubia prudenti viro causa sit, Beati Leonis decretum salutare seruandum est de iis, qui in captiuitate positis parentibus nati sunt, & baptizati sint, certum esse non potest, quorum potius saluti consulendum docet lauacro regenerationis

Leo ep.

34. c. 1.

De Conf.

d. 4. cum

itaque.

Idem in

ep. 95. c.

16. De

Conf. d. 4.

c. Si nul-

la.

rationis adhibito. Quia quod non ostenditur gestum, ratio non finit, ut videatur iteratum.

CAPUT VI.

*De Sacramento Confirmationis &
illius materia.*

HÆc pauca de baptismo Indorum : neque verò plura de sacri Chrismatis sacramento dicenda sunt. Ac bene habet sanè, quod Confirmationis sacramento neophyti nostri priuati non sunt : tametsi partim penuria Episcoporum partim fortassis negligentia, raro eam gratiam Indi consequantur. Illud hoc loco, pro instituto nostro dicendum est, materiam huius sacramenti à Doctoribus, & Florentino Concilio tradi, Chrisma ex oleo, & balsamo ab Episcopo consecratum. Dubitant verò multi, an balsamum re vera ad essentiam sacramenti pertineat : & plerisque assentientibus, Sotus, & Caietanus graues authores negant, qui si de vero balsamo loquuntur, omnino tenendi sunt, cum eorum sententiam satis Apostolica Sedes confirmasse videatur. Extat enim indultum à Pio Quinto Pontifice maximo Episcopo Tucumanensi datum, quod nos ipsi in autographo vidimus, ut in hac Occidentali India, liceat in confectione Chrismatis pro vero balsamo succum quendam adhibere, natiuum his regionibus, qui balsami odorem, & suauitatem maximè

Caiet. 3.

p. 972.

ar. 2. Sot.

in 4. d. 7.

ar. 2.

48 DE PROVVRANDA INDORVM
maximè refert. Non igitur verum balsamum de
essentia est sacramenti, nisi malis materiam sa-
cramentorum Ecclesiæ subdi, quod omnes viri
docti repudiant.

C A P V T VII.

De Eucharistia percipienda diuinum esse præceptum.

Sequitur vt de Eucharistiæ perceptione dica-
mus, à qua genus Indorum latissimè exclu-
sum, adhuc homines docti, & pij frustra con-
queruntur. Quem totum locum vt commodius
explicemus, dicendum erit de ipso iure diuino,
& Ecclesiastico percipiendi Eucharistiam: tum
quid de consuetudine hucusque seruata sentien-
dum sit, & de salute eorum, qui sine viatico cœ-
lesti de vita decedunt: postremo quid deinceps
fieri expediat, admittendine sint an. excludendi
à sacris mysteriis Indi? Ac primum non parua
quæstio est inter Theologos, Vtrum re ipsa su-
mere Eucharistiam iuris diuini præceptum sit.
Quidam enim non aliam, quam Ecclesiasticæ
constitutionis vim agnoscunt, quorum potest vi-
deri non improbabilis sententia, quod videamus
Ecclesiam quibusdam dare, quibusdam negare
Eucharistiam, etiam cùm supremus agitur spiri-
tus: de qua re & antiqui Canones complures
sunt, & quarundam hodie quoque Propinciarum

Bona. in
4. d. 11.
art. ult.
q. 1. Alex.
Hales 4.
p. q. 51.
membr. 4.
Caiet. 3.
p. q. 8. ar.
11. & 12.

mos est, ut ij, qui per publicos magistratus ad supplicia ducuntur, non communicentur. Atqui ius diuinum Ecclesia tollere, aut immutare non potest. Non ergo iuris diuini est, ut homines etiam in vitæ fine Eucharistiam accipiant. Adde quòd verba Christi, quibus maximè apud Ioannem necessaria ad vitam æternam carnis & sanguinis Christi perceptio perhibetur, æquè de omnibus loquuntur, adultis, inquam, & paruulis, ut Augustinus sæpissime aduersus Pelagianos contendit, præcipuè libro primo de peccatorum meritis, & remissione, quod etiam Innocentius primus in epistola ad Concilium Mileuitanum aperitissimè docet. At verò paruulos sacramento altaris imbui, quicquid Græci, & Boëmi Hæretici contradicant, vsque adeo non est necesse, ut contraria potius consuetudo teneatur in Ecclesia Dei, & olim si qui Patres paruulos communicandos putarunt, nulla id salutis necessitate fecisse, sine controuersia credendum est, ut Synodus Tridentina commonuit. Hæc igitur cogitanti mihi, tum verò ad huius occidui orbis Ecclesias oculos conuertenti, nihil iuri diuino repugnare, si iam baptizati adulti Eucharistiam nunquam percipiant, pene persuasum esset, nisi me inde reuocaret non modo D. Thomæ illiusque sectatorum authoritas, quæ apud me valet plurimum, sed etiam perspicua atque efficax, quantum ego sentio, ratio. Si enim sacramenti cuiusque necessitas ex ipsius significatione intelligenda est, ut Ecclesiæ consensus docet, & baptismum idcirco ad vitam necessarium omnino fatemur, quod spiritualis generatio sit, nemo autem viuere queat,

*Aug. lib.
1. de Peccat. meritis, c. 20.
Innoc. I.
ep. 26. in Rescript. ad Conc. Mil.*

Conc. Trid. sess. 21. c. 4.

*D. Tho. 3.
p. 9. 80.
ar. 11.
Dom. Sot.
in 4. d. 12.
q. 1. a. 11.
Petr. Sot.
De Euchar. lect. 9. Pal. in 4. d. 9. q. 1.*

nisi

nisi nascatur : Pœnitentiæ quoque sacramentum
 necessarium agnoscimus lapsis post baptismum,
 quod in eo per claves Ecclesiæ ianua aperitur
 regni cœlestis, qua occlusa nemo introire possit
 in regnum : cum Eucharistia cibus sit animæ,
 idque ex ipsa materia, & institutione Domini
 apertissimè constet, qua obsecro ratione existi-
 mare possumus, nisi insanimus, tam pretiosum,
 tam salutarem cibum à Salvatore nostro institu-
 tum, & commendatum fidelibus, quibus tamen
 liberum sit vel nunquam illum ore contingere?
 An est minus necessarius vitæ tuendæ cibus,
 quam medicina lethali languori curando? Nam
 qui ut hinc euadant, Christum manducari spiri-
 tualiter à fidelibus posse aiunt, etiamsi sacra-
 mentaliter non manducent, atque eo cibo vitam
 animæ ali, vera illi quidem afferent, sed nihil de
 argumentationis robore imminuunt. Etenim spi-
 ritualis Christi manducatio etiam veteribus Pa-
 tribus communis fuit, ut Apostolus sanè confir-
 mat, Omnes, inquit, in mari & in nube bap-
 tizati sunt, & omnes eandem escam spirituales
 manducauerunt. Attamen populus Christianus in
 nouo testamento sicut ad vitæ generationem ac-
 cepit baptismum, ita etiam ad vitæ iam acceptæ
 alimentum accepit Eucharistiam. Ipsum ergo
 Christum sacramentaliter sumere debet ad vitam
 spirituales conseruandâ, sicut in ipso Christo per
 baptismum necessariò nascitur. Neque mihi pla-
 cet, ut re ipsa atque actu accipere hunc panem
 ad vitam animæ sustentandam opus sit; satis esse
 non dubito, ut voto accipiarur ab eo, qui non
 est idoneus actu accipere, dummodo re ipsa,
 atque

atque actu aliquando suscipiat, quemadmodum de baptismo, & Confessione Sacramentali Fides Catholica sentit. Etenim sicut de baptismo dictum est à Domino, Nisi quis renatus fuerit ex *Ioan. 3.* aqua & Spiritu sancto non potest introire in Regnum cœlorum, ita etiam ab eodem de Eucharistia dictum est, Nisi manducaueritis carnem filij hominis, non habebitis vitam in vobis. Et sicut illic legimus, Ite docete omnes gentes, baptizantes eos in nomine Patris, & Filij, & Spiritus sancti: sic etiam hîc: Hoc facite in meam commemorationem. Nam quod illa Domini verba, de Fidei manducatione tantummodo intelligenda quidam volunt, grauitè & periculosè labuntur. De vtraque enim manducatione & Fidei, & Sacramenti Christum loqui tum ipse contextus aperte docet, tum Ecclesiæ Catholicæ consensus cōstantissimè confirmat, quæ testimoniis illis ex sexto Capite Ioannis ad doctrinam Eucharistiæ confirmandam perpetuo in Conciliis & decretis vsa est. Verè ergo loquitur Christus de Sacramentali manducatione, quæ tantum Fidelibus baptizatis in hac vita positis conuenire potest: beatîs & antiquæ legis patribus conuenire non potest, qui tamen Christum spiritualiter manducauerunt. Quod si hæc tam illustria scripturæ verba nulla essent, si nulla etiam cibi significati ratio haberetur, illud tamen abundè esse deberet, quod Ecclesiæ præceptum de communicando ex Concilij Lateranensis tempore legimus, vsum verò & perpetuum & vniuersalè ex ipso Spiritus sancti aduentu cernimus, sentire verò fidelibus liberum fuisse tunc penitus à communionē abstinere, vel ad id humano non diuino

Ioan. 3.

Ioan. 6.

Matt. 28.

1. Cor. 11.

instituto vocatos esse, magnæ profectò imperitiæ est. Neque enim Ecclesia de sacramentis percipiendis solet ferre leges, sed quibus temporibus necessariò sumantur, & qua ratione definire, id ad se pertinere propriè agnoscit. Est ergo est iuris diuini præceptum, vt omnes adulti iam baptizati aliquando communicent. Tempora autem percipiendæ Eucharistiæ duo præcipuè sancta mater Ecclesia definiuit: vnum cum quis mortis angustis, aut periculo premitur, tunc viatico necessario iuuandum sacri Canones statuunt: alterum quotannis in Dominico Paschate, de quo præceptum extat Lateranensis Concilij, & Tridentinus Canon in hæc verba, Si quis negauerit omnes, & singulos Christi Fideles vtriusque sexus, cum ad annos discretionis peruenerint, teneri singulis annis saltem in Paschate ad communicandum iuxta præceptum sanctæ Matris Ecclesiæ, anathema sit.

Concil.

Nic. can.

13. 26. q.

6. De hu

ver. & in

Cœc. Car-

thæ 4. c.

77. Conc.

Lat. c. 21

Conc.

Tri. sess.

13. c. 9.

C A P V T V I I I.

Quòd quamvis diuinum præceptum sit de communicando, possit tamen Ecclesia pro iudicio suo communionem negare.

CUm igitur & diuinum ius secundum saniorrem & certiorrem doctrinam, & Ecclesiasticum præceptum secundum Fidem Catholicam, habeat,

habeat, ut omnes adulti iudicii compotes sacramentum altaris accipiant, magna mihi quaestio, & antehac, & modò maximè visa est, quid de seruiato hucusque more in hac noua Occidentali Ecclesia sentiendum sit, ubi Indi adulti iam baptizati, iidemque legitimè peccata confessi, neque semel singulis annis, neque verò mortis urgente discrimine communicantur, adeoque id usu receptum est, ut si contra fieri contingat, non leue scandalum homines putent. An debet consuetudo hæc inter eas numerari, quas Augustinus sapienter pro varietate locorum varias esse in Ecclesiis seruandas docet? At ille in iis tantum eam facultatem tribuit, quæ non sunt contra Fidem Catholicam, & Conciliorum Generalium decreta, quale de communicandis adultis omnibus esse, dubitare non possumus. An verò harum regionum homines tandiu absurde contra Ecclesiasticam disciplinam, & Euangelicam legem errasse arbitrabimur? At multi Præsules, & doctores sapientia, & religione præstantes eiusmodi morem, vel probarunt, vel certè dissimularunt. An potius quod hætenus factitatum est, ita non penitus improbare debemus, ut corrigi tamen & in meliorem usum transferri oporteat? Mihi sanè ita videtur: ut & modestè de hac Ecclesia noua sentiamus, & tamen veritatem Euangelij, saluti præsertim Indorum tantopere necessariam asseramus. Quod ut facilius intelligatur, oportet illud diligenter aduertere, quòd quamvis diuini & Euangelici iuris sit, ut Christianus aliquando communicet, potest nihilominus illum Ecclesia à communione suspendere non solum ad defini-

*Aug. ad
Ianuariū
ep. 118.
C. 119.*

tum tempus, sed etiam per totam vitam, & quod mirabile est, ipso mortis urgente periculo potest priuare viatico, neque tamen vlla ex parte ius diuinum violatur. Id ita esse complures antiquorum Conciliorum Canones apertissimè monstrant, quibus propter varias causas etiam verè pœnitentibus cum de vita exeunt, non esse concedendam Eucharistiam legimus. In vno Elyberino Concilio omnium propemodum Prouincialium antiquissimo, plusquam septem aut octo canones ob varia commissâ, neque in fine communionem accipiendam esse decernunt. Ac nequis vel Prouincialis Concilij authoritatem, non magni faciat, vel peculiarem alicuius regionis & Ecclesiæ eam seueritatem putet, legat beati Innocentij Papæ epistolam ad sanctum Exuperium Episcopum Tolosanum, cuius verba recitare placet, Quæsitum est, inquit, quid de his obseruari oporteat, qui post baptismum omni tempore incontinentiæ & voluptatibus dediti, in extremo fine vitæ suæ, pœnitentiam simul, & reconciliationem communionis exposcunt. De his obseruatio prior, durior: posterior interueniente misericordia inclinatio est. Nam consuetudo prior tenuit, vt concederetur eis pœnitentia, sed communio negaretur. Nam cum illis temporibus crebræ persecutiones essent, ne communionis concessa facilitas homines de reconciliatione securos non reuocaret à lapsu, negata meritò communio est, concessa pœnitentia, ne totum penitus negaretur, & durio remissionem fecit temporis ratio. Sed postquam Dominus noster pacem Ecclesiis suis reddidit, iam depulso terrore, communionem dari abeuntibus placuit,

*Conc. Elyberinâ
in 1. tom.*

*Innoc. I.
epi. 3. c. 1.*

placuit, & propter Domini misericordiam quasi viaticum profecturis. Quem morem Pontifex ipse Innocentius deinceps retinendum decernit, magnæ Nicænæ Synodi auctoritatem secutus, cuius decimus tertius canon habet: De iis qui excedunt, antiqua & canonica lex hunc quoque servabitur, ut si quis vita excedit, ultimo & maximè necessario viatico ne priuetur. Quamvis ergo hoc decretum Nicænum toto orbe terrarum perpetuo obtinuerit, tamen negare non possumus antiquiores Patres etiam in extremo vitæ fine quibusdam poenitentibus viaticum detraxisse: neque ea in re sanctissimos viros, atque doctissimos diuino præcepto restitisse sentire sine impudentia possumus, cum præsertim Innocentius primus merito id factum apertè fateatur. At, tu ipse, dicet aliquis, diuinum & Euangelicum de Eucharistia sumenda præceptum statuis: statuo sanè, sed ita tamen ut Christus Dominus Ecclesiæ suæ commiserit, quando, & quomodo, & à quibus Eucharistia sumeretur. Itaque potest illa legitima ex causa, & tempus prorogare, & omnino suspendere aliquem à communione: sicut potuit eadem aliquando infantes communicare probabili ex causa, & mox id prohibere ex causa: potuit plebem vtrâque specie communicare, & mox id ipsum lege vetare. Nam vbique quidem illa in dispensatione Sacramentorum potestatem maximam habet diuinitus datam, sed nusquam ita illustrem atque perspicuam, atque in hoc omnium diuinissimo Sacramento, quod profectò præclare docent Tridentini Patres, in illis verbis, præterea declarat, hanc potestatem, perpetuo in Ecclesia fuisse;

26. q. 6. c.
de his v^{er}
rò.

sess. 21.
c. 21

ut in sacramentorum dispensatione salva illorum substantia ea statueret, vel mutaret, quæ suscipientium utilitati seu ipsorum sacramentorum venerationi pro rerum, temporum, & locorum varietate magis expedire iudicaret. Si quis ergo ex me presse, & scholastice quærat, qualenam sit de Eucharistia percipienda diuinum præceptum, illud sine dubio responsurus sum, ut omnes Christi corpus ab Ecclesia datum accipiant. Neque enim iubentur arripere ipsi, sed de manu ministrorum sumere: à quibus & petere debent, & cum illi tribuunt, non possunt perpetuò renuere, nisi diuino iure violato. Neque verò, in quo quæstionis est nodus, propterea ministri Ecclesiæ, & dispensatores sacramentorum Dei coguntur, aut omnibus, aut omni tempore porrigere Eucharistiam, sed suo iudicio Ecclesia uti diuinitus finitur, ut vel subtrahat in tempore tritici cœlestis mensuram, prout in Spiritu sancto expedire iudicauerit. Nam ad hunc ferè modum scholastici scriptores quidam diuinum de satisfactione præceptum interpretantur, ut satisfacere quivis debeat pro modo sibi ab eo qui habet Ecclesiæ clauces imposito. Itaque potuit Ecclesia hæc Indicana neophytis suis Eucharistiam subducere, nullo violato neque diuino, neque Ecclesiastico præcepto. Diuinum sanè, ut dixi, non cogit ministros Ecclesiæ iudicio suo non uti: Ecclesiasticum verò licet magis expressum definitumque sit, tamen cum Sacerdoti audita pœnitentis confessione facultas tribuatur in magna Lateranensi Synodo, ut si ita expedire censuerit, differat à communione etiam in Paschate pœnitentem, quod olim

Sot. in 4.

d. 20. q.

2. art. 2.

Conc.

Lat. 6. 11.

olim frequentissimum erat, facile interpretari possumus, non esse sublatam Episcopis, & maioribus Ecclesiæ potestatem differendi per vitam totam hominem, aut hominum aliquod genus, cum ita expedire magnis rationibus iudicauerint. Atque hæc eò à me dicta pertinent, quod huius Ecclesiæ præsulibus, & doctoribus eam notam inuri minimè velim, ut contra diuinum, & Ecclesiasticum præceptum tandiu, & egisse, & agere existimentur. De qua tota re Concilij Limensis sententiam subiiciam: Quumvis omnes Christiani adulti vtriusque sexus præcepto teneantur sanctissimum Eucharistiæ sacramentum accipere singulis annis saltem in Paschate, tamen huius Prouinciæ Antistites, cum aduerterent gentem hanc Indorum, & recentem esse, & infantilem in fide, atque ita ipsorum saluti expedire iudicarent, statuerunt, ut vsque dum fidem perfectè tenerent, hoc diuino sacramento, quod est perfectorum cibus, non communicarentur, excepto si quis ei percipiendo satis idoneus videretur.

*Conc. Lim.
men. con-
stit. 58.*

CAPVT IX.

Quòd omnino expediât priori consuetudine emendata, Indos fideles communicare.

Verum hæc hæctenus disputata sunt, ut licere aliqua ratione neophytos à communione

differre non improbemus : at hoc ita vniuerſe & perpetuo fieri , vt in his regionibus ferè fit , nullo modo probare poſſumus. Itaque corrigenda eſt prorsus conſuetudo iſta, & tam antiſtituti auctoritate , quam virorum literatorum doctrina ab hoc nouo orbe exterminanda. Quamobrem in illo eodem Concilij Prouincialis decreto , poſtquam prior conſuetudo aliqua ex parte excuſatur , in poſterum tamen ita mutatur atque corrigitur : Quoniam verò cõplures iam Indorũ fidei Chriſtianæ doctrinam meliùs percipiunt, atq; hoc diuinum Sacramentum non ſolum deuotè cupiunt ſuſcipere, verumetiam petunt , & vt fiat ſibi copia, importunè efflagitant , placuit huic ſanctæ Synodo monere, prout ſeriò monet, omnes Indorum Parochos , vt quos audita iam confeſſione perſpexerint hunc cœleſtem cibum à reliquo corporali diſcernere , atque eundem deuotè cupere & poſcere , quoniam ſine cauſa neminem diuino alimento priuare poſſumus , quo tempore cæteris Chriſtianis ſolent , Indis etiam omnibus adminiſtrent. Quæ pia ſanè, & ſatis conſulta conſtitutio nihilò magis , ex quo edita eſt annos iam nouem obſeruatur, quam reliquo retro tempore : vt hinc ſatis appareat , non venerationi Sacramenti cœleſtis aut neophytorum ſaluti pleroſque ſacerdotes conſulere , ſed otio & ignauia indulgere, cum religionem , & prudentiam in neganda Euchariftia perquam ambitioſè prætexant. Quam ergo magnopere expediat nouos Chriſti milites communicare illo pane , qui cor hominis verè confirmat , etiam ſi rudes illi ſint, & tyrones, oſtendit in primis totius Eccleſiæ Catholicæ ab ipſis primis exordiis cõſuetudo, qua Spiritu ſancto

*Eadem
conſt. 58.*

duce omnes Christiani ex ipso fonte Baptismi ad Sacrosancta mysteria percipienda perducebantur. Adeo in Ecclesia Dei certum fuit, quibus esset la-
uacrum regenerationis legitimè datum, eis cœle-
ste alimentum concedi debere. Testes multi pro-
duci possent, sed vnus nobis Dionysius Apostoli-
ci, & temporis, & Spiritus satis erit, is sacros ri-
tus baptismi enarrans, ita scribit, Sacerdotes illum
vestem baptizati munditiæ congruam induunt,
sicque indutum rursus ad Pontificem ducunt, ille
diuino ac deifico prorsus vnguento virum sig-
nans sacratissimæ communionis participem facit.
Et mox tractata intelligentia baptismi mystica, ita
rem absoluit, In fine autem omnium Pontifex
ita perfectum ad sacratissimam Eucharistiam vo-
cat, atque consummantium illi Sacramentorum
communionem deificam tradit. Hæc Dionysius.
Quod vsque adeo in Ecclesia seruatum est, vt eos
etiam quos minus consideratè baptismo ablutos
esse constaret, tamen à communionem non prohi-
berent tanquam suo iure id exigentes. Constat
hoc ex Concilio Toletano, vt alia omittamus,
Qui autem iampridem ad Christianitatem venire
coacti sunt (sicut factum est temporibus religio-
sissimi Principis Sisibuti) quia iam constat eos
Sacramentis diuinis associatos, & baptismi gra-
tiam suscepisse, & Chrismate vnctos esse, & cor-
poris Domini, & sanguinis extitisse participes, &
cætera. Hæc sanè Ecclesiæ consuetudo inuiolata
fuit, quòd nimirum Sancti Patres censerent sine
Eucharistia neminem esse perfectum Christianum
atque constantem. Adeoque id verum est senten-
tia illorum, vt beatus Augustinus eos, qui non
commu

*Dionys. de**Eccl.**Hier. c. 2.**p. 1.**c. 2. pa. 3.**Conc. Tol.**4. c. 55.*

*August.
tract. 11.
in Ioan.*

Ioan. 6.

communicant non plenos Christianos, sed semi-Christianos, aut nondum Christianos definire videatur : Ita enim scribit in Ioannem , Si dixerimus Catechumeno , Credis in Christum , responderet , Credo , & signat se cruce Christi , portat in fronte & non erubescit de cruce Domini sui. Ecce credit in nomine eius; interrogemus eum, manducas carnem filij hominis , & bibis sanguinem filij hominis ? Nescit, quid dicimus , quia IESVS non se credidit ei. Et post pauca , Accessit ad illos IESVS, facit in illis salutem, quia ipse dixit, Nisi quis manducauerit carnem meam , & biberit sanguinem meum, non habebit in se vitam, & mox, Quò trajicit per baptismum IESVS, cujus figuram gerebat Moyses , qui per mare trajiciebat ? Quò trajiciebat ? Ad Manna, quid est Manna ? Ego sum , inquit , panis viuus , qui de cœlo descendi, Manna accipiunt fideles jam trajecti per mare rubrum. Significabat mare illud rubrum baptismum Christi, quò ergo perducit credentes & baptizatos ? Ad manna. Et nesciunt Catechumeni, quid accipiant Christiani, erubescant ergo , quia nesciunt , transeant mare rubrum , manducant manna, vt quomodo crediderunt in nomine IESV, sic se ipsis credat IESVS. Hactenus Augustinus. In eorum ergo numero reponendi sunt , qui non accipiunt cœleste manna, quibus IESVS se ipsum non credit, hoc est inter semi-Christianos, & qui Catechumenorum ordinem non excelsere. Quantopere autem referat ad fidem confirmandam , ad spem augendam , ad charitatem dilatandam , ad omnem denique Christianæ vitæ rationem promouendam, cœlestis illius panis frequentatio, ne-

mo est prorsus qui dicendo satis consequi possit. Vnde, obsecro, tantus fidei ardor initio nascentis Ecclesiæ? Erant, inquit, perseverantes in doctrina Apostolorum, & orationibus, & fractione panis. Vnde ad calcandum mundi fastum, vnde ad sustinenda martyria inuicta virtus? Vnde ad glorificandum Christum inter gladios & ignes tanta illa alacritas animorum? Ex illa, ait Chrysostomus, mensa tanquam Leones ignem spirantes ipsi diabolo formidabiles discedamus. Quid Cyprianus? Idoneus esse non potest, inquit, ad martyrium, qui ab Ecclesia non armatur ad prælium: & mens deficit, quam non recepta Eucharistia erigit, & accendit. Multum planè, & supra quam dici potest baptismus homini confert, multum cætera Sacramenta: sed sine hoc omnium Sacramentorum summo, imperfecta cætera sunt, neque vitam Christianam, quam inchoant aut promouent, perficere possunt. An non Dionysius idoneus author est, cui fidem habeamus? At ille sic scribit: Dicimus ergo cætera sacrarum rerum signa, quorum nobis societas indulgetur, hujus diuinis profectò consummatibusque muneribus perfici. Neque enim fermè fas est sacerdotalis muneris mysterium aliquod peragi, nisi diuinum istud Eucharistiæ augustissimumque Sacramentum compleat. Vsq; adeo Sancti Patres nolunt Christianos Sacramentis cæteris esse contentos. Quid ergo nos tam stolide, vel querimur, vel miramur Indorum gentem nondum firmas in fide, & religione Christiana egisse radices? Baculum panis auferimus, vt Propheta loquitur, & imbecillitatem miramur? Farnelicis alimenta diuina subtrahimus, & matiem gressusque titubantes

*Act. 2.**Chry. bo.
61. ad
pop. Ant.
Cyp. l. 1.
epist. 2.**Diony. de
Eccl. Hie.
c. 3. p. 1.**Ezec. 4.*

- Psal. 101.* tes accusamus? Propheta se percussum, vt fœnum & aruisse cor suum dolet, quod oblitus sit comedere panem suum: quid agent, qui nunquam illum etiam degustarunt? Nos tamen nihil tot in Christo paruulorum seruitutem interitumque dolemus. Cum deficiat paruulus, & lactens in plateis oppidi, hoc est, cum recens in Christo nati nobis spectantibus; & tacentibus in media Ecclesia intercant præ fame, & quidem cum instent ipsi, atq; auide diuina Sacramenta poscant, non est qui porrigat, omnes dedignantur, omnes auersantur miseros, vt verè videamus impleri, quod sermo diuinus statim adiungit, Matribus suis dixerunt: Vbi est triticum & vinum? Cum deficeret quasi vulnerati in plateis ciuitatis, cum exhalarent animas suas in sinu matrum suarum. Quod si panis hic cœlestis propriè cor hominis confirmat, si sensum mentis illustrat, si aduersus pericula & hostiles impetus munit, si denique vhus vitam spiritualem conseruat & perficit, quid aliud quærimus, cur deficiente pane corruant isti vnusquisque ad proximum suum, & contabescant in iniquitatibus suis? Re vera deficiunt in via Domini, quia contra Domini præceptum sinuntur abire jejuni. Contra quicunque hoc cibo reficiuntur, à facie frumenti multiplicantur, & vires quotidie novas sumunt. Docuit hoc vsus ipse copiosè. Nam quotquot ex Indorum genere à nostris (qui contradicentibus cæteris id ausi aggressique sunt) communicantur hætenus ea puritate, eo animi robore, eo fidei sensu, iis denique vitæ vniuersæ studiis, cæteris præstant, vt meritò sacerdotes ipsi mirentur, atque ingenuè cōfiteantur ampliores, & illustriores hujus supercœlestis

cœlestis panis fructus in neophytis cerni, quam in cæteris, neque immerito. Nam & fide & deuotione nos vincunt : quod nos ipsi abunde sumus experti. Ferè commune prouerbum Indis est cum, qui semel Eucharistiam acceperit, nullum amplius crimen debere committere : quod si quando humana fragilitate admissum sit, tanto animi dolore tanta in seipsum indignatione commotum ad pœnitentiam venire Indum conspeximus, & tam duras de suo scelere pœnas exigere, vt ardorem fidei admirati simus. Neque enim tantam inuenimus in Israël : Scimus aliquot per simulationem diuino obrepisse conuiuio non indutos veste nuptiali, sed abeant simulatores : nos de verè Abrahamæ filiis loquimur, quos non dubitamus ab extremo hoc Occidente in mensa Domini cum Abraham, & Isaac, & Iacob præclare recumbere. Certè Eucharistia ipsa pro sua benignitate, & magnificètia nos uos mensæ suæ conuiuas largius locupletiusque videtur excipere. Quare cum perpetua totius populi Christiani consuetudine, cum majorum nostrorum ac Sanctorum Patrum authoritate, cum ratione ipsa perspicua, cum testatissima experientia doceamur nouis Indorum gentibus supersubstantialem panem communicare, quis deinceps tam erit cœlesti beneficio ingratus, tam negligens salutis fratrum, tam ipsius Christi Iesu gloriæ inuidus, qui non inepto hoc more longissimè relegato, sacram Eucharistiam auidè præsertim petentibus fratribus arbitretur esse tribuendam?

Matth. 23.

CAPVT X.

Confutatio opinionis contrariae.

Aug. l. 7. **Confes.** **A**T perfectorum, inquiunt, panis est ille cœlestis, cibus grandium, vt Augustinus audiuit, crescant, & manducabunt. Imò verò manducant, vt crescant. Neque enim ego Angelorum panem, & supersubstantialem virorum atque perfectorum cibum esse nego: verum idem cibus est paruulorum, idem infirmorum alimentum.

Prov. 9. An non diuina sapientia postquam ædificauit sibi domum, & excidit columnas septem, & immolauit victimas, & miscuit vinum, & proposuit denique mensam suam, ita alloquitur conuiuas suos. Si quis est paruulus veniat ad me, & insipientibus locuta est, Venite comedite panem meum, & bibite vinum, quod miscui vobis, relinquitte infantiam, & viuite & ambulate per vias prudentiæ? Paruulos ergo alloquitur, paruulos inuitat ad cœlestis mensæ conuiuium. Nam cum diuites illi ac præpotentes variis ex causis venire vocatî recusassent, Rex qui lautas & splendidas epulas appararat, seruos suos, vt debiles & claudos, & pauperes accerferent, misit, vsque dum conuiuis domus regia impleretur: atque illud solum in conuiuis exostulauit, quod quidam vestem nuptiis dignam non attulisset. An verò quos Dominus libenter vocat, & gratos habet, hos

ministri

ministri iure fastidiant ? Certè Sancti Patres, qui panem hunc perfectorum, & virorum in Christo cibum esse volunt, iidem debilium, & paruulorum viribus augendis, & confirmandis, & medicinam, & alimentum esse aptissimum copiosè testantur. Non ergo quoniam minus perfecti in fide, & charitate neophyti sunt, repellendi sunt, sed multo magis inuitandi, & alliciendi, vt vsu ipso panis huius qui cor hominis confirmat, perfecti fiant. Alij stoliditatem & imperitiam barbarorum nobis obijciunt, indignum esse dicentes, si canibus & porcis margaritas projiciamus. Sed qui Christi lauacro purificati legitimè sunt, canes certè, & fues illi non sunt. Quod si sensus horum exiguus est, ne tales quidem à se repellit benignissimus Dominus. Diuus sanè Thomas tantæ authoritatis vir iis, qui debilem habent vsum rationis, non esse denegandum hoc Sacramentum, apertè scribit. Vt enim sensu & ratione parum valeant, multum tamen præstabunt amentibus, & phreneticis, quorum si anterior deuotio testata sit, instillandam illis atque infundendam Eucharistiam Sanctorum Patrum Canones iubent. Vsque adeo pluris fuit fructus, quem hoc Sacramento homines percipiunt, quam species quædam religionis, quam multi hoc tempore præ se ferunt. Ac re vera non est tam Indorum sensus exiguus ad percipiendam Eucharistiam, quam Parochorum magna desidia ad porrigendam. Nam vt curam laborémque docendi, & præparandi plebem à se reiiciant, ruditatem & imperitiam

*Tho. 3. p.
q. 80. a. 9.*

*Cðc. Car-
thag. 4. c.
76. 26. q.
6. Is qui
in infir-
mitate.*

466 DE PROVVRANDA INDOVRVM
tiam istorum obtendunt. Non satis discernit
Indus inter cibum sacrum & profanum, inquis.
At qui potest ille discernere, si tu nunquam hoc
docuisti? Non eam deuotionem affert, quam
oportet. Quomodo verò afferet, si tu ad cœle-
ste Sacramentum nunquam inuitas? Si neque
dignitatem commendas, neque immensam vti-
litatem doces? Omnino experti sumus ipsi,
quam vehementer excitentur Indi, cum hæc
illis commemorantur, quam omnia & pol-
liceantur, & præstent, vt liceat eis de illo
pane edere. Quanta verò inuidia, quo do-
lore pulsantur cum intuentur Hispanos com-
municantes: quod si quem suorum hac men-
sa dignatum conspiciunt, omnium studia ar-
dent, atque ad sese diffundi eam liberalitatem
vehementer efflagitant. Itaque ad docendam
fidei catechesin, & ad turpia quædam vitia pro-
fliganda ebrietatem præsertim, nullum reme-
dium præsentius experti sumus, quam vt Sacra
communio præmium proponeretur iis, qui & fi-
dei dogmata optinè tenerent atque exponerent,
& mores Christianos atque honestissimos præ se
ferrent. Certant inter se, cum ista audiunt, & gra-
tissimum habent, cum admittuntur, refectique se-
mel cibo cœlesti puritatem mentis, & corporis
multò studiosius, quàm Hispani conseruant, vt
redire liceat ad mensam illam, ardenter exoptant.
Hoc Parochi complures minus credunt. At nos
non longè posita loquimur, faciant ipsi pericu-
lum, si zelum Dei habent, ac non negligentiae
prætextum quærant. Sed qui grauius & proba-
bilius videntur morem istum suum defendere,
illud

illud obijciunt, quòd non tutò præbeatur Eucharistia neophytis, quippe qui veterem superstitionem non satis exuerint, fierique possit ut indignum aliquid in Christi corpus designent, cum non constet satis animo an sint fideles. Istorum flagitia vñtata commemorant, sordes præsertim carnis, & temulentia. Talibus porrigere sacramentum nihil esse aliud quam in cloacam aut sentinam proijcere. Quibus equidem respondebo non absque probatione, & examine panem illum præbendum esse neque nouis, neque veteribus Christianis. Quod si quis est fornicator, aut 1. Cor. 5. ebriosus, aut idolis seruiens, cum eiusmodi etiam communem cibum capere Apostolus vetat, nedum cœlesti mensa communicare. Verum hoc neq; omnium neophytorum est, neq; si illorum tales sunt aliquando morbi aliter in illis curandi sunt, quam in cæteris fidelibus, quorum nouimus corruptos mores, & vitam admodum flagitiosam legitimam pœnitentia & confessione detergi, atque ita salubri satisfactione purgatos, ut ait Leo Papa, ad communionem admitti. Cur igitur non idem apud Indos indulgentia erit, quibus eo magis cum labuntur venia danda est, quod ignorantia potius, & imbecillitate quadam, quam animi peruersitate laborant. Itaq; vel ad ipsa istorum vitia amputanda & tollenda singularis remedij est, diuinam communionem iis, qui ab ebrietate, & cæteris sordibus diligenter cauent, præmium ponere. Neque enim vbi perspecta est superstitionis antiquæ aut ebriositatis, aut fœdæ consuetudinis macula, ad altare Indus debet admitti, nisi contraria opera illam manifestè & diligenter elucrit. Nam etsi veniam

*Leo 1. De
pœnit. d.
1. c. multiplic.*

1. Reg. 14.

Abfaloni filio, Ioabo interpellante sapientissimus David negare non potuit, ingressum tamen Hierusalem à suo conspectu per biennium abstinere iussit. Intelligent Indi quod communione priuantur non esse nationis, sed criminis: & vniuersum Christianis concedatur, sed non Christiano dignis moribus subtrahatur. Neque ego nimiam modo frequentiam Eucharistiæ in Indis probo, fortassis enim facilitas contemptum pariet. Sed illud contendo, vt quotannis nisi ex certa causa communicentur, vt Ecclesia præcipit, tum præcipuè, vt cum de vita exeunt, & ritè sacerdoti confessi sunt, viatico necessario ne priuentur, quemadmodum habet Nicænus Canon. Quinam autem indigni, ineptive sint, quibus Angelorum panis præbeatur, sacerdotum ipsorum audita confessione cæterisque perspectis, iudicium esto. Sacrilegiorum verò, quæ quidam aut metuunt, aut insimulant, profectò periculum nullum est, aut perquam rarum. Neque enim Indi Iudæorum more auersi sunt à mysterio Christi, neque est timendum, ne contumelia afficiant sumptam Eucharistiam, quam reuera venerantur, neque eius generis exempla hætenus certa vidimus, quin potius quod ad externum cultum attinet, multò quam veteres Christiani ad religionem propensiores sunt. Quod si pueris olim, & phreneticis Eucharistia dabatur, vt Ecclesiasticæ historiæ copiose testantur, neque id contra religionem censebant sancti Patres, cur illi sacramento fiat iniuria, si pauperes & egentes iuxta Psalmum edant, & saturentur, qui si iudicio aut doctrina minus interdum vigent, id

satis

Psal. 11.

satis animi pietate , & fidei necessitate compen-
sant ? Paruuli sanè panem petunt , & ad sacra-
mentum desiderio , & Fide anhelant , sed qui
frangat docendo , & comminuendo eorum ca-
ptui conuenienter , rarus omnino est. Præparare
ergo debemus Indorum mentem & Fidem , at-
que ita probatis , & præparatis panem cœlestem
dare : sed (quod plerique facimus) quia præpa-
rare piget , ad accipiendum indignos accusare
magis placet.

C A P V T X I .

De necessitate Confessionis.

AD Pœnitentiæ sacramentum venio , quod
à patribus quartum numeratur , quamvis
vulgò Eucharistiam præire soleat. Est autem Con-
fessio peccatorum post baptismum lapsis non mi-
nus necessaria , vt est à Spiritu sancto in Concilio *Ses. 14.*
Tridentino definitum , quam nondum regenera- *cap. 3.*
tis ipse baptismus. Quod si vbique gentium sin-
gularis hæc medicina imbecillitatis humanæ co-
gnoscentia prædicandaque est , nouis certe Indo-
rum populis post fidem Christi , nihil est & cre-
brius & accuratius repetendum , quod vna hæc
salutis illorum spes supersit. Paulus prædicabat *Act. 10.*
Fidem in Iesum Christum , & pœnitentiam in
Deum. Christi ille quidem tantam volebat apud
homines auctoritatem existere , vt non tam cre-
brò in Deum credere eos admoneret , quod faci-

le sensus humanus admittit, quam in Iesum Christum, ut eius diuinitas esset testata, eoque fides perfectior quo sensu humano superior. Contra, Pœnitentiam in Deum maluit dicere quam in Christum, ut cum criminum quisque suorum meminisset, Deum ipsum non hominem solum sibi offensum, & iratum cogitans, vehementius doleret. Quoniam vero pœnitentiam etiam ante baptismum ita necessariam esse constat, ut tamen sine baptismo vel re vel voto suscepto non sufficiat, consequens est prorsus, ut qui primam regenerationis stolam maculauit, & pœnitentia indigeat, & per clauēs Ecclesiæ gratiæ restitui debeat, sine quibus salutis aditus nemini post baptismum lapso patere potest. Barbaris autem, quorum est sensus natura imbecillior, Fides verò non admodum excitata, rarum est valde, ut perfectus ille dolor, quem contritionem dicimus, de criminibus commissis hæreat, quo magis diuinæ medicinæ auxilio excipiendi adiuuandique sunt, ut quod hominis operi deest, cœlestis sacramenti vis suppleat. Nam quòd Absolutionis beneficio dolor ille non vsquequaque perfectus, qui à plerisque attritio, à nonnullis imperfecta contritio vocatur, valeat ad salutem & primam iustificationis gratiam consequendam, tam mihi certum est, ut inter Catholica dogmata propemodum numerandum putem. Neque obscure Tridentini Patres id docuisse videntur, cum eam attritionem, quæ per se non iustificat, ad iustificationis gratiam in sacramento Pœnitentiæ impetrandam valere declarant. Mihi verò & ratio

aperta

Conc. Tri.

sess. 4.

cap. 4.

aperta persuadet, cum per claves Ecclesiæ detur vera absolutio culpæ, idque per se & ex propria institutione, cum sit etiam morbi lethalis medicina præsens, sit lepræ ostensæ purificatio operatoria, sit denique mortuæ animæ à morte peccati excitatio, quemadmodum sanctorum Patrum literæ produnt: tum maximè me confirmat quotidiana diuinæ operationis experientia, si tamen occultæ operationis experientia dici debet, fiducia quædam de multorum hominum salute certissima. Cernimus planè innumerabiles animas minus perfecto dolore pro scelerum magnitudine commotas ad hoc sacramentum accedere, quibus postquam quod in nobis situm est, præstamus, & de Dei immensitate confisi sacramentum absolutionis impendimus, adeo cœlestium donorum, quantum homini conijcere datur, testimonia non obscura succedunt, ut nihil aliud cogitare possimus, quam quod verissima bonitas dixit, Quæ solueritis in terris in cœlis soluta erunt. Quamobrem non est cur quisquam de Indorum salute desperet, neque eorum tenues conatus, & examinationes conscientiæ, & minus accuratas peccatorum enumerationes, & doloris non usque adeo expressa signa, & cætera pro eorum captu non magna contemnat: sed quantum potest, ipse adiuuet fratrem, & infirmum, ut ait Paulus, in fide assumat, agat denique quod potest, id verò omne, quod restat, diuinæ clementiæ committat securus, qui exiguo facilè concedit misericordiam, & laborantem ac lassum reficit, & hoc habet ipse refrigerium, si reficiamus ægrotum, & sciamus animam lassam sustentare

*Matt 18.
Ioan. 20.*

Rom. 14.

Sap. 6.

Esai. 28.

Esai. 50.

472 DE PROCVRANDA INDORVM
sermone, & de tenui offerentem Domino, quod
habet, non aspernemur. Equidem horum mise-
rorum confessiones imperitas securius audio,
quam hominum præpotentum expolitas, & ma-
gna doloris significatione profusas. Cum ergo in
hoc sacramento vnica sit spes salutis Indorum, præ
omnibus & diligentius & crebrius meditandum
prædicandumque erit.

CAPVT XII.

*Confessionis peccatorum vsum Indis in sua
superstitione fuisse.*

Illud autem merito mirari quispiam possit,
Confessionem peccatorum etiam occultorum,
& grauium celebri vfu apud hosce barbaros lon-
gè ante Christi Euangelium auditum, frequen-
tatam. Erant sacerdotes non pauci huic ipsi mu-
neri assignati, qui plebis audiendis confessioni-
bus vacarent. Atque ad singula deprompta pec-
cata ex manipulo quodam fœniculum frangens
sacerdos, ab eo videlicet crimine liberum pronun-
tiabat. Vnde apud superiores Prouincias Ychu-
fyres eiusmodi sacerdotes vocabantur. Ac vt mi-
hi quidem narrabant Chucuiti Parochiarum præ-
positi, non omnes omnium criminum absoluen-
dorum parem potestatem habebant: sed grauiora
quædam facinora apud primarios veluti Pon-
tifices deponere vsus erat. Hanc ergo consuetudi-
nem inter idololatrias barbaros religiosè obser-
uatam

uatam mirari, ut dixi, merito possis. At illud non admirationem sed stuporem mihi propemodum affert, valuisse tantum Diaboli hominumque mendacium apud homines, ut non solum occulta crimina proderent, sed sævas etiam pœnas sibi pro iis iniungi æquo animo paterentur. Iuebantur sæpe expiandi adulterij aut alterius sceleris causa, durissimo saxo ad scapulas tundi fortiter, interdum à iuuenibus diu virgis cædi, non raro si sceleris magnitudo acerbius aliquid postulare videretur, in excelsam atque omni solatij genere destitutam rupem secedere, & longum ibi æuum, ferarum more traducere. Complura iam eius generis narrant, quæ fabulis similia videri possent, nisi nobis superstites adhuc senes, quosdam decrepitos eo munere olim apud suos functos viri fide digni ostendissent. Causam ego huius consuetudinis, barbarorum illam potissimum probo, quod Diabolus per omnia in Dei similitudinem etiam nunc insaniens, sicut se Deum adorari & saluari mortalibus illis persuasit, ita Dei veri sacramenta religiosaque instituta transferre ad se falsa quadam imitatione contendit. Nam quò aliò spectat, quod in Cuzquensi vrbe Ingarum imperio celebri, Eucharistiæ nostræ vmbra quandam & simulachrum adhibendum curauit? Cum ex massa sacrificij nescio cuius sanguine aspersa buccellas quasdam solemnes singuli acciperent, atque comederent, quibus Principis Ingæ fidem, & societatem sibi cordi esse usque ad fundendum pro ipso sanguinem testarentur. Atque ad eum modum festo quodam die peregrini præsertim atque aduenæ communicabant.

474 DE PROCVRANDA INDORVM
Prætereo Trinitatis imaginem in Tangatanga
apud Sacacas veteri more cultam, omitto alia
complura, quæ curiose huc accersere possem: qui-
bus cum fidem olim barbari haberent, minus dif-
ficiles ad credendum, cum nostra narramus, se
se præbent. Sed dissimulari profectò non potest,
quàm nobis erubescendum sit, quod à Satanæ
ministris superemur, cùm ad salutare & divini-
tus institutas confessiones persuadendas pigriores
simus quam illi ad sævas illas suas carnificinas.
Gratulandum verò est in tanta mentis humanæ
cæcitate, esse aliquem scelerum sensum, non-
nullum conscientiæ aculeum, quo tranquillita-
tem suam occulto veneno exposito quærere quo-
dammodo cogitur. Et quia vera remedia minus
occurrunt, falsis se saltem, ut potest, recreat,
atque sustentat. Tanta est culpæ intus latentis
vis. Quo magis fidere debet Christi servus, &
veram peccatorum omnium medicinam pœni-
tentiam per salutarem confessionem ostendere.
Facile sibi persuadent Indi Confessionis Sacra-
mentalium usum & vim, neque recusant certè me-
dicum (& si plerique contra calumniantur) mo-
do eum esse perspiciant, qui verè medicus sit, non
infestus carnifex, aut avarus prædo animarum.

C A P V T XIII.

*De peritia Indicæ linguæ confessionibus
audiendis necessaria.*

Q Valem vero esse oporteat medicum, quo sa-
lutis animarum zelo feruere, qua peritia ape-
riendis

riendis curandisque vulneribus præditum, satis
 ut arbitror, supradixi. Attamen sermonis Indici
 peritia quantopere desideretur, hoc maximè loco
 apparet. Cum neque pœnitentium crimina agno-
 scere neque salutariter providere nisi linguæ mini-
 sterio possit. Cuius qui expers sit, turrim Babeli-
 cam non Euangelicam is ædificet, necesse est. Et
 quamvis inter viros Theologos satis conueniat,
 confessionem etiam per interpretem reddi,
 atque accipi posse, iidem tamen æque consen-
 tiunt, nulla aut diuina, aut Ecclesiastica lege ho-
 mines ad eum confessionis modum compelli,
 quippe cum lex Dei suavis & æquitatis plena no-
 lit cum tanta sua molestia ad confitendum pecca-
 torem cogere, cum præsertim pudore metuque
 humano, qui ubi tertius adest testis aut arbiter,
 maximè vrget, ne confessiones integræ since-
 æque fierent, merito verendum esset. Quam-
 robrem consultè satis in Limensi Synodo Pa-
 tres ne Indorum confessiones per interpre-
 tem Parochi exciperent, graui proposita mul-
 cta vetuerunt. Quod tamen decretum non co-
 pertinet, ut non liceat sponte sua volentes In-
 dos per interpretem confiteri morbo præsertim
 periculoso oppressos audire, ubi sacerdotis Indi-
 cè docti copia deest, atque eo saltem modo ho-
 rum saluti consulere, quod à quibusdam religio-
 se factum nouimus, & ratio ipsa monet, ubi
 pœnitens ipse iacturam eam omnem præ salu-
 tis suæ desiderio contemnit, non oportere spi-
 ritualem medicum labori, vel suo, vel illius par-
 cere. Neque verò hoc Sancti Leonis antiquo

*S. Th.
 & reliqui
 in 4. d.
 27.*

*Concil.
 Lim.
 Con. 49.*

*Leo epis.
 Canon. 78.*

Canoni contrarium est, qui solum reprehendit, & vetat: Ne populi auribus professio publicè recitetur, cum reatus conscientiarum sufficiat solis sacerdotibus indicari confessione secreta. Nam & nonnullas confessiones cum alijs plures interessent ab antiquis Christianis factas esse historiæ produnt, & hi ipsi barbari scelerum suorum notitiam falsis sacerdotibus reddere frequente corona non verebantur. Verum quia hoc & rarum est, ut pœnitens libenter accipiat, & quæ necessitate fiunt, præter legem sunt, nullo modo potest salua conscientia Parochi munus usurpare, qui per se ipsum Confessiones populi sibi commissi hoc est sine interprete audire non possit. Quod si bona fide præfecturam non tam à se quæsitam quam ab Antistite suo sibi impositam agat, & quamvis non omnia optimè intelligat quæ pœnitens loquitur, plurima tamen & communiora & graviora non ignoret, atque ipse vicissim opportuna consilia adhibere mediocriter possit, non erit deterrendus ab eo officio sacerdos, cum peritiores præsertim desunt, & zelo ipse spiritus sermonis inopiam abunde compensat. Tutissima res obedientia est, & sola, ut Damascenus ait, citra periculum.

*Damas in
Histor.*

C A P V T . XIV.

De prudentia Sacerdotum & tolerantia.

Sermonis ergo Indici peritum oportet esse sacerdotem: verum non minus morum & ingenij

nij Indici peritum. Idololatriæ genera & flagitiorum & cæterorum, in quibus frequentiores sunt, vel experientia ipsa discet, vel aliorum commemoratione cognoscet. Sunt etiam nonnulla commodè litteris commendata. Ex quibus omnibus ipse sibi Indicem conficiet, ad quem confessiones examinet, quatenus opus esse prudentia persuaserit. Neque enim omnes eodem modo examinandi erunt. In eum vsu tum ab aliis, tum à nostris nuper Confessionalia quædam perscripta sunt, vtraque lingua his regionibus communi Quichua, & Aymara, quæ rudibus, & tyronibus magno adiumento esse possunt. Quamvis autem & peritia sermonis, & industria opus sit, tamen ad confessiones audiendas neophytorum sacerdos longè sibi ampliorem patientiam, & animi tranquillitatem comparare debet. Hæc enim præcipua supellex est, cuius maximè inopia fit, ut nihil propemodum in curandis conscientiis Indorum plerique proficiant, plurimi etiam deteriores reddant. Atque in nostris sanè sacerdotibus illud miraculi loco inter se se Indi vulgò & suspiciunt & celebrant, quòd Patres ij sint, qui confitentem audiant libenter, quantumcunque ille in suis explicandis criminibus immoretur, & postquam quæ in mentem venerint, finem dicendi fecerit, tum præclaris quibusdam interrogationibus, quæcunque memoriam effugerunt, meminisse cogant, atque ipsas viscerum fibras veluti aperiant. Cuius rei novæ scilicet, atque inusitatæ adeo celebris fama plerosque commouit, ut longissimis itineribus ad nostros venientes viderimus, nihil aliud præferentes, quam ut contingeret pec-

478 DE PROCURANDA INDORVM
cata apud hosce Dei ministros (ita enim illi lo-
quuntur) deponere , qui libenter audiant , quæ
quisque confiteri cupiat , & se se accusantem pec-
catorem benigno sermone recreent , atque eri-
gant , & quod omnium maximum prodigium
putant , audita confessione nihil sibi neque pretij ,
neque eleemosynæ loco dari patiantur , quin po-
tius si qua re Indus indigeat , opem ipsi libenter
ferant. Qua opinione incredibile est quantum In-
di profecerint , vt nullo modo dubitare possimus
pœnitentiam his gentibus à Domino Deo datam ,
ministorum culpa fuisse minus hactenus fructuo-
sam , eandem futuram fructuosissimam , si vel me-
diocrem animi alacritatem in excipiendis infirmis
medici spirituales præseferant. Sunt ergo Indi au-
diendi toleranter , sunt inuitandi benigne , eri-
gendi sapienter , sunt denique in omnibus æquo
animo ferendi. Charitas enim omnia sustinet , om-
nia suffert , & in spiritu lenitatis præoccupatum
aliquo delicto instruere docet.

1. Cor. 13.
Gal. 6.

C A P V T XV.

*Quòd Confessiones non sincere fiant ,
potius sacerdotum , quam Indo-
rum fieri culpa.*

QVibus ex rebus facile intelligere possumus ,
quòd plurimi Indorum malignè sacramen-
to pœnitentiæ abutantur , non sinceras , neque
integras peccatorum confessiones facientes , sed
fuga

fucatas ad speciem, & mutilas, non tam ad ipsorum referendum esse malitiam, quam ad Parochorum sæuos mores, & imperiosam quandam austeritatem, qua infirmum & scabiosum pecus *Ezech.* fastidiunt, & calce abijciunt, qui errantes oves *34.* funda potius & baculo terrent, quam sibilo leni colligunt, immemores prorsus illius magni pastoris, qui dixit, Sibilabo eis, & congregabo illos, *Zach. 10.* quia redemi eos. Profecto si fideles Hispani confessarium nacti essent talem, sæuientem & magis finire properantem, quam audire omnia curantem, rarus omnino, qui integras confessiones faceret. Metus ergo Parochorum, & quod ex metu oritur odium, cogit Indos nihil veri & sinceri apud illos dicere. Cuius rei nullo alio testimonio opus est, quàm quòd sacerdotem nacti benignum, patienter audientem, & commiserantem potius, quam superbè indignantem, certatim ad Confessiones faciendas nullo urgente accurrunt illi ipsi Indi, qui Parochis suis vix vi post annum, ut confiteantur, adduci possunt. Incredibile est quot millia confessiones generales fecerint apud eos religiosos, quos sibi vere patres arbitrantur, quam sponte, quam apertè, quo animi dolore, qua sui detestatione infandissima etiam scelera totius anteaetæ vitæ detegant, quibus lachrymis, quo gemitu, & singultu corpus suum acerbe tundentes ac vellicantes, & sese totos intimo mœrore conficientes, quod iam tandem Parochi non pauci, & agnoscere, & admirari cœperunt. Quid ordè est, Cur Indus cum ita ægrotat, ut mortem sibi impendere existimet, ultro accersit Parochum, & intimas con-

scientiæ

480 DE PROVVRANDA INDORVM
scientiæ plagas exponit ? Profectò Fidem suam
satis Indus , cum fingere nihil est opus , ostendit.
Itaque moriturus libenter crimina omnia etiam
immania prodit , quod tamen sospes sæpe facere
recusat. Hic quis non videat metum hominis me-
tu mortis superari ? Quod si sanus , & saluus ho-
minis asperitatem & minus sibi æquum animum
minimè offenderet , facilius ac libentius res ipsas
vt sunt, proditurus esset.

C A P V T X V I.

*Contra errorem illius , qui scripsit Con-
fessiones ab Indis esse tollendas.*

QUò magis ridenda est (si modo risu ac non
potius acri dolore tam absurda blasphemia
excipi debet) Theologi illius sententia , qui op-
timè consultum iri Indis & dixit, & scripsit, si con-
fessionum obligatio tolleretur , Ne tot , inquit,
& tam graua sacrilegia perpetrare cogantur.
O stultam hominis vocem, qui cum sibi sapienter
Indorum saluti consulere videatur , nihil aliud
agat , quam vt illos interire vnico sublato reme-
dio cogat ! Si peruersis remedio quovis abutenti-
bus ista est ratio medendi , tolle matrimonia, ne
adulteria fiant , aufer Ecclesias & sacra omnia, ne
sacrilegi sint, denique nullū sit humanæ imbecil-
litis remediū , ne malitia conuertat in virus.
Quin potius apud rectè ac sapienter æstimantem
omnia est , pluris quod pauci electi per medici-
nam

nam sanantur, quam quòd plurimi reprobi per illius abusum deteriores fiunt. Atque hæc quidem ita dicuntur, quasi consultationis humanæ esset de Pœnitentiæ Sacramento censere: cum vero vè sacrosancta Concilia tradunt, totiusque consen- *Conc Tri.*
sus Ecclesiæ, diuini iuris illud sit, diuinæ autho- *ses. 14.*
ritatis, neque aliud post baptismum lapsis reme- *can. 6.*
dium superesse Christus Dominus sanxerit, quam insanè, imo verò quam hæretice prorsus dicitur, vt confessionis faciendæ obligatio abrogetur iis, quibus nulla est alia salutis relicta spes? Quin nos ipsos potius accusamus, atque emendamus, & animarum medici efficimur, & patres nos non satellites esse meminimus? Hæc enim expedita, & certa ratio est ad cuitanda sacrilegia, quæ in confessionibus Indorum perpetrantur.

CAPVT XVII.

Quas satisfactiones Indis iniungere oporteat.

Quas autem satisfactiones iniungere conueniat, prudentia docebit. Cum intimo ipsi scelerum suorum dolore pulsantur, vtrò pergraves sibi imponi flagitant: & si sacerdos indulgentius forte se gesserit, ipsi eas arripiunt. Adcò feruor spiritus, vbi semel accensus est, magnos conatus excitat. At plerique imbecilliores sunt, neque ea animi firmitudine, vt tam graues pœnas

nas de se exigant. Quid ergo? Abiiciendine erunt? An expectandū vsque dum spiritus ita incalescat. vt pares delictis pœnas exoluere velint? Id quidem est, & Dei potius dono, quam hominis industria sperandum. Ergo quod Christus oui erranti præstitit, vt vix dum ab errore conuersam, vt Dionysius dixit, in humores sacros attolleret, id ipsum Christi imitatori faciendum est, si salutem hominum amat, vt non plus imponat oneris, quam ferre illum posse viderit, atque in se, quod fratri deest, suppleat & peragat, adimplens ea, quæ defunt passionum Christi pro membro ipsius. Nam sicut alienorum peccatorum participes efficiuntur, qui leuissimas satisfactiones pro grauissimis delictis iniungunt, vt sancti Patres tradiderunt: ita Phariseorum est, alligare onera graua, & importabilia. Christi sanguinem non infideliter dispensare is credendus est, qui se se viribus pœnitentium accommodat, cum præsertim non tam animi prauitate quam infirmitate quadam maiora non audent, mitiora libenter subeunt. Salutares igitur satisfactiones Indis iniungere oportebit ex iis præsertim, quæ aut consuetudine, aut commoditate freti non mendaciter se se peracturos polliceri videantur: ita prorsus vt excitentur potius quam terreantur, ne odio in sacramentum concepto, cum opus deinceps fuerit, redire ad medicum perhorrescant.

*Dion.
epist. 8.*

*Conc. Tri.
sess. 14.
cap. 8.
Matt. 23.*

CAPVT XVIII.

De Extrema-unctione.

INfirmatur quis in vobis , inducat presbyteros Ecclesiæ , & orent super eum vngentes eum in nomine Domini, & oratio fidei saluabit infirmum, & alleuiabit eum Dominus, & si in peccatis fuerit , dimittentur ei. Hoc sacramentum Extremæ-unctionis à Patribus sacramentum exeuntium vocatum est, & totius vitæ Christianæ consummatium existimatum, quo Dominus clementissimus finem vitæ tanquam firmissimo præsidio munuit. Nam etsi aduersarius noster occasiones per omnem vitam quærat & capter , vt deuorare animas nostras , quoquomodo possit, nullum tamen tempus est, quo vehementius ille omnes ver-
sutiæ suæ neruos intendat , ad perdendos nos penitus, & à fiducia etiam, si possit, diuinæ misericordiæ deturbandos, quàm cùm impendere nobis exitum vitæ perspicit. Vnctio ergo hæc sacra delicta, si qua sunt adhuc expianda , ac peccati reliquias abstergit , & ægroti animam alleuiat & confirmat , magnam in eo diuinæ misericordiæ fiduciam excitando , qua infirmus subleuatus, & mali incommoda , ac labores leuius fert , & temptationibus Dæmonis calcaneo insidiantis facilius resistit , & sanitatem corporis interdum, vbi salutis animæ expedierit , consequitur. Hæc sunt quæ Fidelibus omnibus ex tam salutari sacramento pie suscepto bona conferri sancta Synodus Tridentina

*Iac. 5.
Ex Conc.
Tri. ses.
14. c. 1. &
cap. 2. de
Extre.
unct.*

docet : à quorum consortio & fructu cur obsecro excludantur nouæ stirpes Indorum , cum baptizati sint sicut & nos , & Fidem eandem profiteantur , & in mortis discrimine sibi ab Ecclesia auxilium præberi vehementer cupiant? Magnæ hoc inhumanitatis in fratres genus est , cum præsertim si qui omnium mortalium,hi maximè cum extremi temporis tenentur angustiis, præsidio Ecclesiastico indigeant. Etenim idolorum pontifices & venefici, quorum hodie quoque magna copia superest , qui summopere Christianæ religioni obsistunt, cæterosque decipiunt , ij omni opera & ratione ægrotis periclitantibus persuadent , vt iuxta priscam suam superstitionem apud ipsosmet confiteantur, atque idolis sibi placandis & conciliandis sacrificia offerant : multaue alia impiè & sacrilegè præcipiunt miseris , qui vt sunt natura timidi , minusque ad Diaboli fraudes cognoscendas instructi , tum antiqua consuetudine alliciente, & mortis periculo territi facile eiusmodi fallacibus promissis animum adhibent. Quamobrem aduersus hos filios Belial , veritatis inimicos, qui vias Domini rectas nõ cessant peruertere, & alliciunt animas instabiles in æternam damnationem, opus est Christi tyronibus firmissimo aliquo præsidio: nullum verò excogitari potest diuino Extremæ-vnctionis Sacramento præstantius.

Quibus rebus adducta Synodus Prouincialis decernit , & præcipit, vt sacerdotes nullo modo Indos fideles iam rite confessos, aut si minus id licuit, contritionis signa præ se ferentes sine hoc tam salutis remedio de vita exire patiantur. Et decretum quidem totius Ecclesiæ ad omnes fideles in generali

*Ex Concil. Lim.
const. 75.*

*Act. 13.
2. Pet. 2.*

Const. 75.

SALVTE. LIBER VI. 485
nerali Concilio legimus, peculiare verò ad Indos fideles in Prouinciali Synodo repetitum, & magnopere commendatum cernimus: vtrumque vero re ipsa vsque adeo neglectum vt pene sacrilegij loco sit, si quis de Indo infirmo vngendo cogitet. Neque ego sanè intelligo quovsque tam stolidi nostrorum consuetudo ferenda sit.

CAPVT XIX.

De Sacerdotio.

DE Sacerdotio inter Indos pauca sanè præci-
pienda sunt. Nam quod ad ipsos attinet, sciunt ordinem esse ministrorum à Domino institutum, vt & Deo seruiant, & populo præsent, illi ad altaris sacrosancta mysteria, huic ad remittenda peccata, & verbum Dei proponendum, authoritate diuinitus data. Atque vtinam vt hi sacerdotium venerantur, & tanquam munus cœleste suscipiunt, ita nos vitæ sanctitate tanto muneri pares essemus. Illud autem prudenter est à maioribus constitutum, vt nemo ex Indorum genere, sacerdotio aut gradu aliquo Ecclesiastico doneatur, neque sacras vestes in ministerio induat: tantum vt liceat Indis fidelibus inferuire altaribus acolythorum more, in choro psallere, ædituorum officio fungi, superpelliceis inter hæc tantummodo indui. Nam inferiora hæc ad eos cohortandos, & in religione Christiana confirmandos plurimum valent. Mirificè his delectantur, &

*Con. Lim.
Const. 74.*

primores ipsi libentissimè filios suos Ecclesiasticis ministeriis, & literis imbuendos tradunt, idque pro gloria non parua ducunt. Quòd verò ad superiores gradus sacros præsertim Indos euehere minimè oporteat hac ætate Ecclesiæ

1. *Tim. 3.* antiquissima instituta satis docent. Paulus Apostolus vetat neophytum Ecclesiæ præfici, ne in superbiam elatus, instar diaboli corruat ex

Adrian. 2. in epist. ad Tarass. in 2. Nicenæ syn. alto. Sacra Concilia vehementer detestantur ordinationes eorum, qui in fide tyrones sunt. Nam cum ipsis tum populo damnum fit, tum verò ministerio ipsi non levis iniuria. Quocirca admirabile est, quam seuerè sacræ litteræ reprehendant sacerdotes factos de fæce populi, idque cum agatur non de sacerdotibus veri & summi Dei, sed falsorum potius: quia tamen Deorum nomen etsi non numen habebant, iis attributos esse ministros plebeios, & viles, pro magno scelere ponunt, quemadmodum iurisiurandi religionem etiam diis mendacibus non seruatam cædem diuinæ litteræ

Sap. 14. damnant. Sic enim scriptum in libro Regum

3. *Reg. 13.* legimus: Non est reuersus Hieroboam de via sua pessima, sed è contrario fecit de nouissimis populi sacerdotes excelsorum, quicunque volebat, implebat manum suam, & fiebat sacerdos

4. *Reg. 17.* excelsorum. In quarto quoque libro de Samaritanis loquens Scriptura, Fecerunt autem sibi de nouissimis sacerdotes excelsorum, & ponebant eos in fanis sublimibus, & cum Dominum colerent, Diis quoque seruebant iuxta consuetudinem Gentium, de quibus translati erant Samariam. Quod planè documentum non ad hoc solum

valet,

valet, ut Indi non initientur, cum sint & in fide noui, & genere obscuro, verum etiam qui ex harum foeminae & Hispanis viris concubitu praesertim flagitioso gignuntur, quoad fieri potest à sacris mysteriis contractandis abstineant, ne sacerdotium vile habeatur, nisi cum vitae diu probatae grauitate, & morum splendore natalium obscuritatem superant. Tales esse nonnullos negare non possumus, qui & vitae honestate, nostris pares sunt, & sermonis Indici commoditate superiores. Verum rari hoc exempli est. Quamobrem antiqui Canones & Prouincialia decreta seruanda sunt, ut sacerdos omni ex parte populo spectabilis, & honore dignus existat.

CAPVT XX.

De ritibus Matrimoniorum apud Indos.

IN matrimonio tractando latior campus occurrit, in quo paracho multa necessariò cognoscenda erunt, non solum quòd sit Ecclesiae sacramentum excipiendae, & sanandae multorum infirmitati necessarium, sed quòd infideles quoque sua coniugia habeant, quorum vsum & ritum, abusum quoque & errores cognoscere oporteat, ne quod non rarò contingit, aut vera matrimonia dirimantur, aut pro matrimoniis flagitia teneantur. In omnibus docendi sunt, ut *Heb. 13.*
custodiant immaculatum torum & honorabiles

nuptias. Vsum autem & vim connubiorum apud infideles, si omnia dicenda sunt, oratione complecti, molestissimi negotij est, cum in tanta barbarorum illuue non possint non infiniti esse & ritus, & leges matrimoniorum valde inter se discrepantes. Sed tamen illa ego præcipuè attingam pauca de multis, quæ huic Peruenfi regno ex Ingarum disciplina communiora sunt. Alij de suis regionibus & barbaris, aut etiam de alijs latius pro eruditione sua dicere poterunt. Igitur vera coniugia apud barbaros nostros erant, tamen si quod sæpe miratus sum, nomen non esset adeo, ut Hispanico, & nostri, & ipsi vtantur. Erat tamen sua cuique vxor, & Socraticam rempublicam barbari naturali ductu oderant, & damabant. Sicut vxori fas non erat alteri nubere, ita neque viro vxorem semel ductam repudiare. Adulteria si qua deprehenderentur, acerbissimo supplicio vindicabantur. Nam quanquam cælibum apud istos maior licentia est, fornicationisq; labes impune habetur, tamen coniugatorum adulteria seuerius quam apud nos vindicatur. Stuprum quoq; virginibus vel Soli, vel Pachayachachi, vel Ingæ ipsi consecratis, quas Mamaconas vulgò vocant, Vestalibus professione persimiles, si quando constaret illatum, tam immane sacrilegium habebatur, ut viui vterque defoderentur in terram. Et vulgo sanè vnam vni tantum habere licebat vxorem, cum qua vitam omnem degeret. Atque hæc quidem naturali legi conuenienter barbari hi tenebant. Sed his paucis plurima iam miscebantur absurda, & à naturali lege valdè abhorrentia. In primis summus ipse Princeps Ingarum,

plurimis

plurimis stipabatur vxoribus, quamvis vna esset præcipua, quam ipsi Coyam vocant, reginam nos dicere possumus. At hæc ipsa Coya ijsdem erat parentibus genita, vt instar Iouis Iunonij, regis eadē esset, & soror, & cōiux. Adeo sanctum erat, vt præcipua vxor eadem esset sanguine coniunctissima. Cæteri verò procures, & ipsi plures sibi coniugio copulabant, præcipuamque eandem si non sororē at consanguinitate maximē propinquam habebāt. Erat enim id regium. Vulgus reliquum vnam, vt dixi, nisi priuilegio Ingæ ob aliquid fortiter, aut strenuē gestum, plures liceret accipere, vxorem habebat. At illam non pro suo quisque arbitrato eligebat: sed aut Principis, aut Ducum illius, aut populi ipsius voluntate capiebat sibi assignatam. Idque intra suam semper tribū & familiā, quod Ayllo vulgo dicitur. Ex qua pristina consuetudine infidelium, duo apud fideles absurda manarunt: vnum vt Curacæ siue primores Indorū, pro arbitrato suo suis vxores dent, neque liberā illis eligendi facultatem permittant: alterum vt vix de alia tribu aut gente vxorem audeant Indi accipere, eamque ob causam sæpe cōsanguineas aut etiā sorores, & novercas violent pro vxoribus. Quæ sanè incommoda diligentium parochorum studio magna ex parte abolita sunt: & Concilij animaduersione plerique vigilare cœperunt. Fuit miserrima seruitus Peruensium sub Ingarum tyrannide, vt neque

*Con. Lim.
const. 64.*

vxorem ducere, neque siceram bibere, neque cocam mandere, neque carnibus vesci sine illius voluntate fas esset. Nunc verò qui in libertatem Evangelij vocati sunt, gratias agunt, & durissimo iugo

excusso, leuem Christi sarcinam alacriter portant. Est etiam pessimus quidam error, & ex errore maximus abusus coniugiorum, (monstrum dicere possis) tam robustè in animis barbarorum inhæres, vt inter Christianos etiam rarus sit, quem non teneat. Virginitas, quæ apud omnes mortales in pretio & honore est, apud hos barbaros vilis, & indecora habetur. Exceptis enim iis quas vel Soli, vel Ingæ consecratas septa sacra custodiunt, cæteræ quandiu virgines sunt, contemptas se arbitrantur, atque ita cum primum vacat, obuium quemque corruppendæ virginitati suæ vltro accersunt. Mariti quoque violatas offendunt, adeo non moleste ferunt, vt virginibus, si quæ tales ad coniugia peruenerint, probro vertant, quod à nemine adamatæ sint, quale in

Baruc. 6. Baruch fœminarum opprobrium legimus. Itaque quod vbique gentium maximo ac diuino prope modum honore afficitur, inter has belluas hominum, virginitas dedecori, & ignominix est. Quo ex errore abusus quoque ille fœdissimus exortus est, vt nemo prorsus vxorem sibi ducendam putet, cuius per complures dies aut menses non ante periculum fecerit. Ita, quod dicere quoque pudet, nulla est idonea vxor, quæ non prius fuerit concubina. Hæc tanta matrimoniorum labes adeo obtinuit, vt à nostris patribus pro magno referatur, quod Indi iam vxores virgines ducunt. Et re vera diuini verbi falce vitiosa hæc omnia amputanda quotidie sunt. Et matrimoniorum iura dicenda, & virginitatis decus ornandum atque illustrandum, quod iam tum concionibus tum exemplo Christiani populi admonitæ barbaræ

barbaræ quoque fœminæ colere & seruare cœperunt. Illud postremo dicendum est, priuilegia ac facultates à Sede Apostolica concessas in neophytorum gratiam peculiari studio debere cognosci, ne cum alias sæpe, tum in matrimoniis iungendis Indorum labi contingat. Néve per imperitiam præpositorum imbecilles Indica cogantur seruare, quæ fortes & antiqui Christiani vix seruant. Nam cum multa iis similia quæ diximus, barbari in sua superstitione seruarent, ne religionis nostræ moribus contrariis prorsus deterrentur à fide, Romani Pontifices nonnihil de Ecclesiasticarum legum rigore imminuendum existimarunt, imitati profecto Gregorium illum magnum, cuius erga recens conuersos Anglos paterna indulgentia literis ad Augustinum datis expressa tenetur.

Greg. lib.
12. Re-
gist. epi-
stol. 31.

C A P V T X X I.

*Quid agendum sit de coniugiis infidelium
cum ad fidem Catholicam
conuertuntur.*

SEd habet frequentem apud nos, & dignam scitu quæstionem, cum infidelis coniugatus fide nostra suscepta baptizatur, quid de illius matrimonio sentiendum sit. Ac primum, eum qui Christianus effectus est, non posse vxorem denudò ducere infidelem, neque fidelem infideli nubere, sine vlla dubitatione ex Ecclesiæ usu, & consensu

sensu certissimum est. Nam & scelus ingens committitur, & matrimonium nullum est iuxta nostrorum doctorum concordem sententiam, tamen, quæ illi recitant, Ambrosij & Augustini cæteraque decreta non id satis efficiant. Sed consensus, ut dixi, Ecclesiæ satis est. De eo verò qui ante baptismum uxorem habuit (sunt enim inter infideles vera coniugia, si secundum leges suas naturali legi non repugnantes peragantur, tamen si sacramenti vim nullam habeant nisi in Ecclesia Catholica rata fiant,) quid acturus sit, intelligendum est Pauli Apostoli præceptum. Primum enim per baptismum non soluitur matrimonium cum infideli, quin potius, & potest, & debet cohabitare cum illo, si coniux infidelis ultro consentiat, & spes sit lucrandi illum Christo. Ita enim docet Apostolus, Si quis frater uxorem habet infidelem, & hæc consentit habitare cum illo, non dimittat illam, & si qua mulier habet virum infidelem, & hic consentit habitare cum illa, non dimittat virum, & mox: Vnde enim scis mulier, si virum saluum facies? aut vnde scis vir, si mulierem saluam facies? Hoc modo Monica Patritium Augustini patrem saluum fecit. Quamobrem Synodus Limensis iuxta eiusdem Augustini contra Pollentium sententiam, præcipit fidelem coniugatum cum infideli legitima coniuge cohabitare, neque alias nuptias inire permittit, quovsque illa Christianam religionem penitus repudiare intelligatur. Secundum documentum sit: Si coniux infidelis fidelem deserat, aut ita cohabitare velit, ut illi vel fidem, vel charitatem rebus, aut verbis deserere suadeat, tunc temporis

Ambros.

28. q. 1.

cap. Cai.

Aug. eadem qu.

cap. Sic

enim

Concil.

Chalc.

cap. 14.

1. Cor. 7.

Aug. 9.

lib. Conf.

Con. Lim.

const. 61.

August.

contra

Pollentiū,

& de ser.

Domini

in monte.

temporis non cogitur fidelis cum infideli vitam ducere, quin potius licebit, si ita placuerit, fidelem aliam coniugem sibi copulare diremptio iam priori coniugio. Ita statuit Innocentius tertius, & ad hunc modum intelligendum dicit, & Pauli Apostoli verbum, & Gregorij decretum. Quod si infidelis discedit, discedat, ait Paulus: non enim seruituti subiectus est frater aut soror in eiusmodi: in pace autem vocauit nos Dominus. Tertium quoque sit. Cum dubium est, an coniux infidelis fidei impedimento futurus sit, & an potius illum peruersurus à vera religione sit, quam ab ipso lucrificandus, quidnam agendum est? Nam neque contumelia creatoris manifestè apparet, neque spes etiam satis elucet illum saluum faciendi. Huic dubitationi occurrendum existimarunt Patres hoc modo: vt coniux infidelis admoneatur, quantum satis est, vt religionem Christi suscipiat, quod si conuenienter admonitus, omnino renuerit, intelligatur obstinata esse voluntate, & fidelem consortio suo potius lædere quam ab illo adiuuari. Itaque separandum esse. Ad hunc modum Tolentanum Concilium decernit; Iudæi qui Christianas mulieres in coniugio habent, admoneantur ab Episcopo ciuitatis illius, vt si cum eis permanere cupiant, Christiani efficiantur. Quod si admoniti noluerint, separentur. Huius Concilij auctoritatem secuti Patres in Synodo Limensi, ita præcipiunt, Si alter cōiugum baptizari renuerit, Sacerdos adhibito notario, & testibus illum admoneat, vt intra sex menses Christianus fiat, & baptizetur, atque eandem admonitionem repetat sæpe

*Innocentius.
c. Quam-
to, de Di-
uoritiis.
Gre. 20.
quest. 2. c.
si infide-
lis.*

*Conc. Tol.
4. cap. 61.
28. q. 1.
ca. Iudæi
qui.*

*Con. Lim.
const. 36.*

intra

intra illud temporis spatium saltem semel singulis mensibus. Quod si transacto iam semestri tempore, adhuc baptizari renuerit, exinde iam in sua secta obstinatus reputandus est. Quamobrem Antistitem suum Parochus certiores faciet, ut ipse statuatur, quid facto opus sit. Separationem autem illam Concilij Toletani ego non solum quoad torum intelligo sed etiam quoad vinculum.

Sot. in 4. d. 30. q. art. 2. Itaque licebit, ut graues quoque auctores confir-

Et 4.

Aug. 28. quest. 1. mant, fidei iam tunc alias nuptias conciliare sibi. Contumelia enim creatoris & periculum

cap. vxor. Innoc. fidei intelligitur, cum animus coniugis infide-

cap. gaudemus de lis adeo est in sua superstitione obstinatus. Præ-

diuortii. terea illud ex eodem Innocentio animaduerten-

dum est, nuptias infidelium non teneri Canonis legibus, quare illa solum matrimonia irrita

erunt, quæ cum lege naturali pugnant, quem-

admodum aperte repugnat pluralitas vxorum,

atque etiam repudium primæ, ut Euangelium, &

Prophetæ docet. Quamvis ineptus quidam Theo-

logus, ut multa alia, etiam hoc hæretice & stulte

asseruerit, Indis pluralitatem vxorum esse con-

cedendam in Ecclesia. At verò quæ lege solum Ec-

clesiastica prohibita sunt, ut secundo aut tertio

gradu contracta, ea rata fieri, cum vterque ba-

ptizatur, Canones sacri iubent. Cum verò plures

habuit vxores, si verè ut vxores habuit adhibitis

cæremoniis, & ritu patrio nuptiis adhiberi solito,

illam tantummodo retinebit, quam primam

esse meminerit, aut si ignorat, quænam fuerit

prima, accipiet ex Indulto Pauli tertij, quam

ex omnibus ipse delegerit. Quod si etiam prima

illa abest, & baptizari differt, licebit ex aliis, quam

velit,

velit, sumere, ita concedente Pio quinto Pontifice Maximo, qui nullo modo Innocentio tertio contrarius est. Quandocunque autem vxor infidelis ad fidem conuertitur, si nondum aliam Christianam accepit, tenetur illam fidelis accipere. Hæc pro regionum harum difficultatibus ex sanctorum Patrum decretis perstrinxisse sufficiat: plura & clariora authores tradent.

*Eodem c.
Gaudemus.*

C A P V T XXII.

De impedimentis Matrimonij explicandis, & inuenibus collocandis.

IAm verò in matrimoniis celebrandis summo-
pere Parochi curare debent, vt impedimenta Ecclesiastica sæpe & proponantur, & explicentur, ne quod crebro fit, per ignorantiam illegitimas Indi nuptias iungant. Quod si quando de industria & malitiose impedimentum dissimulatum, aut tectum esse deprehenderint, vt Prouincialia
decreta habent, grauiter in reos animaduertant, præsertim Curacas cæterosque primores, quorum nequitia solent incestuosæ nuptiæ frequenter conciliari: vt reliqui exemplo asperiore docti discant in solemnibus monitionibus aut Ban-
nis explorata impedimenta manifesta facere. Sunt autem monitiones in sacro Concilio Tridentino præceptæ, inter Indos potissimum obseruandæ, vt nuptiæ publicentur eorum qui coniugari volunt, inter eos, quibus maximè noti sunt. Impedimenta
verò

*Con. Lim.
conf. 66.*

*Sess 24.
cap. 4.*

*S. Ange-
lus Syl-
uest. dis-
pens. q. 9.
Navarro
cap. 22.
n. 36.*

verò apud hos sigillatim exponenda sunt, quibus & ignotum est ius, & pro vetusta consuetudine frequens est prohibita coniugia appetere. Itaque explicabit Parochus, quod faciunt peritiores, quibus gradibus consanguinitatis, quibus etiam affinitatis, quibus spiritualis cognationis nefas sit coniugia inire. Maxime verò insistet in declarando impedimento ex fornicatione primo, aut secundo gradu admissa. Vulgare quippe est Indis earum sorores, aut neptes, aut materteras, aut consobrinas ducere, quas flagitiose polluerunt. Atque equidem perquam optarem, ut in iis gradibus, sicut duo reliqui à Tridentino Concilio sublati sunt, esset penes Episcopos Indicanos dispensandi facultas cum neophytis, præsertim cum essent iam matrimonia contracta, & aut vterque coniux impedimentum nesciuit, quod fieri potest, aut saltem vnus eorum. Hos enim iubere prorsus, se continere, aut Romam vsque petendæ dispensationis causa proficisci nimium profectò est. Atque in secundo saltè gradu ex fornicatione occulta posse Episcopos nostros dispensare, quia Sedes Apostolica commodè adiri non potest, & periculum est in mora, authores non ignobiles sentiunt, quorum nos iudiciũ secuti Archiepiscopo Limensi, ut nonnunquam dispensaret persuasimus. Illud quoque experientia docet Indos à prima adolescentiæ ætate collocare percommodum esse, ac multo magis adolescentulas Indas, quod re ipsa compertum sit, maritatus fœminas omnium esse castissimas, quæ si cœperint ante nuptias libidini fræna laxare, per reliquam ætatem præcipites ferantur necesse est. Erit ergo non mediocris officij, ut Parochus honestas

nestas nuptias suadeat atque conciliet, parentes de liberis collocandis admoneat, metum omnem Curacarum adimat: iuvenes ipsos conueniat, & Christiani coniugij sanctitatem doceat, fidei & catechesis Christianæ rationem exposcat, peccata ritè confiteri moneat: statim vt mutuo consensu contraxerint matrimonium, in Ecclesia solemnes benedictiones impendat, vt simul, quemadmodū est à nostris Præsulibus ordinatum, & nuptiæ fiant, & ab Ecclesia benedicantur. Mox vt nuptialia omnia legitimè peracta fuerint, omni illa superstitiosa temulentia & compotatione amputata, in qua diabolo per suos Areitos, aut Taquies Initiantur, honesta tantum religiosi conuiuij lætitia concessa paterne grauiterque monere, quæ sint Christiani matrimonij leges, quæ disciplina domestica, quomodo Ecclesia frequentanda, mane & vesperi quotidie orandum, filij educandi in fide, & timore Domini, vt quamvis pauperem vitam degant, multa bona habeant, si timuerint Deum, & illius mandata seruauerint. Hoc est enim omnis homo reliqua omnia vanitas vanitatum. Hactenus de Sacramentis Indis administrandis, pro instituto nostro pauca de multis: quæ certè pro explorata harum regionum conditione magis opportuna existimauimus.

Const. 68.

*Tob. 4.
Eccli. 12.*

CAPVT XXIII.

*Quibus ex rebus Indorum salus maximè
pendeat, peroratio.*

CVM de procuranda Indorum salute satis multa, vt potui, dixerim, tamen illa omnia non magni ponderis futura scio, nisi tria quædam veluti capita vniuersi huius instituti, pro rei dignitate seuiuntur. Primum, vt Christiani Principes & Præfecti, & Magistratus Christi iugum suaue, & onus leue Indis ad fidem se recipientibus, vt est, esse permittant, id est, vt tributorum, exactiõnum, laborumque onera valde moderentur, sciâtque Barbari se ipsos potius quam sua quæri, & quod habent Caroli Cæsaris regia edicta, rebus ipsis intelligant, Christiano dominatu se potius leuari, quam premi, Leges quoque non prorsus duras, & insuetas barbaris ferant: sed quoad per Christianam, & naturalem legem liceat, sinantur institutis suis viuere, atque in iis ipsis, & dirigantur, & perficiantur. Etenim perdifficile est omnes leges, & consuetudines patrias, & gentilitias mutare: & satis profecto est, vt illa abrogare cogantur, quæ sunt Euangelio & Ecclesiæ Christianæ contraria, quæ in tam corruptis moribus, in tantis ignorantia tenebris satis multa sunt. Cætera si protinus auferre contendas, ac non tempori ipsi optimo magistro vt emendet committas, reddes Christianismum odiosum, & grauem. Omitto
quod

quod prudentissimus quisque & rerum Indicarum peritissimus eiusmodi novas leges, & mutationes censet ipsi reip. temporali, & Indorum, & Hispanorum admodum perniciosas, quod barbari neque nostra tenent, neque sua sinuntur agere: ex quo rerum omnium perturbatio consequatur necesse est. Sed ut hoc omittam, certè fides, & amor Christi cum dura tributorum, & operarum, & legum servitute Christianitatis prætextu non bene constat. Migravit Iudas, id est, fidei confessio, ut sancti patres interpretantur, propter afflictionem, & multitudinem servitutis. Sefaci Ægyptio regi traditi sunt diuinitus Iudæi, ut sciant, ait Deus, distantiam servitutis meæ, & servitutis regni terrarum. Nisi ergo Christianis principibus & magistratibus prima cura sit salutis Indorum, ac non prouentuum censûsque regalis (nam honestè ista quoque quæri possunt sed secundo loco) parum admodum apud Indos religio Christiana proficiet. Hoc igitur primum est: Deinde illud, ut præfules Ecclesiæ Indicanæ ij præficiantur, qui zelum Dei habeant, & filiis potius thesaurizent, ac non solum sua libenter impendant, sed se ipsos etiam superimpendant pro animabus suorum, licet plus diligentes minus diligantur à suis. Denique quorum esset insigne verbis rebûsque expressum, Non vestra sed vos. Quod si Deus, ut apud Prophetam loquitur, daret pastores iuxta cor suum, Episcopos inquam, & Parochos, quales describit Apostolus, plurimos ac lætissimos greges ex hoc agro Indicano pascua cœlestia quotidie exciperent. Ut essent autem pastores eiusmodi, (nusquam enim tantopere oportet esse lectissimos) examinanda.

Tren. 1.

2. Par. 12.

1. Cor. 12.

Hier. 3.

1. Tim. 3.

Tit. 1.

esset doctrina, explorandi mores sine avaritia, perspicendus animarum zelus, & laborum pro Christo tolerantia. Verè enim in his novis Ecclesiæ populis antiqui temporis, & Apostolici pastores esse deberent. Postremo, religiosi qui ad has regiones pro regia liberalitate, & fide, copiosè transmittimur, non fortuito, aut pro libidine, aut etiam avaritia cuiusque sed cœlesti vocatione ducti veniamus, quantum referat, vix dici potest. Nihil perinde nocet huic Ecclesiæ atque mercenariorum, & sua quærentium turba. Quid vero in cau-

Iud. 1.

sa Dei agant homines animales, spiritum vix habentes? Pauci numero, virtute præstantes opus Domini potius promouent. Quandiu ergo religiosi, auxiliares his regionibus dati, non mittentur diuinitus, neque prædicare, neque audiri fructuosè satis poterunt, si Paulo Apostolo credimus.

Rom. 10.

Qui verò in primis humiles, animarum amantes, Christum sibi imitandum existimantes, illius crucem, & mortificationem in corpore suo circumferentes huc venerint, cœlestes thesauros, deliciâsque omni opinione maiores certissimè inuenturi sunt. Sed quando hoc fiet? Quando homines esse

Matth.

19.

homines desinent, & humana sapere, humana quærere, humanis inhiare? Apud homines planè hoc impossibile est, apud Deum autem omnia

Zach. 10.

possibilia. Nunquid quia hoc difficile est in oculis populi huius ideo difficile erit in oculis meis?

Dicit Dominus. Indorum certè copiosissimam, & paratissimam segetem cernimus, neque aliud quam falcem Euangelicam expectantem, & si hactenus fortassè quibusdam minus Dominico horreo idoneam existimatam, sed iam rebus ipsis,

fide.

fide, constantia, ardore animi, alacritate admirabili se se cœlorum Regno aptissimam proclamantem, inuidorum & segnium calumnias facile propulsantem, operarios ipsos lætissime allicientem, & multitudine, & vbertate oculos omnium ad se se atque animos conuertentem. Quid ergo superest? Nisi ut impensissimè cœtemus Dominum messis, ut mittat ipse diuinitus operarios in messem suam. Plus preces lachrymæque nostrorum, vbicunque illi sunt, apud Deum efficere, quam nostros omnes conatus, & operas, certum est. Ferant igitur opem quicumque Dei amantes, & salutis hominum studiosi apud benignum Redemptorem haberi volunt, & quibus possint modis, sacrificiis, precibus, lachrymis, tum consilio, opera, sudoribus, & sanguine ipso si opus sit, charissimam Christo Iesu, tot gentium salutem prosequantur.

Matth. 5.

Barbari. Fructuosa apud Barbaros Euangelij prædicatio, etsi multum difficilis. 1. & seq. Quæ apud ipsos Fidei notitia. 8

Ipsorum ineptitudo, non tam à natura, quam ab educatione. 41. Debent paulatim emendari mores Barbarorum. 44. Vtrum possint debellari propter infidelitatem. 85. Vel propter crimina naturæ contraria. 89. Responsio ad obiectiones pro ipsorum expugnatione. 99. Permulti inuenti sunt Barbari, qui diu addubitarunt nos homines esse. 113. Nihil mutabilius Barbarorum ingenio. 143. Miro modo Barbari Regibus & Ducibus suis addicti sunt. 147. Qui Fidem suscipiunt ad curam & ditionem Christianorum Principum pertinent. 153. Qui inter Barbaros versantur, humanis ad virtutem auxiliis destituuntur. 306. Barbarorum idololatria, quæ. 381

Apud Barbaros virginitas contemnitur, nisi in virginibus Soli consecratis. 490

Bellum. Non possunt bello domari Barbari propter infidelitatem. 85. Hoc Scripturæ, & SS. Patrum auctoritate curiosè admodum discutitur. ib. & seq. Propter crimina naturæ, quibusdam visum est illud licere. 89. Fortiter confutatur. 94

Quando liceat Barbaris infidelibus bellum inferre. 136

Sententia de bello infligendo Barbaris damnata. 99. De illo, qui aggreditur propter defensionem innocentium, qui à Barbaris trucidantur. 105. Omnia ista non solum diuina, sed etiam regia lege firmantur. 108

Benef.

Beneficentia. Explicatur quid sit. 322. Quomodo debeat exerceri, curiosè & fructuosè proponitur. 323-324

Bonzi. Gentilium in Iapponia Sacerdotes. 147

Brachmanes. Indiarum sacrificuli præstigiatores. ibid.

Brasilienses. Et si Barbari sint, Christiana tamen mansuetudine sunt domiti. 81

C

Castitas. Quæ necessaria Castitas ad Euangelizandum. 55. Admirantur castos barbari. 56.

Vita pura Diaboli os obstruere potest. 120.

Exemplum castitatis quod esse debeat. 321. Castitas vilis est fœminis Barbaris. 400. Sacrilegium contra Virginum castitatem punitur. 488

Catechismus. Quis catechismus Indis vulgo necessarius sit. 405. Opus est duplici catechismo. 406

Catechista. Quæ catechistæ tædium faciant. 335. Ex quo oriatur fonte tale catechistæ tædium. 336. Multa proponuntur tantum catechistæ tædium alleuandi gratia. 337. & seq. De fructu sperando ex catechizandis Indis. 341. Quare Ecclesiæ articulus sæpè à catechistis omittatur. 375. De præceptis Decalogi ad quæ spectare debet catechista. 381

Charitas. Quid agit in operario Christi. 17. Charitatis verum testimonium. 22. Quæ ipsi propria. 40. Prudens charitas pro magistra habenda. 85. An charitatis Christianæ sit Barbaros bello domare. ibid. Magna præstat charitas. 143. Pauli charitas à Christo originem sumpsit. 317. Discat à Christo charitatem, prædicator. 320.

Exemplum charitatis, quæ debeat esse. 321. Vera charitas in quo consistit. 347

Christiani. Quo iure possint expeditiones facere, in regna Barbarorum. 130. Quid in terris Barbarorum ipsis liceat. 133. Christianus qualiter Christianus Christum profiteatur. 365. Quæ continentur in symbolo scire omnes Christiani tenentur. 368. & seq. Quid docendum iis qui Christiani cupiunt fieri, mortis articulo. 379

Christus. Ad ipsum omnes Gentes conuocandæ sunt. 4. Fidei auctor est & consummator. 15. Ad ipsum debent auertere operarij vineæ Domini. 16. Charitatis Christi fidelissimum testimonium. 22. Christi cognitio & dilectio vniuersæ Christianæ doctrinæ summa est. 346. Christus nobis omnia. 348. Christi annuntiandi cura præcipua debet esse. 349. Nihil quam Christum loquebantur Apostoli. 349. In Christi cognitione vera salus posita est. 351. Opinio illorum, qui sine Christi notitia posse aliquem saluum esse, ridiculè ab aliquibus defenditur. 352. & seq.

Communio. Potest Ecclesia pro Iudicio Communionem negare. 452. Probatur assertio Conciliorum Decretis, & antiquæ Ecclesiæ consuetudine. 454. & seq. Expedit tamen emendata priori consuetudine, Indos fideles communicare. 458. A Communionem non prohibebantur, qui etiam minus consideratè Baptismo erant abluti. 459. Eos qui non communicant semi-Christianos vocat Augustinus. 460

Comparatio. Indorum cum Samaritanis. 60. Item. 62. 63. Regni Peru, toties intestinis armis concussi,

cussi, cum pulmone ægrotante. 164. Vt arbuta, nisi assiduè foueantur, facillimè vitiantur, sic teneræ Neophytorum mentes, corrumpuntur errore; si negligenter relinquantur. 408

Concilia. Decreta Concilij Limensis. 297. 379. 443. Tridentini de iustificatione. 360. Laodicensis. 370. Bracharensis. ibid. Eliberitani. 396. Parisiensis. 407. Toletani. 443. Florentini. 447. Tridentini. 449. Lateranensis. 451. 452

Confessio. Sæpiùs ita fiunt confessiones, vt neque Indus intelligat Sacerdotem; neque intelligatur ipse. 437. Confessio quid sit. 469. De necessitate istius Sacramenti. ibid. & seq. Confessionis peccatorum vsus Indis in sua superstitione fuit. 472

Magna lingue peritia confessionibus audiendis necessaria est. 475. Confessionem per Interpretem reddi posse putant multi Theologi. 475. Sacerdotum prudentia magna esse debet audiendis confessionibus. 477. Si non bene fiant Confessiones, sæpè Sacerdotis potius quam Indi est culpa. 478. & seq. Error Theologi qui confessiones tollendas esse iudicauit, refellitur. 480

Confirmatio. Hoc Sacramento Neophiti Indi non sunt priuati. 447. Huius materia quid sit, ex Concilio Florentino. ibid.

Constantia. Quod potest dari firmissimum constantiæ testimonium. 22

Conuersio. Veram Indorum conuersionem retardant sæpè pessimi exempli mores. 146. Aliqua alia impedimenta maximè Barbarorum saluti obstantia. ibid. & seq.

Correctio.

Correctio. Modestè debent corrigi, qui resistunt veritati. 59

Christianæ adlectionis est correptionem exercere. 328. Quid observandum sit in correptione Indorum, notatur & curiosè proponitur. 333

Cretenſes. Ipsorum vitia commemorat Apostolus.

Cruz. Quorum in frontibus ponitur signum Crucis. 31

Cura. Maxima semper cura fuit Romanis Pontificibus, operarios mittere in vineam Domini, pro reducendis Ethnicis ad Fidei agnitionem. 154. Moderatoris cura quid efficere possit. 229

Oratio ad Deum, & homines, Apostolica cura definitur. 318. Cura præcipua quæ esse debet.

Curace. Qui apud Indos. 68

Cupiditas. Charitatis venenū est singulare. 83. Eius suffragio Fidem periclitari necesse est. 84. Bonorum cupiditas quam nociua sit rebus Indicis. 168. Perniciosæ cupiditatis mater peccatum. 175

D

D*Ecalogus.* De præceptis Decalogi, quæ Catechistæ Indos docere tenentur. 381. Varia præceptorum Decalogi consideratio. 381. & seq.

Deus. Ipsius voluntas de vocatione Gentium. 4. Non est personarum acceptatio apud Deum. 5. Verè humilibus dat gratiam. 13. Spes ponenda in

- in illo qui dat verbum euangelizantibus. 16.
Iam vocat Indos ad Euangelium. 29. Dei est
vincere. 76. Occasiones benefaciendi Deus
captat. 225. Dei zelus missionum Indicarum
difficultates debet superare. 434
Dilectio. Doctrinæ Christianæ finis Christi cogni-
tio ac dilectio est. 346. Quæ vera dilectio sit.
348. De vera sui dilectione. 397
Quomodo diligitur proximus. 403. Nulla est
vera dilectio apud Indos. 404. In hoc co-
gnoscentur verè Christi discipuli, si dilectio-
nem habeant ad inuicem. 405
Doctrina. Aliqua non sana doctrina agnitionem
Christi ad salutem nullo modo necessariam
esse, docente. 351. Alia circa fidem explicitam,
erronea. 363. & seq. Quid docendi Indi in ex-
tremo mortis articulo vt baptizentur. 379

E

- E***Brietas.* Malum est Barbaris familiare. 230.
Multa quæ ebrietatem causant. 232. Quæ
mala ex ebrietate oriantur. 234. Excludit à
Regno Dei; & innumerabilium malorum fons
perhibetur. ibid. Nocet moribus, corpori, fidei.
ibid. Mala quæ ex ipsa procedunt. 235. Sensum
hominis reddit stupidum, corpora infestat; &
nulla morum corruptela maior. 236. Anima-
lium omnium libidinum fœditatem superat.
237. Ebrietati plerumque sacrilegium coniu-
ctum est. 239. Quibus modis ab ebrietate Indi
compesci queant. 240. Consilium Augustini
pro exterminanda ebrietate. 242. Opus est po-
testate

Index Rerum.

testate civili, ut finis imponatur tanto malo.

243. Exemplo illud confirmatur. *ibid.* & seq.

Ecclesia. Animæ salus fides Ecclesiæ. 371. Quid Ecclesia doceat pro mysterio Trinitatis omnibus tradendo. 373. De mysterio Ecclesiæ tenendo. 375. Sæpius de Ecclesia quam de Christo prophetatum ex Scriptura. 376. Tria debent doceri Indi de Ecclesia. 377. Missionum usus in Ecclesia frequens. 423. Multa contra Ecclesiæ consuetudinem geruntur apud Indos. 436. Potest Ecclesia pro iudicio suo communionem negare. 452. Hoc demonstratur Conciliorum Decretis, antiquitate, & traditione. 454. & seq. Constat etiam Concilij Limensis auctoritate.

457

Episcopus. Non tam se iudicem quam Episcopum, zelo, benignitate, & cura demonstrabat D. Ambrosius. 166. Ad quid tenentur Episcopi. 197. Salutem populorum debent curare. 202

Error. Illorum error, qui sine Christi notitia posse aliquem saluum esse putant. 351. & seq. Cuiusdam error, Christianos rudiores sine Fide Christi explicita saluari non posse asserentis. 362. & seq.

Euangelium. Prædicatio Euangelij Barbaris necessaria. 1. & seq. Quomodo consideretur ab his qui longe positi sunt, ab illis qui rem propius tractant. *ibid.* Nullus ab ipsius communicatione seclusus. 2. Hoc probatur Scripturæ & Patrum testimoniis. 2. 3. 4. & 5. Cur videatur apud Indos multum difficilis, & parum fructuosa Euangelij prædicatio. 6. 7. & seq. Quomodo debeat prædicari per totum mundum. 7.

Ad

Index Rerum.

Ad Euangelium iam Indi vocantur. 29. Quid curare debent Ministri Euangelici, ne Euangelio impedimentum ferant. 51. Quæ necessariae expeditiones ad prædicandum Barbaris Euangelium. 128. Qui Euangelium Indis prædicare volunt, ipsorum idioma diligenter ediscere tenentur. 293. In Ministro Euangelij, vitæ probitas à Deo & hominibus requiritur. 301.

Eucharistia. Adulti Indi cur prohibentur accipere. 438. Diuinum est præceptum Eucharistiam percipiendi. 448. Quæritur utrum paruulos, & adultos obliget præceptum istud. 449. Cibus est animæ Eucharistia. 450. Duo Ecclesia definiuit pro Eucharistiæ sumptione. 452.

Exempla. Fœminæ in suæ infidelitatis errore obstinatae, quæ tandem baptizatur. 33. Viri, cuius corpus triduum integrum iacuit. 34. Diui Xauerij pro ediscendis Barbarorum linguis. 48. Patientiæ D. Malachiae. 43. Melliti à D. Gregorio cum Augustino Monacho in Angliam missi. 75. Laurentij. ibid.

Exemplum. Vitæ exemplum laudatur. 319. Christi exemplo debent agere operarij Euangelici. 320. Quantum valeat tale exemplum ostenditur. 321. 322. Exemplum in omnibus virtutibus, quæ esse debent iuxta Apostolum. 329. vitæ integræ, exemplum pro captu Indorum. 343.

Expeditio. Quæ sint necessariae expeditiones ad prædicandum Barbaris Euangelium. 128. Quo iure Christiani expeditiones facere possint in regna Barbarorum. 130. & seq.

Extrema-Vnctio. Subtrahitur sine causa Extrema-
vnctio

vinctio Indis. 438. Extrema-Vinctio vocatur à
Patribus Sacramentum euntium. 483. Concilia
prouincialia statuerunt, vt nullus Sacerdos In-
dos fideles ritè confessos, vel saltem contritos,
hoc Sacramento priuet. 484

F

- F***ides.* Quomodo ex auditu. 10. Ad fidem Indo-
rum conuersio. 14
Fidei auctor & consummator est Christus Do-
minus. 15
Fidei prædicatio nunquam sine ingenti la-
bore peragi potuit. 19
Fidei officit violentia. 58
Veræ fidei apud Indos spes est magna. 61
Indorum morbo laborantium fidem miraba-
tur Episcopus Popajanensis. 68
Qui Fidem asperitatibus propagare conten-
dunt, suas potius quam Christi causas agunt
iuxta D. Gregorium. 98
De his qui Fidem iam receperunt, curiosa dis-
quisitio secundum regulas Scripturæ & Con-
ciliorum. 126. 127
A Fide omnia sunt inchoanda. 347
De fide ad Baptismi gratiam necessaria. 444

G

- G***Entiles.* Paulatim debent ipforum mores
emendari. 44
Gloria. Qui verè gloriam Dei quærunt. 63. Egre-
gia Lusitanorum gloria, in quo posita. 134
Gratia.

Index Rerum.

- Gratia.* Auxilio gratiæ non destituuntur Indi, etsi Barbari. 23. & seq. Curiosissimè discutitur propositum, Scripturæ & Patrum testimonio. ibid. Sine gratia Christi nemo potest iustificari. 360. De Fide & pœnitentia ad Baptismi gratiam necessaria. 444
- Guaca.* Quid sit Guaca apud Indos. 64. Ipsorum superstitio, 78

H

- H**abitatio, Quid de habitatione inter Indos causatur. 49. Et quæ sit. 50
- Historia.* Mira loquitur inuenti noui orbis. 33
- Humi.* Piru sacrificuli, populos ad alienos ritus transire grauitè ferunt; & quare. 147
- Humilitas.* Caput est virtutum. 13. Quid operario Euangelico verissima humilitate agenti. 17. Ipsum subleuat humilitas. 22

I

- I**dololatria. Barbarorum idololatria. 381. Fornicationem idololatriam vocat Scriptura. ib. Tria idololatriæ genera ex sancto Ioanne Damasceno. 382. 383. Idololatriæ remedia varia. 387. Prius de animis Regum auferatur. ib. & seq. Ex natura & substantia Deorum idololatriæ remedium potest sumi. 391. Ex impotentia simulachrorum. ibid. Ex humanarum etiam rerum prouidentia. ibid. & seq. De auertendis Idolorum signis & templis. 394. & seq.
- Impudicitia.* Despicabilem reddit prædicatorem. 57.

Index Rerum.

57. Quæ libidinis & auaritiæ incentiua occurrant, notatur. 308. 309. Nemo castus nisi fugiat. ibid. Idololatria vocatur impudicitia. 381
Indi. Illorum salus non est desperanda; & quare. 1. & seq. Apud illos & si difficilis Euangelij prædicatio, fructuosa tamen est & necessaria. ibid. Cur videatur apud illos parum utilis illa prædicatio. 6. & seq. Cur tot annorum millibus, Dei notitiâ caruerunt. 6. Quæ apud quosdam Indorum populos fidei sit notitia. 8. Ipsorum cum antiquis Chananæorum populis comparatio. 9. Gens Indorum tota sordida, tota seruilis. 10. Ipsorum ad fidem conuersio quomodo difficilis. 14. Indorum gentes quantumvis Barbaræ, auxilio tamen gratiæ ad salutem non sunt destitutæ. 23. & seq. Indos iam vocat Deus ad Euangelium. 29. & seq. Ipsorum ingenia quomodo tractanda, vt Christo lucrifiant. 35. De habitatione inter Indos. 49. Qualis ex magna parte sit Indorum Religio. 60. Spes magna veræ salutis apud Indos. 62. Multi apud illos urgente metu mortis Sacerdotem petunt. 67. Vtrum possit inferri bellum Indis, discutitur, à pag. 85. vsque ad 109. De ciuili administratione Indorum saluti necessaria. 151. & seq. Non oportet falsos titulos comminisci dominationis Indorum. 159. Difficile idonei inueniuntur rebus Indicis præfecti; & quare. 167. Quomodo debeant Indi exerceri. 182. Cur Hispani commendandi sunt. 189. Circumspectè onerosæ leges fortunis Indorum sunt indicendæ. 205. Quibus modis salus Indorum per sæculares Ministros procurari potest. 227.
Ebrietas

Index Rerum.

Ebrietas Indis familiaris. 230. Quibus modis ab ipsa compesci queant. 240. Indi testimonium non est pro integro accipiendum. 250. Mores Indorum Christo non repugnantes sunt permittendi. 251. Contra eos qui Indorum tarditatem accusant disseritur. 263. Qui peruersitatem morum Indorum ; fidei non receptæ causam afferunt , damnantur. 267. Non sunt tam infideles Indi, vt plerique iactant. 273. Tria debent doceri Indi de Ecclesia. 377. Parum sunt misericordes in ægrotos , in senes & egentes illiberales. 404. Vehementer excitantur Eucharistiæ sumptione. 466. Non Iudæorum more à mysterio Christi sunt auersi. 468. Confessionis peccatorum vsus Indis in sua superstitione fuit. 472. Quibus de rebus Indorum salus maximè pendeat. 498. & seq.

Infantes. Multi quotidie de interitu æterno, apud Indos salutari lauacro eripiuntur. 66. Quæ fuerit gentium consuetudo nomen imponere infantibus, iuxta Aristotelem. 67

Infidelitas. Propter infidelitatem etiam pertinacem , non licet Barbaros debellare. 85. Variè asseritur propositum ex Scripturæ & Patrum auctoritate. 86. & seq. Quid dicant Theologi de infidelitate etiam pertinaci. 89. Varia infidelitatis genera , ex Ioanne Damasceno. 382. & seq. Infidelitatis remedia. 388.

Insula. Hispanica , Cuba , & sancti Ioannis insula olim frequentissima , nunc penè deserta , & horrida. 224. Insulam Mori, ex immanissima feritate ad miram cōsuetudinem traduxit sanctus Xauerus. 229. In quadam Insula, quid didice-

rit Author.

Iudæi. Multa Iudæis legi assuetis Apostolica Ecclesia condonauit. 44.

Iudicium. Diuinum fuit iudicium innumerabiles Indorum populos, tot annorum millibus Dei notitia caruisse. 6.

Ius. Quod ius habeant Christiani in Barbaros, etiam infideles. 85. & seq. Ius habere Romanum Pontificem, Ethnicorum crimina plectere, quidam statuerunt. 90. Quomodo ius penes dominos manet. 177.

Iustificatio. Quid Tridentina Synodus docuerit de iustificatione. 360. Doctrina D. Thomæ & Theologorum. *ibid.*

L

L *Aurentius.* In Anglia Episcopus, flagellis per somnum cæsus: & cur. 75.

Leges. Christianorum Imperatorum leges latæ. 203. Circumspectè onerosæ leges Indorum fortunis sunt indicendæ. 205. Lex quatenus obligat, consuetudine contra obtinente. 221.

Lingua. Ferunt genus mortalium olim Septuaginta duabus linguis confusum fuisse. 11. Quæ lingua generalis introducta in Ingarum Imperio, à Rege Guainacapa. *ibid.* Ipsarum difficultas. *ibid.*

Non detertere debet ab Euangelij propagatione, ista linguæ difficultas. 45. Mirabile D. Xaverij exemplum pro ediscendis Barbarorum linguis. 48.

Indica lingua necessaria. 276. Qui *Indici*

Index Rerum.

Indici sermonis ignari sunt ; parum profunt. 279. Quidam non rectè inscitiae sermonis Indici consulunt. 284. Indicum idioma diligenter ediscere tenentur , qui ad Indos veniunt prædicandi Euangelij gratiâ.

283

Peritia summæ linguæ necessaria , confessionibus audiendis. 474

Ludi. Ipso sacri Parasceues magno die , flagitiosissimi ludi ab ebriis Barbaris , Satanæ artificio , more solemni aguntur. 240. Christianis à Synodo Prouinciali, prohibiti. *ibid.*

M

Magi. Aduersus Magos acrius pugnare debent Christi operarij. 147

Magistratus. Respublica quæque benè ordinata debet habere Magistratum. 162. Publicorum Magistratum culpæ abscondi non possunt. 165. Non vocari debent ad Magistratum egentes. 168

Manfuetudo. Perutilis est operario Christi ad euangelizandum. 55. Præcipuè commendatur viris euangelicis. 59. Ex immani feritate admiram manfuetudinem, Insulam Mori traduxit S. Xauerus. 229. A Christo discenda manfuetudo. 320

Matrimonium. Ingas non nisi sororem legitimo sibi coniugio copulare constat. 339. Ritus matrimoniorum apud Indos , qui. 487

In Matrimonio vnica, contenti Barbari vxore.

488. Verum apud illos matrimonium. *ibid.*

Index Rerum.

Consuetudo diuersa circa matrimonium principum & plebeciorum. 489. Quid agendum de coniugiis infidelium, cum ad Christum conuertuntur. 492. Patrum & Conciliorum Decreta de proposito, 492. & seq. De impedimentis matrimonij. 495. & seq.

Merces. Quæ merces debeat requiri à Sacerdotibus. 54

Mercès vera est fructus animarum. 64

Messis. Copiosissima est apud Indos, modo operarij idonei non desint. 272. Variâ multorum zelo fidei illustrium messis. 274

Metalla. De metallorum operatione. 222. Seruitus per operationem metallorum, rudis satis. 223. Debet celebrari Missa his qui metalla operantur. 226

Miracula. Cur in conuersione gentium, minimè hodie fiant miracula, vt olim à Christi prædicatoribus. 115. Per multa in conuersione Anglorum edita fuerunt per Monachos à Gregorio Magno missos. 117. Vnum & singulare miraculum necessarium est pro conuersione Indorum; mores cum fide congruentes. 119. Exiguo prædicatorum merito signorum parcitas, aliqua ex parte est attribuenda. 121. Qui sine miraculo fidem doceri non posse asserant. 360

Missa. Debet celebrari his qui metalla operantur. 226

Missio. Ius missionum in Ecclesia antiquus & frequens. 423. Quas Missiones semper Apostoli, & Apostolorum Discipuli susceperint. 424. Vtilitas missionum inter Indos. 426. Parochi missiones

Index Rerum.

- missiones vtiliter & libenter suscipiunt. 428.
& seq. Aliqua quæ cauere oportet in missioni-
bus. 430. Missionum difficultates. 434
- Missionarij.* Ipsorum humilitas, prima debet esse
virtus. 13. Iplis proponitur Christi exemplum.
16. & 17. Pauli. 18. Quibus virtutibus indigeant.
22. Quid curare debeant ne impedimentum
Euangelio ponant. 51. Patientia & labore co-
piosos fructus possunt colligere. 70. Quod opti-
mi Christi ministri officium. 73. Quibus indi-
geant miraculis. 120. Illorum exiguo merito
signorum parcitas, magna ex parte attribuen-
da est. 121. Quales erga socios itineris. 137. &
seq. Quales in conuersione infidelium. 141. In-
dicum idioma diligenter discere tenentur, qui
ad Indos veniunt. 283. In Ministro Euangelij
vitæ probitas à Deo & ab hominibus requiri-
tur. 301. Apostoli & Apostolorum Discipuli
Missionarij. 425. & 426. Veri Missionarij vir-
tutes, quæ esse debent. 426
- Modestia.* Cum modestia debent corripì qui re-
sistunt veritati. 39. Parochorum modestia In-
dorum vitiis opponi debet. 310
- Mores.* In Barbaris quomodo debeant emenda-
ri. 44. Sensum in melius mutantur, & quomo-
do. 45
- Mysteria.* Quæ mysteria scire teneantur Christia-
ni. 368. De mysterio Trinitatis omnibus tra-
dendo. 372. & seq. In quo esse aiunt aliqui, my-
sterium Trinitatis. 374. De mysterio Ecclesiæ
tenendo. 375

O *Ratio.* Instantes orationi debent esse Christi operarij. 141. Hoc probatur exemplo Christi & Apostolorum. ibid. & seq. Oratio euangelizantibus necessaria. 314. Quid proficiat si bene sit ordinata. 315. Duabus functionibus, oratione ad Deum, & oratione ad homines Apostolica cura definita est. 318. Quid orationis præsidio impetretur. 319

P

P *Aracia.* Quid statuerint Synodi circa paræcias Indiarum. 197. Paræcia permutari non potest iuxta Decretum Concilij Limensis. 297. Possintne committi Regularibus Indorum Parochiæ. 410. & 411. Multis videtur Iesuitas debere tales parochias suscipere. 415. & seq. Quæ rationes illos deterreant à tali onere. 418. & seq. Quæ moderatio adhibenda in suscipiendis Parochiis. 420

Parochus. Quid agere debeant qui Indici sermonis sunt ignari. 279. Parochorum obligationes pro ediscenda lingua Indorum. 282. & 283. Parochi in India si quis munus obeat Catechismo Concilij Tridentini studeat. 296. Concilij Limensis Decretum pro parochis. 297. Abusus Indicorum parochorum. 310. Non debent cum fœminis habitare. 311. Nec Vsuras quærere. ibid. Ludus è domibus penitus expellatur. 312. Venationes exercere honestum non est. ibid. De residentia Parochorum. 407. Parochi

Index Rerum.

rochi missiones utiliter & libenter accipiunt.

428. Caueant Regulares ne Parochis sint odiosi. 430. Quædam Parochis obseruanda. 434

Patientia. Operariis Christi perutilis virtus est. 22.

Ipsa sola efficitur, vt copiosi fructus apud Indos colligantur. 70. Etiam apud Barbaros patientia mirabilis inuenitur. 78. Primum Apostolatus signum est patientia. 121

Patronus. Doctrinam Fidei & moribus sufficientem patroni Indis susceptis præbere tenentur.

195. Multa patronorum onera. 197. 198. & 199.

Quid erga nondum baptizatos Indos Patronis liceat. 200. Verba Patronis dicta. 202. De tem-

porali Prouidentia Patronorum in suos. 204.

Quantum Patronis assignare par erit, Legislatoris est, statuere. 206. Quid confessionibus Patronorum audiendis, Sacerdoti prouiden-

dum. 208

S. Paulus. Proponitur exemplum operariis in vinea Domini. 18. & 19. Inquisitionem suam de

gratia & electione ad inscrutabilis sapientiæ excelsa suspendit. 24. Epimenidi Poëtæ subscri-

bit de Cretensibus. 42. Quomodo castitatem extollit. 56. Auaritiam damnat. 58. Sui muneris

excellentiâ multum facit. 256. & 257. grauissimè de eligendis fidelium præpositis admonet

Titum. 302. Incredibili studio orationem coluit & prædicauit. 316. In quo gloriatur. 350

Peccatum. Multi Indorum peccant vel ignorantia, vel carnis infirmitate. 69

Piaches. Noui regni incolarum venefici Sacerdotes. 147

Pœnitentia. De necessitate salutis est. 280. Debent

scire idioma Indicum prædicatores, pro tanti Sacramenti administratione. 280. & 281. Veræ pœnitentiæ exemplum in Iapponensi quodam. 360. & 361. Vix medicina pœnitentia valet quibusdam quotidie cœlestia Sacramenta tractantibus. 431. De pœnitentia ad Baptismi gratiam necessaria. 444. Pœnitentiæ Sacramentum quid sit. 469

Pontifex. Romani Pontifices operarios in vineam Dominicam miserunt. 154. & 155. Quem casum sibi reseruant. 207

Prædicatio. Ipsius difficultas non debet terrere Christi seruos. 12. & seq. Quibus modis apud Barbaros Euangelij prædicatio aggredienda sit. 82. Triplex prædicandi modus apud Barbaros. 110. Mores cum fide congruentes, singulare miraculum. 119. Quæ debet esse prædicatio inter eos, qui iam fidem receperunt. 124. Prædicationum vsus in Ecclesia frequens. 432. & seq.

Prædicator. Euangelico prædicatori proponitur Christi exemplum. 16. Pauli. 18. Quid curare debeat ne Euangelio impedimentum ponat. 51. Quibus indigeat miraculis. 126. De officio ipsius erga socios itineris. 137. Quales se præstare debent in conuersione infidelium. 141. Qui ad Indos veniunt Indicum idioma diligenter ediscere tenentur. 283. 284. & seq. Prædicatoris Christiani munus. 347

Præfecti. Difficilè inueniuntur rebus Indicis præfecti. 167. Quidquid peccant Indiarum præfecti sine emendatione peccant. 165. Non est iniquum tributa Indos pendere administratoribus

bus & præfectis suis.

172. & 173

Prætores. Indorum prætores qui debent esse ; & ad quid teneantur. 248. & 249. Concordia prætoris cum Sacerdote quanta esse debet. 252

Probitas. Vitæ probitas in Ministro Euangelij à Deo & hominibus requiritur. 301. Curiosè multa pro hac re afferuntur ex Scriptura & Patribus. 301. & seq.

R

Reges. Miro modo etiam Barbari Regibus suis addicti sunt. 147. Barbari fidem suscipientes ad curam, ditionemque Principum Christianorum pertinent. 153. Regibus & Regum Ducibus obediendum monet Petrus. ib. & seq. Reges suos multi populi, diuinitatis nomine colunt. 386

Religio. Qualis in Religione Christiana sit ex magna parte Indorum natio. 60. De Religione Christiana scire debent noui fideles. 368. Variæ Indorum adhuc Ethnicorum Religionis, superstitiones. 473

Respublica. Qualis in omni Republica Magistratus esse debent. 162. Rempublicam Moyse suadente Ietro socero, sapienter ordinauit. 168. Qui ciuitatem aliquam administrant, statum præsentem Reipublicæ debent amare. 169. Non tam dilatandæ apud Indos Reipublicæ causa, res geritur, quam fidei amplificandæ. 170. Illustre præceptum de Republica gubernanda. 251

Sacerdos. Canonibus definitum est, quot Sacerdotes in Indorum oppidis habere oporteat. 197. Ad se dicta accipere debet Sacerdotes verba Gregorij Magni. 202. Quid Sacerdoti prouidendum confessionibus Patronorum audiendis. 208. Concordia Prætoris cum Sacerdote quæ debet esse. 253. Sacerdotalis officij excellentia. 255. & seq. Inter Indos maximè Sacerdotes præstare possunt. 260. Quæ scientia Sacerdoti est necessaria. 294. & seq. Nihil in Sacerdotibus Plebeium. 301

Sacerdotum sæpissimè videntur conscientia deplorata, eo quod ad cor durum peruenerint. 434

Sacerdotum prudentia magna esse debet audiendis confessionibus. 477. Sæpè Sacerdotis potius quam Indi est culpa, si non benefiant confessiones. 478. Sacerdos omni ex parte debet esse spectabilis. 487

Sacerdotium. Pauca præcipiuntur de Sacerdotio inter Indos; & cur. 485. Concilia detestantur ordinationes illorum ad Sacerdotium qui in fide tyrones sunt. 486. Cauendum ne Sacerdotium vile habeatur. 487

Sacramenta. Pro nefariis & impuris Idolorum cultibus, Deo iuuante apud Indos celebrantur. 70. Doctrina de Sacramentis, contra Nouatorum calumnias. 435. & seq. Multa circa Sacramenta contra Ecclesiæ consuetudinem in India geruntur. 437. Voluntas cognoscenda eorum qui ad Fidei Sacramentum aspirant. 439

Sacri

Index Rerum.

Sacrilegium. Seuerè punitur apud Barbaros ; & præsertim quod est contra virgines suis diis dicatas. 488

Samaritani. Qui dicuntur Samaritani. 61. Ipsi iure merito Indi comparantur, & quare. 62

Satanas. Fremit se pulsum esse; & totis viribus agit vt possit redire ad pristinum statum apud Indos. 70

Satisfactio. Prudentia docet, quas satisfactiones Indis licet iniungere. 481. Qui Christi imitator est, non plus debet imponere oneris, quam ferre pœnitentem posse viderit. 482. Peccatorum efficiuntur participes, qui leuissimas iniungerent satisfactiones. ibid. Salutares iniungendæ sunt ex iis quæ aut consuetudine, aut commoditate fiunt. ibid.

Seruitus. Ad seruitutem non possunt redigi Indorum populi à Christianis. 176. De seruitio personali Indorum. 212. Genus seruitutis inhumanum. 210. Non iniqua seruitus, quæ. 215. Seruitutis multa genera; & quomodo permitti possunt. 218. & seq. Dura seruitus in extrahendis conchiliis. 223

Sol. Perueniens aliqui Solem iu honore primo habent. 385. Tonitru, Punctum & Cuillor illum vocitant. ib. & seq. Ipsi virgines consecratæ. 488

Spes. Veræ Fidei, spes magna est apud Indos. 61. Spes non solum futuri fructus, sed etiam præsentis. 76

Symbolum. Quæ cōtinentur in Symbolo scire omnes Christiani tenentur. 368. Symbolum disci oportet, & reddi Episcopo siue Presbytero, ex Concilio Laodicensi. 370. Totum Symbolum Catechu

Index Rerum.

Catechumeni doceri iubentur Bracharenſis
Decreto. ibid.

Synodus. Quid Synodi ſtatuerint circa Paræcias
Indiarum. 197. Synodo Prouinciali computa-
tiones damnatæ, tanquam idololatriæ fomen-
ta. 240. Decretum Concilij Limenſis pro Paro-
chis. 297. Quid contra abuſus Parochorum à
Conciliis præſertim Gallicis ſancitum ſit. 313.
Quid docuerit Tridentina Synodus de iuſtifi-
catione. 360. Synodi Laodicensis & Bracharen-
ſis Decreta. 370. Prouincialis Limenſis Synodi
Decretum. 379. Eliberitani. 396. Pariſienſis. 407

T

T*Aqui.* Celebres Barbarorum cantilenæ, in-
ter potandum potiffimum adhiberi ſolitæ.

240

Theologus. Quid docuerint Theologi de expu-
gnatione Barbarorum. 99. Oportet vt in nouo
orbe aliqui ſint præſtantes Theologi. 298. &
ſeq. Sententia veri non digna Theologi. 352.
Theologorum ſententia, de myſterio Trinitatis
omnibus tradendo. 373. Eruditi Theologi ſen-
tentia. 398. Quæſtio inter Theologos circa Eu-
chariſtiæ ſumptionem. 448

Tributum. Non eſt iniquum tributa Indos pen-
dere ſuis adminiſtratoribus. 172. Quid docuerit
de hac re Apoſtolus. 173. Tria Tributorum ge-
nera improbata. 174. Exempla illorum qui ex
tributo ſeruierunt. 175. Iosephus vniuerſam ter-
ram Ægypti Pharaoni ſubdidit ſub tributo.
177. Vulgaris ratio tributa imperandi. 179. An
propter